





IT: 22.



P. Lissini ad simplices agum 1832

VERITAS

RELIGIONIS CATHOLICÆ,

Suppositis Scripturis & Fide
in Christum,

EVIDENTER DEMONSTRATA;

PER

A. R. P. THYRSUM GONZALEZ,

Salmanticæ S.T.D. emeritum,

nunc Præpositum Generalem Societatis Jesu.

EDITIO TERTIA

Iuxta Dilinganam anni 1691

cum Facultate Superiorum



INSVLIS AN. MDCXCVI.

APUD FRANCISCUM FIEVET.

Prostant Antverpiæ apud Henr. Thieullier.

VERIL

RELIGIONIS CATHOLICAE

supplicatio
in Conspectu

EVIDENTIAE DIMINUTIVAE

PER

A. P. THOMAS DE VALLIS


Sacerdos S. R. E. Cardinalis

et Praeceptor Pontificis

et aliorum

in hac parte

et aliorum



LIBRARIIS N. S. R. E. CARDINIS
ALD. FRANCHINI

IN AEDIBUS N. S. R. E. CARDINIS

PR O O E M I U M,

S E U

OPERIS INTRODUCTION.



N illo opere, cui titulus *Manuductio ad conversionem Mahumetanorum*, in duas partes divisa, in prima veritas Religionis Christianæ Catholicæ Romanæ manifestis argumentis demonstratur; in secunda falsitas sectæ Mahumetanæ convincitur, (quod primùm excusum est Martiri in Hispania Anno 1687, & secundò Dilingæ in Germania An-

P R O O E M I U M.

no 1689) Libro secundo ostendimus, Religionem Christianam, prout distinguitur ab omni secta, quæ Christum non adorat, ut verum Deum & Hominem, esse non solum evidenter credibilem, sed evidenter veram; non quidem evidentiâ directâ rei in se, quæ reddat evidentiâ mysteria nostræ Religionis, sed evidentiâ reflexâ & in alio, nempe evidentiâ in attestante; quatenus evidenter probatur, Deum esse authorem illius: ostendimusque, hanc evidentiâ in attestante componi cum fide obscura mysteriorum; & sistere in dicto, & non transire ad rem dictam. Et cap. 3 illius libri secundi §. 1 ostendimus,

P R O O E M I U M.

dimus, argumentum, quo Cardinalis Bellarminus probat, Religionem Christianam esse quidem evidenter credibilem, non tamen evidenter veram; dumtaxat evincere, illam non esse evidenter veram evidentiâ rei in se, & per principia intrinseca & directa (nam hoc pacto solum *dicitur evidenter verum, quod in se, vel in suis principiis videtur*: mysteria autem Religionis Christianæ, nec in se, nec in suis principiis, videntur in hac vita) non autem probare, quod non sit evidenter vera, evidentiâ rei in alio, nempe in attestante, & per principia extrinseca atque reflexa.

PROOEMIUM.

Nunc in præfenti libro probandum nobis est, saltem supposita fide in Christum & veritate Scripturarum, evidenter demonstrari, solam Ecclesiam Catholicam Romanam esse veram Christi Ecclesiam; sectas vero omnes hæreticorum esse synagogas sathanæ; quod est facilius, quam illud primum, quod probatum est prima parte Manuductionis ad conversionem Mahumetanorum lib. 2. Unde Cardinalis Bellarminus, quamvis illud primum neget, defendit hoc secundum T. 2, lib. de notis Ecclesiæ, cap. 3: ubi notat, *Ecclesiam Catholicam esse quasi solem quem-*

P R O O E M I U M.

quemdam, qui radios lucis clarissimos ex omni parte diffundit, ut facillimè per eos cognosci possit: habet enim plurimas notas, sive testimonia ac signa, quæ illam discernunt ab omni Religione Paganorum, Iudæorum, & Hæreticorum. Et quamvis ipse arbitretur, has notas non efficere evidenter verum, ipsam esse veram Christi Ecclesiam; sed solum efficere evidenter credibile; tamen addit; apud eos qui admittunt Scripturas divinas, & Historias, ac Patrum veterum scripta, facere etiam evidentiam veritatis. Tametsi enim articulorum fidei veritas non possit nobis esse evidens absolutè; tamen

PRO O E M I U M.

*potest esse evidens ex hypothesi,
id est supposita veritate Scriptu-
rarum: quod enim à Scriptura
evidenter deducitur, est eviden-
ter verum suppositis Scripturis.
Quod verissimè dictum est, &
à nobis fusè in hoc libro pro-
bandum.*



C A P.

CAPUT PRIMUM.

Primum caput probandi veritatem propositam; quia ex Euangelio est manifestum, Christum supra Petrum fundasse Ecclesiam visibilem, usque ad finem mundi permansuram: evidens autem est, hanc non esse illam, quam Reformatam haretici appellant; utpote, quæ cum Calvino & Luthero incepit; sed Catholicam Romanam, quæ continuata serie Pastorum à D. Petro ad Alexandrum VIII, numerat 245 summos Pontifices.

§. I.

Demonstratur Christum supra Petrum fundasse Ecclesiam suam.



Uod id sit manifestum ex Euangelio, constat ex illis Christi Domini verbis Matt. 16, 18: Et ego dico tibi, quia tu es Petrus, & super hanc Petram edificabo Ecclesiam meam, & porta inferi non prevalebunt adversus eam. Interrogaverat Christus Apostolos omnes; Vos autem, quem me esse

esse dicitis: Petrus autem plenus fide, cæteros in confessione præveniens, respondit; *Tu es Christus, filius Dei vivi*. Christus autem, laudans confessionem Petri, ad eumque sermonem dirigens, ipsi determinatè dixit; *Et ego dico tibi*. Non dixit autem, *Vobis*, quasi comprehendere voluisset Apostolos omnes, quatenus unam constituebant Ecclesiam; sed, *Tibi*; *Tu es Petrus*, id est, non solum vocaris, sed *revera es Petrus seu Petra*, rupesq; firmissima, ratione immobilis fidei, supra quam fundabo Ecclesiam meam. Illa autem verba, *Et ego dico tibi*, continent elegantem antithesim, quasi dicat. *Tu, qui homo es*, Filium Dei vivi me esse dixisti: Ego vero, qui *Filius Dei sum*, dico te esse Petrum, seu firmissimam Petram, supra quam ædificabo Ecclesiam meam: id est, dico tibi, *te esse Vicarium meum*; id est, Ecclesiam, quæ super me, tamquam supra lapidem primum, ædificata est, supra te, tamquam secundarium quoddam fundamentum, ædificabo.

II Et sane cum in hoc loco, *Et super hanc petram*, pronomen hanc referri non possit, nisi vel ad personam Petri, vel ad personam Christi, vel ad confessionem de divinitate Christi,

Christi, quam Petrus fecit; Illustrissimus Petrus de Marca, Archiepiscopus Parisiensis opusc. 4. cap. 3, n. 27, vere testatus est, *universam Ecclesiam, tum in occidente, tum in oriente, juxta litteralis sensus proprietatem, semper Petrum intellexisse in illis verbis; Et super hanc Petram: nec ullum è Patribus hanc interpretationem rejecisse; imo vero omnes & singulos illam, ut veram & genuinam, amplexos esse; aliquos tamen Patres huic receptæ ab omnibus explicationi alias superstruxisse, quæ huic primæ & universali non officerent. Unde Hieronymus Epist. 57 agebat: Ego Cathedra Petri communione consocior; super illam Petram adificatam Ecclesiam scio. Quicumq; extra hanc domum Agnum comederit, profanus est. Si quis in arca Noë non fuerit, peribit regnante diluvio. Estque adeo exploratum, promissionem illam factam esse Petro in propria persona; ut P. Suarez lib. 3. adversus Regem Angliæ cap. 10, n. 4, disertè pronuntiaverit; evidens esse ex tenore verborum, promissionem illam factam esse Petro in propria persona; & Christum per illa verba, Super hanc Petram, sine dubio eundem Petrum designasse. Idque docuit totum concilium*

cilium Chalcedonense, in quo sederunt 630 Patres, dum actione tertia Petrum appellat *Petram & crepidinem Ecclesia Catholica*. Et hunc esse communem sensum totius Ecclesiae, & Græcorum atque Latinorum Patrum, affirmant etiam P. Suarez, ubi nuper; Cardinalis Bellarminus, lib. 1 de Romano Pontifice cap. 10; P. Valentia, in Analyfi fidei lib. 3, cap. 2, & Maldonatus ad eum locum.

III. Verum quidem est, D. Augustinum duplici modo exposuisse illum locum. Primo, ut per illa verba, *Et super hanc Petram*, intelligatur persona Christi; ut constat ex primo retractationum cap. 21. Dixi (inquit) in quodam loco de Apostolo Petro, quod in illo, tamquam in Petra, adificata est Ecclesia; sed scio me postea sapissime exposuisse, quod à Domino dictum est, Tu es Petrus, & super hanc petram &c. ut super hanc intelligeretur, quem confessus est Petrus, & utramque expositionem dicere probabile; Harum autem (inquit) duarum sententiarum quæ sit probabilior, eligat Lector. Sed ideo utramque expositionem, ut genuinam & litteralem, approbavit Augustinus; & arbitrio legentium reliquit judicare, quænam ex illis sit probabilior; quia

igno

evidenter demonstrata, C. I §. I. 5

ignoravit linguam Hebræam & Syriacam, in qua Matthæus scripsit ; & ob hanc ignorantem existimavit, in illis verbis , *Tu es Petrus, & super hanc Petram*, Christum distinxisse inter Petrum & Petram, & nomine Petræ se ipsum intellexisse ; cum tamen scientibus linguam Hebræam & Syriacam sit manifestum, intellexisse Petrum. Nam cum dixit, *Et super hanc Petram*, per pronomen illud *Hanc*, designavit aliquam Petram, de qua paulo ante locutus fuerat : tunc autem Christus non seipsum, sed Simonem appellaverat Petram : Syriacè namque loquebatur : in lingua autem Syriaca, *Petrus & Petra*, ejusdem generis sunt, eandemq; terminationem habent ; ut docet Hieronymus in caput secundum Epistolæ ad Galatas. Et res certissima est, inquit Bellarminus. Nam ubicumque in textu Hebræo est *Sella*, id est *Petra*, in Syriaco est *Cepha* ; quin etiam *Cepha*, Hebraicè rupem significat. Quare ubi in versione Græca atque Latina legimus, *Tu es Petrus, & super hanc Petram*, in Syriaca atque Hebraica, in qua Matthæus scripsit, legimus *Tu es Cephas, & super hoc Cephas aedificabo* ; quasi diceret Latinè ; *Tu es Petra, & super hanc Petram*, Unde.

de, teste Bellarmino, Augustinus ex sola ignorantia linguę Hebręę est deceptus; dum existimavit, verba illa, *Et super hanc Petram*, designare Christum; eo quod immediatè antè Christus non dixerat; *Tu es Petra*; sed, *Tu es Petrus*: quo argumento minimè moveretur, si sciret, in lingua illa, in qua locutus est Christus, eodem nomine utrumque significari.

IV Hinc apparet, quam leve sit fundamentum, quo Calvinus motus est ad asserendum, ex hoc loco non posse probari Primitivum Petri: observat enim, non sine causa Euangelistam orationem variasse, & cum dixisset, *Tu es Petrus*, secundo loco non dixisse, *Super hunc Petrum*; sed, *Super hanc Petram*, ut aliam Petram significaret; nempe seipsum. Hanc Calvini observationem, *puerilem & ridiculam* appellat Maldonatus: quia cum certum sit, Matthæum Euangelium suum scripsisse in lingua Hebraica aut Chaldaica, in quibus non est ista generis differentia, quæ Græcè & Latinè reperitur; sed uno eodemque nomine *Petrus & Petra* significantur; Christus in illa lingua dixit, *Tu es Petra, & super hanc Petram*. Certum ergo est, pronomen

nomen illud *Hanc*, significare ibi Petrum; nam in eo loco nec Petrus appellaverat Christum *Petram*, sed *filium Dei vivi*; nec Christus seipsum nuncupaverat *Petram*. Ergo dici non potest, quod postquam Christus cum Simone loquens, dixit, *Tu es Petrus*, statim per pronomen *Hanc* designaverit personam propriam, de qua nullus præcesserat sermo; sed necessario dicendum est, designasse personam Petri, de qua immediatè antea locutus fuerat.

V Quod si quæras, cur interpretes Græcus Matthæi, illam generis distinctionem adhibuerit? respondit Maldonatus, in promptu rationem esse. Nam quamvis Græcè Πέτρος genere masculino, & Πέτρα feminino dicatur: tamen Petrus, quia vir erat, non Petra feminino, sed Petrus masculino nomine vocandus erat: secundo autem loco, ubi de ædificii fundamento agebatur, non *Petrum*, sed *Petram*, quia in ejusmodi ædificiis, nomen *Petra*, femininum magis usitatum est.

VI Illa autem verba, *Super hanc Petram ædificabo Ecclesiam meam*, promissionē continent dumtaxat Ecclesiæ postea fundandæ supra Petrum, non foundationem actualē: sicut

sicut per illa verba, *Tibi dabo claves regni cælorum*, non claves tunc dedit, sed promisit. Hanc autem promissionem adimplevit Christus post resurrectionem suam, cum Joan. 21 dixit, *Pasce oves meas*; per quæ verba illum, summum totius ovilis & gregis sui pastorem constituit, & totius Ecclesiæ suæ caput visibile fecit. Et ideo Cyprianus, in libro de unitate Ecclesiæ paulo post initium, agebat. *Loquitur Dominus ad Petrum, Ego dico tibi, Tu es Petrus &c. & iterum eidem post resurrectionem dicit, Pasce oves meas. Super illum unum ædificavit Ecclesiam suam, & illi pascendas mandat oves suas.*

VII Quare dum Christus, Matt. 16. dixit: *Tu es Petrus, & super hanc Petram ædificabo Ecclesiam meam*; perinde fuit ac si diceret; *Tu es saxum, & super hoc saxum ædificabo Ecclesiam meam*; id est, te, qui jam es saxum, efficiam fundamentum Ecclesiæ meæ, ut ad litteram exponit Cajetanus; ac proinde per illa verba; *Tu es Petrus & super hanc Petram &c.* Christus solum declaravit, Petrum, ob fidei firmitatem, jam tunc esse Petram, dignam quæ assumeretur in fundamentum ædificiî. Ut enim, inquit

Am-

Ambrosius ad Caput 22. Lucæ; *Quem Petram dixit, fundamentum Ecclesiæ indicavit*; nam ob illustrem confessionem Divinitatis Christi, & firmitatem fidei quam ostendebat, dum dixit, *Tu es Christus, filius Dei vivi*; meruit, ut postea supra ipsum ædificaretur Ecclesiæ, quando electus est in caput Ecclesiæ & Vicarium Christi, per illa verba, *Pasce oves meas*. Unde Hilarius, hunc locum exponens, *En, inquit, dignum plane confessio Petri premium consecuta est, quia scilicet filium Dei in homine vidisset.*

VIII Ex dictis constat, manifestum esse ex Euangelio, Christum supra personam Petri fundasse Ecclesiæ suam, tamquam supra fundamentum secundarium; quia Petrum constituit Vicarium suum in terris, plenissimam ei potestatem super omnes fideles communicans. Ut enim testatur D. Thomas, opusculo I contra errores Græcorum lib. 2, cap 33, secundum novissimam editionem anni 1600; Chrysostomus in Matth. ait, *Filius, quæ Patris sunt, & ipsius Filii potestatem Petro ubique terrarum concessit, & homini mortali omnium quæ in calò sunt dedit authoritatem, ut Ecclesiæ ubique terrarum*

IO *Veritas Religionis Catholicae*
rum amplificet. Et in Acta Apostolorum;
Petrus à Filio, super omnes qui Filii sunt, pote-
statem accepit; non ut Moyses, in gente una;
sed in universo orbe. Et homil. 30. ad popu-
lum: Ei (Petro) per totum orbem terrarum
Ecclesie præsidentia tradita est.

IX Manifestum, inquam, est, fundas-
se Ecclesiam supra Petrum; quia manife-
stum est, post confessionem Divinitatis, à
Petro factam per illa verba, *Tu es Christus,*
filius Dei vivi; Christum ad Petrum con-
versum dixisse; *Et ego dico tibi, quia tu es*
Petrus, & super hanc Petram edificabo Eccle-
siam meam. Rursus, juxta communem sen-
tentiam Patrum & Interpretum, & juxta
textum Hebræum vel Syriacum, in qua lin-
gua Matthæus scripsit, manifestum quoque
est, Christum Dominum per illa verba, *Et*
super hanc Petram, non seipsum designasse;
sed Petrum, de quo immediate præcesserat
fermo, & de quo immediate post subjunxit:
Et tibi dabo claves regni cælorum. Incredibile
namque est, Christum, loquentem cum
Petro, dum dixit, *Tu es Petrus;* & dum
dixit, *Tibi dabo claves regni cælorum,* non
loqui cum Petro in clausula intermedia, *Et*
super

evidenter demonstrata, C. I §. I. 11

super hanc Petram. Unde merito P. Suarez dixit, evidens esse ex tenore verborum, promissionem illam factam esse Petro in sua propria persona. Manifestum quoque est, per illa verba, *Et super hanc Petram*, vel non designari fidem Petri seu fidei confessionem, vel designari includendo principaliter personam Petri, credentem & confitentem. Quamvis enim Christus, ob illam illustrem confessionem, *Tu es Christus filius Dei vivi*, ortam ex fide firmissima, dixerit Petro, *Tu es Petrus, & super hanc petram &c.* tamen promissio non est facta confessioni fidei, sed personæ confitenti. Quia enim Petrus, ob fidei soliditatem & constantiam, erat veluti firmissima petra; promisit ei Christus, se supra illum esse fundaturum Ecclesiam suam. Unde, sicut pronomina illa, *Tu & Tibi*, Petrum designant, cum Christus dixit, *Tu es Petrus*; & cum dixit, *Tibi dabo claves*; ita pronomine illud *Hanc*, personam Petri designat, cum dixit, *Et super hanc Petram &c.*

X Hinc infero cum Maldonato, quo sensu exponendi sint Patres, qui verba illa, *Super hanc Petram*, interpretantur, *Super hanc fidem*. Dicere enim voluerunt, per fidem
& con-

& confessionem Petri, Ecclesiam esse ædificatam; id est, super Petrum, propter fidem & confessionem. Sic dicere solemus, in unius hominis fide fundatam esse Rempubli-
cam; id est, in uno homine, propter fidem. Sic Ambrosius de resurrectionis fide dixit, *Super aquas fidem Petri ambulasse*; id est, Petrum, propter fidem; quia nimirum fides ejus effecit, ut super aquas ambularet.

XI Nec urget fundamentum, quo Calvinus contendit, per *Petram*, Christum ibi designari; quia nimirum Petra erat Christus, & solus ipse est fundamentum Ecclesiæ, juxta illud Pauli 1 Corinth. 3; *Fundamentum aliud nemo potest ponere, præter illud, quod positum est, quod est Christus Iesus*. Non, inquam, urget. Quia licet solus Christus sit primarium fundamentum, lapisque primus, maximus, atque angularis hujus ædificii; Apostoli tamen & Prophetæ etiam sunt lapides & fundamentum; licet secundarium; ut constat ex ipso Apostolo ad Hebræos 2, *Superædificati super fundamentum Apostolorum & Prophetarum, ipso summo angulari lapide Christo Iesu*. Apostolus ergo, in prima ad Corinthios, loquitur tantum de primario

mario fundamento; alioqui pugnaret secum, & repugnaret Joanni, qui de Ecclesia loquens Apoc. 21 inquit; *Et murus civitatis habens fundamenta duodecim, & in ipsis duodecim nomina duodecim Apostolorum.* Christus ergo est prima Petra, primumque fundamentum Ecclesiæ; post Christum vero Petrus & ejus Successores Petra sunt firmissima, cui innititur tota ædificii moles. Dicamus ergo de Petro, cum Augustino serm. 16 de Sanctis; *Dicitur Petro, eo quod nationibus fidei fundamenta posuerit; &, tamquam saxum immobile, totius corporis Christiani compagem & molem contineat.*

§ II.

Demonstratur, Ecclesiam, supra Petrum fundatam, esse visibilem.

XII **O**Mnes Doctores Catholici unanimiter, tamquam dogma de fide certum, tradunt; Ecclesiam, à Christo supra Petrum fundatam, esse visibilem; utpote, in qua Episcopi & Pastores visibiliter debent gubernare suos subditos, visibiliter docere, hortari, Sacramenta administrare,
pec-

peccantes corripere, contumaces ab aliorum communione separare; apud quam possint accusari, qui correctionem fraternam secretam noluerunt admittere; juxta illud Matth. 8. 17, *Dic Ecclesiæ: si Ecclesiam non audierit, sit tibi sicut Ethnicus & Publicanus*: in qua Concilia publice indici & celebrari possint, ut in eis communi consilio sanciantur Canones, & dirimantur controversiæ de fide & religione, ut ab Apostolis Actor. 15, 28 indictum & celebratum est Concilium Hierosolymitanum, in quo facta est hæc Constitutio: *Visum est Spiritui sancto, & nobis, nihil ultra imponere vobis. quam hæc necessaria; ut abstineatis vos ab immolatis simulacrorum, & sanguine, & suffocato.* Et, post Apostolorum tempora, celebrata sunt quatuor Concilia generalia, quæ ab hæreticis ipsis hujus sæculi tanquam legitima admittuntur; nimirum, Nicænum, Constantinopolitanum, Ephesinum, & Chalcedonense.

XIII Et veritas ista constat ex Symbolo fidei, in quo dicimus; *Credo in unam sanctam Ecclesiam Catholicam.* Hunc enim articulum intelligendum esse de Ecclesia visibili,

bili, docent, non solum omnes Catholici, sed etiam multi ex hæreticis; ut Calvinus lib. 4 Institut. Cap. 1, §. 2: ubi ex professo disputat de Ecclesia visibili; & Philippus Melancton, in examine ordinandorum, titulo *de Ecclesia*.

XIV Idque ratio ipsa comprobat. Cum enim Ecclesia Catholica sit veluti arca Noë, extra quam nemo salvari potest, ut constat ex Symbolo Athanasii; & sit velut arx munitissima, in quam se recipere debent, qui in captivitatem æternam à diabolo abigi nolunt; debet esse visibilis, & ita conspicua, ut quicumque serio desiderat æternam suam salutem, & facit quantum potest ut illam consequatur, dignoscere possit Ecclesiam Catholicam, in qua sola salus obtineri potest. Quomodo autem id posset dignoscere, si illa non esset visibilis, & talibus notis, insignibus, & prærogativis ornata; ut omni homini, illa rite contemplanti, statim appareret, Ecclesiam, talibus signis ornatam, non posse non esse illam, quam Christus supra Petrum fundavit, vel fundare promisit per illa verba; *Tu es Petrus, & super hanc Petram ædificabo Ecclesiam meam.*

XV Et ideo David Psalm. 18, 6, Christi designans, dixit: In sole posuit tabernaculum, id est (ut ibidem explicat Augustinus) in manifestatione posuit Ecclesiam suam, non in occulto. Et ut ait Epist. 1, 6 ad Donatistas; Ipsa est Ecclesia in sole posita, id est in manifestatione omnibus nota, usque ad terminos terra. Et huc spectant verba Christi Matth. 5, 15; Non potest civitas abscondi supra montem posita; neque accendunt lucernam, & ponunt eam sub modio, sed super candelabrum; ut luceat omnibus, qui in domo sunt. Hæc enim intelligenda esse de Ecclesia, docet Augustinus in libro de unitate Ecclesiæ cap. 15 his verbis: Non est operata Ecclesia, quia non est sub modio, sed supra candelabrum; & de illa dictum est; Non potest civitas abscondi supra montem posita. Sed Donatistis velut operata est, qui audiunt tam lucida & manifesta testimonia, quæ illam toti Orbi demonstrant; & malunt clausis oculis offendere in montem, quam in eum ascendere. Et epist. 170 ad Sever. Facile tibi est, attendere, & videre civitatem supra montem constitutam. Idque constat ex parabolis, quæ omnium consensu significant Ecclesiam. Ut enim

evidenter demonstrata, C. I §. 2. 17

enim sapienter notat Bellarminus lib. 3 de Ecclesia cap. 13, *Arca*, in qua sunt grana & paleæ; & *rete*, in quo sunt boni & mali pisces; & *ager*, in quo sunt frumenta & zizania; & *convivium*, in quo sunt boni & mali discumbentes; & *ovile*, in quo sunt oves & hoedi, significant Ecclesiam visibilem, ut etiam hæretici fatentur: nam Ecclesia invisibilis non habet bonos & malos, sed tantum bonos, secundum eorum sententiam.

§. III.

Demonstratur, Ecclesiam visibilem, à Christo fundatam supra Petrum, numquam periisse; sed semper in mundo extitisse, & permansuram usque ad finem mundi.

XVI **I**D manifestè demonstratur ex promissione Christi, facta Petro; *Super hanc Petram edificabo Ecclesiam meam, & porta inferi non prævalebunt adversus eam.* Cum enim Christus sit summè sapiens, summè potens, & summè verax; omnis ejus absoluta promissio adimpleri debet. Cum ergo promiserit, portas inferi non prævalituras adversus Ecclesiam, in Petro tamquam in

firmissima rupe fundatam; necessario dicendum est, adimplevisse quod promisit. Ergo portæ inferi hucusque non prævaluerunt, nec deinceps prævalebunt adversus Ecclesiam, ab ipso in Petro fundatam. Prævaluissent autem, si Ecclesia ab ipso fundata periisset; vel essent prævalituræ, si esset peritura. Quisnam enim potest esse apertior & manifestior modus prævalendi adversus Ecclesiam, quam illam omnino evertendo & destruendo? Si ergo diabolus Ecclesiam destruxit, evertendo in ea veram fidem; sequitur manifestè, diabolum non solum oppugnasse, sed expugnasse Ecclesiam; non solum concussisse, sed diruisse. Unde sequitur, vel Christum in promittendo fuisse mendacem seu fallacem, vel in adimplendo impotentem ob defectum virium. Cum ergo hoc sit impossibile; sequitur, Ecclesiam, à Christo fundatam supra Petram, fixam & immobilem hucusque perseverasse in fide, & usque ad finem mundi perseveraturam; quin ullæ diaboli insidiæ & tyrannorum persecutiones valeant unquam illam evertere.

XVII Et ideo S. Leo Magnus, serm. 3 in assumptione sua, expendens illam illustrem
con-

evidenter demonstrata. C. I §. 3. 19
confessionem Divinitatis Christi, à Petro
factam per illa verba, *Tu es Christus, Filius*
Dei vivi; & verba, quæ Christus in præ-
mium illius confessionis ad Petrum locutus
est, dicens; *Et ego dico tibi, quia tu es Pe-*
trus, & super hanc Petram ædificabo Ecclesiam
meam, & portæ inferi non prævalebunt ad-
versus eam, inquit: *Soliditas illius fidei, quæ*
in Apostolo est laudata, perpetua est; & sicut
permanet, quod in Christo Petrus credidit; ita
permanet, quod in Petro Christus instituit: Pe-
trum enim in consortium Divinitatis assum-
ptum, id quod ipse erat Dominus, voluit no-
minari, dicendo; Tu es Petrus, & super hanc
Petram ædificabo Ecclesiam meam; ut eterni
templi ædificatio, mirabili munere gratiæ Dei,
in Petri soliditate consisteret.

Non prævalebunt unquam portæ inferi
adversus Ecclesiam, in soliditate Petræ fun-
datam. Quamvis fluctus persecutionum in-
tumescent, & hæreticorum machinæ Ec-
clesiæ firmitatem impetant; illidentur ad fir-
mitatem Petræ hujus, & evanescent. Mira-
bilis valde est in hac re providentia Dei, quod
fuerint hætenus usque ad Lutheri tempora,
ut minimum dacenti hæresiarchæ (inquit

Bellarmin. lib. de notis Ecclesiæ cap. 6) quorum multi habuerunt multos Episcopos, multas Ecclesias, multos potentissimos patronos, & Imperatores, & Reges, & scripserunt libros innumerabiles, ut viderentur nunquam posse deficere; & tamen ita defecerunt, ut jam non supersint, nec ipsi, nec libri eorum, nec dogmata, nec nomina, aut vestigia ulla nisi in libris Catholicorum.

XVIII Confirmatur, quia cum Christus sit summa sapientia, manifestum est, quod in ædificanda domo sua seu Ecclesia sua, se gesserit ut sapientem architectum, non ut stultum. Ut autem ipse Christus dixit Matt. 7, v. 24, sapiens architectus est, qui ædificat domum suam supra petram; stultus, qui supra arenam: & causam reddit, quia quando oritur aliqua vehemens tempestas; mox corruiť illa, quæ supra arenam; non illa, quæ supra petram. Ergo Christus, ut sapiens architectus, Ecclesiam suam non ædificavit supra arenam, ita ut vi ventorum, tentationum diaboli, & imbrum persecutionum hominum posset dissipari; sed supra firmissimam Petram, ita ut nulla ventorum vi, nullo imbrum impulsu possit un-

unquam subverti; & ad hoc ipsum allusit quando dixit: *Et ego dico tibi, quia tu es Petrus, & super hanc Petram ædificabo Ecclesiam meam, & porta inferi non prævalebunt adversus eam.* Nam ut sapiens architectus, tam firmum huic ædificio supposuit fundamentum, ut nulla dæmonum tentatione, nulla hominum persecutione, nulla vi, nulla fraude possit unquam corruere. Quare hæretici, asserentes, Ecclesiam à Christo fundatam; post aliquot sæcula, periisse; magnam ei faciunt injuriam: quia hoc ipso ostendunt, eum non se gessisse, ut sapientem architectum; & insuper coguntur admittere, Christum mendacem promissorem esse; quia scilicet promisit, quod non adimplevit.

XIX Manifestum ergo est ex Evangelio, Ecclesiam, à Christo fundatam supra Petrum, nunquam periisse; sed contra tot persecutionum imbres, contra tot dæmonum tentationes, & hæreticorum machinas, immobilem perseverasse in fide, supra quam fundata est. Unde S. Augustinus lib. I. de Symbolo ad Catechumenos cap. 6, expendens hanc Christi promissionem; *Et por-*

ta inferi non praevalerunt adversus eam, inquit: Ipsa est Ecclesia sancta, Ecclesia una, Ecclesia vera, Ecclesia Catholica; contra omnes haereses pugnat; oppugnari potest, expugnari tamen non potest. Haereses omnes de illa exierunt, tanquam sarmenta inutilia de vite praecisa; ipsa autem manet in radice sua, in charitate sua. Porta inferi non vincunt eam: quia nimirum assistentia Spiritus sancti, ipsi à Christo promissa, illam conservat contra omnes inferi machinas; & de Ecclesia verificatur illud, quod praedixit Iaias cap. 41. v. 31, Ecce confundentur & erubescunt omnes, qui pugnant adversum te; erunt quasi non sint, & peribunt viri qui contradicunt tibi. Quares eos, & non invenies viros rebelles tibi: erunt quasi non sint, & veluti consumptio homines bellantes adversum te. Unde Bernardus serm. 79. in Cant. Nec fides (inquit) de terra, nec charitas deficit de Ecclesia: venerunt flumina, flaverunt venti, & impegerunt in eam; & non cecidit, quia fundata erat supra petram: Petra autem erat Christus. Itaque nec verborum Philosophorum, nec cavillationibus haereticorum, nec gladiis persecutorum potuit ista, aut poterit aliquando separari à Charitate Dei.

XX Chri-

XX Christi omnipotentis promissio Ecclesiam immobilem conservavit & auxit, inter tot Imperatorum Romanorum sævissimas persecutiones, spatio trecentorum annorum continuatas. Hæc promissio effecit, ut tot hæreses, quæ diversis temporibus ex diaboli suggestione & hominum pertinacia prodierunt, & videbantur Ecclesiam Christi subversuræ, instar torrentis transierint; & Ecclesia permanserit secura & immota, utpote supra petram firmissimam fundata. De his prophetice locutus est David, cum dixit; *Dejecti sunt, dum allevarentur; perierunt propter iniquitatem suam; velut somnium surgentium, Domine, in civitate tua* (id est, in Ecclesia) *imaginem ipsorum ad nihilum rediges.* Id quod recte explicat Augustinus, similitudine torrentis, ad illa Psalmistæ verba (*Spernentur tanquam aqua decurrens*) Non vos, inquit, terreant, Fratres, quidam fluvii, qui dicuntur torrentes, & hyemalibus aquis implentur; nolite timere. Post paululum transit, decurrit aqua; ad tempus perstrepat, mox cessabit; diu stare non possunt. Multæ hæreses jam emortuæ sunt; currerunt in rivis suis quantum potuerunt; de-

currerunt, siccati sunt, vix eorum memoria reperitur; vel quia fuerint, spernentur tanquam aqua deturrens. Quin, & hoc agnovit fateturque Lutherus; Hoc inquit, vidimus & videmus omnibus hæreticis contigisse, ut primo quidem hominibus placuerint; sed postea dissipata sunt ossa eorum secus infernum: confusi sunt, quoniam Deus sprevit eos. Et alibi; Quamvis, ait, plantentur hæreses, & nonnihil floreant; tamen non ferunt fructum. Placent quippe propter novitatem, cujus ut plurimum homines sunt amatores; vel etiam propter voluptates sensus, quibus solent indulgere; postea vero, tanquam planta sine succo, in se ipsis arescunt; atque adeo in contemptum, etiam apud suos vertuntur. Hæc hæresiarcha de hæreticis.

XXI Hanc assistentiam infallibilem suam, qua Ecclesia in æternum conservetur, contra omnes tyrannorum, & hæreticorum persecutiones, promisit etiam Christus Matt. 28, dum dixit: *Euntes in mundum universum, docete omnes gentes &c.* Et ecce ego vobiscum sum omnibus diebus, usque ad consummationem sæculi. Quasi diceret: Ego mitto vos in universum mundum, ut prædi-

dicetis Evangelium apud Ethnicos & apud
Hebræos ; & fidem meam persuadeatis, Ec-
clesias fundetis , & Sacramenta administre-
tis. Occurrent quidem ingentia pericula,
magnæque difficultates : quia diabolus, qui
ubique habet suos cultores & idololatrias,
crudelissime vos persequetur : sed estote
forti animo : *Ecce Ego vobiscum sum* &c. non
solum per essentiam, præsentiam, & po-
tentiam, sicut quatenus Deus præsens sum
in omnibus rebus; nec solum per gratiam,
sicut sum cum omnibus justis, eis tribuens
vitam spiritualem; sed per specialem provi-
dentiam, qua fiet, ut Ecclesia nunquam
deficiat. *Vobiscum, usque ad consummationem
sæculi*; quia semper ero cum Ecclesia, quam
vos repræsentatis; ac proinde non solum
vobiscum, sed cum successoribus vestris,
usque ad consummationem sæculi. *Ecce
Ego, Deus vester, Salvator, Debellator in-
ferni & peccati, & mortis* : Ego, qui nuper
dixi, *Non relinquam vos orphanos* Joan. 14.
18 : Ego, qui dixi, *Confidite, Ego vici mun-
dum*. Joan. 16. 33. Ego, contra quem Prin-
ceps hujus mundi non habet quicquam. Joan.
14. 30. Ego, cui Pater promisit, *Ponam*

inimicos tuos scabellum pedum tuorum, Ps. 109.

XXII Hoc testimonio usus est Augustinus, conc. 2. in Psal. 101 contra Donatistas, qui dicebant, Ecclesiam Catholicam, quæ antea toto orbe fuerat diffusa, postea toto orbe periisse, propter crimen Cæciliani Episcopi; & solum remansisse in ea parte Africæ, quæ Donato adhærebat; ut testatur idem Augustinus in lib. de hæresibus cap. 69. Introducit ea concione secunda sanctus Doctor Ecclesiam, ita loquentem cum Christo: *Quid est, quod nescio qui recedentes à me, murmurant contra me? Quid est, quod periti, me periisse contendunt? Certe enim hoc dicunt, quia fui, & non sum. Annuntia mihi exiguitatem dierum meorum, quamdiu ero in isto sæculo; annuntia mihi, propter illos, qui dicunt; Fuit, & jam non est; apostatavit, & periit Ecclesia de omnibus gentibus. Et annuntiavit: Ecce Ego vobiscum sum omnibus diebus, usque ad consummationem sæculi.* Hactenus Augustinus, ex illa promissione Christi contra Donatistas, & in persona illorum contra Lutheranos & Calvinistas inferens, Ecclesiam, à Christo in Petro fundatam, non periisse, sed usque ad

ad finem mundi permanfuram; quia Chriftus, promittens, fe femper cum fuccefforibus Apoftolorum futurum, promifit femper confervaturum in Ecclefia fidem veram, in qua eft fundata. Non dixit, *Ecce Ego vultifcum fum*, per tria ſæcula, vel quatuor, & non amplius, & poſtea vos deferam; ſed, *Uſque ad conſummationem ſæculi*. Quomodo ergo hæretici fingunt, Eccleſiam, à Chriſto fundatam ſupra Petrum, duraffe duntaxat per tria, vel quatuor, vel ad ſummum per quinque ſæcula?

Dedit Deus Legem ſcriptam populo ſuo, per manum Moyſis ſervi ſui; & hæc duravit per quindecim & amplius ſæcula; & dicemus, Legem Euangelicam, quam Deus dedit mundo per Filium ſuum unigenitum Jeſum Chriſtum, ſolum duraffe per tria, vel quatuor, vel quinque ſæcula? Dicemusne plus dediffe umbræ, quam corpori? plus figuræ, quam rei figuratæ? plus ſervo, quam filio? plus legi timoris, quam legi amoris? plus populo ſuo, quando erat veluti ſub prædago, quam quando erat in ætate adulta, & creverat in virum perfectum? Quis non videat, hæceſſe abſurda & incredibilia?

XXIII Eandem assistentiam Spiritus sancti, qua Ecclesia, supra Petrum fundanda, semper esset perseveratura, id est semper retentura veram fidem, per quam coetus hominum in ratione veræ Ecclesiæ constituitur (sicut enim per animam caro animatur in hominem viventem; ita per veram fidem & Religionem, coetus hominum, qui alioquin totus pene est caro, formatur in Christi Ecclesiæ) impetravit Christus sua oratione, dum Lucæ 22,23 dixit, *Simon, Simon, ecce Sathanas expetivit vos, ut cribraret sicut triticum; Ego autem rogavi pro te, ut non deficiat fides tua; & tu, aliquando conversus, confirma fratres tuos: ex quo loco, ut notat Maldonatus, Patres atque Doctores colligunt, Ecclesiæ Romanæ, fundatæ in Petro, fidem fore perpetuam. Rogavit namque Christus, & sua oratione obtinuit, ne à Sede Petri, cui omnes Christi fideles obedire tenentur, deficiat vera fides: nam à Sede Romana, tamquam à Matre omnium Ecclesiarum, vera fides derivatur in alias Ecclesias; & per conformitatem cum Sede Petri, veram fidem retinere debent: unde si Sedes Petri erraret in fide, reliquæ*
om-

omnes, se conformantes cum Matre & Magistra omnium Ecclesiarum, errarent. Et ideo S. Leo serm. 2 in Natali Apostolorum Petri & Pauli, in hunc sensum, hunc locum exponens, inquit: *Commune erat omnibus Apostolis periculum de tentatione formidinis, & Dominicæ protectionis auxilio pariter indigebant; quoniam diabolus omnes exagitare, omnes cupiebat elidere; & tamen specialis à Domino Petri cura suscipitur, & profide Petri proprie supplicatur; tamquam aliorum status certior sit futurus, si mens Principis victa non fuerit. In Petro ergo omnium fortitudo munita; & Dominicæ gratiæ ita ordinatur auxilium, ut firmitas, quæ per Christum Petro tribuitur, per Petrum Apostolis conferatur: ac per consequens firmitas fidei, quæ per Christum Romano Pontifici Petri Successori tribuitur, per Romanum Pontificem cæteris Episcopis conferatur, & sic in omnes fideles derivetur: quia ad ipsum pertinet, fratrum communitatem in fide confirmare, eis vera dogmata proponendo, & dubia fidei resolvendo. Hinc Pelagius secundus ad Cathedram Petri exaltatus ann. 577, epist. 5 ad Episcopos Istriæ, hunc locum explicans, inquit:*

quit : *Considerate, charissimi, quia Veritas mentiri potuit, nec fides Petri in aeternum quassari non poterit, vel mutari; nam cum omnes Discipulos diabolus ad excribendum poposcerit, pro solo Petro se Dominus rogasse testatur, & ab eo voluit ceteros confirmari.*

XXIV Ecclesiam Christi non periisse unquam, deserendo fidem in qua fundata est, & amplectendo falsa dogmata & errores pro articulis & veritatibus fidei, ut somniarunt Lutherus & Calvinus, evincitur ex illis verbis Apostoli 1 ad Timo. 3, *Ecclesia Dei est columna & firmamentum veritatis.* Quomodo enim Ecclesia est columna & firmamentum veritatis, si à veritate deflexit, & loco veritatis sustentat errores? Deinde etiam, stando in explicatione horum verborum, tradita à Calvino, & impugnata à Bellarmino lib. 3 de Ecclesia militante cap. 14, quod scilicet ideo Ecclesia columna & firmamentum veritatis dicatur, *quia est fida custos veritatis, eamque puram & sinceram ad posteros transmittat*: etiam stando in hac explicatione, sequitur, numquam in fide errasse, sed nec errare posse. Si enim est fida custos veritatis, numquam suam culpam illam amisit, & loco illius suscepit errores. Quomodo enim

esse potest fida custos veritatis Ecclesia, quæ veritatem sua sponte deferit, & errores amplectitur ? quare, si erravit, fida custos non fuit. Denique, etiam juxta explicationem traditam à Theodoro Beza, sequitur, numquam errasse. Nam juxta Bezam, ideo Ecclesia dicitur columna & firmamentum veritatis, *quia non alibi habitat veritas Dei in hoc mundo, nisi in Ecclesia.* Si enim hoc ita est, sequitur, semper in Ecclesia, à Christo supra Petrum fundata, habitasse veritatem Dei; vel certe, nullam in mundo habitasse veritatem Dei. Cum ergo certum sit, semper in mundo habitare veritatem Dei; certum est, semper habitasse in Ecclesia supra Petrum fundata: ergo certum est, numquam illam amisisse veram fidem.

XXV. Id ipsum probatur. Quia certum est, Ecclesiam gubernari à Christo, tamquam à capite & sponso; & ab Spiritu sancto, tamquam ab anima; ut patet ex illo ad Ephes. 1, *Ipsam dedit caput supra omnem Ecclesiam, quæ est corpus ipsius.* Et ex illo ad Ephes. 4, *Unum corpus & unus spiritus.* Et ad Ephes. 5, *Vir caput est mulieris, sicut Christus caput Ecclesia.* Ergo, si Ecclesia in dogmatibus fidei & mo-
rum

rum erraret; error tribueretur Christo & Spiritui sancto. At certum est, errorem non posse tribui Christo nec Spiritui sancto: ergo certum est, Ecclesiam non posse errare in dogmatibus fidei & morum. Et ideo Dominus Joan. 16, dixit: *Spiritus veritatis docebit vos omnem veritatem*; quam scilicet tamquam dogma certum credere debetis. Quamvis enim Christus, tamquam caput Ecclesiæ; & Spiritus sanctus, tamquam ejus sponsus, non teneantur revelare omnem omnino veritatē Ecclesiæ, seu ab illa remove omnem omnino errorē & ignorantiam; tenentur tamen remove omnem errorem, ex quo magnum oritur malum, qualis est omnis error circa fidem. Magnum enim est malum, quod Ecclesia falsā fide Deum colat; cum præcipuē cultus divinus in fide, spe, & charitate consistat, ut Augustinus docet in Enchiridio cap. 3. Sic vir, qui est caput mulieris, licet non teneatur remove ab uxore omnem ignorantiam; tenetur tamen remove omnem errorem, ex quo magnum aliquod malum oritur, licet uxor excusetur per ignorantiam.

XXVI Et sanè cum Christus jusserit Ecclesiæ in omnibus obedire, sub anathematis poena,

pœna , ut patet ex illis verbis Matth. 18 , *Si Ecclesiam non audierit, sit tibi velut Ethnicus & Publicanus*; non potest permittere, ut Ecclesia erret in iis, quæ credenda proponit omnibus fidelibus, vel facienda præcipit : iniquum enim esset, sub tam gravi pœna obligare, ad assentiendum rebus incertis & interdum falsis. Idque supponunt tamquam quid indubitatum Ecclesiæ Patres, dum omnes ad Ecclesiam provocant in quæstionibus fidei quibuscumque: quod profecto non facerent, si Ecclesiam falli posse existimarent in iudicio fidei. Unde Tertullianus lib. de præscriptionibus; *Age, inquit, omnes Ecclesia erraverint, nullam respexerit Spiritus sanctus*. Quibus verbis supponit, impossibile esse, ut tota Ecclesia erret in rebus fidei. Et ideo Augustinus Epiit. I 18, aiebat , *disputare de eo, quod universa Ecclesia sentit, insolentissima dementia est*. Ergo insolentissimæ dementiæ est, Ecclesiam à Christo fundatam errasse in fide, & per mille & amplius annos dogmata erronea credidisse, tamquam articulos & veritates fidei ; sicut absque dubio Ecclesia Romana semper tamquam dogmata fidei suscepit ea omnia, quæ nunc credit; nimirum, dari septem

septem Sacramenta, dari Purgatorium; Christum esse realiter præsentem sub speciebus panis, & substantiam panis ibi non manere; Sanctos esse colendos; Sacrificium Missæ esse sanctissimum & Deo gratum; Fidem sine operibus non sufficere ad salutem: & alia similia, in quibus Ecclesia Romana contradicit omnibus sectis hæreticorum.

§. IV.

Demonstratur ex dictis, solam Ecclesiam Catholicam Romanam, esse veram Christi Ecclesiam; non autem illam, quam Reformatam appellant.

XXVII **N**Omine Ecclesiæ Romanæ non hic dumtaxat intelligimus Ecclesiam particularem, quæ Romæ existit, quatenus distinguitur ab aliis Ecclesiis particularibus; sed intelligimus cœtum omnium fidelium, qui obediunt Romano Pontifici, ut legitimo Christi Vicario, & Petri successori, & capiti visibili totius militantis Ecclesiæ; quæ appellatur Romana à præcipua sui parte, nempe ab Ecclesia Romæ existente, quæ est reliquarum Ecclesiarum Mater; quæ
etiam

etiam dicitur Pontificia, quia Pontifici summo est subiecta ; & Catholica seu Universalis, quia per totum orbem est diffusa,

XXVIII Ecclesiam ergo Romanam , & non Ecclesiam Lutheranam, vel Calvinianam, quam *Reformatam* appellant (& sic de aliis hæreticorum sectis) esse veram Christi Ecclesiam, evidenter ex præmissis infertur. Nam vera Christi Ecclesia semper in mundo fuit, ex quo Christus illam supra Petrum fundavit. Atqui sola Ecclesia Catholica Romana semper in mundo fuit, ex quo Christus supra Petrum Ecclesiam suam fundavit; non autem Lutherana, vel Calviniana; Ergo sola Ecclesia Catholica Romana, non autem Lutherana vel Calviniana, est vera Christi Ecclesia. Major hujus syllogismi constat ex dictis § præcedenti. Minor probatur. Quia, ex quo Christus Ecclesiam suam supra Petrum fundavit, semper fuit in mundo cœtus hominum obedientium Romano Pontifici, & agnoscentium illum ut successorem D. Petri & Vicarium Christi, & profitentium dogmata illa quæ Ecclesia Romana proficitur; omnibus enim sæculis celebrata est Missa pro vivis & defunctis; celebrata festa, servata

vata jejunia, frequentata vota monastica, honoratæ Sanctorum reliquiæ, administrata septem Sacramenta, & alia religionis nostræ propria semper in usu fuèrunt, ut ex omnium ætatum scriptoribus constat. Et à D. Petro usque ad Alexandrum VIII, modernum Pontificem, continuati sunt Pontifices, qui Sedem Romanam ascenderunt, & in regimine & solitudine Ecclesiarum Petro successerunt; & secundum calculum communiorum, sunt ducenti quadraginta quinque. Petro namque successit Linus, Linus Cletus, Cleto Clemens, & sic descendendo deveniemus ad Alexandrum VIII. Unde concluditur, Ecclesiam Romanam, quæ modo agnoscit Alexandrum VIII pro summo Pontifice, illam eandem esse, quam Christus supra Petrum fundavit: nam illa, quam Christus fundavit supra Petrum, usque ad finem mundi duratura est. Hæc autem nulla alia est, quam Ecclesia Catholica Romana, quæ Pastores suos usque ad Petrum continuatâ serie enumerat, nam Alexander VIII, successit Innocentio XI, Innocentius XI, successit Clementi X; Clemens X, Clementi IX; Clemens IX, Alexandro VII; Alexander VII,

VII, Innocentio X; & sic ascendendo devenimus ad Petrum.

XXIX Quo eodem argumento evincitur, Ecclesiam Lutheranam non esse veram Christi Ecclesiam, & similiter de Calviniana, & aliis. Nam vera Christi Ecclesia semper fuit, ex quo Christus supra Petrum illam fundavit. At Ecclesia Lutherana non semper fuit: nam ante annum 1517, in quo Lutherus incœpit efferre caput, Religio Lutherana non erat in mundo; & à fortiori Calviniana, quæ illius soboles est: constatque ex scriptoribus, eo tempore, quo Lutherus insurrexit contra Pontificum Romanum, præter Judaicam, Mahumeticam, & Paganicam Religionem, non aliam fuisse in mundo præter Catholicam Romanam & Hussiticam: Ergo Ecclesia Lutherana non est vera Christi Ecclesia.

XXX Hoc argumento, sumpto ab antiquitate Ecclesiæ veræ Christi, quæ incipiens à Petro semper duravit, & in finem mundi duratura est; nisi sunt antiqui Patres Ecclesiæ contra hæreticos, ut probarent; apud ipsos non esse veram Christi Ecclesiam. Illo usus est Irenæus, *Vir Apostolicorum tempo-*
rum

rum (inquit Philippus Labbe) à S. Polycarpo Smyrnaeorum Antistite, cujus in juventute fuerat auditor, in Galliam missus, & anno Christi 178, vel 179, consecratus est Episcopus Lugdunensis: nam lib. 3 adversus hæreses cap. 3, enumerat Pontifices Romanos à Petro usque ad Eleutherium, qui suo tempore sedebat; & dicit, per hanc successionem confundi omnes hæreticos.

XXXI Eodem usus est Tertullianus, qui in decrepita fere ætate obiit anno 215, libro de Præscriptionibus. Cedant (inquit) *hæretici origines Ecclesiarum suarum, evolvant ordinem Episcoporum suorum, ita per successionem ab initio decurrentem, ut primus ille Episcopus aliquem ex Apostolis vel Apostolicis viris habuerit authorem & antecessorem: hoc enim modo Romanorum Ecclesia Clementem à Petro ordinatum refert.*

XXXII Eodem usus est S. Optatus Milevitanus Episcopus, lib. 2. contra Parmenianum; ubi enumerat Pontifices omnes Romanos, à Petro usque ad Siricium, qui tunc sedebat; ut ostendat, Ecclesiam veram non esse apud Donatistas, qui per similem successionem ad Apostolos ascendere

dere non poterant; & subdit; *Vos vestra Cathedra originem ostendite, qui vobis vultis sanctam Ecclesiam vindicare.*

XXXIII Eodem argumento, & in eundem scopum, contra Donatistas usus est S. Augustinus epist. 145, ut probaret, eorum Ecclesiam non esse Ecclesiam Christi. Nam enumerat ordinem Pontificum Romanorum, qui à Petro usque ad Anastasium obtinuerant Cathedram Romanam, & concludit: *Sub hoc ordine successionis nullus Donatista Episcopus invenitur;* ut inde eliciat, apud Donatistas non esse veram Christi Ecclesiam, quandoquidem suos Episcopos cum Petro connectere non poterant. Et in Psalmo contra partem Donati, *Numerate, inquit, Sacerdotes, vel ab ipsa sede Petri; & in ordine Patrum, quis cui successerit, videte. Ipsa est petra, quam non vincunt superba inferorum portæ.* Et lib. contra Epistolam fundamenti; *Tenet me, inquit, in Ecclesia, ab ipsa Sede Petri Apostoli, cui pascendas oves suas Dominus commendavit; usque ad presentem Episcopatum successio Sacerdotum.*

XXXIV Hinc concluditur, illam dumtaxat esse veram Christi Ecclesiam, quæ à
Chri-

Christo supra Petrum & Apostolos fundata, usque ad præsentem diem perseverat. Id quod S. Hieronymus, in Dialogo contra Luciferianos in fine, notavit his verbis. *Brevem tibi apertamque animi mei sententiam proferam; in illa Ecclesia esse permanendum, quæ ab Apostolis fundata, usque ad diem hanc durat. Sicubi audieris, eos, qui dicuntur Christi, non à Domino Iesu Christo, sed quopiam alio nuncupari, ut puta, Marcionitas, Valentinianos, Montenses, sive Campitas; scito, non Ecclesiam Christi, sed Antichristi esse synagogam. Ex hoc enim ipso quod postea instituti sunt, eos esse se indicant, quos futuros Apostolus prænuntiavit. Nec sibi blandiantur, si de Scripturarum capitulis videntur sibi affirmare, quod dicunt: cum & diabolus de Scripturis aliqua sit locutus; & Scriptura non in legendo consistant, sed intelligendo.*

XXXV Ex quibus verbis constat, novitatem esse signum hæreseos, ab Apostolo prænuntiatae. Unde infertur, Religionem Lutheranam & Calvinianam & alias hæreticorum sectas, quæ in Luthero & Calvino aliisque hæresiarchis originem sumpserunt, non esse veram Christi Religionem & Ecclesiam;

clesiam; nam Religio Lutherana incepit quindecim sæculis, postquam Christus suam Ecclesiam supra Petrum fundaverat; ac proinde non fuit ab Apostolis fundata, nec proinde Ecclesia Christi esse potest.

XXXVI Quapropter, ut quis probare possit, se esse in vera Christi Ecclesia, seu veram Christi Religionem tenere; debet ostendere, se esse in Ecclesia, quorum ministri omnes ab Apostolis descendunt, suntque Apostolorum successores, vel ab eorum successoribus ordinationem acceperunt. Id autem omnes Romanæ Ecclesiæ filii ostendere possunt; nullus autem Lutheranæ vel Calvinianæ Religionis cultor probare valet. Constat namque, omnes Catholicæ Religionis ministros ab Apostolis descendere, si-ve potestatem Ordinis spectes, per quam offertur sacrificium, & conficiuntur Sacramenta ad sanctificandos fideles; si-ve potestatem Jurisdictionis consideres, per quam datur jus regendi & pascendi Ecclesiam verbo Dei, &c. Inferiores enim Ministri, præsertim Subdiaconi, Diaconi, & Presbyteri ordinantur ab Episcopis; Episcopi autem suum Ordinem ab aliis Episcopis acceperunt;

& hi rursus ab aliis, & sic ascendendo usque ad Apostolos, qui potestatem suam proxime à Christo acceperunt. Nullus est ergo, qui non acceperit mediate suam potestatem ab Apostolis, & per Apostolos à Christo. Quare, sicut omnes homines, secundum vitam & potentiam naturalem, longo generationum tractu descendunt ab Adam; ita omnes Ecclesiæ Ministri, secundum potestatem supernaturalem Ordinis, longa ordinationum serie descendunt à Christo, qui est secundus Adam. Ac proinde nullus est Minister, qui potestatem suam Ordinis, qua consecrat, qua sacrificat, qua absolvit à peccatis, & qua alia Sacramenta conficit, & populum Christianum sanctificat, non possit ad Christum, tamquam ad primum fontem & auctorem, reducere; qui homine, tamquam mero instrumento, utitur ad consecrandum corpus suum, ad remittenda peccata, & sanctificandas animas.

XXXVII Idemque est de potestate Jurisdictionis. Constat namque similiter, omnem potestatem Jurisdictionis, qua Ministri Ecclesiæ Catholicæ populum Christianum

regunt, verbum Dei prædicant, & alia munera pastoralia obeunt, à Christo descendere, & ad ipsum perspicue reduci. Parochi namque habent suam Jurisdictionem ab Episcopis, Episcopi à Romano Pontifice; hic vero, præcedente legitima hominum electione, immediate accipit suam potestatem jurisdictionis à Christo. Cum enim sit verus Christi Vicarius, legitimusque Petri Successor in Cathedra, & in munere regendi Ecclesiam Christi, & pascendi universum ejus gregem; necessario succedit ei in potestate Jurisdictionis, quam Christus per illa verba, *Pasce oves meas*, communicavit Petro, & in ipso omnibus, qui legitime fuerint electi ad Episcopatum Romanum.

XXXVIII Qui autem in Ecclesia non habent potestatem ordinariam, sed delegatam tantum; eam à Parochis, vel ab Episcopis, vel à Summo Pontifice acceperunt. Nullus ergo est Minister in Ecclesia Catholica, nullus verbi Dei Prædicator, nullus Catechista, qui non possit ostendere, suam potestatem à Christo descendere, & suam missionem legitimam esse; utpote à Christo,

per legitimos ejus Ministros, derivatam: quod nisi possent ostendere, non essent ullo modo audiendi, sed suspecti habendi tamquam lupi; cum non per ostium in ovile intrarent, sed aliunde occulte irreperent.

XXXIX Quod autem nullus Lutheranae vel Calvinianæ sectæ Professor possit ostendere, suæ sectæ Ministros à Christo potestatem accipere; facile evincitur. In primis probare non possunt, Episcopos suæ sectæ potestatem Ordinis à Christo accepisse. Non enim dicere possunt, Christum descendisse de cælo, & illos per se ipsum ordinasse in Episcopos. Nec dicere possunt, Apostolos immediatè imposuisse super illos manus suas, & potestatem Ordinis Episcopalis illis immediatè contulisse; nec probare possunt illos ordinatos fuisse ab aliis Episcopis, qui mediatè ab Apostolis Ordinem susceperint, ut probare possunt Episcopi Catholici. Loquamur de primo Episcopo alicujus sectæ, vel Lutheranae, vel Calvinianæ, qui ante professionem illius sectæ Episcopus non erat; sed, vel merè Laicus, vel solum Presbyter in Ecclesia Catholica, à qua defecit, ut transfret ad illam sectam: à quo, quæso, ordinatus est Episcopus?

XL Hoc argumentum vehementer torlit Angliæ Ministros. Nam ut refert Richardus Arfdekin tom. I Theologiæ tripartitæ part. I cap. 3, pag. mihi 11, *Sæpius postulati de legitima ordinatione Parkeri, qui primus post hæresim tamquam Archiepiscopus Cantuariensis Sedem occupavit; nec testes, nec tabulas, nec ullum derivati à Christo ordinis aut potestatis indicium legitimum umquam proferre potuerunt. Quorum unus (inquit) uon ita pridem, quasi collabenti Ecclesiæ humeros suppositurus, non antiquas tabulas, sed novas fabulas evulgavit de Parkero, in quadam taberna per aliquos Romanæ Ecclesiæ Episcopos in Prasulem consecrato; sed non defuit auctor Catholicus, Dublinensis nunc Prasul Illustrissimus, qui calamo, suâ eruditione digno, commentum illud apertè dissolvit, & ad vivum resecurit. Hoc idem argumentum manifestè probat, nec apud Lutheranos, nec apud alios hæreticos esse veram Christi Ecclesiam: quia vera Christi Ecclesia non potest subsistere sine veris Episcopis; apud Lutheranos autem aliosque hæreticos non sunt veri Episcopi: quia veri Episcopi dari non possunt sine vera ordinatione & successione ab Apostolis: Episcopi*

autem Lutheranorum (& sic de aliis sectis) non habent veram ordinationem nec successionem ab Apostolis. Nam si inquiremus, à quo ordinati sint Episcopi Lutherani, qui modo existunt; & ab illis petamus, ut probent, se ab Apostolis originem trahere; respondere non poterunt, nec satisfacere. Nam tandem deveniendum est ad primum Episcopum suæ sectæ, de quo probari non possit, fuisse verè ordinatum in Episcopum, & originem trahere ex Apostolis. Nam in secta Lutherana tandem deveniemus ad Lutherum, qui habitus est Episcopus Wittenbergen-
sis: de quo inquirō, à quo consecratus sit in Episcopum. Certè, ex statuto Apostolorum, & Concilii Nicæni & Carthaginensis, Episcopus debet ordinari à tribus Episcopis, vel ex dispensatione ab uno, assistentibus Abbatibus. Quæro, à quo ordinatus est Lutherus? Non ab Episcopis Lutheranis, quia ante illum nullus in illa secta fuit, nec Episcopus, nec Abbas. Non ab Episcopis Ecclesiæ Romanæ, à quorum fide & religione discessit, & in quibus ipse Lutherus veram potestatem ordinandi agnoscere non poterat; quandoquidem palam prædicabat, Ecclesiam Romanam

à multis seculis defecisse à fide & religione;
& jam non esse veram Christi Ecclesiam,
sed synagogam sathanæ; manifestum autem
est, non esse veros Episcopos, cum vera pote-
state ordinandi, ubi non est vera Christi Ec-
clesia. Ergo Lutherus non fuit verus Epi-
scopus; sed ei aliisque similibus convenit id,
quod Cyprianus lib. de Simplicitate Prælatorum
ait: *Il sunt, qui se ultro, apud temerarios
convenas, sine divina dispositione, præficiunt:
qui se Præpositos, sine ulla ordinationis lege,
constituunt; qui, nemine Episcopatum dante,
Episcopi sibi nomen assumunt*, Idem dico de
Zwinglio, qui habitus est Episcopus Tiguri-
nus; & de Calvino, qui dictus est Episcopus
Genevensis; & de Oecolampadio, qui in ipso
sepulchri epitaphio vocatur primus Basileæ
Episcopus: quod epitaphium se legisse, testa-
tur, non sine risu, Cardinalis Bellarminus, lib.
de notis Ecclesiæ cap. 8. De hoc, & de Lu-
thero, & similibus monstris verè dicere pos-
sumus, quod de alio hæresiarcha dixit Cy-
prianus lib. I epist. 6 ad Magnum: *Novatianus,*
inquit, in Ecclesia non est, neque Episcopus
computari potest; qui Apostolicâ traditione
contemptâ, nemini succedens, à se ipso ordi-
natus est.

XLI quodsi hæretici, ad declinandum hoc telum, dicant; ut quis sit Episcopus, non opus esse, ut ordinetur vel consecratur in Episcopum ab aliis Episcopis; sed satis esse, quod eligatur à populo in Episcopum, ad hoc ut Christus immediate illi communi-
cet potestatem Ordinis Episcopalis; id quod respondet Brentius, apud Bellarminum iib. de notis Ecclesiæ cap. 8; *Nos legitime*, inquit, *vocati sumus à Populo, & Magistratu; & ab eis Episcopatum accepimus, & nos non intrusimus.* Si, inquam, hoc dicant; contradicunt toti antiquitati, & perpetuo Ecclesiæ usui. Ut enim inquit P. Lessius, in opusculo de vera Religione capeffenda; *Numquam in Ecclesia habitus fuit Episcopus, ita ut munia omnia Episcopalia obire posset, nisi ab alio Episcopo ordinatus; cui, ex Apostolorum constitutione, duo alii Episcopi debent conjungi, ut expresse præcipitur Can. 1. Apostol. & Can. 4 Synodi Nicana, & insinuat Apostolus scribens Episcopo Timotheo 1.4, & monens; Noli negligere gratiam, quæ in te est, quæ data est tibi per prophetiam, cum impositione manuum Presbyterii: hoc est, cætus Episcoporum, qui simul cum or-*
dinante

evidenter demonstrata. C. I §. 4. 49
dinante manus ordinando imponent, ut Pa-
tres exponunt.

XLII Unde in primitiva Ecclesia, quan-
do nec hæretici negant, Romanos Pontifices
fuisse veros Pontifices ; singuli Papæ , in-
cipiendo à D. Petro , aliquos Episcopos or-
dinarunt ; ut constat ex Pontificali Roma-
no S. Damasi, & Historia Ecclesiastica, in
Vitis singulorum Pontificum ; in quibus,
incipiendo à D. Petro , & D. Lino, & aliis,
narratur, quot Ordinationes fecerint, &
quot Episcopos per varia loca ordinaverint ;
& , ut inquit Cardinalis Bellarminus tom.
2. lib. 4 de notis Ecclesiæ cap. 8 , constat,
Christum, à quo Ecclesia novi Testamenti cœ-
pit, duodecim Apostolos tantum Elegisse Epi-
scopos & Sacerdotes, & eis commisisse omnem
auctoritatem pascendi & gubernandi Eccle-
siam ; Apostolos autem postea elegisse, atque or-
dinasse alios Episcopos, & eis tradidisse simi-
lem potestatem , alios deinceps ordinandi ; id
quod ex historiis non solum antiquis Eusebii, &
similium , sed etiam ex ipsis Centuriis Mag-
deburgensium aperte ostenditur. Et hinc est,
quod Paulus , qui extra ordinem Apostolus à
Christo post ascensionem in cælum factus est

50 *Veritas Religionis Catholica*
non fuisset agnitus in Ecclesia pro tali, nisi
prius in ipsa Ecclesia baptizatus fuisset, & ab
Apostolis dexteris accepisset, imo, & ab il-
lis ordinatus fuisset, ut patet ex Act. 9, & 13:
& ad Galat. 1.

XLIII Itaque sicut in populo Testamenti
veteris, qui per carnalem generationem pro-
pagabatur, nulli erant de populo illo Dei, nisi
qui descendebant à duodecim filiis Iacob; nulli
Sacerdotes, nisi qui descendebant à Levi per
Aaron; & idcirco diligentissime tunc conser-
vabantur genealogia, ut patet ex toto veteri
Testamento: ita in populo Testamenti novi, qui
spirituali generatione multiplicatur, nulli
sunt Christiani, nisi per Apostolos, vel eo-
rum Successores, aut ab eis missos converfi;
nulli Episcopi, nisi qui eisdem legitime succe-
dunt; & ideo tam diligenter annotantur à
nostris Episcoporum successiones. Quare futi-
lis est responsio Brentii; nam aliud est loqui
de electione Episcopi, aliud de consecratio-
ne; nam electio varie variis temporibus fa-
cta est. Constat enim, veteres Romanos
Pontifices misisse Episcopos ad varias civi-
tates, sine ullo consensu populorum requi-
sito. Constat etiam, aliquando Populum si-
mul

evidenter demonstrata, C. I §. I. §. I.

mul cum Clero Episcopum elegisse, aliquando solum Clerum. *Ceterum quomodocumque fieret electio, semper (inquit Bellarm.) necessaria fuit ordinatio: quam non populus, sed soli Episcopi, & quidem tres, regulariter conferebant: quod nemo nescit, nisi qui nihil legit.*

XLIV Quod si rursus dicas, ad veram Christi Ecclesiam non requiri, quod in illa detur Hierarchia Ecclesiastica, coalescens ex Patriarchis, Archiepiscopis, & Presbyteris; sed sufficere, quod Ecclesia, exclusis Episcopis & Ministris, à solis senioribus administretur, ut faciunt Puritani & Presbyteriani in Anglia; qui ex diametro opponuntur Protestantibus, dicentibus Ecclesiam debere constari ex Archiepiscopis, Episcopis, Decanis, aliisque gradibus Ecclesiasticæ Hierarchiæ. Si hoc, inquam, dixeris, rem manifeste absurdam, & contrariam Scripturæ & Patribus dices. Clare namque ostendit Bellarminus, ubi nuper, *non posse ullo modo Ecclesiam esse sine Pastoribus & Episcopis; ut recte docet Cyprianus epist. 9. lib. 4, ubi dicit, Ecclesiam esse plebem, Episcopo adunatam; & Episcopum esse in Ecclesia, Ecclesiam in Episcopo, Quare Hieronymus,*
lib.

lib. contra Luciferianos ; *Ecclesia*, inquit, *non est, quæ non habet Sacerdotes.* Id quod aperte probatur ex Paulo Ephes. 4 : *Et ipse dedit quosdam quidem Apostolos, quosdam autem Prophetas, alios Pastores & Doctores, ad consummationem Sanctorum, in edificationem Corporis Christi, donec occurramus omnes.* Ubi docet Apostolus, futuros Pastores in Ecclesia usque ad diem iudicii ; tunc enim occurremus Domino in *unitate fidei. in virum perfectum, in mensuram ætatis plenitudinis Christi.*

XLV Esse autem Episcopos, Pastores hujus gregis, docet idem Apostolus, apud Lucam Act. 20 : *Attendite vobis & universo gregi, in quo vos Spiritus sanctus posuit Episcopos, regere Ecclesiam Dei.* Sed nec Lutherus id negat, quin potius, in lib. de Eccl. & Conc. inter notas Ecclesiæ ponit, *habere veros Pastores* : ex quo sequitur, eam non esse veram Ecclesiam, quæ aut nullos, aut non veros habet Pastores.

XLVI Deinde probare non possunt Lutherani & Calvinistæ, suos ministros, imo nec primos authores suæ ecclesiæ reformatæ, Lutherum & Calvinum, potestatem Juris-

isdictionis à Christo accepisse, ad gubernandas Ecclesias, imo nec ad prædicandū Verbum Dei. Nemo enim, in Ecclesia prædicare potest, nisi legitimâ authoritate fuerit missus, juxta illud Apostoli ad Rom. 10; *Quomodo prædicabunt, nisi mittantur?* alioquin maxima nasceretur in Ecclesia confusio. Ut enim sapienter ponderat P. Lessius; *qui vis officium prædicandi, & Ecclesiam regendi, sibi assumere posset, & quosvis errores disseminare.* Si enim in Repub. temporali & politia humana, nemo se ipsum potest intrudere, & assumere magistratum ad regendum populum, in rebus terrenis, ad hanc vitam dumtaxat pertinentibus; sed debet à Principe ad hoc constitui: quanto minus in Ecclesia, in regno Christi spirituali, potest quis sibi arrogare officium Pastoris, ad regendum populum, in iis quæ salutem spectant æternam; sed ab Ecclesiæ supremo Rectore & Sacrorum Principe, constitui debet? Multo enim magis vitanda est confusio regiminis in Ecclesia, quam in politia; cum illa in perniciem cedat animarum, hæc solum in damna fortunarum vel corporum.

XLVII Deinde Joan. 10. *Qui non intrat per*

per ostium in ovile ovium, sed ascendit aliunde, hic fur est & latro, inquit Dominus. At is, qui absque legitima missione & autoritate, assumit sibi officium Pastoris in Ecclesia, non intrat per ostium, sed ascendit aliunde: ut Patres passim exponunt, & per se satis constat. Quid enim aliud est, intrare per ostium, quam intrare legitimâ viâ, legitimâ autoritate? Ostium enim est via ordinaria, ad hoc instituta, ut per eam intretur in ovile. Unde designat illam autoritatem, per quam Ministri debent admitti in ovile Christi, ad oves Christi regendas & pascendas.

Rursus, Dominus apud Joannem 7, ait: Qui à semetipso loquitur, gloriam propriam querit; qui autem querit gloriam ejus qui misit eum, hic verax est, & injustitia in illo non est. Quibus verbis significat, non esse credendum iis, qui legitimè missi non sunt, sed à seipsis veniunt: quia gloriam propriam quærunt, ac proinde non ad veritatem, sed ad honorem & compendium loquuntur, & doctrinam suam omnem eo dirigunt. Denique Apostolus, in epist. ad Hebræos, adeo hanc missionem necessariam ducit, ut etiam in Christo Domino eam requirat. Nec quisquam
sumit

sumit sibi honorem, sed qui vocatur à Deo tanquam Aaron. Sic & Christus, non semetipsum clarificavit, ut Pontifex fieret: sed qui locutus est ad eum; Filius meus es tu, ego hodie genui te. Unde Dominus toties inculcat Judæis suam missionem; nimirum, quod à se non venerit, sed à Patre missus; idemque multis modis confirmat.

XLVIII Ex his clarè deducitur, Lutherum, Calvinum, & similes novos Doctores; audiendos non esse, & eorum doctrinam vitandam. Quia constat, eos aliquâ legitimâ autoritate missos non esse, sed à seipsis venisse: constat, eos sibi magistratum, & officium Pastorum, & jus reformandi in Ecclesia, usurpasse: constat, non intrasse per ostium, & viâ legitimâ, sed aliunde ascendisse in ovile: ac proinde, juxta Domini sententiam, pro furibus & latronibus habendos.

§. V.

Præcluditur vanum hæreticorum effugium, asserentium, suam Religionem non esse novam, sed semper extitisse; licet latuerit occulta, quousque Lutherus cœpit palam prædicare.

XLIX **C** Alvinus, in Præfatione suarum Institut. animadvertens, antiquitatem esse potissimam notam veræ Ecclesiæ; nam sine dubio vera Ecclesia antiquior est quam falsa, quemadmodum Deus antè fuit quam diabolus: quocirca Matt. 13, prius seminatum legimus bonum semen, quam zizania; & Ecclesia dicitur *Catholica*, quia omni tempore fuit; & similiter dicitur *Apostolica*, quia fundata est ab Apostolis, ac proinde debet esse antiquissima. Hoc, inquā, animadvertens Calvinus; ut declinaret argumentum, quod contra ipsum fiebat ex novitate suæ Ecclesiæ, quā evincebatur, illam non esse veram Christi Ecclesiam; respondit, suam Ecclesiam non esse novam, sed antiquissimam; imo illam ipsam, quam Christus fundavit; tamen non esse visam per multa sæcula, & tunc demum apparuisse. Sed contra hoc effu-

effugium vel potius somnium, valdè insurrexere, Cardinalis Bellarminus, lib. 4 de notis Ecclesiæ cap. 5; P. Leonardus Lessius, in præclaro illo opusculo seu consultatione, *quæ Fides & Religio sit capessenda*, in nona consideratione, in 1 ratione, ob quam omnes aliæ Religiones præter Catholicam sunt suspectæ; & P. Martinus Becanus, in compendio Manualis, lib. 1 cap. 3, n. 34, & 61: ex quibus, & ipsorum verbis, hoc delirium patefaciendum est. Et imprimis contra illud, militat argumentum, quod facit B. Augustinus contra Donatistas lib. 3 de Baptismo, cap. 2. *Autista Ecclesia, quæ nunc apparuit, antea perierat, & nunc resurrexit; aut non perierat, sed tantum latuerat, & nunc extulit caput. Neutrum autem potest dici.*

Non primum. Quia tunc non potuissent renasci ipsi, si mater perierat. Si periit: Unde ergo, inquit B. Augustinus, *Donatus apparuit? de qua terra germinavit? ex quo mari emerfit? de quo calo cecidit?* Et præterea falsæ erunt promissiones Christi Matth. 16; *Porta inferi non prævalebunt adversus eam.* Matthæi ultimo; *Ego vobiscum sum usque, &c.*

Non secundum. Quia tunc vel ista Ecclesia latens

latens profitebatur suam fidem, vel non profitebatur. Si profitebatur, ergo non erat latens, sed manifesta: & si manifesta, quomodo nemo advertibat? quomodo non capiebantur & coercebantur ab Inquisitoribus, qui longo tempore ante Lutheri ætatem esse cœperunt in Ecclesia? quomodo nullum vestigium, nulla memoria eorum extat? Si autem non profitebatur fidem, sed verè & propriè latebat (quam partem ipsi defendere coguntur) ergo illa non fuit vera Ecclesia, ac proinde nulla fuit in mundo vera Ecclesia: nam, ut ipsi dicunt, confessio fidei est nota veræ Ecclesiæ, & Rom. 10, *ore confessio fit ad salutem.*

L Prætera, si ita est; quomodo apparente Luthero & Calvino nemo fuit, qui se illis adjungeret, nisi quos ipsi deceperunt? Si multi Lutherani & Calvinistæ latebant, debuissent multi, prædicante Luthero & Calvino, mox cognoscere socios suos, & ad eos currere, etiam non vocati? At non ita factum est; nam omnes ferè qui sunt Lutherani & Calvinistæ, fatentur, se antea fuisse ex nostris, & nihil cogitasse de nova illa doctrina. Imo Lutherus ipse fatetur, se aliquando non fuisse

Lu-

Lutheranum, sed Monachum Catholicum, & Missas celebrâsse per quindecim annos, serio & devotè. Vide librum de Missa angulari, vel Joannem Cochlæum in Actis Lutheri, anni 1534. Item librum secundum Lutheri contra Zwinglium; vel Septicipitem Joannis Cochlæi, cap. 24.

Denique, si ita Ecclesia latuisset, ut Calvinus dicit; sequeretur, Ecclesiam Christi fuisse pejorem & miserio rem omni secta hæretica, & ipso etiam populo Judæorum post ever sionem Herosolymæ; quod certè est blasphemum; cum Deus per Prophetas passim prædicet gloriam Ecclesiæ; & polliceatur, se cum ea semper futurum. Quod illud sequatur, patet. Nam omnis hæretica secta habuit sua templa, suos Episcopos sua Sacramenta; & similiter Judæi, post ever sam Hierusalem, semper habuerunt aliquas Synagogas, ubi liberè exercuerunt suas cæremônias; ut patet ex Gregorio lib. 7 Epist. 5; nec unquam coacti sunt generaliter adorare deos alienos.

At Ecclesia, quàm latentem fingit Calvinus per annos ferè mille, nulla habuit templa, nulla sacra, nullos Episcopos; nec habuit
unum

unum angulum terræ, ubi libere exerceret actus Religionis suæ; & quod pejus est, coacta est servire diis alienis, adorare idola, sacrilegiis communicare; quæ est horribilior captivitas, quam unquam fuerit Judæorum; imo est ista Ecclesia deformior ipsis ruinis Synagogæ.

LI Præterea si alia Ecclesia Christi, præter Catholicam Romanam, semper fuit, licet occulta & latens; edisserant nobis adversarii, quænam illa fuerit, quas mundi partes occupaverit, & adhuc occupet? quos Pastores & Episcopos habuerit, & adhuc habeat? qui Reges & Imperatores illi adhæserint, & adhuc adhæreant? qui hæretici ab illa damnati? quæ Academiæ confirmatæ? quæ templa & monasteria erecta? Dicere enim, in mundo semper extitisse veram Christi Ecclesiam, distinctam ab Ecclesia Romana; & tamen nullos habuisse Episcopos & Pastores, nullas Universitates, nullos Doctores, nulla templa, nullas Religiosas familias, nulla concilia celebrasse, nullas hæreses damnasse; est merum delirium, risu potius quam confutatione dignum.

LII Hinc P.Lessius evidenti dilemmate concludit, nec Religionem Lutheranam, nec ullam aliam hæreticorum sectam, esse veram Christi Ecclesiam. Nam Religio Lutherana vel Calvinistica ante suos authores extitit, vel non extitit. Si non extitit; ergo est plane novitia, ac proinde non potest esse Religio Christi; quæ est antiqua. Si extitit, ergo fuit occulta, ac proinde non potuit esse Christi Religio & Ecclesia: hæc enim est *civitas supra montem posita, quæ abscondi non potest, Matt. 9: hæc est Mons Domus Domini, preparatus in vertice montium, & elevatus super omnes colles, omnibus conspicuus, ad quem fluent omnes gentes, Isa. 2. Hæc est Regnum Christi, diffusum à mari usque ad mare, & à flumine usque ad cardines terræ Psal. 71. Hæc est Mons ille magnus, replens universam terram, Dan. 2. Ecclesia enim Christi, mundo debet esse conspicua; tum ut suo cultu & decore, suisque moribus & externa specie, gentes ad se alliciat; tum ut qui volunt fieri Christiani, sciant, quo se debeant conferre, quos adire, à quibus instructionem petere. Similiter ejus doctrina, & fides manifesta esse debet; alioquin mundo esset*

esset inutilis, nec posset gentes convertere. Unde etiam in maximis persecutionibus numquam ita latuit, quin passim cognosceretur; ut ex historiis Ecclesiasticis constat. Hinc tanta Martyrum multitudo. Deinde, si tot sæculis latuit, indigna prorsus fuit hoc nomine. Quomodo enim dici potest Ecclesia Christi, quæ Christi sinceram doctrinam non audet confiteri? quæ tam pusilli est animi, & ita mortem timet, ut se abdat in tenebras, & tot sæculis non audeat prodire in lucem? denique, quæ tot sæculis non solum se occuluit, & sinceram fidei professionem suppressit; sed etiam professa est fidem falsam, nempe Papisticam; adoravit idola, contaminavit se mille superstitionibus & sacrilegiis? Nam ante Lutherum omnes Christiani exterius in omnibus gerere se debebant ut Catholici, alioquin mox ab Inquisitoribus & Episcopis deprehensi fuissent, & tamquam hæretici puniti. Miserabilior itaque & deformior fuisset Ecclesia Christi ruinis Synagogæ seu sectæ Judaica, quæ semper suas synagogas, & liberam suæ religionis professionem, quibusdam locis habuit; nec coacta est, saltem generatim, ad
ido-

idolorum cultum: miserabilior & deterior
sectis omnibus hæreticis; nulla enim um-
quam secta fuit alicujus nominis, quæ non
sua templa, vel domos religiosas, suos con-
ventus, suos Episcopos, suæ Religionis for-
mam & professionem habuerit, ita ut pas-
sim cognosci posset.

LIII Cum hæretici, his pressi argumen-
tis, non possint assignare Ecclesiam aliquam
visibilem, distinctam ab Ecclesia Pontificia,
in qua semper fuerint Episcopi & Doctores,
& in qua floruerint Universitates, & in qua
celebrata sint Concilia; duo quæsierunt ef-
fugia, satis ridicula, apud Becanum. Primo
namque aliqui fingunt Ecclesiam quamdam,
in cunis jacentem, & vagientē. Ajunt enim,
inquit ille, Ecclesiam Christi aliquot sæculis
tam fuisse corruptam ac vitiatam, ut nulli in
ea fuerint veri fideles, nisi infantes baptizati.
Et sine dubio intelligunt Ecclesiam Roma-
nam seu Pontificiam, quam putant superio-
ribus sæculis penitus defecisse; nisi quod soli
infantes, legitimè in ea baptizati, tamquam
vera ipsius membra, manserint. Miserum
perfugium, & ipsis adversariis perniciosum.
Nam ipsi passim docent, duas esse notas Ec-
clesiæ;

clesiæ; nempe sinceram prædicationē Evangelii, & legitimam Sacramentorum administrationem, ex quibus vera Christi Ecclesia dignosci debet, & sine quibus consistere non possit, ut videre est in Confessione Augustana art. 7, & in Apologia ejusdem, & in Calvino lib. 4 Instit. cap. 1 §. 9, 10, & 11. At hæ duæ notæ non conveniunt Ecclesiæ, in qua soli infantes baptizati sunt; quia soli infantes, nec possunt sincerè prædicare Evangelium, nec legitimâ administrare Sacramenta: ergo Ecclesia, in qua soli infantes sunt, non est vera Christi Ecclesia.

LIV Alii habent aliud effugium. Ajunt, semper in Ecclesia fuisse unum aut alterum, cordatum virum, qui Papæ contradixerit; cujusmodi diversis temporibus fuerunt Wicleff, Joannes Hus, Lutherus, Calvinus. Æque inepte. Nam primo, dicant mihi quis fuerit ille unus, vel illi duo cordati viri, qui ante Wicleffum, per singula superiora sæcula, Papæ contradixerint? Si nesciunt? quare temere affirmant? Si sciunt? edicant eorum nomina, locum habitationis, & cæteras circumstantias. Non poterunt. Secundo, Ecclesia Christi non est deterioris conditionis, quam

quam fuerit Synagoga Judæorum, cum Ecclesia sit domina; Synagoga, ancilla; ad Gal. 4, 22.) At Synagoga numquam fuit tam deserta, ut duo tantum viri in ea reperirentur. Imo, tempore Helix, cum putabatur desertissima, septem millia virorum in eâ reperta sunt, Rom. 9, 4. Cur ergo Adversarii fingunt, Ecclesiam Christi fuisse aliquando tam desertam, ut duo tantum viri in ea reperti fuerint? quod manifeste repugnat Scripturæ, quæ apud Isaiam testatur, Ecclesiam Christi multo fœcundiorẽ & ampliorem fore, quam fuerit Synagoga, Isaiæ 54, 1. Tertio, Donatistæ plus tribuebant Ecclesiæ quam hi faciunt. Nam illi, tametsi dicerent, Ecclesiam toto orbe periisse, & in sola Africa remansisse; non tamen ausi sunt asserere, quod hi asserunt, remansisse aliquando in duobus tantum viris, qui Papæ contradixerint. Si ergo illi, qui melius sentiebant de Ecclesia, quam hi nostri Adversarii sentiunt, nihilominus ab Augustino & aliis Patribus damnati sunt tamquam hæretici; quid de his nostris fieri oportere existimandum est?

CAPUT II.

Secundum caput idem probandi, quia, cum Sectarii fateantur, Ecclesiam Romanam tribus, quatuor, vel quinque seculis veram Ecclesiam Christi fuisse; manifestè demonstratur, illam postea à vera fide, quam ab Apostolis acceperat, non defecisse per apostasiam; per hæresim, vel per schisma.

LV **P**. Martinus Becanus, in compendio Manualis lib. I. cap. 3, n. 24, testatur, hæreticos Lutheranos & Calvinistas, passim asserere, totam Ecclesiam visibilem, quæ primis quingentis annis habuit veram fidem ac Religionem, postea errasse, & multis sæculis usque ad tempora Lutheri in errore perstitisse; vel ut alii loquuntur, totam periisse ac defecisse: non quod perierint aut defecerint homines, ex quibus conflata est Ecclesia visibilis; sed quod defecerit eorum fides & sincera religio. Et Cardinalis Bellarminus, lib. 4 de notis Ecclesiæ cap. 5, affirmat, hæreticos hujus temporis asserere, post primos quingentos annos cœpisse invalescere nostram Religionem, quam ipsi sectam Papisticam

cam vel Pontificiam appellant; tamen quando cœperit absolute, numquam dixisse: & postea subjungit idem Bellarminus; *Passim Calvinistæ & Lutherani, usque ad primos quingentos vel sexcentos annos, extendunt Ecclesiæ puritatem.* P. Leonardus Lessius, in illo præclaro opusculo suo, *Quæ fides & religio sit capeffenda*, in nona consideratione, ratione 1, refert, Lutheranos Doctores, in opere Centuriarum ab ipsis edito, asserere, Ecclesiam Romanam, etiamsi temporibus Apostolorum & aliquando postea fuerit vera Christi Ecclesia, tamen tertio saltem & quarto sæculo cœpisse omnino deficere à fide vera, ac proinde non fuisse amplius veram Christi Ecclesiam; testaturque, hoc passim judicari à Lutheranis, in quibusdam Germaniæ oppidis, cum prægrandibus litteris in frontibus domorum scribunt hæc vel similia verba: *Anno tali illuxit huic urbi verum Evangelium Christi, superstitione depulsâ.* Imo Rex Jacobus, in oratione quam habuit ad supremos Regni Ordinis (Parlamentum appellant) & Wittakerus, in responsione ad secundam demonstrationem Sanderi; Tulkus, in Caput secundum Epistolæ 2 ad Thessalonicenses;

& alii Ecclesiæ Romanæ hostes, & hæresis Calvinianæ & Lutheranæ defensores, aperte fatentur Ecclesiam Romanam primis temporibus *purissimam, celeberrimam, nec non sanctitate & doctrinâ florentissimam extitisse*. Estque res evidentissima; cum Petrus & Paulus Ecclesiam Romanam fundaverint; & suo sanguine illustraverint; & Pontifices, qui Petro successerunt per tria & amplius secula, ut Linus, Cletus, Clemens &c. Sancti sine dubio fuerint.

LVI Dicunt autem Lutherani & Calvinistæ, ita post aliqua sæcula Ecclesiam Catholicam, à Christo supra Petrum fundatam, in doctrina fidei mutatam fuisse, ut Pontifex Romanus conversus sit in Antichristum. Nam Magdeburgenses, centuriâ 7 cap. 1 affirmant, initio anni 600 Papam in Antichristum mutatum esse. Et Lutherus, in supputatione temporum, vult, Sanctum Gregorium fuisse ultimum Papam. Item Theodorus Bibliander, in tabulis suæ Chronologiæ initio anni DC, ponit apparitionem Antichristi, id est Papæ.

LVII Hoc supposito, probò, numquam Ecclesiam Romanam defecisse à vera fide, quam

quam ab Apostolis acceperat; sed quam semel acceperat, semper retinuisse; & sic argumentor. Illa Ecclesia, quæ semel fuit vera Ecclesia, pura & incontaminata, & postea numquam incidit in apostasiam, hæresim vel schisma; semper vera, pura, & incontaminata perseverat Christi Ecclesia. Atqui Ecclesia Romana aliquando fuit vera Christi Ecclesia, pura & incontaminata, & postea numquam incidit in apostasiam, hæresim, vel schisma; ergo Ecclesia Romana semper vera, pura, & incontaminata perseverat Christi Ecclesia. Consequentia est evidens: & major, ex terminis nota. Minor, quoad primam partem, patet ex confessione adversariorum, & est evidens evidentiâ facti; & patet ex Apostolo Rom. 8. *Qui in carne sunt, Deo placere non possunt; vos autem in carne non estis, sed in spiritu & v. 11. Quod si spiritus ejus, qui suscitavit Iesum à mortuis, habitat in vobis, qui suscitabit Iesum Christum à mortuis, vivificabit & mortalia corpora vestra, propter inhabitantem ejus spiritum in vobis.* Item, Rom. 16, 17. *Vestra obedientia in omnem locum divulgata est: gaudeo igitur in vobis.* Quoad secundam partem probatur eadem minor. Primo

que, quod spectat ad apostasiam, manifestissimum est, Ecclesiam Romanam in apostasiam numquam incidisse. Siquidem apostasis, est fidei Christianæ non solum abrenuntiatio, sed etiam vel ipsius tituli Christiani nominis omnimoda abjuratio: evidentissimum autem est, Ecclesiam Romanam numquam abrenuntiâsse fidem Christi, & multo minus abjurâsse titulū nominis Christiani.

LVIII Secundo, Ecclesia Romana non incidit in hæresim. Quia hæresis est, alicui privatæ & singulari opinioni seu errori in fide obstinata adhæsiō, contra generalem & approbatam universalis Ecclesiæ doctrinam. Atqui Ecclesia Romana numquam alicui novæ, privatæ, & singulari opinioni, seu errori in fide, contra generalem & approbatam Ecclesiæ universalis doctrinam adhæsit: ergo non incidit in hæresim. Minor manifesta est. Quia nulla unquam Ecclesia adhæsit alicui novæ, privatæ, & singulari opinioni, discrepanti à recepta totius Orbis universali doctrina; quin ab aliquo œcumenico Concilio, vel à Patribus & Scriptoribus illius sæculi, vel ab aliqua alia legitima potestate, tamquam heterodoxa seu hæretica, fuerit con-

condemnata. Atqui Ecclesia Romana numquam condemnata fuit ab aliquo œcumenico Concilio; nemo antiquorum Patrum adversus illam styllum exacuit: contra vero ad unum omnes pro illa acerrime depugnârunt: nec ulla legitima potestas sive auctoritas afferri potest, à qua vel reprobata vel condemnata, tamquam heterodoxa seu hæretica, fuerit: ergo Romana Ecclesia numquam adhæsit alicui novæ, privatæ, & singulari opinioni, discrepanti à recepta totius Orbis universali doctrina: ergo numquam incidit in hæresim.

LIX Tertio. Numquam Ecclesia Romana incidit in schisma. Quia Schisma nihil aliud est, quam discessio seu separatio ab unitate Ecclesiæ, quo fit, ut vinculum communionis, quo cum Ecclesiæ corpore jungimur & coarctamur, rumpatur necesse sit. Atqui Ecclesia Romana numquam rupit aut dissolvit vinculum communionis cum aliqua priore Ecclesia, nec separavit se ab aliquo corpore fidelium Christianorum: ergo numquam incidit in schisma. Minor manifesta est. Quia impossibile est, ostendere aliquam Ecclesiam vel Christianorum socie-

tatem, à qua discessit vel quam deseruit Ecclesia Romana. Mihi quoque non modo stupendum videtur, verum etiam ridiculum & rationi omnino dissentaneum, quod Ecclesia illa habeatur pro schismatica; cum nulla alia Ecclesia assignari possit præter Romanam, quæ singulis sæculis, ab ipso Salvatoris nostri tempore deductis, permanfit visibilis, à qua illa recessit.

LX Præterea argumentor; Quia si Ecclesia Romana, quæ per aliqua sæcula fuit vera Christi Ecclesia, pura & immaculata in fide, quam ab Apostolis acceperat, & postea conversa est in synagogam sathanæ; & Romanus Pontifex, qui prius fuit verus Christi Vicarius & legitimus Petri Successor, conversus est in Antichristum; necesse est, ut dicamus unum ex duobus; nimirum, vel alicui Pontifici Romano, vero & legitimo, successisse in Cathedra Romana alium, qui non fuit verus Christi Vicarius & legitimus Petri Successor, sed Antichristus; vel aliquem extitisse Pontificem Romanum, qui primo fuerit verus & legitimus Christi Vicarius, & veræ & Apostolicæ fidei professor & custos; postea vero fidem deseruerit, & hæ-

hæreses seminaverit, & ex pastore conversus sit in lupum, & ex Vicario Christi in Antichristum. Non enim est alius modus possibilis, quo verificetur, aliquando Ecclesiam Romanam habuisse verum & legitimum Pontificem, & postea loco Pontificis legitimi habuisse & nunc habere illegitimum, qui verus Pontifex non sit; nisi quia, vel vero & legitimo Pontifici successit illegitimus & falsus; vel quia qui prius fuit verus & legitimus, factus est postea illegitimus & falsus. Atqui utrumque est evidenter falsum, & penitus incredibile. Nam tanta & tam stupenda mutatio, ut Pontifex Romanus ex Vicario Christi mutaretur in Antichristum, & ex custode veræ fidei fieret veræ fidei destructor & devastator, & hæresiarcha, & totius Ecclesiæ everfor; non potuit fieri clanculum, & nullo contradicente, imo & nullo advertente. Quomodo ergo nulla hujus rei in historiis extat memoria? Quomodo non est notata hæc defectio nec observata, nisi post tot sæcula à Luthero & Calvino? Quomodo ignoratur, quisnam fuerit primus Pontifex Romanus, qui apostatavit à vera fide? Nulla umquam in Ec-

D 5 clesia

clesia extitit hæresis, quin sciretur, quis fuerit ejus author, & quo cœperit tempore illam seminare. Sic scimus Arianorum authorem fuisse Arium, Presbyterum Alexandrinum, qui anno 324 cœpit blasphemare contra divinitatem Filii, ejusque cum Patre æqualitatem. Scimus Nestorianæ hæresis authorem fuisse Nestorium, Episcopum Constantinopolitanum, qui anno 431 cœpit docere, in Christo esse duas Personas; & similiter de hæresi Eutychiana, de Pelagiana, & omnibus aliis, scimus authores & tempus in quo cœperunt.

LXI At de defectione Ecclesiæ Romanæ à vera fide numquam Adversarii assignant tempus, in quo incœperit; nec Pontificem, qui fuerit ejus primus author; nec dogma particulare, in quo hæc defectio cœperit; imo dicunt Adversarii, non simul factam mutationem & defectionem Ecclesiæ Romanæ à vera fide; sed paulatim irrepsisse errores, non advertentibus, imo etiam dormientibus Pastoribus; unde illi apud Becanum, in Compendio Manualis lib. 1. cap. 3. n. 64; & apud Bellarm. lib. de notis Ecclesiæ cap. 5, duo statuunt principia; unum est

est Pontificiam Ecclesiam, non subito, sed sensim defecisse à fide; ac tandem omni fide abjecta, adulteram factam esse. Alterum, hanc defectionem initio fuisse latentem & occultam, adeo ut nec aliæ circumstantiæ illius designari potuerint; tandem tamen, post aliquot sæcula, à Luthero & Calvino publice fuisse notatam & deprehensam. Hæc autem sunt omnino incredibilia, & sine ulla veri specie. Quamvis enim dormientibus Pastoribus, possit aliquis impostor, incipere seminare hæreses; at quod illæ seminantur, nascantur, & crescant, nullo resistente, imo nullo advertente, est impossibile. Unde licet Matt. 13 zizania dicantur seminata dormientibus hominibus; at mox nata apparuerunt, & cognita fuerunt. Quomodo igitur hæreses illæ monstruosæ, quas hæretici affricant Ecclesiæ Romanæ, per mille & amplius annos detectæ non sunt; quousque venerunt oculati illi Doctores & novi Apostoli Germaniæ & Genève, Lutherus & Calvinus, qui illas mundo manifestarunt? Sane non solum Pastores, sed etiam Deus valde dormisset, si per tot sæcula non excitasset aliquem, qui his erroribus

bus resisteret, & qui contra illos scriberet: & delendum esset ex Evangelio illud, *Ecce ego vobiscum sum usque ad consummationem sæculi.*

LXII In hoc hæreticorum hujus temporis effugium invehitur, non minus eleganter quam valide, strenuus ille fidei Catholicæ pugil atque defensor in Anglia, Edmundus Campianus nostræ Societatis, qui proprio sanguine veritatem fidei Catholicæ consignavit, in libello illo præclaro decem rationum propositarum in causa Fidei, quibus ad certamen provocavit omnes Academicos Oxoniæ & Cantabrigiæ, in septima ratione, desumpta ex silentio historicorum; *Profecto*, inquit, *si quid in Religione mutatum aut à primis degeneratum sæculis inaudissent, frequentes memorassent: si non frequentes, saltem aliqui: si non aliqui, unus aliquis absque dubio. Nullus omnino, neque benevolus nobis, neque malevolus, non modo quidquam tale prodidit, sed nec significavit. Verbi gratia. Dant nobis Adversarii (nec aliter possunt) fuisse Romanam Ecclesiam aliquando sanctam, Catholicam, tum cum hæc à divo Paulo promeruisset elogia; Vestra fides an-*
nun-

evidenter demonstrata. C. 2 §. 5. 77
nuntiatur in universo mundo, Rom. i. v. 8 ;
Sine intermissione memoriam vestri facio,
Rom. i. v. 9 ; Scio quoniam veniens ad vos ,
in abundantia benedictionis Christi veniam,
Rom. 15. v. 29 ; Salutant vos omnes Eccle-
siae Christi , Rom. 16, v. 17 ; Vestra enim
obedientia in omnem locum divulgata est ; Rom.
15. v. 19 ; tum , cum ibi Paulus in libera
custodia disseminaret Euangelium ; tum , cum
in ea quondam Babylone collectam Ecclesiam
Petrus regeret ; tum , cum ille Clemens ap-
prime laudatus ab Apostolo sederet ad ipsa gu-
bernacula ; tum , cum profani Caesares , ut Ne-
ro , Domitianus , Trajanus , Antoninus , Roma-
nos Pontifices laniarent ; tum etiam , vel Cal-
vino teste , Instit. l. 4. c. 2. n. 3. & in epist.
ad Sadol. cum Damasus , Siricius , Anasta-
sius , Innocentius , clavum tenerent Apostoli-
cum : hoc enim saeculo , nihil adhuc , praeser-
tim Romae , digressos ab Evangelica doctrina ,
liberaliter ille concedit. Quando igitur hanc
fidem , tantopere celebratam , Roma perdidit ?
quando esse desit , quod ante fuit ? quo tempo-
re , quo Pontifice , qua via , qua vi , quibus
incrementis Urbem & Orbem Religio per-
vasit aliena ? quas voces , quas turbas ,
quae

78 *Veritas Religionis Catholica*
qua lamenta progeniit ? Omnes Orbe reliquo
sopiti sunt, dum Roma, Roma inquam, nova
Sacramenta, novum Sacrificium, novum Re-
ligionis dogma produceret ? Nullus extitit Hi-
storicus, neque Latinus neque Græcus, neque
remotus neque citimus, qui rem tantam vel
obscure jaceret in commentarios ?

C A P U T III.

Tertium caput idem probandi, quia cum sine
fide impossibile sit placere Deo, si Ecclesia Ro-
mana à quinto vel sexto saculo veram Christi
fidem perdidit, ut somniant Sæctarii ; eviden-
ter inde infertur, per mille annos nullum ho-
minem salutem obtinuisse, ac proinde damna-
tos fuisse, Benedictum, Malachiam, Bernar-
dum, Dominicum, Franciscum, & alios, quos
ipsi hæretici Sanctos fuisse fatentur. Hoc autem
est evidenter falsum.

KXIII **A**Nte omnia, tamquam primum
principium, supponendum est,
veram Religionem, in qua homines salutem
æternam consequi possint, unicam tantum
esse, non multiplicem. Una enim tantum
est veritas, & ut ait Apostolus ad Ephes. 4,
Unus

Unus Dominus, una fides, unum baptisma; Deus, & Pater omnium. Ex quo infertur primo, omnes Religiones, omnes fidei confessiones, præter unam, esse falsas, noxias, pestiferas, ab autore diabolo, qui est pater mendacii, introductas. Infertur secundo, neminem, qui hanc Unicam non habuerit, salutem eternam consequi posse; & omnes qui extra veram Religionem obierint, in æternum perituros, quantumvis alioqui laudabiliter vixerint. Quod enim Apostolus 1. Corinth. 13. de charitate dixit: Si linguis hominum loquar & Angelorum, charitatem autem non habeam, factus sum velut æsonans aut cymbalum tinniens. Et si habuero prophetiam, & noverim mysteria omnia, & omnem scientiam; & si habuero omnem fidem, ita ut montes transferam; charitatem autem non habuero, nihil sum. Et si distribuero in cibos pauperum omnes facultates meas, & si tradidero corpus meum, ita ut ardeam; charitatem autem non habuero, nihil mihi prodest. Quod, inquam, Apostolus in hoc loco de charitate dixit, potiori jure dicendum est de vera fide seu religione, quæ charitatis & reliquarum Christianarum virtutum est fundamentum.

LXIV

LXIV Quod confirmatur ex verbis Christi Joan. 6, *Nemo potest venire ad me, nisi Pater meus traxerit eum.* Nemo potest venire ad Christum, & cum illo in cœlis regnare, nisi Pater traxerit eum ad Religionem, per cujus professionem & observantiam perventurus est ad Christum. At Pater nequit trahere ad Religionem falsam, cujus non ipse sed diabolus author est; ergo nemo potest venire ad Christum, & cum illo in cœlis regnare, nisi per professionem & observantiâ Religionis veræ. Ratio est, quia Religio, quæ à Deo non est, ad Deum ducere non potest; & quæ à cælo non descendit, non potest ducere in cælum; juxta illud Christi Joan. 3. v. 13. *Nemo ascendit in cælum, nisi qui descendit de cælo, filius hominis qui est in cælo.* Id est, nemo potest ascendere in cælum, nisi qui per veram fidem & charitatem fuerit unitus cum Christo, qui est filius Dei qui descendit de cælo, ut nos sibi unitos & incorporatos, per veram fidem & charitatem, secum duceret in cælum; ubi enim est caput, ibi esse debent membra, ipsi unita per veram fidem & charitatem.

LXV Confirmatur secundo, quia, ut

in-

inquit Apostolus ad Heb. 11. 6, *Sine fide impossibile est placere Deo.* Fides autem illa, sine qua impossibile est placere Deo, debet esse fides vera, & à Deo hominibus data: nam fides falsa, & à Deo non proveniens sed à diabolo, nequit esse necessaria ad placendum Deo. Unde Christus Joan. 3. v. 16, dicebat: *Qui credit in filium, habet vitam eternam: qui autem incredulus est filio, non videbit vitam, sed ira Dei manet super eum.* Quare sicut non potest dari arbor sine radice, nec domus sine fundamento; sic nec salus obtineri potest sine vera fide & religione, quæ est radix & fundamentum hujus spiritualis ædificii. Nemo recipietur à Deo in domo sua cælesti, qui in hac vita non fuerit domus & templum in quo Deus inhabitet, juxta illud Apostoli; *Templum Dei estis vos.* In hoc autem templo fundamentum est fides, spes est veluti paries, & charitas est tectum, ut explicat Augustinus. Ergo impossibile est, ut sine professione veræ fidei & religionis, sit aliquis vere justus & templum Dei, & quod sit in statu salutis.

LXVI Hoc supposito primo principio, ex doctrina hæreticorum evidenter infertur,

per

per mille & amplius annos , nullam fuisse
veram fidem & religionem in mundo ;
quousque in Germania apparuit ille hære-
ticorum novus Apostolus Lutherus ; ac pro-
inde nullum hominem toto illo tempore
salvatum esse. Sequela probatur. Nam quan-
do Lutherus incepit caput efferre , & suos
errores disseminare ; solum erant in mundo
Religio Judaica, Religio Mahumetana , &
Religio Christiana ; nomen autem Religio-
nis Christianæ solum tunc profitebantur
Christiani Pontificii seu Catholici Romani,
qui nimirum tenebant eam fidem, & profite-
bantur eos articulos, quos Sedes Petri seu
Ecclesia Romana docebat , & Pontificem
Romanum agnoscebant ut Vicarium Chri-
sti : & Christiani schismatici, seu Græci qui
separati sunt ab Ecclesia Romana ; & secta
quædam hæreticorum , nempe Hussitarum,
qui scilicet sectabantur errores Joannis Hus
Bohemi, qui damnati sunt in Concilio Con-
stantiensi sub Martino V. anno 1418, ut pa-
tet ex ejus Constitutione *Inter cunctas*, quæ
edita est sacro approbante Concilio, jam ple-
no & legitimo. Manifestum autem est, nec
in Religione Judaica , postquam Christus
venit,

venit , esse salutem : nec esse in Religione Mahumetana, ut demonstravimus in secunda parte Manuductionis ad Conv. Mahum. Præterea certum est, ex confessione ipsorum hæreticorum, contra quos arguimus; homines non potuisse salvari in Ecclesia Græca, postquam per schisma, tempore Photii Patriarchæ Constantinopolitani anno 869, separata est ab Ecclesia Latina, dum in illo schismate duraverunt: duraverunt autem ab illo tempore usque ad an. 1438, quando sub Eugenio quarto Pontifice, & Joanne Paleologo Imperatore, in Concilio Florentino unita est iterum Græca cum Latina, à qua tamen unione cito recessit; & ideo in pœnam pertinacis schismatis, ad quod Græci redierunt, tradidit eos Deus tyrannidi Turcarum, qui armorum vi occupaverunt Imperium Trapezuntinum & Constantinopolitanum, quæ per tot annos in Græcia floruerant.

LXVII Quod certum sit ex confessione ipsorum hæreticorum, non posse Græcos schismaticos in sua Religione salvari, probatur. Quia Græci pertinaciter negant, Spiritum sanctum procedere immediatè à Filio, asserentes procedere à solo Patre : qui est
error

error damnatus in Symbolo Constantino-
politano, quod canitur in Missa; & (ut probat
Cardinalis Bellarminus lib. 2. de Missa cap.
16) est ita antiquum, ut S. Chrysostomus, qui
floruit ad finem quarti sæculi, & obiit anno
Christi 407, illud inseruerit Missæ quam
composuit; ac proinde, asserere, Spiritum san-
ctum non procedere à Filio, est hæresis ma-
nifesta, non solum apud omnes Catholicos,
sed etiam apud Lutheranos & Calvinistas, ut
testatur Bellarm. in libro de notis Ecclesiæ
cap. 9. In Ecclesia ergo Græca, quæ tempore
Lutheri & Calvinii non solum schismatica
erat, per separationem à capite visibili, nempe
à Romano Pontifice; sed hæretica, ob nega-
tam pertinaciter processionem Spiritus san-
cti à Filio, salvari homines non poterant.

LXVIII Nec item salvari poterant in se-
cta Hussitarum; quia extra veram Christi
Ecclesiam nemo salvari potest, ut fatentur
ipsi hæretici; illa autem secta non erat vera
Christi Ecclesia, tum quia inceperat in Bo-
hemia tempore Concilii Constantiensis, ac
proinde non erat Ecclesia vera, quam Chri-
stus supra Petrum fundavit: tum quia Ec-
clesia vera Christi debet, esse Catholica, id
est

est Universalis; illa autem secta solum occupavit exiguam aliquam partem Germaniæ, paucosque habuit sectatores. Denique quia illa secta jam prorsus evanuit, & finita est; vera autem Christi Ecclesia duratura est usque ad finem mundi; ergo illa secta non erat vera Christi Ecclesia, ac proinde in illa salvari non poterant. Ergo si, juxta hæreticos, Ecclesia Romana & Pontificia non est vera Christi Ecclesia; nulla erat vera Christi Ecclesia, quando venit Lutherus, in qua homines possent salvari: nec fuerat per mille & amplius annos; siquidem Ecclesia Romana, à qua apostatavit Lutherus, ex ipsius sententia jam defecerat à vera fide Christi, post quartum vel quintum sæculum, vel saltem post sextum. Ergo nullus homo salutem æternam obtinuit spatium mille annorum: quia extra veram Ecclesiam vera fides esse non potest, nec sine vera fide & vera religione potest salus obtineri.

LXIX Perierunt ergo Benedictus, Malachias, Bernardus, Dominicus, & Franciscus; perierunt Xaverius, Petrus de Alcantara, & Theresia, qui floruerunt in Ecclesia Romana post sextum sæculum; hos au-

autem Sanctos fuisse, hæretici ipsi fatentur. Nam Totila, quamvis hæreticus Arrianus esset, summo honore affecit S. Benedictum; & tamquam verum Dei servum & Prophetam veneratus est, ut scribit S. Gregorius Lib. 2. Dialogorum cap. 15. Calvinus etiam Institut. cap. 10. §. 17. vocat Bernardum *pium scriptorem*: nemo autem pius sine vera fide & sanctitate esse potest. Philippus etiam Melanchton in Apologia art. 5. & 27. Confessionis Augustanæ, vocat Sanctos, Bernardum, Dominicum, & Franciscum; quod idem facit Lutherus, in libro de abroganda Missa prope finem. Ut Sanctum etiam venerantur Franciscum Xaverium ipsi hæretici: sic enim de illo Richardus Haclutus Minister Anglicus scribit, in 2 volumine de primis navigationibus part. 2. pag. 8. *Pius ille Confessor, Indorum, in iis quæ ad Religionem pertinent, Institutor Franciscus Xavier, post multos exantlatos labores, post injurias & calamitates magno animo superatas, omnibus benedictionibus plenus obiit anno 1552; postquam multa hominum millia ad fidem Christi perduxisset. De hoc viro sancto, virtutibus ejus & mirabilibus, omnes recentes Indorum*
hi-

historia testantur. Hæc ille, vi manifestæ veritatis, coactus est eloqui; suffraganturque Hollandorum eo navigantium de ejusdem sanctitate & prodigiis testimonia.

LXX Cum ergo evidenter sit absurdum, & penitus incredibile & impossibile, viros ejusmodi, quos Deus tot signis & miraculis illustravit, & qui tanta pro ejus gloria amplificanda passi sunt, & tam ardentem ipsum amârunt, in æternum periiſſe; consequens est, esse evidenter falsum, Ecclesiam Romanam non perseverâſſe in vera fide & religione, quam in primis quatuor vel quinque sæculis, ex confessione Adversariorum, puram & illibatam servavit. Quis non miretur, homines judicio aliquo pollentes, potuisse sibi persuadere, per mille & amplius annos, mundum fuisse sine vera Christi Ecclesia? Quid hoc est, nisi negare Dei providentiam erga hominum salutem? Quomodo verificari potest, Deum serio velle homines salvos fieri, si permisisset mundum per mille & amplius annos perseverâſſe sine vera fide & religione; in qua homines salvari possent? Si nulla fuit vera in mundo Christi Ecclesia per mille annos, promptum erit cum Tertulliano, libro
de

de præscriptionibus contra hæreticos, ab absurdo sic inferre: *Perperam ergo tot sæculis euangelizatum, perperam creditum, tot millia millium perperam tincta, tot opera fidei perperam administrata; tot virtutes, tot charismata perperam operata; tot sacerdotia, tot ministeria perperam functa; tot denique martyria perperam coronata.* Quis autem non videat, quam hæc omnia sint incredibilia, absurda, & blasphema? quam totius orbis, & omnium sæculorum iudicio contraria? Manifestum ergo est, Ecclesiam Romanam numquam veram fidem & religionem perdidisse: quia qui hoc concesserit, cogitur devorare hoc absurdum, nempe, per mille & amplius annos nullum hominem salutem æternam obtinuisse, Deumque conservasse mundum per tot sæcula, ut omnes homines in infernum detruderet.

LXXI Ad fugiendum absurdum illatum, quod scilicet sequeretur, damnatos fuisse viros illos eximios, qui etiam ipsorum hæreticorum iudicio Sancti fuerunt; dicere quis poterit, illos fuisse excusatos per ignorantiam. Sed contra. Quia ignorantia non excusat, nisi in iis, quæ sunt tantum necessaria necessitate

cessitate præcepti; non autem in iis, quæ sunt necessaria necessitate medii; quale est colere & profiteri veram religionem; quia sine fide & vera religione impossibile est aliquem salvari. Deinde si vera fuerint, quæ sectarii dicunt de Ecclesia Romana; essent inexcusabiles, qui illi adhærerent; quia nimirum adhærerent *Meretrici Babylonica* (sic enim illi vocant Ecclesiam Romanam) & essent Ministri & instrumenta primaria Antichristi; essent idololatræ, colentes creaturam pro Creatore, nimirum panem & vinum loco Christi in Eucharistia. Nulla autem est ignorantia, qua valeant ista excusari. Fuissent ergo omnes illi impii, & æterno igne digni. Quia, homines adulti & baptizati, si gloria æterna non fruuntur, necesse est ut in ignem æternum mittantur: unum enim ex illis duobus extremis, Matt. 25, 46, *& ibunt hi in supplicium æternum, iusti autem in vitam æternam*, illis competere debet.

CAPUT IV.

Inpugnatur effugium quorundam Protestantium, qui cum absurdum capituli præcedentis devorare non audeant, dicunt, posse quemlibet Christianum in sua religione, & fide salvari; v.g. Lutheranum in sua, similiter Calvinistam & Pontificium: atque apertè demonstratur, si semel in Ecclesia Romana reperitur salvatio, illam reperiri non posse in secta Lutherana vel Calviniana, nec in ulla alia, negante aliquem ex articulis, quos Ecclesia Romana credendos proponit.

LXXII *P*ater Richardus Arsdekin, in sua Theologia tripartita parte prima cap. 2. art. 1, testatur Serianum & plures, præsertim in Hollandia & Germania; & nuper in Anglia Thomam Hobbesium in elementis Philosophicis, docuisse, quemlibet Christianum posse in sua fide & secta salvari. Et P. Leonardus Lessius, in Appendice Consultationis de religione & fide capeffenda, duas hac de re instituit quæstiones. Prima, *utrum quisvis in sua fide ac religione salvari possit?* & circa hanc, inquit: *Multi hoc tempore*

tempore sentiunt,quemlibet in sua fide salvari posse; ac perinde ad salutem sufficere, credere in Deum, & nemini facere injuriam. Secunda quæstio, Utrum si fides Christi sit necessaria, ipsa per se sufficiat; an vero aliquid aliud credere oporteat? id est, Utrum sufficiat ad salutem credere in Christum, eumque pro peccatis esse mortuum, etiamsi alia nolimus credere? Et post quæstionis propositionem subiungit: Plurimi, præsertim ex plebe, id satis esse existimant, modo ea, quæ de Deo & Christo habentur in Symbolo Apostolorum, credantur; cetera omnia putant adiaphora, & quemlibet de illis posse credere, prout ei bona fide videtur credendum; Symbolum autem à quovis credi volunt juxta sensum, qui cuilibet videtur optimus. Itaque statuunt, quemlibet, qui Christum confitetur, in sua fide salvari posse; sive sit Papista, sive Lutherista, sive Calvinista sive Anabaptista, sive alterius sectæ. Omnes enim hi tenent idem caput, quod est Christus; omnes eidem innituntur fundamento, quod est Christus Iesus: itaque à salute excidere non possunt, etiamsi in aliis dissentiant. Hinc aliqui potentes, qui istis novis Religionibus utuntur ad stabilendum & amplificandum suum imperium,

plurimum laborant, ut ex Lutheranis & Calvinistis unam Ecclesiam conficiant; & persuadere nituntur, inter eos non esse discrimen, nisi in nescio quibus apicibus & rebus adiaphoris. Quia res ista est magni momenti, utrumque errorem in hoc Capite impugnabo.

§. I.

Demonstratur esse evidentem errorem contra lumen rationis, quod unusquisque possit salvari in sua fide & religione, videlicet Mahumetanus in sua, Iudeus in sua, & Christianus in sua.

LXXIII Cardinalis Bellarminus, lib. de notis Ecclesiæ cap. II, nota octava, probat, ad veram Ecclesiam, in qua homines salvari possint, requiri, quod nihil contineat falsum quoad fidei doctrinā, nihil injustum quoad doctrinam morum. Religio namque illa, quæ vel aliquod dogma falsum credit, vel aliquid injustum præcipit, nequit esse à Deo; ac proinde nequit esse talis, ut in illa homines salvari possint. Et ex hac nota dicit evidenter ostendi, nullam esse veram Ecclesiam nisi nostram. *Nulla enim, inquit, est*

est secta, vel Paganorum, vel Philosophorum, vel Iudaorum, vel Turcarum, vel Hæreticorum, quæ non contineat aliquos exploratos errores, & rectæ rationi manifestè contrarios. Quod ipse probat, discurrendo per singulas sectas; & postquam id probaverat de Philosophis & Paganis, subjungit: De Mahumetanis idem patet ex Alcorano: nam capite secundo docet, omnes salvari in suis Legibus, si eas servant, Iudæos, Christianos, Turcas. Et postea addit alios crassos & manifestos Alcorani errores; de quibus nos latè egimus prima parte Manuductionis ad conversionem Mahumetanorum, Nunc satis est scivisse, esse doctrinam Alcorani, quod unusquisque salvari possit in sua lege & religione.

LXXIV Hunc esse evidentem errorem, quo convincitur, Alcoranum non esse legem Dei, nec librum à Spiritu sancto dictatum, sed ex suggestionem diaboli ab illo insigni seductore Mahumeto compositum, ad comparandum sibi imperium, sepè disputans cum Mahumetanis, luce meridianâ clarius ostendi; ut patebit legenti secundam partem Manuductionis ad conversionem Mahumetanorum lib.2 c.3. Hic sufficiat rationem de-

monstrativam insinuare. Quia implicat, ut leges seu religiones, quoad doctrinam fidei, quam credendam proponunt, invicem inter se oppositæ, sint omnes veræ; sed necesse est, ut vel omnes sint falsæ, vel una sola sit vera, & reliquæ ipsi oppositæ sint falsæ. Id quod Tullius lib. I de natura deorum scitè observavit. Nam cum retulisset varias & inter se oppositas Philosophorum opiniones circa naturam deorum, subjunxit: *Quorum opiniones, cum tam varia sint, tanque inter se dissidentes; alterum profecto fieri potest, ut earum nulla; alterum certe non potest, ut plus unâ vera sit.* At Religio Christiana, Judaica, & Mahumetana sunt inter se omnino oppositæ quoad doctrinam fidei; siquidem Religio Christiana proponit credendum, tamquam articulum fidei, mysterium Trinitatis personarum in Unitate essentiæ; proponit credendum, Christum esse non solum Sanctum, sed Sanctum Sanctorum, & Filium Dei naturalem, verumq; Deum, & Messiam in lege veteri promissum. At Judæi & Mahumetani conveniunt inter se in negando mysterio Trinitatis, & in neganda Divinitate Christi, licet ex diverso motivo: nam Judæi perfidi credunt, Christum non esse Messiam,

promissum in lege veteri; nec fuisse virum sanctum, sed seductorem: at Mahumetani, tamquam articulum fidei habent, Christum fuisse Prophetam sanctissimum, & Messiam promissum Judæis in Lege antiqua, ut dixi in Manuductione ad Conversionem Mahumetanorum parte 2 lib. 2 c. 5. Evidens ergo est, has tres Leges esse inter se oppositas in doctrina fidei. Ergo evidens est, non omnes illas esse veras. Ergo evidens est, vel omnes esse falsas, vel ex illis unam solam esse veram, & reliquas ipsi oppositas esse falsas. Ergo evidens est, non esse salvationem in illis tribus Religionibus: nam evidens est, Religionem falsam non esse datam à Deo; & evidens est, in Religione non datâ à Deo, sed à diabolo inductâ, non posse homines salvari; ut constat ex dictis capite præcedenti, & à nobis probatum est secunda parte Manuductionis ad conversionem Mahumetanorum lib. 2 cap. 3. Ergo est manifestus & evidens error, dicere, quod *unusquisque potest salvari in Lege, Iudæus in sua, Mahumetanus in sua, & Christianus in sua.*

LXXV Ex vi hujus argumenti præcise sumpti non probatur, homines salvari in

Religione Christiana; sed evidenter ostenditur, non posse salvari in Mahumetana, vel aliqua alia, quæ continet tam crassum & evidentem errorem; nec in Judaica post adventum Christi; cum illa contineat manifestos errores, ut probat Bellarminus lib. de notis Ecclesiæ nota 8. cap. 11. Sed ad probandum salvari homines in Religione Christiana, assumendum est aliud principium, quod est evidens; nimirum, dari Deum, & Deum habere providentiam hominum; illosque creasse, ut ipsi serviant, debitumque illi cultum exhibeant. Frustra enim fuisset condere hominem rationis participem, nisi eo fine, ut Conditori suo debitum cultum persolveret. Evidens ergo est, Deum modo habere, & semper in mundo habuisse aliquam veram Legem, per cujus observationem homines debitum Deo cultum exhiberent, & finem felicitatis æternæ consequerentur, ut probavi parte prima Manuductionis ad conversionem Mahumetanorum, lib. 2. cap. 2. §. 2. & 3. Hoc autem principio stabilitò, evidenter demonstratur, Religionem Christianam esse veram. Nam tres solum sunt religiones, vel sectæ, quæ unitatem

tatem Dei agnoscunt; nempe Religio Christiana, secta Mahumetana, & secta Hebræorum: aliqua ergo illorum est vera Religio, in qua homines salvari possint. At evidens est, nec Mahumetanam sectam, nec Hebraicam esse veram Dei Religionem: ergo evidens est, solam Christianam esse veram, solamque Ecclesiam Catholicam esse veram Dei Ecclesiam. Ut enim concludit Bellarminus, libro illo de notis Ecclesiæ nota octava cap. 11, *Ecclesia nostra Catholica nullum errorem, nullam turpitudinem, nihil contra rationem docet, etsi multa supra rationem; proinde sola est absolute sancta, eique soli convenit, quod in Symbolo dicimus; Credo sanctam Ecclesiam*: quam rem ostenderunt adversus Paganos Justinus in utraque Apologia; Tertullianus in Apologet. capite 36. & sequentibus; Ambrosius libro primo, secundo, & tertio contra gentes; Minutius Felix in Octavio; Augustinus in libris de Civitate Dei: contra Paganos autem & hæreticos omnes, idem ostendit accuratissime beatus Thomas, in libris contra gentes.

LXXVI Concludamus igitur cum S. Au-

E 5 gu-

gustino, libro secundo de Civitate Dei, capite vigesimo octavo: *Nihil in Christianis Ecclesiis turpe & flagitiosum spectandum imitandumque proponitur, ubi veri Dei aut præcepta insinuantur, aut miracula narrantur, aut dona laudantur, aut beneficia postulantur.* Et libro vigesimo secundo, capite septimo; *Persuadebatur veritas, nova consuetudini, sed non contraria rationi.*

LXXVII Deinde demonstratur, falsum esse, quod unusquisque possit salvari in sua fide. Ut enim sapienter inquit P. Lessius, *si quilibet, etiam Turca vel Iudæus, in sua fide salvari potest; ergo frustra Apostoli & sancti Patres tantopere in fide Christi asserenda laborarunt; frustratot Martyres per omnia tormentorum genera sanguinem & vitam pro ea profuderunt: poterant enim ab hac doctrina & professione absque salutis dispendio abstinere, & confessione unius Dei cum Iudæis esse contenti.* Addo: Ergo frustra Deus factus est homo; frustra tot miracula patravit, ut Messias & Salvator mundi crederetur; frustra crucifixus & mortuus est: nihil enim horum ad salutem hominum erat necessarium: satis erat mittere per orbem prædicatores, qui fidem unius Dei mortalibus persuaderent.

§. II.

*Ostenditur ex Apostolo, non posse ullum nunc
salvari sine fide in Christum.*

LXXVIII **H**oc modo ratiocinatur Apostolus ad Galatas secundo, cum ait: *Si per Legem iustitia: ergo gratis Christus mortuus est: hoc est, si iustitia potest obtineri per cognitionem unius Dei & Legis observationem; frustra Christus mortuus est; nimirum, quia minime salutis nostræ mors ejus erat necessaria. Unde Cardinalis Bellarminus, lib. 2. de pœnit. cap. 2, dicebat: Lex vetus, ut à nova distinguitur, non habet promissionem gratiæ, nec ejus opera Deo sunt grata. Nam si ex Lege esset iustitia, Christus gratis mortuus esset, ait Apostolus ad Galat. 2: & qui operatur, nimirum sine gratia, quæ propria est Testamenti novi, habet gloriam, sed non apud Deum, inquit idem Roman. 4. & idoneos nos fecit ministros novæ Testamenti, non littera, sed spiritu. 2. Corint. 3: ubi littera Legis, sine spiritu Evangelii, tantum abest, ut vitam adferre dicatur, ut etiam dicatur occidere. Hactenus Bellarminus.*

nus. Certissimum ergo est ex Paulo, neminem post adventum Christi salvari posse per observationem Legis Mosaicæ; sed necessariam esse fidem Christi ad justificationem & ad salutem. Unde idem Apostolus, eodem capite secundo epistolæ ad Galatas vers. 16, dicebat: *Scientes autem, quod non justificatur homo ex operibus Legis, nisi per fidem Iesu Christi; & nos in Christo Iesu credimus, ut justificemur ex fide Christi, & non ex operibus Legis: propter quod ex operibus Legis non justificabitur omnis caro.* Quid clarius? Absurdum ergo est existimare, quod post adventum Christi possit aliquis salvari sine fide in Christum?

LXXIX Quod amplius urgetur. Nam Paulus invehitur, cap. 3 epist. ad Galatas, in Galatas, eo quod dicerent, ex operibus Legis posse homines justificari, & Spiritum sanctum accipere: & sic illos carpit: *O insensati Galatæ, quis vos fascinavit non obedire veritati, ante quorum oculos Iesus Christus proscriptus est, in vobis crucifixus? Hoc solum volo à vobis discere: ex operibus Legis spiritum accepistis, an ex auditu fidei? Sic stulti estis, ut cum spiritu cæperitis, nunc carne con-*
sum-

evidenter demonstrata. C. 4 §. 2. 101
summemini? Et mox: Qui ergo tribuit vobis
spiritum, & operatur in vobis virtutes; ex ope-
ribus Legis, an ex auditu fidei? Sicut scriptum
est; Abraham credidit Deo, & reputatum est illi
ad justitiam. Cognoscite ergo, quia qui ex fide
sunt, ii filii Abraham. Providens autem Scriptu-
ra, quia ex fide justificat gentes Deus; prænun-
tiavit Abraham, quia benedicentur in te omnes
gentes. Igitur qui ex fide sunt, benedicentur
cum fidei Abraham. Quicumque enim ex ope-
ribus Legis sunt, sub maledicto sunt; scriptum
est enim &c. Ac mox: Quoniam autem in Lege
nemo justificatur apud Deum, manifestum est;
quia justus ex fide vivit, Et post aliqua: Sed
conclufit Scriptura omnia sub peccato, ut pro-
missio ex fide Iesu Christi daretur credenti-
bus, &c.

LXXX Ex quibus verbis constat, Paulum
intensatos fascinatosque appellasse eos, qui
putabant, justificationem vel salutem ex Lege
Mosaica, ac ex operibus in Lege illa præscri-
ptis haberi posse sine fide. Ergo manifestum
est, Apostolum prædicasse Galatis, observa-
tionem Legis Mosaicæ non sufficere sine fide
Christi, ad justificationem & salutem. Cum
ergo indubitatum sit, Christianis omnibus,
le-

Legem veterem Judæorum à Deo datam fuisse, & nullam aliam ante adventum Christi fuisse illa sanctiorem & valentiorē ad justificationem & salutem; & certum sit, Paulum asserere, opera illius Legis non sufficere sine fide, ad justificationem & salutem; consequens est, ut ex mente Pauli nullus possit salvari sine fide in ulla Lege. Unde falsissimum est & contra Paulum, asserere, quod, post adventum Christi & prædicationem Evangelii, possit quis salvari, sine fide supernaturali & divina, per observationem solius Legis naturalis. Ergo est aperte contra Paulum dicere, quod unusquisque in sua fide & lege possit salvari, quandoquidem Paulus aperte docet, opera Legis Mosaicæ, quæ sancta erat, & à Deo collata fuit, non sufficere ad salutem, sed necessariam esse fidem Christi.

LXXXI. Ubi adverte, Galatas deceptos hac cogitatione, quod Lex Mosaica data fuisset à Deo, & esset in se sancta; existimasse, adhuc post adventum Christi esse necessariam ejus observationem, ad justificationem & salutem; nec posse aliquem, per solam fidem Christi & observationem Legis Evangelicæ,
ju-

justificari, & salvari, nisi simul observaret Legem Moyfis. Hunc errorem ita impugnat Apostolus, ut nec in totum, nec in partem admittat opera Legis, ut necessaria ad salutem; & ideo, ad Rom. 3 v. 18, ait: *Arbitramur, hominem justificari per fidem sine operibus Legis;* & ad Ephes. 2 v. 5, *Salvati estis per fidem, non ex operibus.* Quibus verbis significat, nec Judæos, ex nuda observatione Legis Mosaicæ; nec Gentiles, propter bona opera ante fidem susceptam patrata, justitiam à Deo consecutos esse, aut consequi potuisse. Ratio est; quia Lex Mosaica, quamvis bona & sancta, erat solum umbra & figura Legis Evangelicæ, & adveniente Christo cessare debuit, quoad omnia præcepta ceremonialia & judicialia, & quoad Sacramenta peculiaria illius Legis, quæ præfigurabant Sacramenta novæ Legis, ut explicavimus 2 part. Manuductionis ad Conv. Mah. lib. 3 cap. 12. Et ideo idem Apostolus ajebat. *In Christo Iesu nec circumcisio, nec præputium aliquid valet, sed nova creatura,* ad Gal. 6 v. 15. Id est, nec Lex Mosaica, in qua circumcisio præcipitur, nec ulla alia, in qua circumcisio non postulatur, sed observatur integre retento præputio; aliquid valet
ad

ad justificationem & salutem, postquam Christus venit, & pro hominibus mortuus est; sed requiritur, quod homo per Baptismum fiat nova creatura; & quod, postquam per Baptismum renatus & justificatus est, novam vitam instituat; secundum illud ejusdem Apostoli, *Eratis aliquando tenebrae, nunc autem lux in Domino; ut filii lucis ambulate.* Ut enim exponit Bellarm. lib. 2. de poenit. cap. 5, sensus illorum verborum, *In Christo Iesu nec circumcisio, &c.* est iste, *is, qui sunt in Christo Iesu jam per Baptismum renati & justificati, nova vita necessaria est; sive* (ut ibidem ipse loquitur) *fides, quae per dilectionem operatur; ut nimirum iuste, sobrie, & pie vivant in hoc seculo; neque periculum ullum imminet, si praeputium gerant, neque utilitatem ullam poterit afferre circumcisio.*

LXXXII. Quare idem Apostolus, cap. 3, ad Galat. v. 21, dicebat: *Si data esset Lex, quae posset vivificare, vere ex Lege esset iustitia. Sed conclusit Scriptura omnia sub peccato, ut promissio ex fide Iesu Christi daretur credentibus. Prius autem quam veniret fides, sub Lege custodiebamur conclusi, in eam fidem quae revelanda erat. Itaque Lex noster paedagogus fuit in*
Chri-

Christo, ut ex fide justificemur. At ubi venit fides, jam non sumus sub pedagogo: omnes enim filii Dei estis per fidem; quæ est in Christo Iesu. Quicumque enim in Christo baptizati estis, Christum induistis.

LXXXIII. Itaque Lex vetus talis non erat, ut posset sine fide justificare; & propterea Evangelista Joannes, cap. 1, 17, agebat: Lex per Moysen data est, gratia & veritas per Iesum Christum facta est. Et ideo, ut ait Augustinus, Lex prius jubebat, sed non juvabat; post Christi adventum, & jubet, & juvat. Consultantur, quæ diximus 2 p. Conv. Mahum. lib. 3 cap. 12: quam veritatem declarans Concilium Tridentinum Sess. 6 cap. 7, de fide loquens, inquit: *Sine qua nullumquam contigit justificatio.*

§. III.

Excluditur error hæreticorum, asserentium, solam fidem in Christum justificare.

LXXXIV **F**ides Catholica, non solum declinat errorem illum hucusque impugnatum, quod scilicet sine fide in Christum possit quis justificari & salutem obtinere; sed errorem alium, huic contrarie op-

op-

oppositum, hereticorum hujus temporis; qui ita extollunt fidem in Christum, ut existiment, illam solam justificare & salvare; bona autem opera, vel esse nulla, vel nihil ad justitiam & salutem conducere; & in confirmationem sui erroris abutuntur testimonio Apostoli, affirmantis, justificari hominem per fidem. Ut enim declarat Concilium Tridentinum Sess. 5. cap. 8. *Cum Apostolus dicit, justificari homines per fidem & gratis; ea verba in eo sensu intelligenda sunt, quem perpetuus Ecclesia Catholica consensus tenuit & expressit; ut scilicet per fidem justificari dicamur, quia fides est humana salutis initium, & radix omnis justificationis, sine qua impossibile est placere Deo, & ad filiorum ejus consortium pervenire.* Hæc autem fides, quæ ad justificationem est necessaria, in parvulis & infantibus, qui baptizantur ante usum rationis, est solum habitualis, & per baptismum infunditur; nec requiritur fides actualis in ipsis, ut somniavit Lutherus; in eo fundans suum errorem, quod alioqui illuderetur Sacramentis sacrilego mendacio, dum respondetur pro infante, *Credo*. Ut enim sapienter respondet Bellarminus, lib. 1. de Sacramentis cap. 11, Nullum est ibi men-

mendacium; nam qui respondet, *Credo*, non significat infantem credere proprio actu, sed alieno. Ut enim exponit S. Augustinus Serm. 10, de verbis Apostoli, *Accommodat Mater Ecclesia infantibus aliorum pedes, ut veniant; aliorum cor, ut credant; aliorum linguam, ut confiteantur.* Idque jure merito. Cum enim sint maculati per peccatum, ab ipsis propria voluntate non commissum, sed contractum ex Adamo, licet proprie ipsis inhærens; congruum est, ut qui sine proprio actu sunt infecti, sine proprio actu possint justificari.

§. IV.

Quanam sit fides Christi requisita in adultis ad salutem.

LXXXV **I**N adultis autem necessaria est ad justificationem fides actualis. Unde, quando adultus baptizatur, vel post Baptismum justificatur; necessario debet præcedere in ipso actualis fides, priusquam infundatur ipsi gratia justificans. Fides autem ista actualis, ad justificationem prærequisita, est fides illa, quâ credimus in Deum, & in filium ejus Jesum Christum, juxta illud

lud Christi Joan. 17, 3: *Hæc est autem vita æterna, ut cognoscant te, solum verum Deum, & quem misisti Iesum Christum*: id est. Hæc est causa vitæ æternæ, & hæc solâ viâ obtinenda est, nempe, fide Divinitatis & mysterii Incarnationis; ut credatur Deus, & credatur Christus; ut ad litteram exponit Cardinalis Toletus. Articulorum enim fidei hæc summa est, nempe veritas Divinitatis, quæ in Unitate essentiæ identificat Trinitatem Personarum; & mysterium Incarnationis Christi, per quem redemptio perfecta est, quorum sine fide nemo vitam æternam obtinere potest. Ad salutem enim requiritur, quod cognoscamus finem nostrum ultimum, qui est Deus unus & trinus: & Mediatorem Iesum Christum, cujus passionem & mortem Deus elegit, ut medium necessarium ad hominum salutem.

LXXXVI Unde, sicut nemo potest salvari, qui ignoret Deum & beneficium creationis, & ideo nullus idololatra salvari potest: ita nullus potest salvari, qui ignoret Christum & beneficium redemptionis: siquidem redemptionis beneficium est longè majus & mirabilius, magisque ad gloriam Dei

Dei & Christi pertinet, & ampliorem à nobis gratitudinem & servitutem postulat. Scripturæ enim apertè dicunt, Christi redemptionem nobis non applicari nisi per fidem ejusdem, ut patet ex illo Rom. 3 v. 22: *Iustitia autem Dei, per fidem Iesu Christi, in omnes qui credunt in eum, & v. 25 Quem proposuit Deus per fidem in sanguine ipsius.* Et ex illo Joan. 10: *Hæc scripta sunt; ut credatis, quia Iesus est Christus Filius Dei, & ut credentes vitam habeatis in nomine ejus.* Et ex illo Christi, Joan. 11: *Omnis qui vivit, & credit in me, non morietur in æternum.* Et ex illo Joannis, epist. 1 cap. 4: *In hoc cognoscitur Spiritus Dei. Omnis spiritus, qui confitetur Iesum Christum venisse in carne, ex Deo est.* Et ex illo Christi, Joan. 3: *Exaltari oportet Filium hominis, ut omnis qui credit in eum, non pereat, sed habeat vitam æternam; id est, oportet Christum crucifigi.* Idem constat ex verbis, quæ Christus ipse apparens Saulo dixit Act. 16: *Nunc ego mitto te ad gentes, aperire oculos eorum, ut convertantur à tenebris ad lucem, & de potestate sathana ad Deum; ut accipiant remissionem peccatorum, & sortem inter Sanctos, per fidem, quæ est in me.* Idem constat ex actibus

bus Apost. cap. 4, à v. 10 ad 13; & Apocal. 1, à v. 5 ad 9; & Apocal. 7 v. 14.

LXXXVII Idque ratio ipsa postulat, ut expendit optimè P. Lessius. Quia ut efficiamur participes alicujus magni & insoliti beneficii, omnis ratio postulat, ut agnoscamus beneficium & benefactorem; eumque, ut par est, cum omni gratiarum actione honoremus: hanc enim gratitudinem ipsa conditio beneficii & benefactoris postulat. Itaque cum beneficium redemptionis sit adeo magnum & exoticum; & ipse, qui illud contulit, adeo sublimis & eximius; & modus, quo contulit, adeo mirabilis; operæ pretium erat, hæc omnia à nobis cognosci; ne prorsus ingrati in tantum benefactorem viveremus & moreremur, neve pro amore odium, pro benedictione maledicta; pro gratiarum actione blasphemias ei more Judæorum rependeremus. Absurdum itaque est, eos qui in Christum non credunt, salutis per Christum nobis paratæ ponere participes.

LXXXVIII Ad fidem in Deum & Christum pertinent mysteria omnia contenta in Symbolo, quæ explicitè credere debemus; & implicitè reliqua omnia, quæ Ecclesia sancta

Ca-

Catholica credenda proponit. Et hæc est fides necessaria ad salutem; non autem illa fides specialis, quam Lutherus & Calvinus fidem justificantem appellant; cum potius sit superba præsumptio, & manifestus error contra lumen rationis. Ut enim inquit Bellarm. lib. de notis Ecclesiæ cap. II, in quo probat, omnes sectas, oppositas Religioni Catholicæ, continere aliquem vel aliquos manifestos errores contra rationem; & errorem manifestum designans in sectis hæreticorum nostri temporis, inquit: *Sectarii nostri temporis docent, omnem hominem justificari solâ fide speciali, quâ quisque certo credit, se propter Christum coram Deo esse justum; quod cum quolibet paradoxo comparari potest. Non enim est id supra vel præter rationem, sed planè contra omnem rationem. Quæro enim: cum incipio credere me esse justum; vel sum justus, vel injustus? Si justus, igitur justificor per fidem illam, quæ est posterior meâ justitiâ; si injustus, ergo ista fides est falsa; ergo non est fides divina justificans; nisi dicamus, homines justificari per mendacium.*

§. V.

Solvitur objectio, contendens non esse necessariam fidem explicitam in Christum ad salutem; & exponitur, quomodo Deus omnibus distribuat auxilia sufficientia ad perveniendum ad hanc fidem.

LXXXIX **S**Ed objicies: Potest quis educari inter gentes, ad quas numquam pervenerit ulla Christi notitia; imo educari in sylvis, ubi à nullo possit audire mysterium Incarnationis. Ille autem, sic educatus, potest sequi ductum naturalis rationis, in appetitu boni & fuga mali; & sic servare legem naturalem, sine peccato ullo mortali, præsertim si exiguo tempore post usum rationis moriatur. Ergo potest sine fide Christi salvari: nam huic facienti, quod in se est, Deus gratiam salvationis non negabit. Verum, hoc argumentum nimis probat; nimirum, ad salutem non esse necessariam fidem superuaturalem & infusam, contra illud Pauli, *Sine fide impossibile est placere Deo*: & contra illud ejusdem ad Hebr. II, *Accedentem ad Deum oportet credere, quia est,*

est, & quod inquirentibus se remunerator sit. Probatur sequela. Quia *fides ex auditu*; Rom. 10. 17. Ergo nullus potest credere, nisi audiat res fidei. Quomodo autem audiet, si non sit prædicator, qui proponat? *Quomodo audient sine prædicante?* Rom. 10. 14. Ergo fidem supernaturalem nullus potest adustus obtinere, nisi audiat prædicatorem veræ fidei. Ergo, si potest salvari is, cui numquam Christus prædicatus est; potest salvari is, cui numquam vera fides veraque religio prædicata est.

XC Respondeo ergo; fieri non posse, ut homo vivens inter gentes, quibus numquam annuntiatus est Christus, se immunem à peccato servet; nisi ex gratia Dei, illi collata propter merita Christi, vi cujus efficaciter moveatur ad observandam legem naturalem. Cui autem Deus ob merita Christi hanc gratiam præstat, ut vivens inter gentes abstineat ab omni peccato mortali; & potens transgredi præcepta Decalogi, quæ sunt de lege naturæ, non transgrediatur; eidem infallibiliter gratiam fidei in Christum dispensabit, vel disponendo ut abducatur captivus in terram Christianorum; vel illuc aliqua

F

fin-

singulari providentia destinando prædicatorem, qui illi annuntiet Christum; vel illum interne illuminando. Et hæc est legitima & solida solutio, ad quam recurrit Theologorum Princeps D. Thomas. Nam 2. 2. q. 2. art. 7. & 8. docet, post tempora gratiæ revelatæ, tam majores, quam minores teneri ad fidem explicitam eorum, quæ ad Mysteria Incarnationis & Trinitatis spectant. Et clarius in 3. dist. 25. q. 2. ad 3. affirmat, post adventum Christi omnes teneri ad explicite credendam Incarnationem. Et respondens ad objectionem nuper factam, inquit: *Si aliquis instructorem non habeat, Deus ei revelaret, nisi ex sua culpa maneret.* Id quod fusius explicat q. 14. de veritate art. 11. in quo inquit, *num sit necessarium, aliquid explicite credere?* Et pro parte negativa proponit hoc argumentum. *Possibile est enim (inquit) aliquem nutriri in silvis, vel inter lupos; & talis non potest aliquid de fide cognoscere; & sic erit aliquis homo, qui de necessitate damnabitur; quod est inconveniens: & sic non videtur, quod sit necessarium aliquid explicite credere.* Cui argumento respondet: *Dicendum, quod non sequitur inconveniens,*

posito, quod quilibet teneatur aliquid explicite credere, si in silvis vel inter bruta animalia nutriatur: hoc enim ad Divinam providentiam pertinet, ut cuilibet provideat de necessariis ad salutem, dummodo ex parte ejus non impediatur. Si enim aliquis taliter nutritus nutum naturalis rationis sequeretur, in appetitu boni & fuga mali; certissime est tenendum, quod ei Deus, vel per internam inspirationem revelaret ea quæ sunt ad credendum necessaria, vel aliquem fidei prædicatorem ad eum dirigeret, sicut misit Petrum ad Cornelium Act. 10. Et ibidem ad 2. addit, quod quamvis non sit in potestate nostra, cognoscere ea quæ sunt fidei ex nobis ipsis; tamen, si nos fecerimus quod in nobis est, ut scilicet ductum naturalis rationis sequamur; Deus non deficiet nobis ab eo, quod nobis est necessarium.

XCI Et hæc est doctrina S. Augustini, qui Epist. 49. ad Deogratias, late explicat, quo modo Deus omnibus adultis provideat media sufficientissima ad salutem, & potestatem veniendi ad Religionem Christianam, si per ipsos non stet. Quibus explicatis, concludit: Ita salus Religionis hujus, per quam solam veram salutem vera veraciterque promitti-

tur, nullumquam defuit, qui dignus fuit; & cui defuit, dignus non fuit. Quare adulti, qui pereunt & damnantur, sibi ipsis imputare debent, quod damnentur in æternum. Quamvis enim, ex sententia D. Thomæ, & communi Theologorum apud Patrem Suarez, disp. 12. de fide sect. 4. n. 9 illis subscribentem, post promulgationem Evangelii, fides explicita in Christum sit medium necessarium ad salutem; hoc medium Deus omnibus offert; siquidem omnibus dispensat auxilia gratiæ sufficientia ad observandam legem naturalem; qui autem legem naturalem observaverit, infallibiliter perveniet ad fidem Christi. Facienti enim, quod in se est, ad quærendam veram Religionem necessariam ad salutem, Deus non denegabit gratiam necessariam ad illam obtinendam.

XCII In hunc scopum adducit S. Augustinus, lib. de prædestinat. sanct. cap. 7, successum Cornelii Centurionis, qui Act. 10, describitur, *Vir justus, religiosus, ac timens Deum; cujus orationes & eleemosynæ acceptæ erant coram Deo; & tamen admonitus fuit ab Angelo, ut vocaret Petrum, qui prædicaret ipsi fidem Christi, ut salvus fieret; ex quo infert*

Au-

Augustinus necessitatem fidei in Christum ad salutem. Sic enim ait, *Cujus accepta sunt eleemosyna, & audita orationes, antequam credidisset in Christum. Nec tamen sine aliqua fide donabat, & orabat; nam quomodo invocabat, in quem non crediderat? Sed si posset sine fide Christi esse salvus, non ad eum ædificandum mitteretur Architectus Apostolus Petrus.*

§. VI.

An Cornelius Centurio fuerit justificatus ante fidem explicitam Christi? Ubi statuitur pars negativa.

XCIII **E**T quamvis Actorum 10 v. 14 dicitur *Cornelius Centurio, Vir justus & timens Deum, & hinc aliqui Doctores affirmant, illum justificatum fuisse ante fidem Christi susceptam ob prædicationem Petri; & M. Canus in relect. de Sacram. par. 2 concl. 3 propterea doceat, fidem explicitam Christi, esse quidem medium necessarium post Christi adventum ad gloriæ consecutionem, non tamen ad justificationem; idque probet, quia Cornelius erat justus, & tamen necesse habuit instrui à Petro, ut salvus fieret.*

ret. Quamvis, inquam, eo loco dicatur Cornelius justus, inde non probatur sufficienter, Cornelium fuisse justum justitia supernaturali ante adventum Petri. Tum quia non appellatur justus ab Historico sacro, sed à duobus domesticis Cornelii, & ab uno milite ejus, quos ipse ex admonitu Angeli misit in Joppen, ut vocarent Petrum in domum suam: tum quia, ut probat P. Vasquez 12 disp. 192 cap. 1, locus iste non est intelligendus de justitia supernaturali, sed solum de justitia quadam morali; quia nimirum Cornelius regulariter legem naturalem observabat, & bonis operibus studebat, licet in aliquo deficeret.

XCIV Sententia autem M. Cani communiter impugnatur: & sententia communis Patrum est, Cornelium non fuisse coram Deo justificatum, nisi post susceptam fidem Christi per prædicationem Petri. Unde Chrysost. Tom. 3, in Sermone de fide & lege naturæ, inquit: *Et vis plane videre, quod opera sine fide non vivificantur? Testimonium bonum habuit Cornelius de eleemosyna & precibus, & Christum ignorabat; & quia magnus ille justitiæ & veritatis Iudex, personarum respectum nesciens,*

nesciens, vidit bona quidem opera, sed mortua, quia fidem non habebat; mittit divinum Angelum. Idem docet S. Gregorius hom. 9 in Ezech. dicens: Unum sine alio nihil prodesse valet, quia nec fides sine operibus, nec opera sine fide, nisi fortasse pro fide percipienda: sicut Cornelius pro bonis operibus meruit audiri, antequam fidelis existeret. Idem docet Basilius, in regulis brevioribus regula 224; & Augustinus expresse multis in locis, quæ congerit Vasquez.

XCV Adeoque necessariam judicavit hanc fidem in Christum Augustinus ad salutem, ut videatur censuisse, illam fuisse necessariam adhuc in veteri lege & in lege naturæ. Sic enim ait lib. 2 de gratia Christi, cap. 24, ubi sic loquitur. Itaque sine ista fide, hoc est, sine fide unius Mediatoris Dei & hominum, hominis Christi Iesu; sine fide, inquam, resurrectionis ejus, quam Deus hominibus definivit, quæ utique sine incarnatione ejus ac morte non potest veraciter credi: sine fide ergo incarnationis, & mortis, & resurrectionis Christi, nec antiquos justos, ut justis essent, à peccatis potuisse mundari, & Dei gratia justificari, veritas Christiana non dubitat: sive in iis justis, quos sancta Scri-

ptura non commemorat, sed tamen fuisse credendi sunt; vel ante diluvium, vel inde usque ad datam Legem, vel ipsius Legis tempore; non solum in filiis Israel, sicut fuerunt Prophetæ, sed etiam extra eundem populum, sicut fuit Iob.

XCVI Hactenus ibi Augustinus, cujus verba explicatione indigent; ne contra communem sententiam Theologorum cogamur dicere, neminem unquam ex adultis salutem obtinuisse sine fide explicita Christi, quod durū videtur. Nam licet aliqui, in Lege nature & in Lege scripta, habuerint fidē explicitam Christi venturi; tamen fides ista explicita tunc non erat necessaria ad salutem, sed sufficiebat fides implicita; ut explicat D. Thom. 2. 2. q. 2. art. 7 ad 3, his verbis: *Dicendum, quod multis Gentilium facta fuit revelatio de Christo, ut patet per ea quæ prædixerunt. Nam Iob 19, dicitur: Scio, quod Redemptor meus vivit. Sibylla etiam prænuntiavit quædam de Christo, ut Augustinus dicit. Invenitur etiam in historiis Romanorum, quod tempore Constantini Augusti & Helenæ matris ejus inventum fuit quoddam sepulchrum, in quo jacebat homo, auream laminam habens in pectore in qua scriptū erat, Christus nascetur ex Virgine,*

& ego credo in eum. O sol, sub Helena* & Constantini temporibus iterum me videbis. Si qui tamen salvati fuerunt, quibus revelatio nō fuit facta, non fuerunt salvati absque fide Mediatoris: qui etsi non habuerunt fidem explicitam, habuerunt tamen fidem implicitam in divina providentia; credentes, Deum esse liberatorem hominū, secundum modos sibi placitos, & secundum quod aliquibus veritatem cognoscentibus spiritus revelasset; secundum illud Iob 3 cap. Qui docet nos super jumenta terræ.

XCVII Habemus ergo, post adventum Christi & prædicationem Evangelii, esse omnino necessariam ad salutem fidem explicitam Incarnationis Verbi, & Mediatoris Dei & hominum, Christi Jesu: Nec enim aliud nomen est sub calo datum hominibus, in quo oporteat nos salvos fieri, ut dixit D. Petrus Act. 4 v. 12. Quam fidem Deus, quantum est ex se, est paratus dare omnibus, non ponentibus obicem peccatis suis personalibus.

F 5

Si

* Id est Herenæ, seu potius Irenæ: sic nomen Irenæus, apud Latinos variè scriptum invenias, Herenæus, Hireneus, Eireneus &c. vide Hist. Miscellæ lib. 23, ubi res ista narratur, an. I Constantini & Irenæ.

Si enim, ut possunt, observent legem naturalem, & quærant serio & diligenter veram Religionem, illam infallibiliter invenient. Sic invenerunt Clemens Romanus, Justinus Philosophus, Hilarius, Gregorius Thaumaturgus, & alii, qui diligenter illam quæsierunt: & in Historia Societatis habemus de hoc illustria exempla. Illud præclarum, quod accidit Venerabili P. Josepho de Anchieta, fama sanctitatis & miraculis celebri in Brasilia, ubi fidem Christianam prædicavit, & nomen novi Thaumaturgi ob multitudinem signorum meruit, & refertur à P. Sebastiano Beretario Florentino in Vita Latina, quam de hoc illustri Viro collegit ex iis, quæ lingua Lusitanica quatuor libris scripserat P. Petrus Roterigius, Provincialis Societatis in Brasilia, lib. 2 pag. mihi 218.

XCVIII *Ex multis (inquit) quæ inde Iosephus animarum lucra retulit, unum admiratione dignum, & cuius haud facile simile reperiatur exemplum, non præteribo; ex quo divinæ Bonitati laudes reddantur, quæ admiranda planè ratione Ethnicum hominem, ad suæ prædestinationis finem adduxit. Obibat Iosephus de more suam hanc provinciam, cum à comitibus*
di-

digressus, solus in silvas penitus intravit, nullo certo consilio, nulla ei subita rei nova oborta cogitatione; sed quasi alterius manu dueretur, in senem incidit Brasilum, humi abjectum, atque arbori applicitum. Is Patrem, ad se aduntem, his vocibus compellat. Perge huc adire; jam diu enim hic tibi præstolor: Quarit ex eo Pater, quinam sit, quaque ex terra vicove eo venerit. Respondit senex, patriam suam mari imminere; aliaque adjecit, ex quibus Pater intellexit, ipsum neque ex Itariensibus, neque è Vincentianis finibus, neque ex tota ora Brasiliæ, in qua versantur Lusitani; sed ex remotioribus terris, fortasse circa Flumen argenteum, aliisve Australibus partibus infra Tropicum (nam Brasilico loquebatur idiomate) vel ministerio supra quam humano eo translatus; vel divino aliquo monitore ac duce, suis gressibus venisse; ex quo labore & ætate fractum ibi quiescere, divini promissi fidem expectantem. Quæsit rursus Pater, quid eo venisset, & quid ibi quæreretur? Respondit. Ut rectam vitam percipiam. Hoc loquendi modo divinam Legem, & iter ad salutem intelligunt Brasili. Cum multa de eo exquisisset; accurateque vita genus per omnes ætatis partes perscrutatus, omnia illius
facta

facta cogitataque excussisset; cognovit, ipsum numquam plus unam conjugem habuisse; numquam bellum aut arma, nisi sui defendendi causa, suscepisse; denique, omnibus subtiliter minutatimque perpensis, statuit apud animum suum Pater, hominem illum nulla unquam lethali culpa naturæ legem violasse; ut verissimū illud esse credamus, quod de id genus hominibus, integerrima vitæ innocentia in infidelitate viventibus, sacra nos decent Interpretes doctrinæ. Comperit præterea, hominem, naturæ bono magna præditum cognitione rerum pertinentium ad animum, æqui præsertim & iniqui, tum etiam ipsius naturæ Auctoris. Et, cum multa de veræ Religionis mysteriis illi Pater exponeret, subiciebat identidem; se intra animum suum ita sensisse, sed expromere nescisse. Ergo satis instructum, labore & ærumnis itinerum ætateque confectum, quoniam solutio instabat, aquâ pluviâ ex carduo collectâ (nulla enim alia in arenis illis suppetebat) baptizavit: Adamumque illi nomen dedit. Qui tam divino affectus beneficio, operante intus virtute Sacramenti, divinæ in se gratiæ sentiens charismata, oculis manibusque in calum sublatis, læto vultu divinæ Bonitati primum, tum etiam

Patri

Patri gratias agit; & quasi expetiti voti campos, cum superesset nihil eorum, quorum illuc causâ divino ductu venerat; omni solutus cura, animam sacro lavacro expiatam, in ipso primo suæ regenerationis vestigio, Deo reddidit; Patre abuuntem statim precibus de more commendante. Corpus exanimè Pater sacris adjunctis precibus sepelivit. Illud aliquando fortasse Divina providentia, & dies in lucem proferet: neque enim locum in invia silva & arenis indagare facile fuit. Hæc peregrè cum rediisset, ipse postea narravit.

XCIX Narrat in super P. Eranciscus Sacchinus, par. 4. hist. nostræ societatis lib. 6. n. 229, in vita insignis Martyris Rodolphi Aquaviva; illum, cum primum in Salseten venit, sacro fonte abluisse viginti homines, ut sic primitias suæ culturæ offerret Deo: In his, inquit historicus, fuit vir, Maurus genere, qui nullius mortalis suâ suæ petitionem venit Baptismum ex Balegate, quam ocyssime expiari cupiens; quod, ut aiebat, nesciebat, quando esset moriturus. Ecce autem statim à Baptismo, ita soluta est narium vena; ut cum immensa copia sanguinis supremo spiritu emisso, eodem tempore in militantem triumphantem-
que

que Christi Ecclesiam adscriptus sit. Aliud singulare exemplum narrat idem Sacchinus, parte v. hist. Societatis lib. 5. n. 191, de quodam juvene, inter Brasilos mediterraneos prænobili, qui, ob vitam inter Gentiles innocenter actam, meruit à Deo ad Baptismum mirabiliter trahi. Is ab ineunte pueritiâ, inquit historicus, mirabilem se suis popularibus præbuerat, pudicitia & sobrietate; virtutibus in illa barbarie tam raris, ut qui eas constanter colant, nihil minus quam cœlestes Angeli, aut homines de cœlo delapsi videantur. Huic domi agenti cum, fama & sermonibus hominum, allata esset notitia quædam Christianæ Religionis, cujus magistri & professores in regionibus mari vicinis esse dicerentur; arcnum & vehemens innatum desiderium ejus cognoscendæ, peregrinationem in eas partes persuasit. Venit; vidit; acquievit; volens poscensque baptizatus est. Vitaque aliquamdiu sancte inter Christianos acta, in morbum incidit; quo, post animum confessione purgatum, sacre Eucharistiæ Viatico munitus, in suavissimis cum Christo præsentem colloquiis, latus & gratulans, vinculo corporis solutus est.

§. VII.

Rejicitur error quorundam hæreticorum nostri temporis; asserentium, posse omnes Christianorum sectas in sua fide & religione salvari, dummodo credant articulos in Symbolo Apostolorum contentos, quamvis in aliis inter se dissentiant.

C V.g. posse Pontificios seu Catholicos Romanos in Religione Catholica salvari; posse Lutheranos in Lutheranism, Calvinistas in Calvinismo, & sic de aliis hæreticorum sectis: quia hi omnes credunt 12 articulos fidei, qui in Symbolo Apostolorum continentur. Hos appellat Politicos P. Becanus, in Manuali lib. 5. cap. 1. P. Lessius, citatus supra in procemio hujus capituli, dicit plurimos ita sentire, præsertim de plebe. Qui ita sentiunt, facile mutant Religionem, & de una secta transeunt facile in aliam, prout ipsis commodum magis est: redduntque rationem hujus imaginationis, quia Symbolum Apostolorum est regula & summa Religionis Christianæ, ut notat S. Augustinus serm. 13 de tempore, cum ait:
Sym-

Symbolum est regula fidei vestra, brevis & grandis. Brevis numero verborum, grandis pondere sententiarum: & serm. 181. Apostoli certam regulam fidei tradiderunt, quam, secundum numerum Apostolorum, duodecim sententiis comprehensam, Symbolum vocarunt; per quam credentes, Catholicam tenuerunt unitatem, & hæreticam convicerunt pravitatem. Ergo, qui credit hos duodecim articulos, tenet summam Religionis Christianæ; tenet Catholicam unitatem, & hæreticam convincit pravitatem. Ergo, quamvis in aliis dogmatibus & articulis dissentiat à Catholicis Romanis, poterit salvari: hoc enim dissidium videtur esse solum in rebus non attinentibus ad substantiam, sed ad sola accidentia Religionis: unde, sicut Thomistæ & Scotistæ, Dominicani & Jesuitæ, licet differant in quibusdam doctrinis, conveniunt in substantia doctrinæ necessariæ ad salutem; ita Calvinistæ atque Lutherani, licet in quibusdam articulis dissentiant à Pontificiis seu Catholicis Romanis; nihilominus, quia conveniunt in articulis contentis in Symbolo Apostolorum, conveniunt in substantia Religionis; & solum differunt in quibusdam acci-

accidentibus, quæ non sunt necessaria ad salutem.

CI Hæc doctrina de falsitate convincitur demonstrative, ex dictis in hoc cap. §. 1, comparando Religionem Christianam cum Mahumëtana & Judaica: quibus aliqua superaddenda sunt, comparando Christianorum sectas inter se. Convincitur, inquam, demonstrative. Quia hoc ipso, quod aliquæ religiones vel sectæ opponantur inter se in aliquibus articulis, quos credendos proponunt; evidens est, non posse esse salvationem in utrisque, seu in omnibus illis: quia evidens hoc ipso est, aliquam vel aliquas ex illis esse falsas, & non posse esse veram plus quam unam: evidens autem est, in religione falsa, non posse homines salvari. Ut enim testatur Cardinalis Bellarm. in libro de notis Ecclesiæ capit. 1, *Omnes consentiunt, in sola vera Ecclesia seu vera Religione, esse veram fidem, veram peccatorum remissionem, veram spem salutis æternæ*: additque, hoc docere omnes Patres, nec hæreticos id negare. Nam idcirco inquit, *omnis hæresis ad se solam trahit veram Ecclesiam, & alios omnes extra Ecclesiam ponit*. Idque ratio evidens convincit.

cit. Quia Religio falsa nequit Deum habere authorem: in Religione autem, quæ Deum non habet authorem, sed diabolum, nequit esse salvatio & spes salutis. Unde merito Cyprianus, in libro de simplicitate Prælatorum, dixit: *Cum Deo manere non possunt, qui esse in Ecclesia Dei unanimes noluerunt. Ardeant licet flammis, & ignibus traditi vel objecti bestiis animas suas ponant; non erit illa fidei corona, sed pœna perfidiæ: occidi talis potest, coronari non potest.*

CII Quod autem evidens sit, ex religionibus vel sectis, habentibus articulos aliquos oppositos, quos credendos proponunt, aliquam vel aliquas esse falsas, constat. Quia, ut religio sit falsa, non requiritur, ut omnia quæ credenda proponit sint falsa; satis est, quod aliqua vel aliquod dogma falsum credendum proponat. Sic religio Mahumetana falsa est, quamvis multa vera credenda proponat; videlicet unitatem Dei, præmium virtutis, pœnam vitiorum, & alia hujusmodi; quia cum his veritatibus proponit credendos multos errores. Sic religio perfidorum Hebræorum, multa vera credenda proponit; & tamen, quia falsa cum illis miscet

miscet, falsa & fallax est. Cum ergo evidens sit, Religionem Catholicam opponi in multis articulis, quos credendos proponit, sectæ Calvinianæ & Lutheranæ; evidens est, vel illas sectas esse falsas, vel esse falsam Religionem Catholicam Romanam. Nam v. g. Religio Catholica Romana credendam proponit præsentiam realem Christi in Eucharistia: Calviniana secta hunc articulum negat, & proponit credendum oppositum. Vel hæc præsentia est vera, vel falsa. Si est vera; evidenter sequitur, esse falsam sectam Calvinianam, quæ credit, non dari talem præsentiam. Si hæc præsentia Christi in Eucharistia est falsa; evidenter infertur, esse falsam Religionem Catholicam, quæ illam credendam proponit. Et idem argumentum fieri potest de aliis articulis, in quibus Religio Catholica opponitur cum secta Calviniana & Lutherana, circa numerum Sacramentorum, circa fidem justificantem, circa Purgatorium, circa necessitatem bonorum operum. Ergo evidens est, non esse veras omnes istas Religiones; sed aliquas ex illis falsas. Ergo est evidens, non posse homines in omnibus illis salvari. Ergo est evidentissimus

mus

mus error, dicere, quemlibet Christianum in sua religione & fide salvari posse, per hoc præcise, quod credat duodecim articulos contentos in Symbolo Apostolorum. Nam si simul cum his veritatibus credit aliquam falsitatem, ut dogma fidei, religio aliqua; illa est religio falsa, & non habet Deum authorem, ac proinde nequit in illa esse salus.

§. VIII.

Cum ad salutem requiratur fides supernaturalis & divina; hæretici circa mysteria, etiam quæ vere confitentur, non habent nisi fidem pure humanam, ex motivo suo fallacem, sicut habent Mahumetani.

CIII **I**Dque alia manifesta ratione evincitur. Nam ut quis possit salvari, debet credere fide supernaturali, infallibili & divinâ, articulos illos contentos in Symbolo : nam *sine fide impossibile est placere Deo*, utique sine fide infusa, infallibili, supernaturali & divina, omnino veraci. Nam operari ex fide purè humanâ & fallaci, quæ simul cum veritatibus credit falsitates, non sufficit ad placendum Deo ; alioqui Mahumetani,
He-

Hebræi perfidi, & omnes hæreticorum sectæ
placerent Deo. Non credit autem, fide su-
pernaturali, infallibili & divina, articulos
contentos in Symbolo; qui negat aliquem
alium articulum, quem Ecclesia Catholica
credendum proponit; sed fide humana, & ex
motivo fallaci, se extendente ad errores;
quia objectum formale & motivum fidei
Divinæ, solum complectitur veritates reipsa
à Deo revelatas. Unde hæreticus, unam ex
veritatibus à Deo revelatis, & ab Ecclesia
Catholica propositis, pertinaciter negans,
non habet de aliis *nisi opinionem quamdam
secundum propriam voluntatem*, ut loquitur
D. Thom. 2.2, q. 5 art. 5 quo inquit, *Utrum
qui discredat unum articulum fidei, possit ha-
bere fidem informem de aliis articulis?* Et ad
quæstionem respondet his verbis: *Dicendum,
quod in hæretico, discredente unum articulum
fidei, non manet fides, neque formata, neque in-
formis. Cujus ratio est, quia species cujuslibet
habitus dependet ex formali ratione objecti;
quâ sublatâ, species habitus remanere non po-
test: formale autem objectum fidei est Veritas
prima, secundum quod manifestatur in Scri-
pturis sacris & doctrina Ecclesiæ, quæ procedit*
ex

ex Veritate prima. Unde quicumque non inhaeret, sicut infallibili & divina regula, doctrina Ecclesiae, quae procedit ex Veritate prima in Scripturis sacris manifestata; ille non habet habitum fidei, sed ea quae sunt fidei alio modo tenet, quam per fidem. Sicut si aliquis teneat mente aliquam conclusionem, non cognoscens medium illius demonstrationis, manifestum est, quod non habet ejus sciensiam, sed opinionem solum: manifestum est autem, quod ille, qui inhaeret doctrinae Ecclesiae, tamquam infallibili regula, omnibus assentit, quae Ecclesia docet: alioquin si de iis, quae Ecclesia docet, quae vult tenet, non jam inhaeret Ecclesiae doctrinae, sicut infallibili regula, sed propriae voluntati. Et sic manifestum est, quod haereticus, qui pertinaciter discredet unum articulum fidei, non est paratus sequi in omnibus doctrinam Ecclesiae. Si enim non pertinaciter, jam non est haereticus; sed solum errans. Unde manifestum est, quod talis haereticus circa unum articulum, fidem non habet de aliis articulis; sed opinionem quamdam, secundum propriam voluntatem.

CIV Quapropter in fide, non solum spectandum est, quid credatur; sed potissimum, quo fundamento credatur, seu quae sit tota
 sic

sic credendi ratio; ex hac enim tota fidei natura & conditio pendet. Qualis enim est credendi ratio & fidei fundamentum, talis est & ipsa fides. Quare si credendi ratio sit fallax, fides erit fallax, & erroribus obnoxia: si autem credendi ratio sit divina, infallibilis & falli nescia; fides erit certa & infallibilis. Ratio autem credendi & fundamentum fidei, in sola Ecclesia Catholica est infallibile; nempe revelatio divina, proposita ab Ecclesia, quæ est columna & firmamentum veritatis; quæ, ob assistentiam infallibilem Spiritus sancti, nequit credendum proponere, nisi illud, quod à Deo revelatum est, vel ex revelatis necessario infertur. Ratio autem & motivum credendi, quo nituntur hæretici, fallax est; unde etiam veritates ipsas, quas habent cum Catholicis communes, non credunt fide divina infallibili, sed fide humanâ, ex ratione sua fallaci & erroribus obnoxia, ac proinde insufficienti ad salutem. Unde eorum fides circa vera dogmata quæ credunt, similis est fidei, quam habent Mahumetani de uno Deo conditore omnium, & de aliis veritatibus circa immortalitatem animæ, & præmium bonorum & supplicium malorum,

rum, quas credunt. Credunt quidem Turcæ, Deum esse unum, conditorem omnium, remuneratorem bonorum operum, & vindicem malorum: sed id credunt, quia ita docet Alcoranus, quem spiritum divino conscriptum putant. Unde credunt motivo fallaci, vi cuius pariter credunt multa falsa; videlicet, in Deo non esse nisi unicum Personam; Christum non esse Deum, sed Prophetam sanctum, Mahumeto minorem; tenendam esse circumcisionem, & similia. Similis est fides hæreticorum. Quamvis enim credant veritatem unius Dei, Trinitatem Personarum, Divinitatem Christi, ejus mortem & resurrectionem, & alias veritates contentas in Symbolo; has credunt ex fundamento fallaci: quia vicissim credunt pariter, tamquam dogmata fidei, manifestos errores. Vel enim credunt sua dogmata propter authoritatem suorum Apostolorum, Lutheri & Calvinii, quos divino Spiritu afflatos esse existimant; vel quia singula proprio judicio in Scripturis contineri judicant, vel ab Apostolis tradita; vel quia denique spiritus privatus interior, testatur, ea esse vera, & hanc esse Scripturæ sacræ mentem; omnia autem ejusmodi

di

di credendi ratio est omnino fallax: unde sepe, putantes se credere veritatem revelatam à Deo, credunt blasphemiam. Sic Calvinus articulum illum Symboli, *Descendit ad inferos*, ita intellexit, ut sibi persuaserit, ibi significari; Christum sustinuisse tormenta damnatorum, dubitasse de sua salute, & timuisse ne ab æterna morte penitus absorberetur: unde Calvinistæ, secuti suum doctorem & prophetam, in hoc articulo, non veritatem à Deo revelatam, sed blasphemiam à Calvino confictam credunt.

CV Hinc patet, ad veram fidem requiri, quod virtualiter in omni suo actu extendatur ad omnia, quæ Deus revelavit. Qui enim credit unum articulum, quia Deus revelavit; & sibi persuadet, Deum revelasse, quia Ecclesia, quæ est columna & firmamentum veritatis, proponit illud tamquam à Deo revelatum; paratus debet esse credere omnia, quæ Ecclesia credenda proponit: unde nulli articulo, ab Ecclesia proposito, potest discredere. Unde, quando dicitur salvari posse omnes, qui credunt duodecim articulos contentos in Symbolo Apostolorum; hoc solum est verum, si credant secundum verum &

legitimum sensum, intentum ab Apostolis, qui est ille quem Ecclesia proponit Catholica: idque creditur in illo articulo Symboli, *Sanctam Ecclesiam Catholicam*: jubemur enim credere, talem Ecclesiam dari. Ut autem inquit Bellarm. lib. de notis Ecclesiæ cap. II, *Constat, Sanctam dici Ecclesiam, quia professio ejus est sancta, nihil continens falsum quoad fidei doctrinam, nihil injustum quoad doctrinam morum, quæ nota soli convenit Ecclesiæ Catholicæ Romanæ, quæ sola est Catholica, id est universalis & sancta.* Unde quicumque fide divina credit articulos contentos in Symbolo, debet esse paratus credere omnia, quæ Ecclesia Catholica credenda proponit; quod nulla secta hæreticorum facit, ac proinde nulla secta hæreticorum est Ecclesia Sancta Dei: omnes enim dissentiant à Catholicis in aliquibus articulis, quos Ecclesia credendos proponit; ac proinde omnes sectæ hæreticorum continent aliquid falsi quoad doctrinam fidei.

CVI Unde differentia inter Catholicos & hæreticos, non est similis illi, quæ datur inter Thomistas & Scotistas, & inter alios Theologos. Isti enim conveniunt in dogmatibus

tibus omnibus, quæ sancta Mater Ecclesia credenda proponit, parati relinquere suas opiniones, si Ecclesia declaret illas esse falsas & contrarias principiis fidei: illasque defendunt, quia veræ ipsis apparent, & Ecclesia nihil in contrarium statuit; parati relinquere, si Ecclesia oppositum definiret: quod hæretici non faciunt; sed ideo sunt hæretici, quia pertinaciter resistunt Ecclesiæ definitionibus, suumque judicium præferunt judicio totius orbis Catholici, quæ est intolerabilis superbia, imo insolentissima insania; unde August. epist. 118 dicit, *disputare contra id, quod universa Ecclesia sentit, insolentissima insania esse.*

CVII Quamvis autem hæretici, detrectantes se subicere judicio Ecclesiæ, appellent ad Scripturas; & dicant, se sequi veritatem, quia sequuntur Scripturam, egregiè falluntur: quia dum putant, se sequi Scripturam, sectantur privatum suum judicium erroneum, quo existimant à Scriptura dici, quod est longè à Scripturæ sensu. Unde merito dicebat Augustinus tomo 7, lib. 1 contra Cresconium c. 33, de Catholicis loquens; *Scripturarum à nobis tenetur veritas, quando*

id facimus , quod universa jam placuit Ecclesie , quam ipsarum Scripturarum commendat authoritas; ut quoniam sancta Scriptura fallere non potest, quisquis falli metuit hujus obscuritate questionis , Ecclesiam de illa consulat, quam sine ulla ambiguitate sancta Scriptura demonstrat.

CVIII Deinde ad salutem non sufficere, utcumque credere omnia, quæ continentur in Symbolo , patet. Quia certum est, ex Scripturis & Patribus , & communi sensu Ecclesiæ, nullum hæreticum, in sensu composito hæresis, salvari. Et tamen certum est, posse aliquem esse hæreticum , quamvis expresse credat omnes articulos contentos in Symbolo. Ergo non sufficit ad salutem, utcumque credere articulos contentos in Symbolo. Consequentia est legitima: minor constat. Quia etsi quis fateretur, vera esse quæ continentur in Symbolo, & tamen pertinaciter negaret peccatum originale; & necessitatem gratiæ ad opera salutaria & meritoria vitæ æternæ , & negaret perseverantiam finalem esse donum Dei , & negaret Baptismum & omnia Sacramenta, & pertinaciter assereret nuptias esse à diabolo , & aliquas

evidenter demonstrata. C. 4 §. 8. 141

aliquas escas ex natura sua esse malas, & poenam damnatorum non esse æternam, sed damnatos & diabolos aliquando obtenturos veniam, & perventuros ad Dei visionem; absque dubio is esset hæreticus. Major vero etiam est certa; nimirum, nullum hæreticum; in sensu composito hæresis, salvari. Id etiam disertè docet Apostolus ad Tim. 3 dicens; *Hæreticum hominem, post unam & secundam correctionem, devita; sciens, quia subversus est qui hujusmodi est, & delinquit; cum sit proprio judicio condemnatus.* Cur enim, juberet illum vitari, si ejus error non officeret saluti? cur diceret illum subversum & condemnatum? Idem docet 2 ad Tim. 2, dum de hæreticis loquens, inquit: *Sermo eorum, ut cancer serpit.* Sentit ergo, sicut cancer est letalis corpori humano, nisi excindatur; ita hæreticum animabus fidelium, quia dum in hæresim animas trahit, illas letaliter inficit.

CIX. Idcirco ajebat Theologorum & Patrum communis magister Augustinus, lib. 4. contra Donatistas cap. 8, *Constituamus aliquem castum, continentem, non avarum, non idolis servientem, hospitalitatem indigentibus ministrantem, non cujusquam inimicum, non*

contentiosum, patientem, quietum, nullum amul-
lantem, nulli invidentem, sobrium, frugalem,
sed haeticum; nulli utique dubium est. propter
hoc solum, quod haeticus est, regnum Dei non
posse surum: & idem est iudicium reliquorum
Patrum, & hic fuit semper Ecclesiae sensus.
Et propterea S. Fulgentius, lib. de fide ad Pe-
trum Diaconum cap. 38, tradens communes
fidei regulas, inquit: *Firmissime tene, & nulla-
tenus dubites*, non solum omnes Paganos, sed
etiam omnes Iudeos, haeticos, atque schisma-
ticos, qui extra Ecclesiam Catholicam prae sen-
tem finiunt vitam, in ignem aeternum ituros, qui
paratus est diabolo & angelis ejus.

Unde gravis Theologus Leonardus Lessius:
in appendice ad consultationem, quae fides &
religio sit capeffenda, cap. I, in fine, hoc con-
firmans, sic concludit: *Hac semper fuit Eccle-
siae fides & omnium Patrum indubitata doctri-
na: quam omnes, qui extra Ecclesiam versantur,
utinam accurate perpenderent? viderent profe-
cto, quam in periculoso statu versentur.*

CX Patetque ab absurdo & ab inconve-
nienti, esse crassissimum errorem, quod ad sa-
lutem sufficiat credere in Christum, & ea
quae sunt in Symbolo; quamvis quis paratus
non

non sit credere reliqua, quæ Ecclesia Catholica credenda proponit: ut enim recte expendit P. Lessius, hæc sententia salvat pene omnes antiquos hæreticos. Plerique enim confitentur Christum, & suo sensu tenent Symbolum. Salvari itaque poterant in sua hæresi Ariani, qui Filium Patri negabant consubstantialem; Macedoniani, qui Spiritum sanctum Filio faciebant minorem; Nestoriani, qui duas in Christo statuebant personas; Eutychiani, qui carnem Christi in Divinitatem conversam asseriebant; Apollinaristæ, qui Verbum divinum loco animæ rationalis, carni unitum in Christo ponebant; Monothelitæ, qui unicam tantum voluntatem & operationem in Christo statuebant; Pelagianini, qui peccatum originale negabant, & hominem viribus naturæ posse gratiam Dei & salutem promereri, docebant; Donatistæ, qui Christi Ecclesiam ubique periisse, præterquam in parte Donati affirmabant; Novatiani, qui lapsis poenitentiam negabant; Montanistæ, qui Montanum Paracletum putabant. Hi omnes, juxta hanc sententiam, singuli in sua fide ac hæresi, salvati sunt; quia in Christum crediderunt, & non minus Symbolum

Apostolicum, quam modo Lutherani & Calvinistæ tenuerunt. At quid absurdius magisque paradoxum in Ecclesia dici potest? Si enim cum ejusmodi fide salus obtineri potest; cur tot Concilia, tanto labore & sumptu convocatis ex toto orbe Episcopis, adversus illas hæreses celebrata? Cur toties anathemate fuere damnatae? Cur sancti Patres tantopere in illis extirpandis laborarunt? Cur Catholici hereticorum illorum consuetudinem & convictum tantopere exhorruerunt? Cur plurimi exilia, mortem, & omnia tormentorum genera præferre maluerunt, quam alicui ex illis hæresibus subscribere? Sane hæc omnia frustra, stulte, & injuriose facta sunt, si in illis sectis salus obtineri poterat. Quod cum nemo sapiens dicere possit; fatendum est, hæreses illas esse animarum pestes, nec posse ullo modo salutem cum illis consistere.

§. IX.

In quo sensu possit esse verum, quod salvari valeant omnes, qui credunt duodecim articulos contentos in Symbolo.

CXI **Q**Uapropter, quod possint salvari omnes, qui credunt 12 articulos
con-

contentos in Symbolo, solum potest esse verum cum sequentibus limitationibus. Prima, si credant secundum verum & legitimum sensum. Unde Calvinistæ, qui in illo articulo, *Descendit ad inferos*, credunt Christum in cruce sustinuisse tormenta damnatorum, & de sua salute dubitasse, non credunt articulos omnes Symboli. Secunda, si implicite credant reliquos omnes articulos à Deo revelatos, quamvis non sint in Symbolo; & generatim & in confuso credant reliqua omnia, quæ Ecclesia credit; & paratos se exhibeant ad credendum explicite, quidquid Ecclesia credendum proposuerit; & ad deponendos errores, quos Ecclesia damnat vel damnaverit; denique, si cum fide illa conjungant observantiam mandatorum. Nam *fides sine operibus mortua est*; & si quis vult ad vitam ingredi, debet servare mandata, juxta Christi Domini expressam doctrinam.

CXII Ratio à priori, cur fides ista requiratur ad salutem, est. Quia sicut vera justitia, ad salutem requisita, se debet extendere ad omnia mandata; quia, qui in uno delinquit, factus est omnium reus; siquidem

hoc ipso contemnit Legislatorem, qui non minus unum quam aliud præcepit: ita vera fides se debet extendere ad omnia divinitus revelata; & qui inter articulos electionem facit, & alios credit, aliis discredit, contemnit auctoritatem Dei revelantis; & non credit, quia Deus revelavit, sed ob motiva humana fallacia: peccatque contra fidem, si dissentit alicui articulo sibi sufficienter proposito; sufficienter autem est propositus, quando Ecclesia, quæ est columna & firmamentum veritatis, declarat, articulum illum esse à Deo revelatum. Unde qui iudicium suum iudicio Ecclesiæ præfert pertinaciter, incidit in crimen hæresis: & quamvis ipsi videatur, suam viam esse securam & rectam, abs dubio illa ducet ad mortem sempiternam.

CXIII Et sane, ratio probans necessarium esse ad salutem, credere omnes articulos contentos in Symbolo; similiter probat, necessarium esse, credere reliquos à Deo revelatos, si ab Ecclesia proponantur: ideo enim illos credere est necesse, quia revera sunt à Deo revelati, & Ecclesia illos credendos proponit. Hæc autem ratio militat in
omni-

omnibus articulis à Deo revelatis, si ab Ecclesia proponantur; vel aliunde sufficienter constet, illos esse revelatos: nulli enim hujusmodi articulo licet dissentire; quia hoc esset contemnere authoritatem Dei revelantis.

§. X.

Rejicitur ex dictis doctrina hæreticorum, distinguens inter articulos essentielles, quos omnes credere debeant; & accidentales, quos liberum sit vel admittere vel repudiare.

CXIV. **N**Ec sufficit, cum Marco Antonio de Dominis, Episcopo Spalatenfi, apostata à Religione Catholica, lib. 7. de Republica Ecclesiast. cap. 9, & 10, distinguere articulos fidei, in essentielles & accidentales, quos liberum sit admittere vel repudiare, salva fidei integritate; cui solutioni in Hollandia passim insistant modo novatores. Non, inquam, sufficit. Quia cum fundamentum fidei sit authoritas Dei revelantis, quæ æqualiter omnes veritates revelatas afficit; fides necessario se debet extendere ad omnes veritates revelatas; siue illæ
ve-

veritates in se sint magnæ, sive parvæ. Si enim mihi Deus diceret, se esse Trinum, & simul diceret, canem Tobiaë habuisse caudam; æquali firmitate deberem utrumque credere; quia cum Deus sit summe sapiens & summe verax, non minus ipsi repugnat fallere vel falli, quando revelat parva, ac quando revelat magna; quando revelat creata, ac quando revelat increata. Unde, quamvis non sit necesse, ut Deus omnes veritates revelet, & inter veritates revelabiles aliæ sint digniores aliis; ex suppositione tamen, quod sint revelatæ, & sufficienter propositæ, æquali certitudine credendæ sunt, & nulli fas est dissentire, licet non omnibus necesse sit positive assentire. Unde est omnino chimericum, asserere, esse aliquos articulos fidei secundarios, quos liceat repudiare salva fidei integritate. Nam hoc ipso, quod sint articuli fidei, & taliter sint propositi, ut liceat illis assentiri assensu fidei supernaturalis, seu assensu summe certo & super omnia; nemini fas est illis positive dissentire: quia præceptum naturale obligat ad non dissentiendum Deo loquenti, quando nobis sufficienter constat Deum loqui, quamvis præcep-

tum

tum naturale non obliget ad assentiendum positive. Quare licet, relate ad præceptum positivum credendi, possint distingui articuli primarii & quasi essentiales, & secundarii & quasi accidentales; ut illi dicantur primarii, quos tenemur explicite credere; illi secundarii, quos solum tenemur credere implicite; numquam tamen potest esse verum, quod sint aliqui articuli fidei, quos salva integritate fidei possimus repudiare, eisdem ut falsis dissentiendo.

CXV Pro quo nota, ex communi sententia Theologorum, in præcepto fidei esse duplicem partem, alteram negativam, alteram positivam. Prior est, non dissentire iis, quæ sufficienter nobis proponuntur, tamquam dicta & revelata à Deo; & hæc pars est quasi de jure naturæ, independenter ab omni lege positiva Dei. Nam ratio naturalis dicat, non esse dissentiendum iis, quæ nobis sufficienter constat dicta esse à Deo; eis enim dissentire, esset gravis Dei injuria; quia qui ita dissentiret, in actu exercito reputaret, vel Deum esse fallacem, vel fallibilem, quorum neutrum potest Deo sine gravissima irreverentia imputari. Pars affirmativa

ad partem affirmativam, non obligat semper, & pro semper; sed certis quibusdam temporibus, ut explicant Theologi. Qui etiam bene distinguunt inter ea, quæ necesse est credere necessitate medii, & eæ quæ solum necessitate præcepti. Quæ autem necessitate præcepti explicite credenda sint, colligendum est ex inodo, quo Deus fidei promulgationem imposuit, & ex Scripturis & traditione & usu Ecclesiæ; quod pariter in materia de fide explicatur à Theologis; qui etiam explicant tempus, pro quo urget hujusmodi præceptum: nec ista exponere pertinet ad hunc locum, nec facit ad meum scopum; in quem tamen utile fuit, ad æquivocationes impediendas, explicasse, ut distinctas, duas istas obligationes.

C A P U T V.

*sectarii fatentes, dari in Ecclesiâ Romana
salvationem, habent evidentem obligationem
deserendi suam sectam, & transeundi ad
Ecclesiam Catholicam.*

CXVII **R**atio est manifesta, Quia evidens est, viam certam perveniendi

niendi ad aliquem terminum, præferendara esse dubiæ, ab eo qui serio desiderat ad illum terminum pervenire. In Ecclesia autem Catholica Romana certa est spes salutis ex utriusque partis confessione: in sectis autem hæreticorum solum est spes salutis in hæreticorum opinione, quam esse manifestum errorem Catholici omnes constanter credunt, & Doctores Catholici satis demonstrant.

CXVIII Hoc argumento inductus est, ad abjurandam hæresim Calvinianam & amplectendam Religionem Catholicam, Magnus ille Galliarum Rex Henricus Quartus; ut narrat Henricus Spondanus ad annum Christi 1591, n. 12. Inductus enim est, quod interrogatis suis Magistris, utrum Catholici in sua Religione salvari possent, ii negare non audent; & è contra à Catholicis asseverantissimè audiret, si in hæresi quam sectabatur moreretur, absque ullo dubio in æternum damnatum iri in inferno: ac proin hanc inde necessariam conclusionem elicuit, longè tutius sibi esse eam Religionem profiteri, in qua salvari posse utraque pars consentiret, quam illam, quam altera dumtaxat probaret. Unde, ne animam simul cum regno perderet,

ret, de utriusque salute intentius cogitans; consultatione cum primariis & intimis habitâ, constituit instructioni suæ diligenter vacare, & post sufficientem instructionem fidem Catholicam amplexus est, quæ ipsi fuit medium necessarium ad regnum temporale & æternum consequendum. Professionem autem solennem fidei Catholicæ fecit eo anno 1593, die vigesimâ quinta Julii D. Jacobo sacra, sub hac verborum forma: *Protestor ac juro, coram Deo Omnipotente, vivere me velle ac mori in Religione Catholica Apostolica Romana, eamque protegere ac defendere adversus omnes, periculo sanguinis ac vitæ meæ; renuntians omnibus hæresibus, contrariis Doctrinæ Sanctæ Ecclesiæ Catholicæ Apostolicæ Romanæ.* Cui fidei Catholicæ professioni & Ecclesiæ defensionem, debet regnum florentissimum Galliæ felicitatem, quam deinceps consecutum est.

CXIX Hoc argumento sæpè usus sum contra Mahumetanos, qui ex doctrina sui Alcorani fatentur, posse Christianos salvari in Religione Christiana: & gratiâ aspirante divinâ non pauci eo convicti, Mahumetismum abjurârunt, & Religionem Christianâ

154 *Veritas Religionis Catholicae*
amplexi sunt; ut latè narravi in Manudu-
ctiōe ad Conversionem Mahumetanorum,
Parte 2 lib. 2 c. 3, 4 & 5 cum sequentibus.

C A P U T VI.

*Quartum Caput probandi, solam Ecclesiam
Catholicam Romanam esse veram Christi Ec-
clesiam; quia in illa sola invenitur firma
credendi regulâ, & supremus controversiarum
fidei iudex.*

§. I.

Præsupponuntur aliqua.

CXXUT argumentum conficiam, ali-
qua supponenda sunt. Suppo-
nendum est 1, Ecclesiam, à Christo funda-
tam supra Petrum, esse visibilem; ut osten-
sum est cap. 1 §. 2.

2 Supponendum est, hanc Ecclesiam visi-
bilem, quatenus conflatur ex Pastoribus &
ovibus, non posse secundum se totam errare
in fide, id est, non posse credere tamquam
articulum fidei aliquod dogma falsum. Id
constat ex dictis c. 1 §. 3, præsertim n. 23 &
24, & 25, & 16: probaturque nunc breviter
I. Quia

1. Quia Christus sua oratione impetravit, ne unquam vera fides, deficeret à Sede Petri, ut Petri successores possent nutantes in fide fratres, in fide confirmare & solidare. Ego autem rogavi pro te Petre, ne deficiat fides tua; & tu aliquando conversus, confirma fratres tuos. Luc. 22 v. 31. Unde S. Leo in serm. in natali Apostolorum Petri & Pauli, hunc locum expendens, inquit: *Commune erat omnibus Apostolis periculum de tentatione formidinis, & Dominica protectionis auxilio pariter indigebant; quoniam diabolus omnes exagitare, omnes cupiebat elidere; & tamen specialis à Domino Petri cura suscipitur, & pro fide Petri propriè supplicatur; tamquam aliorum status certior sit futurus, si mens Principis victa non fuerit.* Quare cum immediatè antea Christus alloqueretur omnes Apostolos, omnibusque diceret; *Ecce sathanas expetivit vos, ut cribraret sicut triticum;* immediatè, conversus determinatè & singulariter ad Petrum, dixit: *Ego autem rogavi pro te &c.* quia ad Petrum, tamquam ad Ecclesiæ caput. sermonem dirigebat. Et ideo sua oratione obtinuit, ne Petrus, vel ullus ejus successor Ecclesiam instruens, in fide & moribus erraret, proponens

156 *Veritas Religionis Catholicæ*
toti Ecclesiæ aliquod dogma falsum creden-
dum, vel toti Ecclesiæ aliquid injustum
præcipiens.

CXXI 2. Quia Christus promisit, portas
infernæ non prævalituras adversus Ecclesiam
visibilem, quam supra Petrum erat fundatu-
rus; *Et portæ infernæ non prævalebunt adversus*
eam, Matth. 16. Prævaluissent autem absque
dubio, si tota Ecclesia profiteretur aliquem
errorem pro dogmate fidei: quia sic defecisset
ab illa vera fides, quæ est fundamentum sa-
lutis. 3. Quia Ecclesia Dei est *columna & fir-*
mamentum veritatis, 1 ad Timoth. 3: quod
non haberet, si posset sustentare errorem
tamquam dogma fidei. 4. Quia Christus pro-
misit Ecclesiæ providentiam suam specia-
lem, *Ecce ego vobiscum sum omnibus diebus*
usque ad consummationem seculi; & assisten-
tiam Spiritus sancti; *Ille docebit vos omnem*
veritatem. Quæ promissiones fuissent irritæ
& fallaces, si Ecclesia tota posset in fide er-
rare.

CXXII Supponendum est 3, Christum
reliquisse in hac Ecclesia visibili, quam supra
Petrum fundavit; & quam credimus esse
unam, & sanctam, & Catholicam, juxta illa
ver-

verba Symboli; *Credo in unam sanctam Ecclesiam Catholicam*; Reliquisse, inquam, tribunal aliquod supremum, à quo determinantur dubia, circa fidem & religionem emergentia, & à quo non sit appellatio ad aliud. Nullum enim est regnum, nulla respublica, in quibus non sit supremus aliquis magistratus, à quo causæ determinantur ultimo, & finiantur; alioqui lites & controversiæ numquam finirentur, sed essent interminabiles.

CXXIII Supponendum est 4, hoc supremum tribunal supremumve magistratum, à quo dubia emergentia circa fidem & religionem determinari debent, debere in Ecclesia Catholica esse authoritatis infallibilis, ad determinandas fidei & morum controversias, emergentes inter ipsos fideles. Cum enim supremo magistratui & supremo judici, à cuius sententia non est appellatio, in quocumque regno vel republica, omnes teneantur obedire; sane si hic supremus controversiarum Judex in Ecclesia Catholica, posset errare in determinandis fidei & morum controversiis, & toti Ecclesiæ proponere credendum, tamquam dogma fidei, aliquem errorem aliquamve falsitatem; tota Ecclesia in
ca-

capite & in membris posset, imo teneretur errare; quia tota teneretur acceptare eam partem, quam supremus Judex controversiarum determinasset. At impossibile est, totam Ecclesiam errare in credendo: ergo impossibile est, supremum Judicem controversiarum fidei in Ecclesia Catholica errare in determinando.

CXXIV Qui voluerit rationes exacte discernere, ob quas Christus in Ecclesia sua reliquerit tribunal aliquod visibile, infallibile ad determinandas fidei & morum controversias, seu regulam vivam visibilem fidei, falli nesciam, ad quam spectet proponere fidelibus, quid credere debeant, consulat P. Suarez lib. I Defensionis fidei adversus Regem Angliæ cap. II; & P. Gregorium de Valentia, tom. 3 quæst. I de fide punct. 7, §. I, ubi hujus regulæ visibilis necessitatem præclare manifestat. Primo ex parte providentiæ divinæ. Quia nisi talis aliqua extaret regula infallibilis, magistra & judex doctrinæ fidei; non satis esset à Deo prospectum hominibus, de necessariis ad suam æternam salutem comparandam. Secundo, ex humani ingenii conditione. Cum enim mens nostra, non solum

lum imbecilla sit, & omnino impar viribus, ut ipsa per se necessariam doctrinam fidei & revelationem divinam per vestigare possit, sed in ea ipsa doctrina nobis divinitus revelata facillime hallucinetur & aberret; indiget magistro aliquo visibili authoritatis infallibilis, à quo discat, quid à Deo revelatum sit, ut propter authoritatem Dei revelantis firmiter credat mysteria revelata. Tertio ex natura ipsius fidei. Cum enim fides ex proprio conceptu argumentum sit rerum non apparentium, juxta Apostolum ad Hebræos 11, id est, cum sit cognitio non evidens, sed quæritatur infallibili testimonio, & pariatur ex auditu, ut docet Apostolus ad Rom. 10; sitque proinde certissima; necesse est, ut supponat aliquam vivam regulam, falli nesciam, quæ proponat Dei testimonium. Res enim, quæ obscure isto modo, & tamen certo, ac infallibiliter, sciuntur; eas necesse est, alicujus authoritatis infallibilis judicio atque asseveratione discere. Quarto, ex necessitate damnandi hæreses in Ecclesia. Nulla enim, potest oriri de aliqua fidei quæstione hæresis, quæ non possit ac debeat ab Ecclesia damnari ac rejici, dicto anathemate ejus authoribus, juxta

ta mandatum Apostoli ad Galat. 1 ; *Si quis vobis euangelizaverit, prater id quod accepistis, anathema sit.* Hoc autem minime fieri posset, nisi in Ecclesia autoritas extaret aliqua, viva atque visibilis, quæ in omni quæstione de rebus fidei certo doceret, quid rectæ fidei consentaneum sit, & quid eidem repugnans. Unde S. Augustinus, lib. de utilitate credendi c. 16, probat, à Deo auctoritatem aliquam constitutam esse, qua, velut gradu certo nitentes, attollamur in Deum. Hanc autem auctoritatem agnoscit in ipsa Ecclesia visibili: & ideo in libro contra epistolam fundamenti cap. 5 dixit: *Euangelio non crederem, nisi me Ecclesia Catholica moveret autoritas.*

CXXV His suppositis, facilè ostenditur, in sola Ecclesia Catholica Romana reperiri firmam credendi regulam, falli nesciam, & supremum controversiarum iudicem, infallibilis auctoritatis ad determinandas fidei & morum controversias, quæ inter fideles exoriantur, non autem in ulla hæreticorum secta; ac proinde, solam Ecclesiam Catholicam Romanam esse veram Christi Ecclesiam; sectas vero hæreticorum esse synagogas diaboli.

boli. Siquidem in Ecclesia Catholica hoc privilegio infallibilitatis gaudent Concilia generalia, confirmata à Romano Pontifice, ut est in confesso apud omnes Catholicos, nullo excepto : item ipse Romanus Pontifex, dum è Cathedra Petri toti Ecclesiæ proponit, quid credere debeat; ut docent ferè omnes Doctores Catholici, & nos breviter hîc probabimus. In sectis autem hæreticorum non reperitur ejusmodi infallibilis credendi regula, quod jam ostendo.

§. II.

Ostenditur contra hæreticos, solam Scripturam non esse normam & judicem ad omnes fidei controversias decidendas.

CXXVI **H**æreticorum nostri temporis sectæ nullam habent firmam & certam credendi regulam, quam sequantur; indeque convincitur, illas non esse veram Dei Religionem : capita namque veræ Religionis debent esse definita, certa, & immutabilia. Quod regulam hanc non habeant, ex qua statui possit, quid sit necessario credendum, quid respuendum, constat. Quia nec

traditiones Ecclesiæ, neque Conciliorum Oecumenicorum, neque Romani Pontificis auctoritatem admittunt; nec veterum Ecclesiæ Doctorum, qui Sacras litteras exposuerunt, iudicium æstimant; traditiones etiam omnes rejicit Lutherus, in caput primum ad Galatas; & Calvinus lib. 4 Institut. cap. 8 §. 6, 7 & 8: & in Antidoto ad quartam Sess. Concilii Trident. conveniuntque Lutherus & Calvinus, eorumque affectu in hoc, quod nihil sit credendum, nihil recipiendum, quod in sacra Scriptura non contineatur,

CXXVII Concilia Oecumenica, quæ semper in Ecclesia summam auctoritatem habuerunt, & tamquam Spiritûs sancti organum æstimata sunt, ita contemnit Lutherus in art. 115 & sequentibus, *ut, quidquid illa definierint, cujusvis privati hominis iudicio subiectum esse velit. Imo dicit, esse rem insanam, quod Concilia concludere velint, quid sit credendum: ibidemque expressè docet, quid credendum sit, quid non; id relinquendum iudicio cujusvis viri spiritualis; ac proinde Lutherus, ne unum Papam admittat, qui tamquam Christi Vicarius & communis Ecclesiæ Magister omnibus fidelibus articulos*

culos credendos è Cathedra Petri proponat, tot Papas facit, quot sunt viri qui se spirituales existimant: & incredibili superbia iudicium hominis privati anteponit iudicio Concilii Universalis, totam Ecclesiam representantis, cum qua Christus semper se futurum esse promisit, *Ecce ego vobiscum sum omnibus diebus, usque ad consummationem seculi.*

CXXVIII Idem fuit spiritus & sensus Calvini, qui l. I instit. c. 7 §. 1, 2 & 4 expressè affirmat, *non esse Ecclesiæ judicare, qui libri sint canonici, sed hoc ad spiritum internum pertinere*; hac doctrina fontem errorum aperiens, ut unusquisque, iudicans ex suggestionem diaboli aliquid à Deo esse revelatum, pro articulo fidei, credat sui capitis somnium, & blasphemiam pro veritate Catholica habeat; quale est illud, quod lib. I Instit. c. 18 §. 1 docuit; nimirum, *nihil efficere homines, nisi arcano Dei nutu; nec quidquam deliberando agitare, nisi quod ipse jam apud se decreverit, & arcana sua directione constituit*; quod est facere Deum authorem omnium scelerum. Denique quod ad Patres attinet, Lutherus lib. contra Regem Angliæ, *non curat mille Augustinos, mille Cyprianos*: Calvinus

etiam pluribus locis eos contemnit, & errasse affirmat.

CXXIX Quia ergo hæretici isti in eo conveniunt, quod sola Scriptura sit norma & iudex controversiarum fidei & morum, pertinaciter asserentes, omnes controversias fidei ex sola Scriptura definiri ac decidi posse; nobis probandum est, falsum esse hoc eorum dogma, & esse radicem errorum. Et cum communi omnium Catholicorum sententia dicimus, quod sicut in republica civili, præter leges scriptas & consuetudines, necessarii sunt iudices vivi, qui lites dirimant & sententiam ferant; attendendo tamen ad leges scriptas & honestas consuetudines, legitimo usu præscriptas, tamquam ad normam & regulam, qua dirigantur in ferenda sententia; ita in Ecclesia Christi, ad decidendas fidei & morum controversias, opus esse iudice vivo, qui sententiam proferat; & normâ, ad quam attendat in ferenda sententia: Iudicem autem istum esse Ecclesiam, quæ dupliciter potest sententiam proferre, vel per Pontificem Romanum, qui est Caput & Pastor summus Ecclesiæ, communisque fidelium Magister in rebus fidei & morum; vel per Concilia

evidenter demonstrata. C.6 §.2. 165

generalia, à Pontifice approbata, quæ Ecclesiam repræsentant: normam vero, quam sequi debent in definiendo, non esse solam Scripturam, sed Scripturam & Traditiones simul; id est verbum Dei scriptum & verbum Dei traditum; quia constat, multa Apostolos docuisse Ecclesiam, quæ non sunt scripta ab ipsis. Ut enim inquit Damascenus, lib. 4 cap. 17, *Plurima Apostoli sine scripto tradiderunt.* Idque patet ex illis verbis Apostoli 2 ad Thessalon. 2, 14; *Itaque, Fratres, state, & tenete Traditiones, quas didicistis, sive per sermonem, sive per Epistolam nostram: quæ verba exponens S. Chrysostomus; Hinc patet, inquit, quod non omnia per Epistolam tradiderit, sed multa etiam sine litteris.*

§. III.

Primum caput probandi, solam Scripturam non esse judicem controversiarum fidei; quia per ipsam nequit sufficienter probari, quanquam sit legitima & vera Dei Scriptura.

CXXX **P**Robatur ergo, falsum omnino esse, quod sola Scriptura sit sufficiens norma & iudex, ad dirimendas &

definiendas omnes fidei & morum controversias. Primo. Nam inter controversias fidei una ex potissimis versatur circa ipsam Scripturam; in qua ipsa Scriptura nequit esse iudex. Nam antequam utamur testimonio Scripturæ, ad probandam veritatem alicujus dogmatis; prius nobis constare debet, illum Librum, unde sumimus testimonium, esse vere Scripturam; non esse supposititium; non esse confectum ab aliquo impostore: illamque sententiam, quam allegamus, non esse insertam, vel perversam aliqua industria hominum, vel incuria scribarum; denique nihil ibi esse additum vel mutatum, quod ad substantiam doctrinæ pertineat. Hæc autem omnia ex Scriptura constare non possunt; nec præcise per ipsas Scripturas possumus probare, ipsas esse veras Dei Scripturas, impulsu Spiritus sancti exaratas: solumque conjecturis quibusdam valde infirmis poterimus uti, nisi recurramus ad auctoritatem Ecclesiæ, quæ columna est & firmamentum veritatis, & nos securos reddit de veritate Scripturarum. Et ideo Tertullianus, lib. de præscriptionibus cap. 15, docet, hæreticos, contendentes probare suos errores ex Scripturis, non esse ad-

mittendos ad certamen hoc; nisi prius probaverint, apud ipsos esse veras Dei Scripturas. Hunc igitur, inquit, potissimum gradum obstruimus, non admittendos eos ad ullam de Scripturis disputationem. Si hæ sunt illæ vires eorum, uti eas habere possint; dispici debet, cui competat possessio Scripturarum, ne is admittatur ad eam, cui nullo modo competit. Et cap. 16 id probat, quoniam nihil proficit congregatio Scripturarum, nisi plane, ut stomachi quis ineat eversionem, aut cerebri. Et cap. 17; Ista hæresis (idem dici debet de hæresi Calviniana & Lutherana) non recipit quasdam Scripturas; & si quas recipit, non recipit integras. . . . & si aliquatenus integras præstat, nihilominus diversas expositiones commentata convertit. . . . Quid promovebis, exercitatissime Scripturarum; cum, si quid defenderis, negetur; ex diverso, si quid negaveris, defendatur?

CXXXI Quapropter, nemo potest ex Scripturis veritatem, quam intendit, probare; nisi prius supponatur, testimonium, quod allegat, esse desumptum ex vera Dei Scriptura; quænam vero sit vera Dei Scriptura, non potest scire præcise per ipsam Scripturam. Unde S. Augustinus, in li-

bro contra epistolam Manichæi, quam vocant Fundamenti, dicebat: *Ego vero Evangelio non crederem, nisi me Ecclesiæ Catholicæ moveret autoritas.* Id est, non crederem mysteria & veritates narratas in Evangelio, tamquam à Deo dictatas; nisi autoritas Ecclesiæ Catholicæ me prius movisset, ad mihi firmiter persuadendum, Evangelium istud esse divinum, & Deum habere authorem. Ergo ut quis propter autoritatem Scripturæ aliquid credat, debet prius aliunde certificari, quod illa Scriptura sit vere Scriptura Dei.

CXXXII. Quare Ecclesiæ Autoritas, aliunde cognita quam ex testimonio ipsius Scripturæ, est motivum firmiter judicandi, Scripturam illam esse divinam: nequit enim non esse divina Scriptura illa, quam ut divinam acceptat tota Ecclesia Catholica; quam esse veram Ecclesiam Dei tot insignia & illustria testimonia demonstrant; & imprimis miracula, quæ ad illam fundandam Christus per se & per Apostolos suos operatus est. Quo argumento utitur Augustinus, Lib. de utilitate credendi cap. 16. Postquam enim expoluit naturam miraculorum, sub-

subjungit. Talia facta sunt eo tempore, quo Deus in vero homine, quantum sat erat, hominibus apparebat; sanati languidi, munda-
ti leprosi; incessus claudis, cæcis visus, surdis
auditus est redditus. Homines illius temporis,
aquam in vinum conversam, saturata quinque
millia quinque panibus, transita pedibus maria,
mortuos resurgentes viderunt: ita quædam cor-
pori, manifestiori beneficio; quædam vero menti,
occultiori signo; & omnia hominibus Majestatis
testimonio consulebant. Sic in se tunc animas er-
rantes mortalium, divina commovebat autho-
ritas. Cur, inquit, ista modo non fiunt? Quia
non moverent, nisi mira essent: at si solita es-
sent, mira non essent. Facta sunt igitur illa
opportunissime, ut his multitudine credentium
congregata atque propagata, in ipsos mores
utilis converteretur autoritas. Hæc ille, qui
addit; quod, postquam Ecclesia tot mira-
culis fundata est, autoritas ipsa divina, quæ
per miracula persuaserat veritatem fidei; per
ipsam fidem persuasit mores quosdam divi-
nos, qui non minus efficaces sunt ad per-
suadendum, esse Divinam & à Deo fidem,
quæ tales mores generat; quam ipsa mira-
cula. Et postea addit Augustinus: Hoc factum

est Divina providentia, per Prophetarum Vaticinia, per humanitatem doctrinamque Christi, per Apostolorum itinera; per Martyrum contumelias, cruces, sanguinem, mortes; per Sanctorum predicabilem vitam; atque in his universis digna rebus tantis atque virtutibus pro temporum opportunitate miracula. Cum igitur tantum auxilium Dei, tantum profectum fructumque vidcamus; dubitamus, nos ejus Ecclesiae condere gremio, quae usque ad confessionem generis humani, ab Apostolica Sede per successiones Episcoporum, frustra haereticis circumlatriantibus, & partim plebis ipsius judicio, partim Conciliorum gravitate, partim etiam miraculorum majestate damnatis, culmen authoritatis obtinuit? cui nolle primas dare, vel summae profecto impietatis est, vel praecipitis arrogantia.

CXXXIII Et sane, cum certum sit, divinas Scripturas traditas esse à Deo alicui hominum coetui vel communitati; ubinam possumus prudenter judicare illas conservari integras & incorruptas, nisi in Ecclesia Catholica Romana, quam tot signis & argumentis Deus probavit, esse suam veram & germanam Ecclesiam? & cui tantam tamque subli-

sublimem concessit auctoritatem. Unde idem Augustinus, l. 2. de Doctrina Christiana cap. 8. Doctorem Christianum, & solertem Divinarum Scripturarum indagatorem instruens, inquit: *In canonicis Scripturis Ecclesiarum Catholicarum quam plurimum auctoritatem sequatur; inter quas sane illæ sunt, quæ Apostolicas Sedes habere, & Epistolas accipere meruerunt. Tenebit igitur hunc modum in Scripturis canonicis, ut eas quæ ab omnibus recipiuntur Ecclesiis Catholicis, præponat eis, quas quædam non accipiunt. In eis vero, quæ non accipiuntur ab omnibus, præponat eas, quas plures graviorefque accipiunt, eis, quas pauciores minorisquæ auctoritatis Ecclesiæ tenent. Cum ergo omnes Ecclesiæ Catholicæ recipiant uti legitimos sacræ Scripturæ libros, eos omnes & solos, quorum catalogum conce-
xit Concilium Tridentinum sess. 4., quem Catalogum accepit Tridentinum per traditionem ab Ecclesiis Apostolicis, id est, quas fundarunt Apostoli, & ad quas scripserunt; consequens est, illam esse veram Dei Scripturam, quam modo habet, & semper habuit Ecclesia Catholica Romana.*

CXXXIV Hunc Catalogum seu Canonem

nem Scripturarum acceperunt per traditionem Patres Tridentini ab Eugenio IV in Concilio Florentino, ut videre est apud Bartholomæum Carranzam in summa Conciliorum. Rursus Eugenius illum accepit à Gelasio Papa in Concilio Romano, ut constat ex secundo Tomo Conciliorum in Decretis Gelasii circa finem. Iterum Gelasius ab Augustino, lib. 2 de Doctrina Christiana cap. 8. Et Augustinus à Concilio Carthaginensi tertio, quod alii quintum, alii sextum vocant. Denique Patres hujus Concilii ab Innocentio I, qui vixit anno 402, in epistola ad Exuperium. Nec dubium, quin Innocentius Catalogum hunc contexuerit, prout invenit in Ecclesiis Apostolicis, quas scilicet Apostoli fundarunt, & in quibus sederunt, inter quas Princeps & reliquarum Mater est Ecclesia Romana; in qua sedit Petrus, quæ per antonomasiam appellatur Sedes Apostolica; quia illam Principes Apostolorum Petrus & Paulus fundarunt, & sanguine suo illustrarunt, & ad quam Paulus scripsit. Cum ergo Ecclesia Catholica Romana eos libros omnes, ut Canonicos & à Deo dictatos custodiat, & per traditionem acceperit à Sedi-

bus,

bus, in quibus Apostoli docuerunt; certum est, Scripturam sacram, veram & legitimam, eam esse, quam Ecclesia Catholica pro tali agnoscit.

CXXXV Quare Catholici omnes securissimi sunt, sequentes judicium Ecclesiæ Catholicæ, quam Spiritus sanctus gubernat, & quam non potest permittere errare in fundamento præcipuo fidei, agnoscendo pro libris canonicis & divinis eos, qui divini non fuerunt. Illi namque Ecclesiæ, quam Christus fundavit & per Apostolos suos per mundum diffudit, libros suos Deus tradidit custodiendos, & usque in finem mundi servandos. Et propterea dixit Augustinus, epist. 118 ad Januarium, *insolentissima infania esse disputare de eo, quod tota per orbem frequentat Ecclesia*. Cum ergo tota Ecclesia libros, quos Concilium Tridentinum ut Canonicos taxat, semper ut Canonicos legerit; extremæ dementiæ erit, de hoc dubitare. Hæretici autem, qui à Catalogo librorum sacrorum expungunt eos, in quibus eorum errores clare damnantur; & versiones formant, prout suis erroribus fovendis conducit; probare non possunt, se habere veras Scripturas, veramque

que earum versionem, nisi in ea parte, in qua cum Catholicis conveniunt. Unde de illis verificatur, quod dixit Augustinus lib. de persev. cap. 11. *Scripturas sic accipiunt, ut suo quodam privilegio, imo sacrilegio, quod volunt, sumant; quod nolunt, rejiciant.*

CXXXVI Quapropter, antequam testimonio Scripturæ probemus aliquam veritatem, prius debet supponi probatum iudicio aliquo authentico infallibilis authoritatis, quænam sit vera & legitima Scriptura: quod iudicium nequit esse aliud, quam iudicium ipsius Ecclesiæ, loquentis per Concilia generalia approbata, quæ ipsam repræsentant; vel per Romanum Pontificem, qui est Vicarius Christi, & Caput visibile Ecclesiæ: cui omnes fideles tenentur obedire, cui Spiritus sanctus assistit ne erret, dum totam instruit Ecclesiam in fide & moribus, & dum illi designat libros, quos tamquam dictatos à Deo legere debeat.

§. IV.

*Secundum caput idem probandi, quia Scriptura
nequit fungi munere judicis, ad definienda
dubia circa ipsius sensum.*

CXXXVII **E**X officio Judicis clare ostenditur, solam Scripturam non posse esse sufficientem controversiarum fidei judicem. Nam cum vis Scripturæ non consistat in sono verborum, sed in sensu, qui est vita & anima Scripturæ; & circa hunc sensum possint esse, & sæpè sint sententiæ omnino contrariæ; nequit ex sola Scriptura, semotâ traditione & expositione Patrum, determinari, quinam sit legitimus sensus Scripturæ, ab Spiritu sancto intentus. Necesse ergo est recurrere ad judicem alium, qui clarè & dilucidè declaret, quinam sit Scripturæ sensus, illumque fidelibus proponat. Nec satis est, quod cum Calvino respondent hæretici hujus temporis, nimirum, judicium de Scripturis & ejus sensu pertinere ad spiritum internum: hoc enim nihil aliud est, quam unicuique assignare pro regula credendi spiritum privatum. Nam spiritus ille internus, non est Spiritus sanctus, qui contradictoria nequit

nequit ut vera inspirare. Spiritus autem ille internus, quem judicem controversiarum faciunt hæretici, contradictoria dicitur ut vera. Nam ex illo spiritu interno Lutherus judicabat, Epistolam Jacobi esse *stramineam*, & Apocalypsim esse *dubia authoritatis*: ex eodem autem spiritu interno Calvinus judicabat, utrumque esse Verbum Dei. Ex illo spiritu interno Calvinus judicabat, sensum genuinum illorum verborum Christi, *Hoc est corpus meum*, esse hunc, *Hic panis figura est corporis mei*: Lutherus vero esse istum, *Hic panis est verè corpus meum*. Ergo spiritus internus, ad quem hæretici recurrunt, pro explicando judice controversiarum fidei, non est Spiritus sanctus; sed spiritus privatus cujuscunque, seu proprium cujusque cerebrum, quod uni dicitur unum & alteri dicitur oppositum. Unde miseri isti homines, dum existimant, se in explicanda Scriptura sequi impulsu Spiritus sancti; sequuntur sæpissimè impulsu diaboli, qui se transfigurans in Angelum lucis, illis persuadet, esse sensum Scripturæ illum, quem Spiritus sanctus intendere non potuit, utpote erroneum & puritati Spiritus sancti contrarium; illisque adaptatur

aptatur illud *Væ* Prophetæ: *Væ* vobis, qui dicitis malum bonum, & bonum malum; ponentes tenebras lucem, & lucem tenebras, *Isai.* 5, 2: & de illis verificatur illud *Prov.* 16, 15, *Est via, quæ videtur homini recta, & novissima ejus ducunt ad mortem.* Et fanè, cum motus internos discernere sit difficillimum, an sint à Deo, an à diabolo, an à proprio spiritu; dum hæretici dicunt, sacram Scripturam, ut explicatam spiritu interno, esse regulam fidei; regulam fidei ancipitem & dubiam statuunt; & ista ipsorum sententia est errorum innumerabilium seminarium: & hinc fit, ut unicuique sua imaginatio pura veritas, & ipsissimus Scripturæ sensus videatur.

CXXXVIII Præterea convincitur, Scripturam non posse esse judicem controversiarum fidei; quia nequit esse inter duos litigantes judex ille, qui non potest ita clare pronuntiare sententiam, ut quilibet litigantium clare intelligat, an pro illo, an contra illum sit prolata sententia. Talis autem est Scriptura: ergo illa nequit esse controversiarum judex. Probatur minor. Nam Lutherani & Calvinistæ, qui dicunt, solam Scripturam esse controversiarum judicem, inter se litigant de præ-

quam Codicem Justiniani cum Pandectis, seposita Doctorum interpretatione; & Titius pro suo jure producta aliqua lege affirmaret, per eam manifeste causam sibi adjudicari, Cajus vero negaret: similiter Cajus allegata alia lege diceret, clarum esse, eam legem sibi favere, Tirius vero negaret: & ita ambo causâ indecisâ discederent; nonne res esset ridicula, & omnes dicerent, neutrum velle causam definiri? neutrum admittere alium judicem, quam proprium judicium? Simili plane modo, hoc ipso quod illi nolunt alium judicem quam Scripturam, & quisque suo spiritui reservat ejus interpretationem; ostendunt, se nolle causam legitimo modo definiri, nec alium judicem quam proprium judicium admittere.

§. V.

Caput tertium idem probandi, quia cum littera occidat, spiritus autem vivificet; qui solam Scripturam vult esse controversiarum Iudicem, relicto Ecclesiæ sensu, necesse est ut erroribus involvatur.

CXXXIX **S**icut in homine sunt duo, corpus scilicet & anima; ita in Scri-

Scriptura duo spectanda sunt, scilicet littera, quæ est veluti corpus; & sensus, qui est velut anima; Apostolus autem 2 Corinth. 3. 6. dicit: *Littera occidit, spiritus autem vivificat*; quod, secundum explicationem traditam ab Augustino serm. 70. de tempore, perinde est, ac si diceret: Si sequaris Scripturæ sensum, qui est quasi spiritus & anima vivificans, proderit tibi ad salutem; si autem neglecto vero & legitimo sensu, hæreas tantum in externa littera, & contendas illum esse sensum quem externa littera præsefert, sæpe errabis. Unde infelices appellat Judæos, & magis infelices hæreticos, *qui dum solum litteræ aspiciunt sonum, quasi corpus sine anima, ita sine vivificante spiritu mortui remanserunt*. Hoc pacto littera occidit Judæos, qui omnia quæ de Christo prædicta sunt à Moysse & Prophetis sub umbris & figuris, secundum litteram externam intelligunt, & sensum internum ab Spiritu sancto intentum non percipiunt. Et hoc est, quod vult Apostolus 2. Corinth. 3, dum ait: *Usque in hodiernum diem, dum legitur Moses, velamen positum est super cor eorum*; quasi diceret; hucusque Judæi non intelligunt

Moy-

Moysem, quem quotidie legunt; quia sistentes in sono & cortice exteriori litteræ, non transierunt ad internum sensum; ac propterea non agnoscunt Christum, qui sub illis Moyfis sacrificiis & ceremoniis tamquam sub velamine occultatus est. Et idcirco Christus Joan. 5. 39, Judæis dicebat: *Scrutamini Scripturas, quia vos putatis in ipsis vitam æternam habere; & illa sunt, quæ testimonium perhibent de me, & non vultis venire ad me, ut vitam habeatis.* Id est, si vultis cognoscere, me esse Messiam, vobis à Deo per Moysem & Prophetas promissum; non debetis tantum legere Scripturas quoad externum corticem litteræ; sed debetis scrutari internum sensum & spiritum, qui est veluti nucleus sub illo cortice latens, quod hætenus non fecistis. Quamvis enim vobis vere persuasum habeatis, in Scripturis sitam esse vitam æternam; adhuc tamen ignoratis, in qua parte sita sit: non enim sita est in littera & cortice, seu in ceremoniis & sacrificiis; sed in spiritu, qui sub illis umbris latet: hunc scrutari debetis. Si autem debite quæeratis, invenietis, illas testimonium perhibere de me; & me esse corpus illius umbræ, &
spi-

spiritum illius litteræ, & veritatem illorum signorum.

CXL Sicut autem littera Scripturæ non penetrata occidit Judæos, ita etiam occidit hæreticos, qui abusi sunt littera Scripturæ ad suos errores confirmandos: quia enim spiritu superbiæ obcæcati, contempserunt verum & legitimum sensum, quem sancta Mater Ecclesia in littera Scripturæ aperuit, & quem Patres Ecclesiæ Spiritu Dei pleni invenerunt & secuti sunt, componentes invicem Scripturæ testimonia, & unum cum alio conferentes, & lucem à Deo enixe postulantes ad assequendum verum sensum: quia, inquam, hunc sensum reliquerunt; & in littera & cortice alicujus testimonii sistentes, ad verum sensum investigandum non sunt progressi; ideo in errores suos & hæreses prolapsi sunt. Nullus enim est hæreticus, qui suos errores non hauserit & confirmare procuraverit ex aliquo Scripturæ testimonio, secundum sonum & corticem litteræ allegato. Sic Sabeliani, secundum litteram intelligentes illa Christi verba Joan. 10, *Ego & Pater unum sumus*, deducebant, Patrem & Filium esse eandem personam, diversis nominibus significatam,

tam, propter diversa munera quæ ad extra exercent; cum tamen secundum legitimum sensum ly *Unum* significet unitatem essentialiæ, & ly *Sumus* pluralitatem personarum. Sic Ariani ex illis verbis Christi Joan. 14, 28, *Pater major me est*, secundum litteram occidentem intellectis, deducebant, Filium Dei esse minorem *Patre*; cum tamen, secundum verum sensum, haustum ex illo textu collato cum illo alio, *Ego & Pater unum sumus*, & cum aliis Scripturæ locis, Christus sit minor *Patre* secundum humanitatem, & æqualis *Patri* secundum divinitatem. Cum enim sit Deus & homo, & habeat duplicem naturam in una persona; secundum naturam humanam est minor *Patre*, & secundum divinam æqualis *Patri*; utpote idem Deus cum *Patre*, licet distincta persona à *Patre*. Et sic de aliis hæreticis, quorum errores ex Scriptura male intellecta collectos, late proponit P. Becanus, in *Manuali Lib. I cap. 5.*

§. VI.

Caput quartum idem probandi, quia cum Scriptura, quoad verum & legitimum sensum, in multis locis sit obscura, nequit se sola esse Iudex omnium controversiarum fidei.

CXLI **M**ulta esse Scripturae loca obscura & intellectu difficilia, constat testimonio Divi Petri epist. 2, c. 3 v. 16 affirmantis, in Epistolis Pauli *quadam esse difficilia intellectu*. Constat secundo ex illo Act. 8, 31, ubi Eunuchus Reginae Aethiopum, interrogatus à Philippo, an intelligeret Isaiam Prophetam, quem legebat; respondit; *Quomodo possum, si non aliquis ostenderit mihi?* Tertio, quia manifestum est, obscurissimam esse Prophetiam Ezechielis de visione quatuor animalium: manifestum etiam est, prophetiam Danielis de septuaginta hebdomadibus, & de abominatione desolationis claram non esse, sed multorum ingenia exercuisse; & propterea Christum, Matth. 14, 15 de illa dixisse; *Qui legit, intelligat*. Quarto, quia certum est, Joannis Apocalypsim plenam esse reconditis mysteriis, & propterea

Hie-

Hieronymum in epistola ad Paulinum dixisse, tot habere Sacramenta, quot verba. Quinto, quia Augustinus, lib. de fide & operibus, c. 15, fatetur, illum locum Pauli 1 Corinth. 1 v. 12. *Super aedificat super fundamentum hoc, aurum, argentum, lapides pretiosos, ligna, fœnum*, esse unum ex illis, de quibus Petrus locutus est, quando dixit, in *Epistolis Pauli quædam esse difficilia intellectu*. Certum quoque est, obscurum esse illum locum 1 Corinth. 15, 29, *Quid facient, qui baptizantur pro mortuis, si omnino mortui non resurgunt?* Item illud Hebr. 6, 4, *Impossibile est, eos qui semel sunt illuminati, gustaverunt etiam donum caeleste, & participes facti sunt Spiritûs sancti, & prolapsi sunt; rursus renovari ad pœnitentiam*. Certissimum denique est, multa alia esse loca in Scriptura, difficillima intellectu; idque constat ex consensu omnium interpretum. Si enim Scriptura esset clara & perspicua, non opus esset tot interpretibus, & tot commentariis.

CXLII Hoc supposito manifestè probatur, Scripturam non esse se sola judicem sufficientem, ad determinandas & definiendas quæstiones, quæ circa fidem & mores

I

inter

inter ipsos Catholicos excitantur. Nam certissimum est, sæpe dubitari, quisnam sit sensus legitimus & verus alicujus textûs Scripturæ, quem tamquam veritatem à Deo revelatam omnes fideles amplecti debeant. Hoc autem dubium nequit resolvi tamquam à judice ab ipsa Scriptura, de cujus sensu dubitatur. Ergo evidens est, vel controversiam illam semper debere manere indecisam, & litem de sensu ejus loci numquam finiendam; vel designandum esse aliquem alium Judicem, qui habeat authoritatem ad definendum & determinandum, quisnam sit legitimus sensus illius textûs: & qui ita clarè & dilucidè ferat sententiam, ut partes litigantes facilè illam percipiant. Iste autem judex nequit esse Scriptura aliqua mortua, sed debet esse, vel persona aliqua particularis, habens authotitatem interpretandi Scripturas, & proponendi fidelibus verum eorum sensum; vel cœtus aliquis hominum, seu aliquod Concilium, cujus judicio omnes debeant stare; & judex iste, cui omnes fideles teneantur obedire, debet esse anthoritatis iufallibilis, ut ostendi §. I: qui judex inter hæreticos non reperitur, & ideo nullam in articulis

lis suæ religionis consistentiam habent hæretici, qui ad Scripturam, tamquam ad unicam credendi regulam & controversiarum fidei judicem, provocant.

CXLIII Ut enim de illis scribebat P. Lessius anno 1609, videmus, nullum apud eos esse finem controversiarum etiam de gravissimis fidei capitibus. Dissentiunt enim Lutherani, Calvinistæ, & Anabaptistæ in multis hoc tempore acerbissime, & se mutuo damnant hæreseos. Dissentiunt ipsi Lutherani, tum inter se in plurimis, tum à Luthero, parente & Apostolo suo; adeo ut hoc tempore numerentur tredecim præcipue Lutheranorum sectæ, nominibus & dogmatibus quibusdam discrepantes. Dissentiunt inter se Calvinistæ, maxime in articulo de capite Ecclesiæ; magna enim illorum pars hanc potestatem tribuit Principi seculari, etsi mulier sit; vocantur hi Protestantes: alii id nefas ducunt, & blasphemiam; hos vocant Puritanos. Dissentiunt inter se Anabaptistæ in plurimis, ita ut 14 eorum sectæ diversæ numerentur, nominibus & dogmatibus distinctæ. Denique nunc eo ventum, ut cum se quisque hanc regulam sequi eaque niti putat, tot pœne sint hæreses,

quot hæretici. Plerique enim, præsertim simpliciores, dicunt se parum curare, quid docuerit Lutherus vel Calvinus; se enim adhærere S. Scripturæ & Verbo Dei, in quo nullus error esse potest, & ita se putant valde securos: Scripturam autem quisque pro suo captu & iudicio intelligit. Unde cum se putant Scripturam habere regulam credendi, loco Scripturæ habent imaginationem propriam. Quod enim imaginantur, significari verbis Scripturæ, pro vero sensu Scripturæ accipiunt: sicque quot sunt diversæ hominum imaginationes, tot sunt regulæ credendi. Sed unde fit, ut sua cuique imaginatio, pura veritas & ipsissimus Scripturæ sensus videatur? Provenit hoc, partim ex immensa quadam philautia & æstimatione sui (qui enim se magni facit, facile sibi persuadet, omnes suas inventiones & animi conceptiones præclaras esse) partim ex diabolica operatione, qui interius phantasiam hominum pervertit, ut id, quod apprehendunt, statim, ob levissimam aliquam ratiunculam, perspicuam veritatem putent. Cum enim homines tædio religionis antiquæ veritatem averfantur, & pruriunt auribus ad novitates, iusto

Dei

Dei judicio sinuntur decipi à diabolo. Hic ergo dum interius in sensibus eorum operatur, putant se divino Spiritu illustrari, & omne de fidei dogmatibus judicium ad hunc spiritum referunt. Hinc fit, ut cuilibet sectæ, & fere cuilibet homini privato sua apprehensio purum putum Dei verbum videatur, nec curet omnes rationes, quæ in contrarium adferuntur. Significat hoc Apostolus, cum ait: *Eo quod charitatem veritatis non receperunt, ut salvi fierent; ideo mittet illis Deus operationem erroris, ut credant mendacio.* Mittet, non imperando, sed diabolo vires laxando, ut eos, qui veritatem seu antiquam Religionem contempserunt, possit decipere, & in mille errores agere transversos.

§. VII.

Infertur ex dictis, Lutheranos & Calvinistas non posse ex Scripturis arguere.

CXLIV **R**atio est, quia ut ostendimus §. I. non potest quis ex Scripturis apud ipsum existentibus arguere, nisi prius probet, apud ipsum esse veram Scripturam. Id autem probare non possunt Lu-

evidenter demonstrata. C. 4 §. 7 191
tis sæculis in Ecclesia viguit, & communi
Christianorum consensu recepta est: hanc
enim repudiant, & in ejus locum, non unam
aut duas, sed prope infinitas suis auditoribus
obtrudunt (ut probat Becanus in Manuali lib.
1. cap. 1. §. 2.) & plerasque etiam ipsis ad-
versariis suspectas, & ab ipsis damnatas. De-
nique non habent authenticam Scripturæ in-
terpretationem, sed novam & inauditam, &
omnibus bonis authoribus repugnantem; ut
cernitur in interpretatione adhibita à Calvi-
no illis Christi verbis Matt. 16. *Si vis ad vi-
tam ingredi, serva mandata*; affirmat enim
hic novus Genevæ propheta, illa non serio,
sed ironice à Christo dicta fuisse; ut sensus
sit: Ne serves mandata; quia illorum ob-
servatio nec prodest, nec possibilis est. Et
cernitur in interpretatione Theodori Bezae,
ad illa verba Actor. 2. 27, *Non derelinques
animam meam in inferno*; quæ sic exponit ad
litteram, *Non derelinques cadaver meum in
sepulchro*. Non ergo habent hæretici veram
Scripturam; ergo ex Scriptura, prout apud
iplos extat, & quatenus ipsorum canone &
versione continetur, nequeunt arguere. Un-
de ad arguendum contra Catholicos necesse

est , ut recurrant ad Scripturam & versionem, quæ semper fuit in usu in Ecclesia ipsa Catholica.

CXLVI Jam ergo ab his Ecclesiæ reformatæ auctoribus rogo , unde acceperint codicem Bibliorum ? Respondebunt , non aliunde, quam à Catholicis. Sed rursus rogo, Cur eundem, quem recepistis, non retinetis ? Cur canonem Catholicorum, qui ab Innocentio primo, ab Augustino, & à tota Ecclesia receptus est , repudiatis ? Cur novum fingitis, qui ab Ecclesia numquam pro legitimo agnitus est ? De vobis sane verificatur , quod de Manichæis scripsit Augustinus libro de bon. persever. cap. 11, *Scripturas sic accipitis , ut vestro quodam privilegio, imo sacrilegio, quod vultis sumatis; quod non vultis, rejiciatis.* Cur antiquam & usitatam editionem , quam semper Ecclesia venerata est , rejicitis ? Cur novas, & inter se repugnantes versiones substituitis ? Cur sensum Scripturæ falsis & distortis interpretationibus depravatis ? Si ergo ex Scriptura Dei arguere vultis , ex nostra debetis arguere, quia vestram non admittimus. Nostra legitima & antiqua est; vestra spuria & novitia : nostra

stra unica & sibi constans; vestra varia, multiplex, & instabilis.

§. VIII.

Quintum caput idem probandi, quia multe sunt controversiæ fidei, quæ non possunt definiri ex Scriptura.

CXLVII **R**atio est, quia multe sunt controversiæ circa fidem & religionem, quarum nulla fit mentio in Scriptura, vel non sufficiens ut determinentur; nequeunt autem ex sola Scriptura determinari controversiæ, quarum nulla fit in Scriptura mentio, vel non sufficiens ad illarum decisionem: pro his ergo controversiis dirimendis quærendus est Judex alius, diversus ab Scriptura; nimirum Judex vivus, qui consulens, non solum libros sacros, sed etiam traditiones Apostolicas, controversias illas determinet. Ille autem Judex non potest esse persona privata; sed debet esse, vel summus Pontifex, vel Concilium generale: ratio enim ipsa postulat, ut causa Religionis, cum sit communis toti Ecclesiæ, non judicetur à privatis, qui nullam in Ecclesia dignitatem ob-

I 5 tinent.

tinent; sed vel ab ipso universalis Ecclesiæ Pastore, cui omnes suas oves Christus in Petro pascendas commisit, dum dixit, *Pasce oves meas*; vel à cœtu generali Pastorum, qui in unum convenientes ad Concilium generale Ecclesiam universam repræsentant; &, tamquam capita particularium Ecclesiarum & pastores gregum, providere debent, ut oves ipsorum habeant salutarem pastum doctrinæ. Sic controversiæ de legibus & privilegiis regni, non ab alio quam à Rege & à regni primoribus, qui totum regnum repræsentant, debent determinari.

CXLVIII Quod multæ sint controversiæ, circa fidem & religionem, quarum nulla fiat mentio in Scriptura, vel non sufficiens ad ipsarum determinationem, patet. Quia controversia de canone Scripturarum, quinam videlicet libri habendi sint pro canonicis & à Deo dictatis, maxime spectat ad fidem & religionem; & tamen hæc controversia nequit ex Scriptura determinari. Affirmant Catholici, libros Tobiae, Judith, Sapientiæ, & Machabæorum esse canonicos; negant Lutherani & Calvinistæ; manifestum est autem istam controversiam non posse ex Scriptura

ptura determinari. Idque ipsi hæretici, fatentur; dum ad expungendos hos libros à catalogo librorum sacrorum, non provocant ad Scripturam, sed ad canonem & traditionem Judæorum; dicunt enim non esse canonicos, quia non reperiuntur in canone Judæorum; ac proinde agnoscunt in hac causa aliū judicem quam Scripturam. Et qualem judicem? Traditionem Judæorum. *Mira res*, exclamat P. Becanus, *pluris Iudaos quam Christianos faciunt; & cum ipsi Christiani esse velint, Christi & Apostolorum traditionibus infensissimi sunt, & Iudæorum traditionem in pretio habent.* Catholici obediunt summis Pontificibus & Conciliis generalibus, quæ mota ex traditione Apostolica & ex usu perpetuo Ecclesiæ, declararunt, omnes istos libros esse canonicos.

CXLIX Ad fidem quoque & religionem pertinet controversia de numero Sacramentorum novæ Legis. Hæretici affirmant, Sacramenta novæ Legis esse dumtaxat duo, nempe Baptismum & Eucharistiam; Catholici constanter credunt, esse septem. Illi ex Scriptura, ad quam provocant, probare non possunt, esse solum duo: quia nec ex Scriptura probare possunt,

possunt, nomen Sacramenti tribui Baptismo & Eucharistiæ, non autem aliis quinque; neque ex Scriptura possunt probare, quænam sit definitio Sacramenti; nec supposita definitione, possunt ex Scriptura persuadere, illam definitionem convenire soli Baptismo & Eucharistiæ. Catholici, ex traditione & perpetua praxi & consensu Ecclesiæ, suam doctrinam hauriunt, quæ in Conciliis ex hac traditione est definita.

CL Ad fidem etiam & religionem pertinet controversia, an baptizati ab hæreticis sint rebaptizandi. Affirmabat olim Cyprianus cum multis Episcopis Africanis; negabat Stephanus Papa, cujus sententiam secutus est Augustinus, & postea ab Ecclesia definita est. Neutra pars ex sola Scriptura putabat posse hanc controversiam definiri. Et Augustinus, qui veram sententiam defendit, non aliunde illam probavit, quam ex Apostolica traditione & praxi Ecclesiæ; ut constat ex lib. 2 de Baptismo contra Donatistas cap. 7, & lib. 5 cap. 23, *Consuetudinis robore* (inquit Augustinus) *tenebatur orbis Christianus, & hac sola opponebatur inducere volentibus novitatem.* Huic traditioni cessit tandem Cyprianus,

nus, quia videbat, se destitutum esse valido Scripturæ testimonio, quo suam sententiam firmare posset, ut testatur Augustinus Epist. 48 ad Vincentium.

CLI Unde constat, hereticos hujus temporis, Lutheranos & Calvinistas, contrarium spiritum habere ei, quem habuit vetus & vera Christi Ecclesia. Nam illi, propter unum Scripturæ testimonium sinistrè explicatum, contemnunt æternam Ecclesiæ consuetudinem, ut loquitur Lutherus de abroganda Missa, & in libro de instituendis Ministris ad Pragenses. At vetus Ecclesia, ex consuetudine ducentorum vel trecentorum annorum, explicabat cum Stephano Papa omnia testimonia, quæ Cyprianus cum suis afferebat: & merito, ut ponderat Bellarminus. Nam cum certum sit, consuetudinem universæ Ecclesiæ perpetuam non posse cum Dei verbo pugnare, & clarior sit consuetudo quam ipsum verbum; rectè judicabant illi, ex consuetudine Verbum Dei esse interpretandum; non autem ob Verbum Dei obscurum & ambiguum, consuetudinem abrogandam, ut Lutherani & alii hujus temporis hæretici faciendum esse contendunt.

CLII Ad fidem etiam & religionem atti-

nent controversiæ istæ : An Christiani loco Sabbati debeant colere diem Dominicam ? an Symbolum fidei sit verè Apostolicum ? an B. Virgo manserit Virgo post partum : quæ ex sola Scriptura decidi non potuerunt : & tamen ab Ecclesia ritè decisiæ sunt, & earum decisionem amplexi sunt Lutherani & Calvinistæ. Ergo manifestum est, solam Scripturam non esse sufficientem controversiarum judicem. Ergo certum est, nullam sectam hæreticorum esse veram Christi Ecclesiam, quia in nulla reperitur legitimus controversiarum fidei iudex ; sed solam Ecclesiam Catholicam Romanam, in qua iudex iste reperitur.

§. IX.

Supponitur, ut omnino certum inter Catholicos, Concilia generalia, confirmata à Romano Pontifice, esse legitimos controversiarum fidei & morum iudices ; ubi obiter ostenditur, etiam permissio, quod Concilium generale sit supra Papam, non esse licitum appellare à sententia Pontificis ad Concilium generale.

CLIII **C**ardinalis Bellarminus, lib. 2. de Conciliis c. 2, testatur, Catholicos omnes

omnes constanter docere, Concilia generalia, à Romano Pontifice confirmata, errare non posse, nec in fide explicanda, nec in iradendis fidei & morum praeceptis, toti Ecclesiae communibus. Et similiter l. 4 de Rom. Pontif. c. 2, testatur, Catholicos omnes & hæreticos convenire in duobus. Primo, posse Pontificem, etiam ut Pontificem, & cum suo cœtu Consiliorum, vel cum generali Concilio errare in controversiis facti particularibus, quæ ex informatione testimoniisque hominum præcipuè pendent. Secundo posse Pontificem, ut privatum doctorem, errare etiam in quaestionibus juris universalibus tam fidei quam morum, idque ex ignorantia, ut aliis doctoribus interdum accidit.

CLIV Deinde addit, Catholicos omnes in aliis duobus convenire, non quidem cum hæreticis, sed solum inter se. Primo, Pontificem cum Generali Concilio non posse errare in condendis fidei decretis, vel generalibus præceptis morum. Secundo, Pontificem solum, vel cum suo particulari Concilio, aliquid in re dubia statuentem, sive errare possit, sive non, esse ab omnibus fidelibus obedienter audiendum.

CLV Ex hoc principio deducit Cardinalis Pallavicinus, in historia Tridentini lib. 1. cap. 12. n. 7, invalidam & illicitam fuisse appellationem Lutheri ad futurum Concilium à Diplomate summi Pontificis Leonis X, in quò errores ejus in materia Indulgentiarum damnavit; declarans è Cathedra Petri, in Ecclesiæ thesauro Christi ac Sanctorum merita contineri, atque eo etiam jure Clavium Romanos Pontifices uti posse, Indulgentias elargientes ad emolumentum vivorum & mortuorum. Probat Cardinalis ibi n. 7, immerito appellasse Luterum ab hoc Decreto summi Pontificis ad futurum Concilium; nam Lutherus fatebatur, Romanum Pontificem esse Dei Vicarium in terris; unde negare non poterat, habere auctoritatem supra omnes fideles. Atque adeo, *tametsi talis auctoritas* (propria Vicarii Dei in terris) *tamquam subjecta Concilio admitteretur; non idcirco Pontificia sententia executio, praesertim contra privatum hominem, suspenderetur provocatione ad Concilium. Alioqui, vel oporteret cujusvis litis gratia Oecumenicum Concilium cogere, vel quilibet penderet anceps, donec opportunitas incideret Oecumenici*

nici Concilii in Ecclesia convocandi. Pari ratione, quamquam sint Principes, qui subiecti sint generalibus regni Ordinibus; risu tamen exciperetur, qui contenderet, executionem sententiae, à Principe in privatum latae, ad Ordinum generalium conventum retardandam. Posito, quod Pontifex errare posset in fidei dogmatis declarandis, essent quidem soluti fideles obligatione credendi indubitanter, quod ille definit; sed non ex eo solverentur obligatione extrinsecus observandi quod in eo genere idem praeceperet, dummodo hoc praeceptum Scripturae seu legi divinae evidenter non opponeretur; quae evidentia nequaquam poterat à Luthero prætendi, ubi tam magna fidelium ac theologorum pars illius novitati reclamabat.

CLVI Quæ in hoc numero narrat Cardinalis, supponunt ea, quæ narraverat num. 1. Nam cum Lutherus usque ad id temporis (nempe ad ann. 1518.) in suis commentariis actisque judiciorum, plenam subjectionem sui suarumque rerum Pontifici professus esset; tunc scripto publico palam fecit, se imprimis nolle adversari Ecclesiae, Sedisque Apostolicæ magisterio ac Pontificiæ authoritati; sed adjecit, Romanum Pontificem,

tametsi Dei Vicarius in terris esset, tamen obnoxium esse tamquam hominem erroribus, quod in Petro patebat, qui idcirco legitur à Paulo acriter objurgatus. Quapropter, sicut paratus erat obtemperare Pontifici probe edocto; ita, ubi suorum æmulorum suasu quidquam in se statuisset, à jure sacrisque litteris alienum, provocare se ad futurum Ecclesiæ universale Concilium, quod Romano Pontifici præest; ac propterea in Pontificum potestate non esse, hujusmodi provocationes interdicere.

CLVII Hic est spiritus hæreticorum, appellare ad futurum Concilium, quando vident, suos errores à Pontifice damnari; obtemperantes, illum esse hominem erroribus obnoxium, ac proinde potuisse errare in illa definitione; non distinguentes inter errorem Pontificis quatenus homo est, & inter errorem ejusdem quatenus Summus Pontifex est, & à Cathedra Petri totam Ecclesiam instruit in fide & moribus: quo pacto habet assistentiam infallibilem Spiritus sancti, ad non proponendum prava dogmata toti Ecclesiæ; sicut habent Concilia generalia, quæ etiam componuntur ex hominibus errori obnoxiiis

noxiiis, & tamen in decretis fidei & morum errare non possunt. Unde, qui affirmant, Pontificem Romanum posse errare in Decretis fidei & morum, toti Ecclesiæ intimatis, viam sternunt ad idem asserendum de Conciliis generalibus; ut fecit Lutherus; qui postea assert. 28. & 29. palam affirmavit, nullum esse Concilium, quod errare non possit; quod etiam docuit Calvinus lib. 4. instit. cap. 7. §. 8, & est communis error hæreticorum hujus temporis: qui probe scientes, eorum doctrinam esse damnandam in Conciliis generalibus, si ad hoc congregentur; se munire volunt hac assertione adversus Conciliorum definitiones. Hunc spiritum Lutheri imitati sunt aliqui partiales Jansenii, qui, ut refert Theophylus Raynaudus tomo 20. pag. 377, postquam certo sciverunt, quinque propositiones Jansenii damnatas fuisse ut hæreticas ab Innocentio X, adhuc ausi sunt obmurmurare, *nondum prorsus præclusum esse exitum sectatoribus Jansenii, cum reliquum (ajebant ipsi) sit persugium appellationis ad generale Concilium, cujus comprobatio in Romana Jansenii damnatione desideratur; cum solius Concilii sit, pronuntiare irretractabiliter de doctrina fidei.*

CLVIII Quod effugium Jansenistarum continet perniciosum errorem. Cum enim, juxta declarationem Concilii Florentini in litteris Unionis, certum sit, Romanum Pontificem, *verum Christi Vicarium, totiusque Ecclesiae caput, & omnium Christianorum Patrem ac Doctorem existere*; & (ut loquitur Innocentius III, in epistola ad Catholicum Armenorum) Romanus Pontifex *Magister sit Christianae fidei*; sanè, quando in re dubia & controversâ inter Catholicos, tamquam supremus Ecclesiae Magister & summus Pastor, controversiam definit, & unam partem tamquam hæreticam vel erroneam damnat, & pro tali haberi præcipit; omnes fideles tenentur suum judicium conformare ipsius judicio: & quamvis ipsi existimarent, illam propositionem contineri in Scriptura; cum tamen sciant, oppositum asserere authores gravissimos ante definitionem Pontificis, & evidenter ipsis constet, rem hanc saltè fuisse dubiam ante definitionem Pontificis; & videant, Pontificem, post diligentem rei discussionem, quæ in re tam gravi semper præsumi debet, partem, quam illi existimabant Catholicam, declarâsse ut hæreticam, debent judicium

dicium suum deponere, & in re anteceden-
ter dubiâ, se conformare cum judicio com-
munis Ecclesiæ Magistri; peccabuntque gra-
vissime, contra obedientiam debitam supre-
mo Ecclesiæ Pastori; si pergant judicare, esse
sanam & Catholicam doctrinam, quam ille
damnavit ut hæreticam.

§. X.

*Demonstratur, Concilia generalia, confirmata
à Pontifice, non posse errare in decretis
fidei & morum.*

CLIX **H**oc constat 1. Quia cum certum
sit ex Evangelio, Christum su-
pra Petrum & successores ejus fundasse
unam Ecclesiam visibilem, usque ad finem
mundi duraturam, & permanfuram firmam
in fide, quin portæ inferi adversus eam præ-
valere valeant, ut ostendimus cap. 1; certissi-
mum est, reliquisse in Ecclesia sua authori-
tatem necessariam ad conservandam unita-
tem fidei in illa, id est, authoritatem falli ne-
sciam in edendo Symbolum, & proponendo
fidelibus articulos fidei & dogmata ab ipsis
credenda. Nam unitas Ecclesiæ stare nequit
sic

sine unitate fidei: nec unitas fidei conservari potest in Ecclesia, nisi in illa detur authoritas aliqua suprema, falli nescia in determinandis fidei & morum controversiis, cujus iudicio omnes stare debeant. Hæc autem authoritas suprema infallibilis, debet esse Summus Pontifex, saltem quando simul cum Concilio generali determinat fidei & morum controversias, & decreta fidei edita à Concilio generali confirmat, & toti Ecclesiæ proponit.

CLX. Hanc rationem desumo ex D. Thoma, 4 contra Gent. c. 76 n. 2, ubi hæc habet: *Ad unitatem Ecclesiæ requiritur, quod omnes fideles in fide conveniant. Circa ea vero, quæ fidei sunt, contingit quæstiones moveri; per diversitatem autem sententiarum divideretur Ecclesia, nisi unitate per unius sententiam conservaretur. Exigitur ergo ad unitatem Ecclesiæ conservandam, quod sit unus, qui toti Ecclesiæ præsit: manifestum est autem, quod Christus Ecclesiæ in necessariis non deficit: quam dilexit, & pro ea sanguinem suum fudit; cum & de Synagoga dicatur per Dominum, Esaiæ 5; Quid ultra debui facere vineæ meæ, & non feci? Non ergo dubitandum est, quin ex ordinatione Christi unus toti Ecclesiæ præsit. Hæc ille.*

CLXI Nec item est dubitandum, quod præsit cum authoritate infallibili ad determinandas fidei & morum controversias, saltem quando eas determinat cum Concilio generali: nam si hanc non haberet, non posset unitatem fidei conservare; sed potius foret causa, ut Ecclesia tota erraret: supremus enim magistratus, cui in causa fidei omnes tenentur obedire; seu supremus Magister, quem è Cathedra loquentem omnes tenentur audire; si erret, causa est, ut omnes errent.

CLXII Quia certissimum est ex Scriptura; *Ecclesiam esse columnam & firmamentum veritatis*: unde impossibile est, ut Ecclesia Christi erret in iis, quæ credenda proponit: Ecclesia autem Christi verissime dicitur, credenda proponere illa omnia, quæ definiunt Concilia generalia, confirmata à Romano Pontifice; & quæ mediante eodem Romano Pontifice intimantur fidelibus, & in Ecclesiis particularibus publicantur: Ecclesia enim non aliter potest proponere fidelibus mysteria credenda, nisi mediante capite Ecclesiæ, & mediis Pastoribus seu Episcopis, quos Deus præfecit communibus fidelibus: ad plebem enim non attinet docere, sed doceri; nec ovi-
bus

bus convenit pascere , sed pasci. Quorum enim est regere aliquam communitatem, si-
ve in temporalibus, siue in spiritualibus, eo-
rumdem est determinare & definire contro-
versias emergentes in illa communitate, sine
quorum decisione pax conservari nequit. Et
sic indubitatum est, Ecclesiam determinasse
omnia, quæ definita sunt in Conciliis gene-
ralibus approbatis. Sic in Concilio Nicæno
primo, approbato à S. Silvestro , definita est
divinitas Christi Domini, ejusque æqualitas
cum Patre, contra Arianos. In Concilio Con-
stantinopolitano primo, confirmato à S. Da-
maso, declarata est divinitas Spiritus sancti,
ejusque æqualitas cum Patre & Filio, con-
tra Macedonium. In Concilio Ephesino pri-
mo, confirmato à S. Cælestino, definitum est
contra Nestorium, in Christo unam tantum
esse personam, eamque divinam ; ac proinde
beatam Virginem, quæ Mater est Christi, es-
se verè & propriè Matrem Dei. In Concilio
Chalcedonensi, confirmato à S. Leone, de-
finitum est & declaratum , contra Diosco-
rum & Eutychetem, in Christo esse duas na-
turas, divinam & humanam, in unica perso-
na divina ; quæ cum semper habuisset natu-
ram

ram divinam per identitatem, in tempore, per veram unionem sibi copulavit humanam: & sic de aliis Conciliis: hæc autem Concilia S. Gregorius venerabatur, ut quatuor Evangelia. Certissimum ergo est, Ecclesiam Catholicam, quæ est columna & firmamentum veritatis, determinasse & definisse ea omnia, quæ definita & determinata sunt in Conciliis generalibus: & omnino indubitatum est, esse hæreses, illas omnes doctrina, quas ut hæreticas Concilia illa generalia damnarunt.

CLXIII Et sane, cum hæretici nostri temporis non negent, Ecclesiam Catholicam Romanam fuisse veram Christi Ecclesiam, in illis primis quatuor vel quinque seculis; negare non possunt, esse certa & indubitata omnia illa, quæ determinata & declarata sunt in illis Conciliis primis Ecclesiæ. Ergo Concilia generalia, confirmata à Romano Pontifice, certam & infallibilem fidem faciunt. Alioqui nec Symbolum Nicænum certam fidem faceret; quod tamen hæretici ipsi hujus temporis, ut infallibilem fidei regulam venerantur.

CLXIV Quod si dixerint, veritates definitas in illis Conciliis, esse certas & indubita-

K

tas,

tas, non quia sunt in illis Conciliis definitæ & declaratæ; sed quia continentur in Scriptura, quæ errare non potest: contra est, quia Arius, Macedonius, Nestorius & Eutyches, qui damnati sunt ut hæretici in illis Conciliis, Evangelia admittebant, & existimabant sua dogmata non esse contraria Evangelio, sed potius in illo contineri. Unde Concilia illa, dum damnarunt illorum dogmata ut hæretica, fideles omnes certificarunt de eo, quod dogmata illa sint contraria Evangelio: quod facere non possent, nisi haberent assistentiam infallibilem Spiritus sancti ad non errandum, dum declarant conciliariter Scripturas, & fidelibus proponunt dogmata credenda. Quomodo certificari poterunt fideles de sensu legitimo Scripturarum, si non certificantur ex decretis Conciliorum generalium legitime congregatorum, & à capite Ecclesiæ confirmatorum? Quæro à Lutheranis & Calvinistis, unde certi sint, Arium, Macedonium, Nestorium, & Eutychetem fuisse hæreticos? Si dicant; Quia certi sumus, docuisse dogmata contra legitimum sensum Scripturæ; ulterius rogabo: Unde vobis constat, dogmata ab illis tradita fuisse contra legitimum sensum

sum Scripturæ? Si dixerint; Quia spiritus internus hoc nobis dicitur; rogabo: Unde scitis, hunc spiritum vestrum internum, qui vobis dicitur, dogmata definita in Tridentino circa fidem, circa justificationem, & circa Sacramenta, esse falsa? unde, inquam, scitis, hunc esse Spiritum Dei, esse Spiritum veritatis, & non potius esse spiritum proprium, vel diabolum & spiritum mendacii? Arius, Macedonius, Nestorius, & Eutyches etiam spiritu interno judicabant, dogmata sua esse conformia Evangelio: nec enim tam tenaciter illa defenderent, nisi interne judicarent, esse conformia Evangelio; & sibi persuaderent, hoc suum judicium esse ab spiritu veritatis; & tamen vos scitis illos deceptos fuisse. Ideo ergo certi estis, fuisse hæreticos, illos homines; quia evidenter vobis constat, eorum dogmata damnata fuisse in Conciliis illis generalibus. Ergo fateri debetis, Concilia generalia legitima, & approbata à Romano Pontifice, habere authoritatem infallibilem. Nec ullum Concilium generale, legitimum & approbatum, potestis rejicere ut mendax; si semel concedatis prima illa quatuor Concilia, quia generalia & approbata, fuisse authoritatis infallibilis.

CLXV 3. Eadem veritas probatur ex illo Apostoli ad Ephes. 4 v. 11. Et ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores & Doctores, ad consummationem Sanctorum; in opus ministerii, in adificationem corporis Christi; donec occurramus omnes in unitatem fidei & agnitionis Filii Dei, in virum perfectum, in mensuram etatis plenitudinis Christi; ut jam non simus parvuli fluctuantes, & circumferamur omni vento doctrinae, in nequitia hominum, in astutia ad circumventionem erroris: ex quibus verbis constat, Christum reliquisse in Ecclesia sua Pastores & Doctores, ut populum instruant in doctrina fidei & morum; & ita in unitate fidei & agnitione Filii Dei, id est, ipsius Christi vera cognitione, confirment & consolident; ut tamquam parvuli, non circumferantur omni vento doctrinae, & seducantur à falsis prophetis, id est, ab hominibus seminantibus falsa dogmata. Ergo ope sua assistit Pastoribus & Doctoribus Ecclesiae, ne illi ita errent in fide, ut populus teneatur illos errantes sequi. Ergo ita assistit illis, ut quando conveniunt ad Concilium generale, & approbante Romano

Pon-

Pontifice definiunt dogmata aliqua, & credenda proponunt, non possint errare. Si enim Pastores & Doctores in Concilio generali, legitimo & approbato, errarent, à rectoque fidei tramite discederent; oves ipsæ, id est, fidelium populus, in errorem ducerentur: ut enim Gregorius docet, *Cum Pastor per abrupta graditur, necesse est ut per precipitium oves sequantur.*

CLXVI Et sane cum Papa sit caput universale visibile totius Ecclesiæ, & Episcopi particulares sint capita suarum Ecclesiarum, & ad ipsos, tamquam ad Pastores, spectet populos, tamquam oves, pascere doctrina veritatis, & communes fideles instruere in fide & moribus, tamquam ad ipsorum Magistros atque Doctores; fieri non potest, nisi ut membra reliqua eo deferantur, quo & oculi suam vim atque aciem intenderint, & caput sese inclinaverit atque deflexerit. Fidelium ergo reliquorum turba, si videret Episcopos, convocatos ad Concilium generale, simul cum Summo Pontifice controversiam fidei determinasse, & unam partem credendam proposuisse; illam partem ut veram deberet amplecti, & oppositam rejicere ut hæreticam;

214 *Veritas Religionis Catholicæ*
ac proinde, errante Concilio generali, tota
Ecclesia erraret.

CLXVII 4. Probatur ex Christi promissionibus, factis Ecclesiæ suæ: nam Joan. 14. Ego (inquit) rogabo Patrem, & alium Paracletum dabit vobis, ut maneat vobiscum in aeternum, Spiritum veritatis; quem vos cognoscetis, quia apud vos manebit. Et postea Paracletus autem Spiritus ille vos docebit omnia, & suggeret vobis omnia, quæcumque dixerò vobis. Item Joan. 16. Cum autem venerit Spiritus veritatis, ille vos docebit omnem veritatem. Quæ verba non possunt intelligi de solis Apostolis, sed referri debent quoque ad eorum successores Episcopos; ut constat ex illis verbis, Ut maneat vobiscum in aeternum. Et ex illa alia Christi promissione, Matt. ult. Ecce ego vobiscum sum omnibus diebus usque ad consummationem seculi. Idem patet ex illis Christi verbis, Joan. 17. Sanctifica eos in veritate: sermo tuus veritas est. Pro eis ego sanctifico me ipsum, ut sint & ipsi sanctificati in veritate. Non pro eis autem rogo tantum, sed pro eis qui credituri sunt per verbum eorum in me. Ergo promissiones illæ factæ sunt, non solum Collegio Apostolorum, sed Collegio Episcoporum,

rum, qui illis successuri erant in munere pastoralis, & factæ sunt Ecclesiæ in capite illorum. Nec verba illa referri possunt ad singulos Episcopos, singulosque fideles in particulari; quia constat, non singulis promisisse Christum Spiritum veritatis; cum ex Scriptura sit manifestum, oportere, ut hæreses sint; & ex Ecclesia prodituros, qui prava dogmata seminant; ut fecerunt Dioscorus, Nestorius, & alii hæresiarchæ, qui Episcopi fuerunt. Intelligendæ ergo sunt de communitate Episcoporum; ad quos, tamquam ad Pastores, pertinet pascere Ecclesiam Dei. Ergo quando convocantur à Vicario Christi ad Concilium generale, ut in eo definiant aliquam fidei & morum controversiam, illamque definiunt approbante eodem Pontifice, & confirmante eorum definitionem; habent assistentiam infallibilem Spiritus sancti ad non errandum.

CLXVIII Si enim Christus dixit Matt. 18, *Ubi sunt duo vel tres congregati in nomine meo, ibi sum in medio eorum*; quanto magis erit in medio Episcoporum, qui, ex mandato summi Pontificis, ex omni mundi parte conveniunt in unum locum, ad providendum Ecclesiæ in magna aliqua necessitate; & ipso

approbante & confirmante, determinant aliquam fidei vel morum controversiam, ut ipsis assistat, ne in re tanti momenti errent? Ut enim explicat Cardinalis Bellarm. l. 2 de Conciliis c. 2; illorum verborum, hic sensus est: *Si duo vel tres, congregati in nomine meo*, obtinent semper quod petunt à Deo; nimirum sapientiam & lumen, quod sufficit eis, ad cognoscenda ea quæ ipsis necessaria sunt; quanto magis Episcopi omnes, congregati in nomine meo, semper obtinebunt, quod juste petunt? id est, sapientiam & lumen, ad iudicanda ea quæ ad totam Ecclesiam dirigendam pertinent?

CLXIX Itaque, si pauci, si multi, si privati, si Episcopi congregentur in nomine Christi; omnes habent Christum præsentem & adjuvantem, & obtinent quod eis convenit obtinere; sed in congregatione paucorum & privatorum adest Christus, ut eos adjuvet in rebus paucis & privatis; in congregatione autem Episcoporum adest, ut eos adjuvet in rebus magnis & publicis. Ita hunc locum exponit, & hoc argumento utitur Concilium Chalcedonense, in Epistola ad Leonem, quæ est post finem tertiæ
actio-

actionis ejusdem Concilii. Item sexta Synodus act. 17; Toletanum III, non procul ab initio: item Innocentius Papa ad Gratian. dist. 20. Can. *De quibus*; Cælestinus, in epistola ad Ephesinum Concilium I; & Cyrillus, in expositione Symboli Nycæni, circa principium.

CLXX Dixi, *Romano Pontifice approbante & confirmante*. Ut enim sapienter scribit M. Cano lib. 5. cap. 5. sicut congregatio Concilii, reclamante vero certoque Ecclesiæ Pontifice, vana est & irrita; sic doctrina, cui præsens *Pontifex per se*, vel absens *per Legatos suos* contradicit, *incerta est* atque imbecilla. Et ideo Concilium generale, etiam legitimi Pontificis autoritate congregatum, in fide errare potest; si Pontifex per se, vel per Legatos suos, non consentiat ipsius Decretis; ut manifeste apparuit in Concilio generali Ephesino secundo, autoritate S. Leonis Magni congregato; in quo, Legatis ejusdem Leonis repugnantibus, Episcopi fere omnes Dioscori hæresi subscripserunt. Et quidem Concilia generalia, à Romano Pontifice non confirmata, firma non esse, probat luculenter idem S. Leo, epistolis 12, 13,

21, 22, 23, & 24; & Synodus octava actione 7; Nicolaus Papa, in epistola ad Michaëlem Imperatorem; & Eugenius IV, in Decreto super unione Jacobinorum; in quo, postquam Ephesinam secundam Synodum sub Leone congregatam condemnavit, quia errorem Eutychetis approbavit, subjunxit; *Suscipit sancta Romana Ecclesia omnes universales synodos, autoritate Pontificis legitime congregatas, ac celebratas, ac confirmatas*: ubi non solum requirit, ad valorem & firmitatem Synodorum, quod autoritate Romani Pontificis celebrentur, sed simul quod ab illo confirmentur: nec enim primum sine secundo sufficit.

CLXXI Quinto probatur, Concilia generalia, à Romano Pontifice confirmata, esse regulam infallibilem fidei. Nam Ecclesia Catholica, quæ est columna & firmamentum veritatis, nequit esse magistra errorum; foret autem magistra errorum, si Concilia generalia, confirmata à Pontifice, in fide errare possent. Illa enim Concilia, ut unita capiti Ecclesiæ, repræsentant universam Ecclesiam; & quod Concilia ejusmodi definiunt, Ecclesia Catholica dicitur definire

re & docere; & ideo S. Augustinus, lib. 1. de Baptismo contra Donatistas cap. 18, dixit: *Plenarii Concilii sententiam, totius Ecclesie consensioem esse*: & Martinus V cum Concilio Constantiensi, quatenus inconcusse fuit generale & ex omnibus Obedientiis compositum, hanc veritatem stabilivit; siquidem inter alias interrogationes, quibus suspecti in fide erant examinandi, proposuit hanc: *Utrum credant, quod quodlibet Concilium generale universalem Ecclesiam representet.* Quod ergo Concilium generale, legitimum & à Romano Pontifice confirmatum, definit tamquam articulum fidei, & omnibus credendum proponit; id Ecclesia Universalis Catholica docet, & credendum proponit. Ut enim sapienter notat Bellarminus, tomoprimum controversiarum lib. 3 de Verbo Dei cap. 5. (prout habetur in tomo, qui servatur in bibliotheca nostri Collegii Romani manu propria ipsius Cardinalis correcto, quem ego vidi) *Ecclesia non aliter loquitur quam per os Pastorum ac Doctorum, ac precipue in Concilio generali congregatorum; quod Concilium, vel summum Pontificem habuerit presentem & Praesidem, vel confirmationem*
atque

atque approbationem ab eo meruerit obtinere. Non enim Ecclesia Catholica Universalis dicitur docere aliquid, quia universi fideles suffragium habeant in determinandis fidei controversiis (esset enim, non solum impossibile, sed indecens & ridiculum, in fidei & morum quæstionibus determinandis, cerdonum & muliercularum rogare sententias, & judicium expectare) sed dicitur Ecclesia Universalis aliquid docere, quando id docet Concilium generale confirmatum, per quod Ecclesia Universalis repræsentatur; vel quando seorsim à Concilio Generali Romanus Pontifex, ut Vicarius Christi, è Cathedra Petri totam Ecclesiam instruit, & illi toti veritatem aliquam credendam proponit. Ut enim inquit D. Thomas, 2. 2. q. 11. art. 2. ad tertium; *Authoritas Ecclesiæ principaliter residet in summo Pontifice*: quod probat ex Hieronymo & jure canonico, 24. q. 1. cap. *Quoties*.

CLXXII Cum ergo Universalis Ecclesia verè dicatur, docere & credenda proponere ea omnia dogmata, quæ Concilia generalia approbata proponunt credenda; & cum ex Christi promissione Ecclesia Universalis nequeat

queat errare in doctrina fidei & morum; necessario infertur, Concilia generalia esse regulam vivam infallibilem fidei, & judicem infallibilem controversiarum fidei.

CLXXIII Quod confirmatur. Nam ad explorandum, quid sentiat Universalis Ecclesia Catholica, non est necesse adire singulos fideles, & rogare quid ipsi sentiant & credant; sed satis est exquirere commune judicium Episcoporum Ecclesiæ Catholicæ: id enim Ecclesia Catholica docet, quod docent communiter ejus omnes Episcopi. Unde Patres Concilii Ephesini; ut explorarent an Nestorius haberet veram fidem, & sentiret atque doceret id, quod sentit & docet Universalis Ecclesia Catholica; ad ipsum scripserunt epistolam, in qua exigunt, ut si satisfacere Ecclesiæ velit, *jure jurando fateatur, sentire se & docere, quæ Universi per Orientem & Occidentem Episcopi Præsidesque populorum crederent ac docerent*: quæ etiam epistola comprobata est à sexta Synodo generali a^ctione 11. In Concilio quoque Tridentino sess.3. definitum est, *Ecclesiæ esse judicare de vero sensu & interpretatione Scripturarum*: insanum autem esset, velle, ut tota

ta

ta fidelium multitudo de ejusmodi re judicium ferat : sufficit ergo , Pastores ac Doctores Ecclesiæ de illa re judicium ferre, approbante Romano Pontifice ; & id dicetur Ecclesia judicare. Idque confirmatur ex historia Ecclesiastica Eusebii Cæsareensis, lib. 4. cap. 22, in qua celebratur diligentissima fidei inquisitio , quam fecit Egesippus Philosophus ; qui Romam veniens, causâ veræ Religionis quærendæ & inveniendæ, non popularium sententiam ad fidem requisivit ; sed satisfecisse ad fidei suæ confirmationem visus est, si judicium commune Episcoporum per ioca singula & Doctorum sententiam exquireret. Ergo quod Episcopi, ad Concilium generale congregati, simul cum Romano Pontifice, determinant & definiunt, id Ecclesia Catholica vere definit & determinat. Cum ergo impossibile sit Ecclesiam Catholicam in doctrina fidei errare ; impossibile est, ut Concilia Generalia à Pontifice approbata errent.

CLXXIV Denique probatur ex illo Act. 15 v. 28, *Visum est Spiritui sancto & nobis, nihil ultra imponere vobis oneris quam hæc necessaria, &c.* Cum enim Antiochiæ es-

set

set seditio, ob Judæos, qui volebant Gentes ad Deum conversas circumcidi; Paulus & Barnabas venerunt Hierosolymam, ut rem ad Apostolos referrent; qui, post Petri & Jacobi suffragia, communi decreto per litteras statuunt, Gentes conversas non ligari lege Moyfi; & hoc decretum miserunt Antiochiam per Judam & Silam, simul cum Paulo & Barnaba. Decretum autem erat illud *Visum est spiritui sancto & nobis.* Ex quo constat, Concilia legitimè congregata, in quibus præsidet Petrus vel Pontifex Romanus ejus successor, per se vel per legatos suos, & in quibus approbante Sede Petri determinatur quæstio fidei, habere assistentiam infallibilem Spiritûs sancti, ad non errandum; & decreta ejusmodi Conciliorum, esse decreta Spiritûs sancti. In hoc autem Concilio, quod fuit norma & exemplar aliorum, quæ successu temporis congreganda erant, præsedet Petrus; ut patet ex versu 7. *Cum autem magna conquisitio fieret, surgens Petrus dixit ad eos, & palam pronuntiavit, non esse imponendum jugum legis Mosaicæ, conversis ad fidem Christi: Nunc ergo, quid tentatis (ajebat) Deum, imponere jugum super cervices Discipulorum,*
quod

quod numquam patres nostri nec nos portare potuimus? Post Petrum locutus est Jacobus, tamquam Episcopus ejus loci, in quo celebratum est Concilium, & dixit v.13; *Viri fratres, audite me*; & confirmavit quæ dixerat Petrus, & suffragium suum iis verbis conclusit: *Propter quod ego judico, non inquietari eos, qui ex Gentibus convertuntur ad Deum v.19.*

CLXXV Notandum est, quod Petrus, qui quatenus Apostolus & tamquam caput Ecclesiæ, habebat assistentiam infallibilem Spiritûs sancti, ad non errandum in decreto fidei; nihilominus noluit se solo questionem hanc determinare, sed communi suffragio Apostolorum qui aderant; ut scilicet relinqueret exemplum successoribus suis, ut questionem fidei non determinent, quin præcedat matura inquisitio & deliberatio; & ut ad damnandas hæreses utantur communi suffragio aliorum Episcoporum, imo convocent Concilium generale, quando commode fieri potest. Ut enim ponderat P. Suarez, disput. 5 de fid. sect. 5 n. 10, interdum convenit, ut Pontifex non definiat sine Concilio generali; *nimirum ad majorem Ecclesiæ satisfactionem,*

tionem, utque magis constet de communi consensu ejus, & ad majorem confusionem hæreticorum, vel quorumcumque contradicentium, ut recte nobis declarant Apostoli exemplo suo Act. 15. Ceterum, quando est periculum in mora, & necessitas vel utilitas Ecclesiæ id postulat; potest & solet Papa res fidei sine Concilio generali definire, & toti Ecclesiæ proponere; quamvis numquam id faciat, non præcedente magna deliberatione & multis consultationibus.

§. XI.

Ostenditur, Romanum Pontificem, etiam extra Concilium Generale, & non expectato Ecclesiæ consensu, esse infallibilem controversiarum fidei Iudicem.

CLXXVI **R**omanum Pontificem habere auctoritatem infallibilem, ad definiendas fidei & morum controversias, extra Concilium generale; & consequenter, non expectato Ecclesiæ consensu; communissimam omnium ferè Catholicorum sententiam appellat Bellarminus, lib. 4. de Roman. Pontif. cap. 2. *quam totus orbis, exceptis pauculis Doctoribus, amplectitur, ut inquit celebris*

Jebris Doct̃or Sorbonicus Andreas Duval-
lius, t. 2. in l. 2. pag. 846. & 754. *quam
unice Hispania, Italia, omnesque Christiani-
tatis Provinciæ docent; ita ut illa, quam sen-
tentiam Parisiensium vocant, ad classẽ ea-
rum opinionum reducenda sit, quæ tolerantur,*
ut scripsit anno 1662 Illustrissimus Petrus
de Marca Archiepiscopus Parisiensis, in Ob-
servationibus ad Theses Claromontanas;
quæ Observationes, Teste Stephano Ballut-
zio, postremum ejus opus fuerunt: idque fe-
ctantur omnes Christiani orbis Universitates,
ut testatur idem de Marca ibidem iis verbis:
*Authoritas infallibilem sententiam in causis
fidei pronuntiandi, est Romanis Pontificibus
omnium Universitatum consensu acquisita, ex-
cepta tamen contigua Sorbona, id est excepta
Universitate Parisiensi, paulo post Conci-
lium Constantiense, & tempore Concilii
Basileensis; & postmodum per aliquot an-
nos, in eo statu quem habuit, quando, post
Joannem Gersonem Cancellarium Univer-
sitatis, aliqui Doctores Parisienses, ut Jaco-
bus Almainus & Joannes Major docere cœ-
perunt, Papam esse in definiendo fallibilem,
ejusque judicium posse reformari à Concilio.*
Et

Et propterea gravissimus Doctor & Decanus Lovaniensis Ruardus Tapperus, orat. 3. Theolog. pag. 393 testatur, eam doctrinam esse noviter introduclam à quibusdam Parisiensium, contra doctrinam veterum omnium Scriptorum, qui Romani Pontificis judicium in quæstionibus fidei infallibile esse tradunt. Et ideo eruditissimus Theophilus Raynaudus, in opusculo cui titulus, Αὐτὸς ἔφα, seu, Ipse dixit, testatur, pro infallibilitate Romani Pontificis allegari posse Theologos omnes, quot ante Concilium Constantiense floruerunt. Nam nonnisi (subjungit) à tempore Concilii Constantiensis & Basileensis vocata est in controversiam hæc veritas apud Catholicos; sed omnes anteriores unanimiter docuerunt, definitiones Pontificias, absquæ Concilio generali editas, facere rem de fide. Et, ut ostendit D. Josephus Gibalinus, author quoque Gal-
lus, lib 5. de Jure Can. cap. 3. §. 15, Hæc fuit semper doctrina scholæ Theologicæ Parisiensis, tam in definitionibus & censuris editis ab ipsa in unum congregata, quam in scriptis singulorum ipsius universitatis Doctorum. Et hanc doctrinam, etiam hoc tempore, major pars Doctorum Sorbonæ & Galliæ defendit,
ut

ut scribebat Illustrissimus de Marca an. 1662, in Observationibus ad Theses Claromontanas num. 34. *Pars (inquit) major, non solum Theologia, sed etiam Iuris Doctorum, communi opinioni adheret; utpote fundamentis nixæ solutu difficillimis, ridetque antiquæ Sorbona opiniones.*

CLXXVII Unde mirandum est, quod his ultimis annis tanta sit apud aliquos facta mutatio in Gallia, ut Conventus, habitus Parisiis anno 1682, negaverit summo Pontifici eam infallibilitatem, quam tota Gallia semper ante Concilium Constantiense professæ est, & quam post Concilium Constantiense innumerabiliter plures in Gallia propugnabant quam oppugnabant, & quam tota Gallicana Ecclesia ann. 1653. in Pontifice agnoverat; & quidem ut omnino necessariam, ad succurrendum Ecclesiæ periclitanti in Jansenismi procellis. Qui scire desiderat hujus tam celeris mutationis causas, legat Eugenium Lombardum, eas late exponentem in suo Regali Sacerdotio, à pag. 3. usque ad 14. Nobis satis sit advertere, Declarationem illam de potestate Ecclesiastica, editam à Conventu Parisiensi, immerito pu-

publicatam esse sub speciosissimo titulo cleri Gallicani; quia illam non edidit Communitas Illustrissimi Cleri, ut probat author præclari operis de libertatibus Ecclesiæ Gallicanæ num. 6 Præfationis. *Præterquam quod (inquit) Episcopi tantum congregati hanc declarationem emisere, aliis non mandantibus, nec sua sponte probaturis; contrariam enim mentem, frequentibus & liberioribus comitiis, alias idem Clerus aperuit.*

CLXXVIII Infallibilitatem hanc Romani Pontificis, non solum defendunt nunc omnes reliquæ nationes orbis, omnesque Universitates, sed omnes Religiosæ familiæ. Religio S. Benedicti, cum S. Anselmo, l. de Incarnat. Verbi c. 1; Religio Cisterciensis, cum S. Bernardo, Epist. 190 & l. 2 de consid. paulo post medium; Religio S. Dominici, cum S. Thoma 2, 2 q. 1 ar. 10 & 4 contra gent. c. 76; Religio S. Francisci, cum S. Bonaventura t. 1 opusc. fol. 373 & t. 2 fol. 494 & in 4 dist. 19 art. 3 q. 1 & cum Alexandro Alensi 3 par. Summæ fol. 160; Religio S. Augustini post S. Doctorem, cum Ægidio Romano in libro de renuntiatione Papæ c. 8 c. 9 & 10, & in 3 dist. 29 part. 2 q. unica art. unico; Religio
Car-

Carmelitana, cum suo Antesignano, Doctore resolutio, Joanne Bachonio, in Prologo libri quarti sent. q. 10; & denique Doctores omnes Societatis Jesu nullo excepto, cum Bellarmino, & Suarez, & Valentia, post S. Ignatium in epistola ad Claudium Abissinorum Imperatorem, & post Didacum Laines in Concilio Tridentino, apud Cardinalem Pallavicinum in historia Concilii l. 18 c. 14.

CLXXIX Et hanc sententiam adeo certam existimant gravissimi Theologi, ut P. Franciscus Suarez, disp. 5 de fide sec. 8 n. 4 censeat, *esse rem de fide certam*: & disp. 20 sec. 3 n. 22 responsionem cujusdam authoris, asserentis, *non esse de fide certum, Pontificem definientem sine Concilio generali non posse errare*; appellet, *non solum nimis temerariam, sed etiam erroneam*; & magnus Cardinalis Bellarminus, tom. 1, manu propria correcto (prout servatur in bibliotheca Collegii Romani) lib. 4 de Romano Pontifice, asserat, illam doctrinam *videri omnino erroneam, & hæresi proximam, ut merito possit judicio Ecclesiæ hæretica declarari*; & Cardinalis Toletus, in Comment. in 2, 2 q. 1 art. 10, controversia 8 concl. 5, dicat, *esse errorem manifestum in fide*; & Melch. Canus,

nus, l.6 de locis c.6 pronuntiet, *se non dubitare, si Concilio proponeretur, quod damnaretur, ut hæresis.* P. Bañez. 2, 2 q.1 art.10 dubio 2 concl.4, postquam asseruit, *in publico judicio non posse Summum Pontificem errare*, addit; *Et procul dubio, si questio hæc ad Concilium legitimum deferretur, non dubito, quin prædicta conclusio definiretur tamquam vera fides, & contraria anathematizaretur.* Nec mirum. Nam certius est, Papam non posse errare in determinandis fidei & morum controversiis, quando è cathedra Petri toti Ecclesiæ declarat quid tenere debeat, quam in ullo casu subjacere Concilio: & tamen Cardinalis Pallavicinus, in hist. Trident. l.24 c.2 n.12, affirmat, *ex decem partibus Patrum, novem & amplius convenisse ad-dandum suffragium pro definitione, quod Papa sit supra omnia Concilia.*

CLXXX Gravissimus etiam Theologus Gregorius de Valentia, tom.3 princ.7 §.41 col.246, censet, authores, asserentes posse Papam errare in determinandis fidei & morum questionibus, quæ inter ipsos Catholicos sunt controversæ, *errare in fide gravissime;* & ibidem, §.45 col.298 asserit, *eos qui Concilium Pontifice superius faciunt, pugnare rever-*
ra,

ra, licet inadvertentes, cum certissima fide de D. Petri & Romani Pontificis Primatu.

CLXXXI Ego, ab omni censura abstinens, & supponens, Papam, ut Doctorem particularem posse errare; & præscindens ab eo, an possit errare, dum consultus ut Pontifex in casu particulari, respondet secundum sententiam sibi probabiliorem, quam veram putat; *Hoc, inquit, tamquam conclusionem Theologicam omnino certam, statuo; Pontificem, deficientem ex Cathedra, esse regulam vivam fidei, & judicem infallibilem controversiarum. Tunc autem (inquit P. Suarez disp. 5 de fide sec. 8 n. 4) Romanus Pontifex loquitur è Cathedra, & ut summus Pontifex, de rebus fidei, quando aliquid authentice universæ Ecclesiæ proponit, tamquam fide divina credendum: & (ut ait P. Valentia tom. 3 col. 250) toties loquitur Romanus Pontifex è Cathedra, & tamquam Christi Vicarius & summus Ecclesiæ Pastor, quoties de rebus fidei controversis alterutram sententiam ita determinat, ut ad illam recipiendam obligare velit totam Ecclesiam. Hanc conclusionem, alibi à me late probatam, ex omnibus locis Theologicis, ex Scriptura, ex traditione Apostolica, ex Conciliis*

generalibus & provincialibus, ex perpetua praxi Ecclesiæ, ex Decretalibus summorum Pontificum, ex communi sensu Patrum, ex Jure canonico & ex communi consensu Theologorum, in præsentī breviter rationibus Theologicis ostendam.

CLXXXII Et imprimis probatur ratione, qua D.Thomas 2,2 q.1 art.1 ostendit; ad summum Pontificem pertinere, fidei Symbolum ordinare. Id autem hac ratione probat. Siquidem *nova editio Symboli necessaria est ad evitandum insurgentes errores*: ad evitandum autem insurgentes errores, nimis periculosum foret, expectare Concilium generale; quia ad hoc multo tempore opus est; unde interim grassarentur errores. Hinc sic infert Angelicus Doctor. *Ad illius ergo auctoritatem pertinet editio Symboli, ad cujus auctoritatem pertinet finaliter determinare ea quæ sunt fidei, ut ab omnibus inconcussa fide teneantur: hoc autem pertinet ad auctoritatem summi Pontificis, ad quem majores & difficiliore Ecclesiæ quæstiones referuntur, ut dicitur in Decret. distinct. 43. Unde & Dominus, Luc. 22, Petro dixit, quem summum Pontificem constituit, Ego pro te rogaui, ut non deficiat fides tua: & tu*

L

ali-

234 *Veritas Religionis Catholicae*
aliquando conversus, confirma fratres tuos. Et
hujus ratio est: quia una fides debet esse totius
Ecclesiae; secundum illud 1 ad Corinth. 1; Id ipsum
dicatis omnes, & non sint in vobis schismata.
Quod servari non posset, nisi quaestio fidei, de fide
exorta, determinetur per eum, qui toti Ecclesiae
praest, ut sic ejus sententia à tota Ecclesia fir-
miter teneatur. Et ideo ad solam auctoritatem
summi Pontificis pertinet nova editio Symbo-
li; sicut & omnia alia, quae pertinent ad totam
Ecclesiam, ut congregare Synodum generalem,
& alia ejusmodi.

CLXXXIII. 2 Argumentor. Quia cum
certum omnino sit & de fide, Christum reli-
quisse in Ecclesia sua auctoritatem infallibi-
lem, ad determinandas fidei & morum con-
troversias; & cum hæc auctoritas sit accidens
quoddam spirituale; evidens est, relictam esse
à Christo in aliquo subjecto, cui primario &
per se conveniat, & unde possit derivari par-
ticipative in alia. At hoc subjectum, cui pri-
mario insidet hæc auctoritas, nec est cumu-
lus ipse seu universitas omnium fidelium, nec
cumulus seu universitas Optimatum Eccle-
siae, seu universitas omnium Episcoporum:
ergo est unus aliquis Episcopus, nempe Ro-
manus

manus Pontifex, in quo, tamquam in summo Pontifice & Christi Vicario, collocata sit primario & principaliter ab ipso Christo hæc infallibilis autoritas, pro bono totius Ecclesiæ. Et ideo S. Thomas 2, 2 q. 11 art. 2 ad 3, dicit: *Autoritas Ecclesiæ principaliter residet in summo Pontifice.* Et probat ex Jure Canonico: dicitur enim 24 q. 1: *Quoties fidei ratio ventilatur, arbitror, omnes fratres nostros & Coëpiscopos non nisi ad Petrum, id est, ad sui nominis auctoritatem, referri debere. Contra cujus auctoritatem nec Hieronymus, nec Augustinus, nec aliquis sacrorum Doctorum suam sententiam defendit. Unde dicit Hieronymus ad Damasum Papam; Hæc est fides, Papa beatissime, quam in Catholica didicimus Ecclesia: in qua si minus perite aut parum caute forte aliquid positum est, emendari cupimus a te, qui Petri fidem & Sedem tenes. Si autem hæc nostra confessio Apostolatus tui iudicio comprobatur; quicumque me culpæ voluerit, se imperitum, vel malevolum, vel etiam non Catholicum, non me hæreticum comprobabit.*

CLXXXIV Quod hæc infallibilis auctoritas non sit relicta, tamquam in subiecto, in cumulo seu universalitate fidelium,

videtur manifestum ; tum quia illi non possunt in aliquem unum locum convenire, ad determinandas fidei & morum controversias : tum quia ridiculum foret, rusticos & ignorantes habere suffragium, in determinandis fidei & morum controversiis : tum quia docere & definire res fidei, attinet ad Pastores, non ad oves; unde universitati & cumulo fidelium convenit quidem infallibilitas passiva & in credendo ; quia non potest tota Ecclesia in fide errare ; non autem infallibilitas activa & in docendo, in definiendo, & in proponendo aliis quid credere debeant.

CLXXXV Quod non sit relicta in cumulo seu universitate Episcoporum, tamquam in subiecto primario, inde probatur : quod cum ad conservandam unitatem fidei necessaria sit aliqua visibilis regula, quæ autoritate tutissimâ fidei dubia resolvere valeat, & subinde nascentia hæresum monstra in cunis elidere, & ad quam Reges & Principes, tam sæculares quam Ecclesiastici, confugere possint, ne in eorum regna & ditionem prava dogmata irrumpant & radices agant ; non sufficienter Christus providisset

Ec-

Ecclesiæ suæ, si authoritatem infallibilem illam reliquisset, tamquam in subiecto primario, in cumulo seu universitate Episcoporum, ut convenientes in unum in Concilio generali, definirent fidei & morum controversias; vel si, relinquens in Petro & successoribus ejus, tamquam in subiecto primario, hanc authoritatem infallibilem; non promississet illi infallibile Spiritus sancti assistentiam, ad definiendas fidei & morum controversias, nisi sub conditione, quod illas definirent in Concilio & cum Concilio generali. Cum enim Concilia generalia non nisi raro, & magnâ difficultatum mole superatâ, congregari possint; miserrima esset Ecclesiæ conditio, si non nisi convocato Concilio generali damnari absque errandi periculo hæreses possent; & liberum interim eorum authoribus foret, summorum Pontificum definitiones eludere; utpote portas ab homine, qui, etiam dum totam Ecclesiam è Cathedra Petri in fide & moribus instruit, errare possit, si id faciat extra Concilium generale, quamvis diligentissimè rem examinet, & Theologorum atque Doctorum judicia exquirat.

CLXXXVI. Quis non videat, absurdum

L 3

esse.

esse, quod Christus opem suam, promissam Petro & successoribus ejus, ad non errandum in decretis fidei & morum, directis ad universam Ecclesiam, alligaverit Conciliis generalibus? quasi sine illis non possint Pontifices summi Scripturas sufficienter scrutari, monumenta Patrum evolvere, & debitam diligentiam adquirendam veritatem. Dicendum ergo est, hanc auctoritatem infallibilem non esse relictam à Christo in cumulo seu in universitate Episcoporum, tamquam in subiecto primario.

CLXXXVII Quod à posteriori & absurdo inde suadetur. Nam hæc auctoritas infallibilis, ad definiendas fidei & morum controversias, est propria supremæ potestatis spiritualis, quam Christus reliquit in Ecclesia: hæc autem suprema potestas non est in cumulo seu universitate Episcoporum; quia in Concilio Constantiensi, quatenus inconcussè universali, definitum est, *Papam canonicè electum habere supremam auctoritatem in Ecclesia Dei*: siquidem *Martinus V*, anno 1418 edidit Constitutionem, quæ incipit, *Inter cunctas*; in qua, sacro approbante Concilio jam pleno, damnati sunt errores Joannis

nis

nis Wiclefi, & Joannis de Hus; quâ robur infallibile dedit damnationi horum errorum, factæ à Concilio sess. 8, quando non erat generale. In ea autem Constitutione circa articulum vigesimum quintum hæreticorum, is qui foret de hæresi suspectus, jubetur explorari sub hac forma: *Utrum credat, quod Papa canonicè electus, qui pro tempore fuerit, ejus nomine proprio expresso, est successor Divi Petri, habens supremam auctoritatem in Ecclesia Dei.* Ergo Concilium Constantiense, quatenus plenum & confirmatum à Martino V, definivit, eum hominem, qui pro tempore fuerit canonicè electus, & ab Ecclesia pro vero Pontifice agnitus, habere supremam auctoritatem in Ecclesia Dei. Ergo est de fide, Papam certum & indubitatum habere supremam auctoritatem in Ecclesia Dei. Ergo hanc supremam auctoritatem non habet Concilium generale, quatenus à Papa distinctum: nam implicat, ut in Ecclesia Christi detur duplex suprema potestas spiritualis. Ergo non reliquit Christus in Concilio generali, quatenus distincto à Pontifice, nec in cumulo Episcoporum ut tali, tamquam in subiecto primario, auctoritatem in-

fallibilem, ad decidendas fidei & morum controversias ; nam hæc autoritas infallibilis necessario imbibitur in suprema autoritate, vel ad illam necessario consequitur.

CLXXXVIII Hinc P. Valentia, tomo 3. q. 1. de fide princ. 7. §. 45. col. 298, de falsitate convincit sententiam Gersonis, Jacobi Almaini, & Joannis Majoris, qui incaute autoritatem Concilii superiorem fecerunt autoritate Papæ; non solum tempore schismatis, quando dantur multi Pontifices dubii (pro quo casu eorum sententia est vera) sed etiam quando datur Papa certus & indubitatus; pro quo casu est aperte falsa; quia ejus (inquit) tantum est, controversas fidei cum infallibili autoritate determinare, cujus est in Ecclesia suprema post Christum potestas spiritualis. Sed suprema hæc potestas duntaxat Romani Pontificis est, non autem ullius Concilii, secluso Pontifice: ergo &c. Postquam autem utramque præmissam hujus syllogismi probavit, subjungit immediate: Atque hinc profecto illorum authorum sententia manifeste revincitur, qui Concilium universale Pontifice superius faciunt. Pugnant enim illi revera (licet non advertentes) cum

cer-

*certissima fide, de divi Petri ac Romani Pontificis Primatu. Hæc ille. Merito autem P. Valentia appellat sententiam de Primatu Romani Pontificis, certissimam, & de fide: constans enim est inter omnes Doctores Catholicos, D. Petrum, cui Christus dixit *Pasce oves meas*; item *Tibi dabo claves regni celorum*, habuisse Primatum potestatis & jurisdictionis in universa Ecclesia Christi, & in universam Ecclesiam, & fuisse summum Pastorem totius ovilis Christi. Ut enim, nomine omnium Catholicorum, inquit Bellarminus, lib. 1. de Romano Pontifice cap. 16, *nobis certum exploratumque est, omnes omnino Christianos, etiam Apostolos, Petro tamquam oviculas commendari, cum ei dicitur, Pasce oves meas.**

CLXXXIX Rursus constans & certum est inter Doctores Catholicos, Romanum Pontificem succedere Petro, non solum in Episcopatu Romano, sed in Pontificatu Ecclesiæ seu in Primatu, idque ex jure divino & ratione successionis, ut late demonstrat Bellarm. lib. 1. de Romano Pontifice à cap. 12. Et ideo eximius Doctor P. Franciscus Suarez, disp. 5. de fide sect. 8. n. 1, dixit:

Ex communi sensu, ac traditione Ecclesiae, & Patrum omnium constat, Christum instituisse Primatum Ecclesiae in persona Petri, ut in Successoribus ejus perpetuo duraret: & ita hic est articulus tenendus, non solum tamquam de fide, sed tamquam unum ex praecipuis fundamentis fidei, & maxime necessarium ad tollendas haereses & schismata. Unde Bernardus, lib. 2. de considerat. ad Eugen. cap. 8, expendens verba illa Christi, *Pasce oves meas*, subjungit: *Quas? Illius vel illius populos civitatis, aut regni? Oves meas, inquit. Cui non planum, non designasse aliquas, sed assignasse omnes? Nihil excipitur, ubi distinguitur nihil.* Et ego, in tractatu Theologico de infallibilitate Romani Pontificis, in definiendis fidei & morum controversiis extra Concilium generale, & non expectato Ecclesiae consensu, disput. 3, ex Concilio Nicæno, ex Constantinopolitano primo, & ex Chalcedonenfi probavi, Romanum Pontificem semper in Ecclesia & in Ecclesiam Dei habuisse Primatum; & consequenter ad hæc, Concilium Florentinum in Decreto fidei sic diserte pronuntiat sess. 25. *Item definimus, Sanctam Apostolicam Sedem & Romanum Pontificem*

tificem in universum orbem tenere Primatum.
Et Concilium Lateranense ultimum eam dem
veritatem definivit; nam inter alios articu-
los Lutheri damnavit hunc: *Romanus Pon-*
tifex, Petri successor, non est Christi Vica-
rius super omnes totius mundi Ecclesias, ab
ipso Christo in Beato Petro institutus; ac pro-
inde definivit articulum contrarium.

CXC Quapropter, ex eo quod Papa ha-
beat Primatum in universa Ecclesia & in uni-
versam Ecclesiam, legitime & necessario in-
fertur, esse supra cumulum & collectionem
reliquorum omnium Episcoporum; esseque
proinde, non solum Pastorem universalem
reliquatam ovium, sed Pastorem reliquo-
rum omnium Pastorum. *Habent illi (inquit*
Bern. ubi nuper) sibi designatos greges, singuli
singulos; tibi universi crediti, uni unus; nec
modo ovium, sed & Pastorum; tu unus omnium
Pastor.

CXCI Et hinc infertur, habere supre-
mam authoritatem in in Ecclesia Dei. Nam
Primatus iste, cum sit potestatis spiritualis
& jurisdictionis, necessario secum affert pri-
mam & supremam authoritatem in Ecclesia
Dei, à qua nimirum non sit appellatio ad
aliam

aliam superiorem auctoritatem, quæ ipsius sententiam & iudicium reformare valeat. Ergo Concilium generale, ut distinctum à Papa, non habet supremam auctoritatem in Ecclesia Dei: ergo non reliquit Christus in Concilio, tamquam in subiecto primario, auctoritatem infallibilem, ad definiendas fidei & morum controversias; siquidem in eo subiecto reliquit auctoritatem istam infallibilem, in quo posuit primam & supremam Ecclesiæ auctoritatem, quæ non habeat auctoritatem superiorem, à qua ejus iudicium reformari valeat. Implicat auctoritatem aliquam in Ecclesia Christi esse supremam, & esse fallibilem in definiendis fidei & morum controversiis: nam hoc ipso quod auctoritas, ad definiendas fidei & morum controversias, in Ecclesia Christi sit fallibilis; ejus iudicium debet esse reformabile per auctoritatem superiorem; alioqui totam Ecclesiam induceret in errorem, obligando illam ad credendum aliquod dogma falsum tamquam articulum fidei. Ergo si primam & supremam auctoritatem reliquit Christus in Romano Pontifice, in illo tamquam in subiecto primario collocavit auctoritatem infallibilem, ad

ad decidendas fidei & morum controversias; ergo non collocavit primario in cumulo, seu universitate reliquorum Episcoporum, qui necessario subjiciuntur Pontifici Romano, tamquam Vicario Christi & capiti visibili Ecclesiæ, summoque totius ovilis Christi Pastori, ac proinde tamquam supremo Pastorum Pastori.

CXCII Alia etiam ratione probatur, Christum non reliquisse authoritatem infallibilem, ad decidendas fidei & morum controversias, in cumulo seu universitate Episcoporum, tamquam in subiecto primario. Nam si reliquit in cumulo seu collectione Episcoporum; ergo non in uno potius quam in alio, sed in communitate omnium, quatenus communitas est. Ad quem ergo attinebit, congregare ad Concilium reliquos omnes Episcopos, illos obligando? nam obligare omnes Episcopos, ut veniant ad Concilium, est proprium alicujus supremæ authoritatis. Si ergo suprema authoritas, ad definiendas res fidei & morum controversias, quæ necessario conjuncta est cum suprema authoritate Ecclesiæ, est in communitate Episcoporum, quatenus communitas est; nullus erit par-

particularis Episcopus, ad quem spectet congregare reliquos: ergo nullus erit, qui possit obligare reliquos : ad quem ergo spectabit convocare authoritative Concilium?

CXCIII Sed demus, Concilium convocari industria Imperatoris & Regum, & mutua conventionem Episcoporum, qui per epistolas paciscantur, ad diem determinatum convenire ad Concilium in talem civitatem. Sane si auctoritas infallibilis, ad determinandas res fidei & morum, non est primario in aliquo Episcopo particulari, sed in communitate omnium quatenus communitas est; postquam Episcopi fuerint congregati, ubi jam agitur de determinatione controversiæ fidei, Pontifex in Concilio, in ordine ad definitionem, erit tamquam unus ex reliquis, si semel auctoritas infallibilis ad definiendum residet primario & immediate in universitate Episcoporum, seu in omnibus collective sumptis; ita ut communitas Episcoporum sit subiectum immediatum & primum illius auctoritatis. Nam ut communitas seu Synodus Episcoporum per suffragia exercent potestatem, quæ in ipsis collectivè sumptis residet; non est necesse, ut omnes uniformiter conveniant
in

in eandem sententiam ; sed sufficit , quod
conveniat major pars : illud enim censetur
Concilium, Senatus, Synodus, Congregatio,
vel Capitulum decernere , quod major pars
decernit; ut patet in omni Republica, in omni
Regno, & in omni Senatu, & Congregatio-
ne. Idque patet per rationem. Quia, si ad va-
lorem decretorum & definitionum Concilii
generalis requireretur , ut omnes omnino
Patres in idem votum eandemque omnino
sententiam conspirarent; redderentur valde
difficiles, & fere moraliter impossibiles, defi-
nitiones Conciliorum; & numquam termina-
rentur causæ conciliariter decernendæ; cum
moraliter videatur impossibile, ut in re, inter
Catholicos controversa & dubia , ad quam
determinandam convocatur Concilium ge-
nerale, uniformis sit consensus omnium; præ-
sertim si numerus Patrum sit magnus , ut
contigit in Concilio Lateranensi 4, sub Inno-
centio III, in quo sederunt 1212 Patres. Er-
go si semel suprema & infallibilis auctori-
tas , ad determinandas fidei & morum con-
troversias, esset à Christo relicta in commu-
nitate & cumulo Episcoporum ; sufficeret,
quod major pars Patrum aliquid definiret, ad
hoc

hoc ut definitio esset infallibilis, & universam obligaret Ecclesiam, utpote orta à suprema autoritate in universam Ecclesiam: major autem pars posset in unam sententiam convenire, non consentiente, imo contradicente & reclamante Romano Pontifice: ergo sine consensu, & confirmatione Romani Pontificis possent controversiæ fidei definiri in Concilio, & illa definitio rem faceret certam de fide. At hoc est manifeste absurdum. Ut enim vere pronuntiavit doctissimus Ferdinandus de Salazar, in tomo de Conceptione c. ult. in quo de auctoritate Conciliorum egit pag. 151, *fide Catholica certum est, nec plures Concilii Patres, nec omnes efficere posse doctrinam aliquam de fide, nisi accedat eorum suffragiis approbatio summi Pontificis.* Idque constat testimonio Paschalis primi summi Pontificis, ad Cathedram Petri exaltati anno 817, in c. *Significasti*, de electione, dicentis; *Omnia Concilia, per Ecclesiæ Romanæ auctoritatem, & facta sunt, & robur acceperunt.* Et ideo Nicolaus Primus Papa, sapientissimus & sanctissimus, ad Pontificatum evectus anno 858, hanc doctrinam tamquam indubitatam supponens, epist. 7 ad Episcopos Orientales agebat;

*ajebat : In universalibus Synodis, quid ratum,
quid prorsus acceptum, nisi quod Sedes Petri
probavit, ut ipsi scitis, habetur ?*

§. XII.

*Nequit dici, Christum reliquisse primario au-
thoritatem supremam in Ecclesia, ut exercen-
dam tamen per unum, nempe per Romanum
Pontificem, tamquam per Ministrum Ecclesiæ
& Vicarium Concilii.*

CXCIV **N**Eque sufficit respondere cum
Parisiensibus apud Navarrum,
in cap. *Novit.* de judiciis notabili 3 num. 17,
Christum reliquisse quidem supremam atq;
infallibilem auctoritatem, ad definiendas fi-
dei & morum controversias, in cumulo Pa-
storum seu Episcoporum; reliquisse tamen,
ut exercendam per unum, nempe per Roma-
num Pontificem, quando Episcopi nequeunt
congregari ad Concilium. Quia Christus
prævidens, non nisi raro Ecclesiam conveni-
re ad Concilium generale; quamvis in illa
tamquam in subjecto reliquerit authorita-
tem infallibilem, ad determinandas fidei &
morum controversias; designavit tamē unum
par-

& absolutè & propriè Vicarius Christi. Quod tamen est manifestè erroneum, imo & hæreticum: nam in Concilio Florentino sess. 25, in litteris Unionis definitum est, *Romanum Pontificem esse verum Christi Vicarium, & totius Ecclesiæ Caput.* Idem definivit Innocentius IV, in cap. *ad Apostolicam* de re judicata in sexto, approbante Concilio Lugdunensi generali. Deinde illa solutio continet errorem damnatum in Concilio Constantensi, quatenus inconcussè fuit generale: nam ibi contra 37 articulum Wicleffi definitum est, *Papam esse proximum & immediatum Vicarium Christi.* Ergo Papa non est Vicarius Concilii vel Ecclesiæ, sed immediatè Vicarius Christi.

CXCV Præterea illa responsio inde efficaciter impugnatur; quia si Papa non esset immediatè Vicarius Christi, sed Vicarius Concilii generalis, seu Ecclesiæ repræsentatæ à Concilio; sequitur, quod, dum est congregatum Concilium; jam Papa defunctus fuisset munere suo, nimirum gubernandi Ecclesiam universam vice Concilii, quando hoc non est congregatum: ergo præsentè Concilio, & volente per se immediatè condere

dere decreta pro tota Ecclesia, illamque per se immediatè gubernare, deberet Papa ab omni exercitio jurisdictionis supersedere : nam quando proprietarius est præsens, & vult per se ipsum immediatè gubernare, debet ejus Vicarius ab exercitio Vicarii cessare. Consequens autem est falsum: nam adhuc, postquam Concilium est congregatum, Papa immediatè gubernat Ecclesiam, nec ab exercitio sui officii potest à Concilio impediri.

CXCVI Præterea, si Papa esset solum Vicarius Concilii ad gubernandam Ecclesiam, sequitur, quod Concilium non indigeret subscriptione & consensu Pontificis, ad decreta fidei & morum edenda, seu ad definendas fidei & morum controversias; sed posset, sine consensu Pontificis, imo ipso contradicente, definitionem facere & intimare toti Ecclesiæ, illamq; obligare ad credenda dogmata definita. Nam quando Proprietarius vult per seipsum immediatè judicare, non indiget subscriptione sui Vicarii, nec ejus consensu, ut ipsius decreta robur, & firmitatem habeant. Sic si Rex Hispaniæ præsens adesset Neapoli, non indigeret subscriptione & consensu sui Proregis ad valorem suorum de-

decretorum : nec Papa indiget consensu Vicarii sui, ad hoc ut validè & licitè aliquid decernat. At certum est, decreta Concilii generalis, non confirmati à Pontifice, non habere vim obligandi Ecclesiam : ut enim testatur septima Synodus generalis, *Actione 6, Non est legitimum decretum generalis Concilii, quod sine Romano Pontifice aut ejus Legato fit.* Et ideo in cap. *regula*, dist. 17 dicitur: *Canonibus præcipientibus, nec ullum unquam ratum est aut erit unquam Concilium, quod Romani Pontificis non fuerit autoritate fulcitum.* Ideo S. Gelasius Papa hujus nominis primus, qui renunciatus est Pontifex anno 492, & obiit anno 496, in tomo de vinculo anathematis, qui extat inter ejus epistolas Decretales, & in epistola ad Episcopos Dardaniæ, latè probat, Concilia, non approbata à Romano Pontifice, nullam habere auctoritatem. Ratio à priori desumitur ex doctrina D. Thomæ 2, 2 q. 1 art. 10, quia *quæstio fidei exorta debet determinari per eum, qui toti Ecclesiæ præest, ut sic ejus sententia à tota Ecclesia teneatur.* Atqui Concilium generale, ut contradistinctum à Papa legitimo & induhitato, non toti Ecclesiæ præest; ergo Concilium,

lium, ut contradistinctum à Papa, sine ejus consensu, & multo minus ipso contradicente, non potest quæstionem fidei determinare, & toti Ecclesiæ proponere, eamque obligare ut ejus sententiam firmiter teneat.

CXCVII Minor constat. Quia in Concilio Florentino sess. 25, in litteris Unionis definitum est, *Romanum Pontificem in universum orbem tenere primatum, esse successorem B. Petri Principis Apostolorum, & verum Christi Vicarium, totiusque Ecclesiæ caput, & omnium Christianorum Patrem atque Doctorem.* Unde, sicut Romanus Pontifex non desinit esse Papa, ex eo quod Concilium generale sit congregatum; ita non desinit habere primatum in universum orbem, & esse totius Ecclesiæ caput & doctor: ergo toti Ecclesiæ tunc præest: ergo ab ipso debet determinari quæstio fidei: ergo est manifestus error, asserere, quod sine consensu Romani Pontificis veri & indubitati, & ipso repugnante, possit Concilium quæstionem fidei exortam determinare, & toti Ecclesiæ proponere, illam obligando ad ejus sententiam firmiter tenendam. Nam Concilium, ut contradistinctum à Papa, non est totius Ec-

Ecclesiæ caput, & omnium Christianorum pater atque doctor; sed repræsentat corpus, cui tamquam caput præest Romanus Pontifex; & non est Pastor, sed ovile Christi; nec doctor & magister totius Ecclesiæ. Unde merito sanctus Thomas loco citato, ex eo quod quæstio fidei debeat determinari ab eo qui toti Ecclesiæ præest, intulit, hoc pertinere ad solam authoritatem summi Pontificis.

§. XIII.

Continuatur materia præcedens. Ubi exponitur, quomodo, etiam in sententia Doctorum, asserentium Concilium generale non posse, etiam ut distinctum à Papa, secundum se totum errare; nihilominus sit necessaria confirmatio Pontificis, ut ejus decreta obligent totam Ecclesiam, & rem faciant de fide certam.

CXCVIII **E**T ideo Concilia generalia, omnibus retro sæculis habita, agnoscentia sua decreta non fore firma certa-que, nisi à Romano Pontifice confirmarentur; eorum confirmationem à summis Pontificibus petierunt, ut longa inductione fuisse ostendit Cardinalis Turrecremata,
lib. 3

lib. 3. cap. 6. 8. 34. 35. 36. & 38. Quapropter autoritas infallibilis, ad definiendas fidei & morum controversias, & ad obligandam totam Ecclesiam potestative, & auctoritate superiori ad credendum veritates definitas, relicta est à Christo, tamquam in subjecto primario, in Romano Pontifice, quatenus Vicario suo & totius Ecclesiæ visibili Capite. In Conciliis autem generalibus, quamvis detur autoritas ad definiendas res fidei (quia in Conciliis generalibus Episcopi non sunt meri consiliarii, sed etiam iudices) autoritas tamen illa non est primaria, & subordinans sibi totam Ecclesiam; sed est secundaria, & subordinata Pontifici, tamquam totius Ecclesiæ Capiti; & indigens confirmatione Pontificis, ad hoc ut fidem infallibilem faciat; vel saltem, ut illa infallibilitas Ecclesiæ innotescat; vel ad hoc, ut possit anathematis vinculo Ecclesiam obligare, ad suscipiendas veritates definitas. Ac pròinde, licet Episcopi sint iudices in Conciliis, sunt iudices subordinati Papæ, tamquam supremo Ecclesiæ Judici & Monarchæ; sicut in Senatibus Regiis Hispaniæ & Galliæ, Senatores sunt iudices; eorum tamen
ju-

judicium est subordinatum judicio Regis; nec potest eorum sententia cogere Regnum ad obediendum, nisi confirmetur à Principe. Potestque Concilium generale, legitime congregatum, quatenus distinctum à Papa, errare in decreto fidei, ut patet in Concilio Ephesino secundo: quia ut Concilium dicatur errare in fide, si sumatur seorsim à Papa, satis est, quod erret major pars: potest autem penes majorem partem errare, ut docet communis & vera sententia; quia infallibilitatem non promisit Deus majori parti, sed meliori, cui Vicarius Christi consentiat. Imo potest errare secundum omnes Patres, ut distinctos à Pontifice, ut docent cum multis Bellarm. lib. 2. de Conc. c. 11; & Valentia t. 3. q. 1. pun. 7, §. 45.

CXCIX Et quamvis secundum sententiam multorum gravium Theologorum, ex iis qui tamquam certum statunt, Papam certum & indubitatum esse supra Concilium generale, definitio edita uniformi consensu suffragiorum à Patribus Concilii, legitime congregati & manentis sub obedientia Pontificis, pro priori ad confirmationem Pontificis, & præscindendo ab illa, sit infallibilis

M

(quia

(quia contingere non potest, ut omnes Patres Concilii, legitimi & manentis sub obedientia legitimi Pontificis, conveniant in statuendo aliquo dogmate, tamquam veritate fidei Catholicæ, & quod illud dogma sit falsum, solusque Papa veritatem assequatur) tamen definitio illa nequit compellere fideles ad profitendam veritatem definitam, nisi confirmetur à Pontifice, & per ejus auctoritatem intimetur Ecclesiæ. Authores, qui illud docent, multi sunt & graves; nimirum, eximius Doctor Suarez disp. 5. de fide sec. 2; Ferdinandus de Salazar, in opere de Concept. cap. 43. §. 5. pag. 452; Franciscus Amicus, disp. 8. de fide n. 76; Joannes Martinon, disp. 9. n. 27; M. Antonius Perez Benedictinus, in Pentateucho fidei. trac. de Concil. dist. 7. cap. 6. & alii.

CC Inter quos Andreas Duvalius Doctor Sorbonicus, in disputatione quadripartita de suprema Romani Pontificis in Ecclesiam potestate p. 4q. 6 conclus. 4, asserit, *Concilium œcumenicum, ante Pontificis confirmationem, solum habere vim directivam, non coactivam; id est, ostendere quidem veritatem infallibiliter amplectendam, cui obsistere ac refragari ne-*
mini

evidenter demonstrata. C. 6 §. 13. 259
mini liceat; sed eam toti Ecclesiæ non posse juri-
dice proponere, neque fideles ad exteriorem suæ
definitionis professionem jure compellere; mi-
nusque pœnis & censuris in eos, qui contrarium
senserint, scire; adeo ut qui ab ipsis decretis
nondum confirmatis dissentiret, etsi erraret, non
propterea tamen hæreticus & Ecclesiæ rebellis
censeretur; nisi Pontifex forte, Legatos mitten-
do, facultatem publicandi definitiones Concilii,
non expectata sua confirmatione, specialiter &
expresse concessisset. Ratio conclusionis manife-
sta est. Quia cum status Ecclesiæ sit monarchi-
cus, non autem aristocraticus; aliunde coactio
seu positiva fidelium obligatio oriri non potest,
quam à supremo moderatore; ut in Regno non
aliunde nascitur Legum servandarum obliga-
tio, quam à Rege. Et hæc causa est, cur semper
œcumenica Concilia à summo Pontifice confir-
mationem expetierint; quia scilicet non ignora-
bant, sua decreta non posse aliter per Ecclesiam
legitime promulgari, & fidelibus obligationem
positivam inducere, & contradicentes pœnis &
censuris castigare, Cap. Significasti, de electio-
ne: Omnia Concilia per Romanæ Ecclesiæ au-
thoritatem, & facta sunt, & robur acceperunt,
Dist. 17. can. Concilia; ubi de provincialibus

Conciliis, à Pontifice non confirmatis scribitur : *quæ quia non habent præsentiam*, id est confirmationem Pontificis, *valetudinem perdidērunt.*

CCI Imo ex authoribus, afferentibus, Concilium generale, legitime congregatum & manens sub obedientia Pontificis, non posse errare in decreto fidei; etiam præscindendo à confirmatione Pontificis; ac proinde ejus definitionem editam à majori parte esse infallibilem, pro priori ad talem confirmationem; P. Ferdinandus de Salazar, tomo de Conceptione p. 491, nihilominus constanter docet; illam definitionem, editam à majore parte, non facere rem certam de fide, nec obligare fideles ad credendum ut dogma fidei veritatem definitam, independentem ab approbatione Pontificis. Redditque rationem: Quia, licet approbatio summi Pontificis non requiratur, ut dans infallibilitatem definitioni Concilii; requiritur tamen, ad declarandum & demonstrandum, illam definitionem esse infallibilem. *Quia Episcoporum suffragia* (inquit) *non aliter ad definitiones dogmatum ad fidem spectantium præstare possunt, nisi rite ac legitime procedant, & directionem à summo*

Pon-

Pontifice acceptam tenentes, sub obedientia illius in omnibus ac singulis maneant. Nam si aliter se gerant, non possunt loqui nomine totius Ecclesiae, quæ numquam non capiti suo subiecta, ac submissa est. Quapropter postquam omnes Episcopi, aut major ipsorum pars in aliquo dogmate concordēs sententias dixerunt, antequam id, quod ita suffragiis suis proferendum putarunt, pro certo & infallibili habeatur, de legitimo procedendi modo, & de eorum obedientia constare debet. Hujus autem rei iudicium ex natura rei ad solum Pontificem spectat: nam in causa ejus subjectionis, quam omnes fideles ipsi debent, ipse solus sententiam dicere potest.

CCII Et hæc videtur esse sententia, quam secutus est Cardinalis Lotharingus in Concilio Tridentino, quando in eo disputatum est de authoritate Episcoporum Concilii & Romani Pontificis. Ut enim contra Petrum Suavem evincit Cardinalis Pallavicinus, in historia Tridentini l. 21 c. 6 n. 20, Cardinalis ille an. 1563 palam dixit Legatis, opinionem suam esse hujusmodi: in Concilio, per Summum Pontificem legitime convocato, & per ejus Legatorum directionem celebrato, inesse immunem à falsitate divinam custodiam in fi-

et dogmatibus; adeo ut ejus sanctiones, etiam ante Pontificiam firmitatem, certa sint, cunctosque Christianos obstringant, adeoque ipsum summum Pontificem ad fidem illis habendam. Posse dumtaxat illum, quippe supremum Ecclesiae judicem, declarare, Concilium modo non ratum processisse, eaque ratione praedictas definitiones irritas reddere. Non ita contingere in morum decretis, in quibus Deus eam custodiam Synodo non sponndit, qua non possit errare in edendis legibus parum opportunis; adeoque illis vim non inesse, antequam à Pontifice Romano confirmentur, cui licet postea eas relaxare ad Ecclesiae utilitatē. Hanc esse suam sententiam affirmavit Lotharingus. Haftenus Cardinalis Historicus.

§. XIV.

Ex eo, quod decreta Concilii sint infallibilia, pro priori ad confirmationem Pontificis, minime sequitur, hunc subjacere Concilio; aut posse ipsius judicium ab illo reformari.

CCIII **N**Ec ex eo, quod decreta fidei edita à Concilio sint infallibilia pro priori ad confirmationem Pontificis, obligentque omnes, adeoque ipsum Pontificem,

cem, ad fidem illis habendam; sequitur, Concilium esse supra Papam in determinandis fidei controversiis; posseque proinde ejus judicium publicum, in materia fidei, reformari à Concilio, declarando, fuisse falsam & erroneam definitionem fidei factam à Pontifice: tum quia, ut hic fatetur Lotharingus, Pontifex est supremus Ecclesiæ Judex; sententia autem seu judicium supremi Judicis nequit ab alio judice in illa communitate, in qua ipse est supremus, reformari: tum quia, quod Pontifex teneatur illis decretis fidem habere, non probat, illa edita esse à Concilio, ut superiori respectu Pontificis; sed ut adhærenti infallibiliter verbo Dei, seu ut organo Spiritus sancti; sicut Petrus Apostolus tenebatur stare scriptis Pauli, & Christus scriptis Prophetarum, & Pontifex definitionibus prædecessorum suorum. Quare tunc in Pontifice esset obligatio in conscientia, non erga Concilium sibi superius, & ut sibi præcipiens; sed erga Deum, ut sibi loquentem medio Concilio; sicut Deus potest loqui Generali Religionis, media revelatione facta subdito ipsius.

CCIV Quare ex eo, quod Concilium, le-

gitime congregatum & manens in obedientia Pontificis, sit infallibile in decretis fidei pro priori ad confirmationem Pontificis; non sequitur esse supremum controversiarum Judicem; sed solum sequitur, esse duplicem infallibilitatem, alteram in definitionibus Papæ, quando loquitur è Cathedra cum tota Ecclesia, ut Vicarius Christi & supremus controversiarum Judex; alteram in Concilio: inter quas hæc datur differentia, quod definitio Pontificis obligat totam Ecclesiam, independenter à consensu vel confirmatione Concilii, quia provenit à supremo Judice controversiarum; definitio vero Concilii, licet sit infallibilis pro priori ad confirmationem Pontificis, hæc infallibilitas non potest constare Ecclesiæ sufficienter ad obligandum; saltem quoad vim coactivam, nisi mediante confirmatione Pontificis, per quam innotescit, Concilium illud legitime processisse; & per quam accipit vim illa definitio Concilii, cogendi ad sui obedientiam in foro externo; quia immiscetur præceptum Pontificis, habentis superioritatem respectu totius corporis Ecclesiæ; quam superioritatem non habet Concilium, ut disti-

stin-

evidenter demonstrata. C.6 §. 14. 265
stinctum à Papa. Unde in sententia, asse-
rente definitionem Concilii generalis esse in-
fallibilem pro priori ad confirmationem Pon-
tificis; definitio Concilii generalis confir-
mata à Pontifice, habet infallibilitatem du-
plici titulo: & quia est à Concilio, & quia
est confirmata à supremo Judice Ecclesiæ;
ac proinde ejus infallibilitas est major ex-
tensive, quam definitio solius Pontificis edi-
ta extra Concilium: istius autem definitio,
utpote orta à supremo Judice Ecclesiæ, est
omnino irreformabilis per Concilium, nec
indiget Concilii confirmatione, nec Eccle-
siæ consensu, ut omnes obliget.

§. XV.

*Ostenditur, non esse expectandum Ecclesiæ
consensum, ut definitio Pontificis
Romani sit infallibilis.*

CCV **Q**Uapropter authoritas infallibilis,
ad definiendas fidei & morum
controversias, per modum Judicis supremi
controversiarum fidei, est in Capite totius
Ecclesiæ: nec ut ejus definitio sit infallibilis,
expectandus est Ecclesiæ consensus. Primo.

M 5

Quia

Quia cum Pontifex sit à Christo constitutus totius Ecclesiæ doctor & magister; absurdum foret, firmitatem sententiæ magistri pendere à consensu discipulorum. Secundo. Cum sit summus Ecclesiæ Pastor, & reliqui omnes fideles comparentur ad illum tamquam oves ad pastorem; absurdum foret, pastorem, in designandis pascuis salutaribus, quibus pascantur oves, à judicio ipsarum ovium pendere. Tertio. Cum certum sit, Romanum Pontificem immediatè à Christo accipere suam potestatem definiendi & determinandi veritates fidei, non minus quam Sacerdos immediatè accipit potestatem consecrandi; non minus absurdum foret, definitionis Pontificiæ infallibilitatem pendere ab acceptance fidelium, quam valorem consecrationis pendere à consensu audientium Missæ Sacrificium.

CCVI Quarto. Quia, ut alibi latè ostendo, certum est, Christum non tradidisse immediatè claves communitati Ecclesiæ, ut communitas est, ut inde derivaretur in Prælatos, & in summum Pontificem; sed immediatè tradidisse Petro & successoribus ejus, pro bono cõmunitatis Ecclesiæ, cujus Caput

put ipsum fecit; ac proinde certum est, sub-
jectum immediatum summæ potestatis Ec-
clesiasticæ, quam Christus reliquit in Eccle-
sia, & quam explicamus nomine Clavium,
quarum mentionem Christus fecit, dum di-
xit Petro; *Tibi dabo Claves regni celorum*;
non esse ipsam communitatem Ecclesiæ, sed
Petrum ejusq; successorem Romanum Pon-
tificem; sicut subjectum immediatum pote-
statis consecrandi, quam Christus reliquit
in Ecclesia, non est communitas Ecclesiæ; sed
sunt soli Sacerdotes, qui illam potestatem à
Christo accipiunt. Hinc autem, ut fatetur
Doctor Ludovicus Ellies Dupin, Dissert. 6
§. 1 pag. 379, necessario inferitur, Romanum
Pontificem esse supra communitatem Ec-
clesiæ; & supra Concilium generale, ut di-
stinctum ab ipso Pontifice; & insuper infer-
tur, ad infallibilitatem Pontificiæ definitio-
nis non esse expectandum consensum com-
munitatis Ecclesiæ, à qua sicut Papa suam
potestatem non accipit, ita nec ejus definitio
ab ejus consensu debet haurire suam infalli-
bilitatem.

CCVII Quinto. Quia eatenus à consensu
Ecclesiæ posset pendere infallibilitas Pon-
tificiæ

tificiæ definitionis, quatenus communitas Ecclesiæ, incapax est errandi in fide; nam ab Ecclesia, ut capaci errandi, nequit Pontificia definitio haurire infallibilitatem; Ecclesia autem capax est errandi in fide secundum aliquam sui partem, & quidem secundum magnam, ut erravit tempore Arianorum, quando in Concilio Ariminensi, Valentis potissimum & Ursatii fraudibus, damnatio Nicænæ fidei conclamata est, & *ingemiscens orbis terrarum se Arianum esse miratus est*, ut ait Hieronymus, & ex illo Ecclesia in lectionibus S. Damasi: solumque est omnino certum, Ecclesiam non posse secundum se totam errare in fide, credendo aliquid falsum pro dogmate fidei. Ergo si infallibilitas Pontificiæ definitionis desumenda est ex consensu Ecclesiæ, desumenda erit ex consensu totius Ecclesiæ: unde non poterit quis ex eo, quod certo sciat aliquam veritatem definitam esse ut articulum fidei à Romano Pontifice, moveri ad credendum fide divina veritatem definitam; quousque certificetur, totam Ecclesiæ communitatem consensisse in illam definitionem, amplectendo ut articulum fidei veritatem definitam. Hanc autem certitudinem

nem nemo potest acquirere seculæ revelatione. Unde enim scire quis potest, omnes fideles credidisse ut veritatem infallibilem, eam quam Pontifex definivit; si Deus hoc ipsi non revelet? Ergo certum est, non esse expectandum Ecclesiæ consensum ad hoc, ut definitio Pontificia sit infallibilis: quia nec est expectandus consensus Ecclesiæ repræsentativè sumptæ, id est consensus Concilii generalis repræsentantis universam Ecclesiam; nec est expectandus consensus ipsius communitatis Ecclesiæ secundum se totam, ut ferè totam, & in ea mensura secundum quam est incapax errandi in fide: quapropter non ideo definitio Pontificis est infallibilis, quia Ecclesia consentit; sed è contra ideo Ecclesia consentit, quia Pontifex est infallibilis.

CCVIII Et quidem quis non videat, nullum fidelium, ad amplectendam fide firma veritatem definitam à Pontifice, exquirere quid alii fideles fecerint; sed solum esse sollicitum, ut omnino certificetur de eo quod Pontifex illam definierit? Ergo solum requiritur, quod certificetur de existentia definitionis; non autem quod certificetur de eo, quod tota Ecclesia illam acceptaverit. Quis non

definitio cujuscunque Episcopi & Doctoris particularis. Nam quando est dubium inter Catholicos, an res aliqua sit revelata & de fide; si unus Episcopus vel Doctor particularis determinet partem affirmantem, & omnes deinde amplectantur illius sententiam, & credant rem ab illo definitam & stabilitam, tamquam veritatem à Deo revelatam, jam illa definitio erit infallibilis: quia implicat, ut sit falsa sententia affirmans aliquid esse revelatum, si tota Ecclesia illam sequitur, credendo rem illam ut à Deo revelatam. Ergo illa doctrina non majorem infallibilitatem, in definiendo & determinando res fidei, tribuit Romano Pontifici, quam cuilibet Episcopo vel Doctori particulari. Quis autem non videat, hoc esse plane absurdum?

CCXI Hinc patet, quam sit absurda doctrina Doctoris moderni, nimirum Illustrissimi Gilberti de Choyseul Duplessy Praslain, Tornacensis Episcopi, qui fuit unus ex principalibus Authoribus declarationis de Potestate Ecclesiastica, quæ nomine Cleri Gallicani publicata est Parisiis mense Martio anno 1682, & qui epistolam de potestate Ecclesiastica in defensionem illius declarationis scripsit.

plit. Illic enim, ad hoc ut constitutio Pontificis, qua aliquam controversiam in materia fidei vel morum è Cathedra Petri determinet; proponendo fidelibus quid tenere debeant in illa controversia, rem faciat certam de fide, perinde ac si esset edita à Concilio generali; requirit pag. 31 illius Epistolæ, pro conditione indispensabili, quod illa constitutio Pontificia *ab omnibus singillatim Ecclesiis recipiatur*. Sic enim expresse habet; *Si eorum Constitutiones ab omnibus singillatim Ecclesiis recipiantur, inconcussæ ac perpetuæ authoritatis maneant, ac si ab universali Concilio essent confirmatæ*. Patet, inquam, quam sit absurda hujus Doctoris doctrina. Si enim ad infallibilitatem Pontificiæ constitutionis requiritur, *ut ab omnibus singillatim Ecclesiis recipiatur*: ergo in potestate cujuslibet Ecclesiæ particulis erit, facere ut definitio Pontificis, edita extra Concilium generale, non sit infallibilis, nimirum si nolit recipere eam; si quidè juxta illum Doctorem, illa Pontificia definitio *non est perpetuæ ac inconcussæ authoritatis, nisi sub conditione, quod ab omnibus singillatim Ecclesiis recipiatur*. Quid autem hoc aliud est, quam Ecclesiam Gallicanam & quamcumque

que aliam, facere arbitram definitionum fidei & morum, quæ à Romano Pontifice Romæ pro tota Ecclesia cuduntur & promulgantur; ut nimirum, si Ecclesia Gallicana nolit eas definitiones recipere, hoc ipso irritæ maneant? Quid hoc absurdius? Quid aliud est, quam Caput subjicere membris, summum Pastorem ovibus, & summum Ecclesiæ Magistrum communemque Doctorem fidelium subjicere discipulorum judicio? quid aliud, quam Sedem Apostolicam, quam Christus posuit tamquam firmissimam fundamentalem petram, cui tota ædificii firmitas inniteretur, firmitatem suam accipere à lapidibus superpositis?

CCXII Et sanè non esse expectandum Ecclesiæ consensum ad hoc, ut Pontificia definitio sit infallibilis, probatur ex principio, apud omnes Catholicos certo, apud Bellarm. l. 4 de Rom. Pontif. c. 2 versic. *deinde Catholici*; & Valentiam, tom. 3 col. 241, quod scilicet, quoties Romanus Pontifex in quæstione controversa & dubia inter Catholicos, quæ ad ipsum tamquam ad Christi Vicarium & communem Ecclesiæ Magistrum resolvenda & determinanda refertur,

unam

unam partem è Cathedra Petri determinat, & toti Ecclesiæ credendum proponit, declarans oppositam esse hæreticam; omnes tenentur ei obedire, & iudicium suum ejus iudicio submittere; quia ad summum Pastorem attinet, ostendere ovibus suis pastum salutiferum, & in illum eas ducere, & venenosum vitare, & ab eo eas arcere; & ad supremum Ecclesiæ Magistrum, quem in dubiis fidei & morum Ecclesiæ particulares & Episcopi inferiores consulere debent, attinet, dubia determinare & resolvere; omnesque proinde tenentur ipsius iudicium sequi. Et ideo 24 q. 7 dicitur: *Quoties ratio fidei ventilatur, non nisi ad Petrum, id est ad sui nominis honorem & auctoritatem habentem, recurrendum est*, & iterum: *Majores Ecclesiæ causas, præsertim circa articulos fidei contingentes, ad Sedem Petri referendas intelligit, qui novit pro eo Dominum orasse, ne deficeret fides ejus.*

CCXIII Hoc pacto Concilia Africana consuluerunt S. Innocentium I & S. Zosimum, in dubiis fidei circa doctrinam Pelagii & Cælestii; & ad eorum instantiam Pontifices illi hæresim Pelagianam damnaverunt, ut testatur S. Augustinus, l. 2 retract. c. 50.

his

his verbis : *Pelagiana hæresis simul cum suis
authoribus ab Episcopis Ecclesiæ Romanæ. prius
Innocentio, deinde Zosimo, cooperantibus Conci-
liorum Africanorum litteris, convicta atque
damnata est.* Et anno 1653 Illustrissimi Epi-
scopi Galliæ numero 85 consuluerunt Inno-
centium X. circa doctrinam Jansenii, & in
prooemio epistolæ sic præfatur; *Majores
causas ad Sedem Apostolicam referri, solennis
mos est.* Et in decursu epistolæ: *Precamur,
Sanctitas tua, quid hac in re tenendum sit, cla-
re & distinctè definiat.* Et ad ipsorum instan-
tiam quinque illas celebres Jansenii propo-
sitiones, ut hæreticas damnavit; & in Bulla
sua contra Jansenium, omnibus Christi fide-
libus mandavit sub poenâ contra hæreticos
in jure expressis, *ne de quinque propositionibus
Jansenii aliter sentiant, quam in Bulla conti-
netur;* ac proinde præcepit, ut pro hæreticis
habeant illas quinque propositiones, & judi-
cium suum. iudicio summi Pontificis defi-
nientis subjiciant. Quare qui post Bullam
Innocentii judicaret, illas propositiones non
esse hæreticas; contra veniret præcepto Pon-
tificis, obligantis ad non aliter sentiendum
de illis propositionibus, quam continetur in
il-

illa Bulla, in qua declarantur ut hæreticæ. Unde merito S. Thomas, 2, 2 qu. 1 art. 2 pronuntiavit. *Papa determinante judicialiter & definitivè, aliquid esse hæreticum & ab Ecclesia pro hæresi habendum, constat quod omnes tenentur acceptare: & hæreticus censeretur, quicumque de cætero teneret oppositum pertinaciter.* Ex hoc principio necessario infertur, Papam habere assistentiam infallibilem Spiritûs sancti, ne erret, quando è Cathedra Petri, dubia fidei & morum resolvit, & toti Ecclesiæ unam partem credendam proponit, ut dogma Catholicum & à Deo revelatum; & oppositum damnat, ut hæreticum, vel erroneum. Nam si Pontifex tunc erraret, omnes fideles possent, imo tenerentur errare in materia fidei; quia omnes tenentur in re dubia inter Catholicos se conformare iudicio supremi Pastoris & Doctoris, dubium definientis & determinantis. Hæc enim obedientia debetur Christi Vicario, ratione Primatus sui in universa Ecclesia. Ut enim sapienter scribit P. Valentia. tom. 3 col. 199. *Non aliud nomine ejus Primatus intelligimus, quam talem auctoritatem, cui omnes fideles in utroque foro, interno & externo, parere debent, in iis quæ spe-*
ctant,

stant, vel ad cultum, vel ad fidem, id est in salutis negotio. Unde, sicut inter omnes Catholicos est certum, Romanum Pontificem habere Primatum in Ecclesia Dei; ita certum debet esse inter ipsos, Romano Pontifici, determinanti fidei & morum controversias, & præcipienti quænam pars tenenda sit, omnes obedire debere. Unde si ille erret in definiendo, omnes errabunt in credendo, quod ille credi præcipit. Cum ergo impossibile sit, totam Ecclesiam errare in credendo; impossibile est, summum Pontificem errare, in definiendis & determinandis fidei & morum controversiis.

§. XVI.

Certum est, regimen à Christo institutum in Ecclesia sua esse monarchicum: inde necessario inferitur, Romanum Pontificem, ut supremum Ecclesiæ Monarcham, esse supremum controversiarum fidei iudicem, ejusque proinde judicium esse irreformabile à Concilio.

CCXIV **C**hristum instituisse regimen absolute monarchicum, in quo suprema auctoritas sit penes unum, ad quem majores causæ referantur, licet aliqua Aristocratia

stocratia temperatum ; est adeo commune, ut Cardinalis Bellarminus, lib. 1. de Rom. Pontif. cap. 5 ; & Andreas Duvalius, in tractatu de suprema Romani Pontificis in Ecclesiam potestate, part. 1. q. 2. pag. mihi 40, testentur, *in hoc asserendo Authores Catholicos convenire omnes* ; & est adeo certum, ut eximius Doctor P. Franciscus Suarez, Disp. 9. de fide sect. 6. numero 8, assermet, id esse *de fide* ; & ipse Joannes Gerson, in Tract. de statibus Ecclesiæ considerat. 1, *Schismaticum & hæreticum appellet eum, qui negaret, statum Papalem institutum esse à Deo supernaturaliter & immediate, tamquam habentem Primatum monarchicum & regalem in Ecclesiastica Hierarchia*. Idem docet, in lib. de potest. Ecclesiæ considerat. 10 ; & in libro de auferibilitate Papæ considerat. 5 ; & Duvalius dicit, hoc ita certum esse, ut à quopiam citra fidei jacturam negari non possit : ipsaque Universitas Parisiensis censuravit ut hæreticam doctrinam Marci Antoni de Dominis, qua, lib. 2. de Republica cap. 3. n. 3, asseruit, *Christum non instituisse in Ecclesia sua gubernationem monarchicam, sed per multos ministros, sine uno Monarcha mortali regere*

evidenter demonstrata. C. 6 §. 16. 279
regere perfecte & gubernare Ecclesiam, ut re-
fert M. Bail in summa Conciliorum, tom.
pag. 82. 83. & 84.

CCXV Veritatem hanc de Monarchia
spirituali Romani Pontificis, non minus ner-
vole quam eleganter probat Pius secundus
Papa, in Bulla retractationum. Nobis suffi-
ciat rationem proponere, qua id probat D.
Thomas, 4 contra gent. cap. 76. nu. 3. *Quia*
nulli dubium esse debet, quin Ecclesiæ regimen
sit optime ordinatum; utpote per eum disposi-
tum, per quem Reges regnant, & legum con-
ditores iusta decernunt; optimum autem regi-
men multitudinis est, ut regatur per unum:
quod patet ex fine regiminis, qui est pax. Pax
enim & unitas: subditorum est finis regentis:
unitatis autem congruentior causa est unus, quam
multi. Manifestum est igitur, regimen Eccle-
sia sic esse dispositum, ut unus toti Ecclesiæ pra-
sit. Et num. 4. Ecclesia militans ex trium-
phanti Ecclesia per similitudinem derivatur.
Unde & Ioannes in Apocalypsi vidit Hierusa-
lem descendentem de cælo: & Moysi dictum
est, quod faceret omnia secundum exemplar ei
in monte monstratum. In triumphanti au-
tem Ecclesia unus praesidet, qui etiam praesidet,
in

in toto universo, scilicet Deus. Dicitur enim Apocalyp. 21. Ipsi populus ejus erunt, & ipse cum eis erit eorum Deus: Ergo & in Ecclesia militante unus est, qui præsidet universis.

CCXVI Hinc aperte deducitur, Romanum Pontificem, ratione sui Primatus & Monarchiæ spiritualis, esse supremum controversiarum fidei Judicem, à cujus sententia non sit appellatio ad tribunal fidei superius. Evidens enim apparet, vel in Ecclesia Christi non esse supremum aliquod tribunal fidei seu supremum controversiarum fidei Judicem, vel hoc munus competere supremo Principi & Monarchæ spirituali, qui toti Ecclesiæ præest; à sententia enim supremi Monarchæ non est appellatio ad alium Judicem in illa communitate, in qua ipse est supremus Princeps & Monarcha. At certissimum est, dari in Ecclesia supremum controversiarum Judicem, ut probatum est, & à priori ostendit D. Thomas, cont. gent. cap. 76. n. 2. Nam de fide est, Ecclesiam esse unam, ut constat ex Symbolo, *Credo in unam sanctam Ecclesiam. Iam ad unitatem Ecclesiæ, ait, requiritur, quod omnes fideles in fide con-*
ve-

evidenter demonstrata. C. 6 §. 16. 281
veniant; circa ea vero, quæ fidei sunt, con-
tingit quæstiones moveri; per diversitatem au-
tem sententiarum divideretur Ecclesia, nisi in
unitate per unius sententiam conservaretur.
Exigitur ergo, ad unitatem Ecclesiæ conser-
vandam, quod sit unus qui toti Ecclesiæ præsit.
Manifestum est autem, quod Christus Eccle-
siæ in necessariis non deficit, quam dilexit, &
pro ea sanguinem suum fudit; cum & de Syna-
goga dicatur per Dominum, Esaia 5, Quid
ultra debui facere vineæ meæ, & non feci?
Non ergo dubitandum est, quin ex ordinatione
Christi unus toti Ecclesiæ præsit. Hæc ille. Nec
item est dubitandum, quod præsit cum au-
thoritate infallibili. Nam si hanc non habe-
ret, non posset unitatem fidei conservare; sed
potius foret causa, ut Ecclesia tota erraret:
supremus enim Magistratus, cui in causa fi-
dei omnes tenentur obedire; seu supremus
Magister, quem è Cathedra loquentem om-
nes tenentur audire, si erret, causa est ut
omnes errent.

§. XVII.

Solvitur objectio, contendens judicium Romani Pontificis in controversiis fidei posse reformari à Concilio generali, quamvis ille sit Monarcha spiritualis.

CCXVII **A**T objicies, ex eo quod gubernatio, à Christo instituta in Romano Pontifice, sit Monarchica; non sequi, quod Papa sit supra Concilium generale; sed satis esse, quod sit supra singulos fideles, & supra omnes Prælatos divise. Nam ut probat P. Suarez, tom. 4. de Religione Societatis in particulari lib. 10. cap. 1; regimen Societatis est per modum Monarchiæ: idque constat ex Constitutione Gregorij XIV, *Ecclesiæ Catholicæ*, in qua sic summus Pontifex loquitur. *Quoniam ratio ipsa docet, & Ignatius fundator prudenter animadvertit, ad hoc ut Societas bene gubernetur, valde expedire, ut Generalis omnem habeat in ea auctoritatem ad ædificationem, ex qua præter cætera quàm plurima, illud sequetur commodi; ut universus Ordo ad Monarchicam gubernationem compositus, maxime servetur unicus; ipsiusque*

siusque membra, per universum orbem dispersa, per omnimodam hanc subordinationem suo capiti colligata, promptius atque facilius à summo Christi in terris Vicario; ad varias functiones, juxta eorum peculiarem vocationem ac speciale votum, dirigi ac moveri possint. Hæc Pontifex.

CCXVIII Quare Generalis Societatis est in hac Religione Monarcha quidam spiritualis, quoad potestatem & auctoritatem distribuendi officia, & admittendi ad Professionem religiosam, & multa alia: ex eo autem, quod hanc Monarchiam habeat, solum sequitur, quod sit supra omnes Rectores & Provinciales divisive; non autem, quod sit supra omnes collectivæ, quando sunt coacti in Congregationem generalem, & per suffragia res Religionis disponunt. Ergo pariter ex eo, quod Papa sit Monarcha spiritualis, solum sequitur, quod sit supra reliquos omnes Episcopos divisive, quando non sunt convocati ad Concilium generale; non autem quod sit supra illos collectivæ sumptos, & quatenus res fidei & morum definiunt & statuunt, per majorem partem suffragiorum. Ergo stat, Papam esse Monarcham spirituales in tota

Ecclesia, quin propterea sit supra totam Ecclesiam, dum est convocata in Concilium generale; ac proinde componitur cum Monarchia spirituali, quod sit infra Concilium generale. Si autem sit infra Concilium, poterit ejus definitio in dubiis fidei reformari per definitionem Concilii generalis.

CCXIX Respondeo, cum Patre Suarez, eo l. 10 c. 1 n. 14, magnam esse differentiam inter Monarchiam Societatis & Monarchiam Ecclesiae. Nam regimen Ecclesiae reducitur ad unum summum Prælatum, qui non solum nulli alteri homini in terris, verum qui nec alicui communitati subiectus, est supra totam Ecclesiam; non solum divisim quoad singulos, sed etiam collective quoad universitatem. Quia Christus Petrum, ejusque successorem Romanum Pontificem, suum in terris Vicarium constituit; illamque constituit in sui absentia corporali & visibili, caput visibile corporis militantis Ecclesiae; summumque Pastorem totius sui ovilis fecit; ut constat ex Evangelio Matth. 16: *Tu es Petrus, & super hanc petram edificabo Ecclesiam meam; & ibi dabo claves regni calorum;* & Joan. 21, *Pasce oves meas;* & Luc. 22, *Confirma fratres*

*tuos. Et cum sint in Evangelio tam clari textus, ex quibus Concilia & Patres atque Doctores statuunt, Papam esse supra totam communitatem Ecclesiæ; nullus est textus, ex quo probari possit, Concilium, ut contradistinctum à Papa, esse supra illum. At Præpositus Generalis Societatis, non solum habet superiorem personam, cui subiectus sit, scilicet Pontificem (quod ex generali ratione Religionis Christianæ, & ex speciali status Religiosi, & ex specialissimo Societatis Jesu, necessarium est) sed etiam est subiectus ipsi Societati, à qua dirigi & corrigi, & (si necesse sit) puniri & deponi potest; ut constat ex Constitutionibus Societatis, & ex Bullis Apostolicis; unde part. 10 constit. §. 8 dicitur; *Refert etiam magnopere, si Præpositi particulares in sibi subditos, & Generalis in particulares (scilicet Præpositos) & Societas in Generalem multum potestatis habeat; ita ut omnes ad bonum omnia possint, & si male agerent omnino subiecti sint.**

CCXX Ratio autem differentię est clara. Quia Papa, non ab Ecclesia, sed immediate à Christo potestatem Papalem habet; quæ res est adeo certa, ut idem eximius Doctor

Franciscus Suarez, disp. 10 de fide sec. 3 n. 7, dicat, hanc conclusionem esse certam de fide. Quia de fide est, Christum in Petro instituisse dignitatem summi Pontificis & Vicarii sui in terris: rursus de fide est, Christum non fundasse eam dignitatem, ut in Petro finiretur, sed ut transfret ad successores Petri: ac proinde de fide est, Christum voluisse, ut aliquis Episcopus succederet Petro in munere summi Pontificis & Vicarii Christi. Est autem certum omnino & evidens evidentia facti, illum Episcopum qui succedit Petro in summo Pontificatu, non alium esse quam Episcopum Romanum. Unde certum omnino est, esse summum Pontificem & Vicarium Christi, illum hominem, de quo constat, esse legitime electum in Episcopum Romanum: de quo videndus est Bellarm. lib. 2 de Romano Pontif. cap. 12.

CCXXI Quare, sicut Christus fundans Ecclesiam, non dedit communitati seu Collegio Apostolorum potestatem eligendi caput, qui vice ipsius Christi post ejus ascensum in cælum visibiliter gubernaret Ecclesiam; sed ipse Christus immediate elegit Petrum in sui Vicarium, qui visibiliter gubernaret

naret Ecclesiam post ascensionem suam: ita non dat nunc communitati Christianorum, vel communitati Episcoporum, vel alicui alteri communitati auctoritatem instituendi Pontificem, seu concedendi alicui homini jurisdictionem Papalem; sed ipse per seipsum immediate communicat potestatem jurisdictionis Papalis illi personæ, quam Cardinales eligunt in Pontificem; sicut per seipsum communicat potestatem consecrandi corpus suum illi viro, quem Episcopus ordinat in Sacerdotem.

CCXXII Quare, quando de novo creatur Papa, personæ eligentes non communicant ipsi potestatem; sed designant personam, cui à Deo immediatè communicatur, ex vi primævæ institutionis factæ à Christo in persona Petri, ut latè explicat ipse P. Suarez, l. 3 adversus Regem Angliæ c. 2. Et idcirco nequit Ecclesia limitare potestatem Pontificis, nec unum constituere pro Oriente, alterum pro Occidente; quod certè posset, si semel potestatem jurisdictionis ipsi communicaret; sicut Episcopi possunt Sacerdotibus limitare potestatem jurisdictionis, quam ipsis communicant; non potestatem

consecrandi, quam immediatè ipsis Christus tribuit. Unde, licet possint Sacerdotibus præcipere, ne faciant Sacrum, ipsosque excommunicare; sua tamen prohibitione nequeunt efficere, ne verè consecrent corpus Christi, si verba consecrationis proferant supra legitimam materiam cum intentione consecrandi; quia potestatem consecrandi non accipiunt ab ipsis, sed immediatè à Christo.

CCXXIII Nec in toto Evangelio reperietur textus, ex quo verisimiliter probari possit, Christum tribuisse Ecclesiæ auctoritatem instituendi potestatem Papæ in Petro vel in successoribus ejus. Et ratio à priori, cur Ecclesia hanc auctoritatem non habeat, est; quia eam potestatem instituere propria auctoritate, quâ aliquis utitur ut Vicarius alicujus Domini, ad nullum alium pertinet nisi ad illum Dominum, cujus ipse qui tali potestate utitur est Vicarius. At potestas Papalis, seu jurisdictio quam habet quatenus Papa, est potestas qua ipse Papa utitur, ut Vicarius Christi in terris; ergo potestatem istam instituere & conferre, ad nullum alium pertinet nisi ad Christum. Potestas ergo Papalis non est ex institutione humana,

na, sed divina; & immediatè à Christo communicatur illi personæ, quæ ritè eligitur in Episcopum Romanum.

CCXXIV Pontifex ergo, non ab Ecclesia, sed immediatè à Christo habet potestatem. At Præpositus Generalis habet suam potestatem à Societate, juxta modum in ipsius Constitutionibus præscriptum, & à summis Pontificibus confirmatum. Unde Societas, in certis casibus designatis in constitutionibus part.9 c.4, potest Generalem deponere; ac proinde non est mirum, quod Societas, quando est coacta in Congregationem generalem, sit supra Præpositum Generalem, quamvis Ecclesia, quando est congregata in Concilio generali, sit subjecta Pontifici, sicut corpus suo capiti, & sicut ovile summo Pastori: quia Pontifex necessario retinet munus Vicarii Christi: ac proinde semper sicut caput visibile habet superioritatem in reliquum Ecclesiæ corpus, representatum à Concilio. Licet enim Christus, existens in cælo, sit invisibile caput Ecclesiæ, in ipsam continuo influens per gratiã; caput tamen visibile Ecclesiæ, quod externè illam gubernat Vice Christi, est Romanus

Pontifex. Est ergo evidens disparitas : quia constat manifeste ex Constitutionibus Societatis & ex Bullis Pontificum, Generalem à Societate accipere immediate potestatem, & Societati ut congregatæ esse subiectum : & contrarium constat ex Evangelio, ex Patribus, & ipsis Conciliis, Papam non accipere potestatem ab Ecclesia, sed immediate à Christo; nec subesse Concilio, sed illo superiore esse; & Concilia ipsa hanc superioritatem agnovisse, dum ad valorem suorum decretorum recurrerunt ad confirmationem Pontificis: cum in Congregatione generali satis sit, decreta condi à maiori parte, ut totam Societatem ligent, nec opus sit confirmatione Generalis ad ipsorum valorem.

CCXXV Nec fuit conveniens, ut Christus subjiceret Romanum Pontificem Concilio, sicut fuit conveniens, ut S. Ignatius in Constitutionibus, vel potius Sedes Apostolica eas confirmans, subjiceret Generalem Societati ad Conventum generalem convocatæ. Nam (ut inquit P. Suarez) *Pontifex, sicut singulari & excellentiori modo habet à Deo potestatem, ita habet peculiarem Spiritus sancti assistentiam, quæ potest supplere*

enjuscumq; superioris directionem vel coactionem. Alii vero inferiores Prælati, sicut ab hominibus eliguntur, ita convenienter toti Communitati seu Congregationi generali subjiciuntur. Quod non fuerit conveniens, Christum Dominum Vicarium suum subjicere Concilio, probat factum ipsum; quia Christus illud fecit, quod melius, & convenientius erat Ecclesiæ suæ. Constat autem ex Evangelio, totum corpus Ecclesiæ subjecisse Romano Pontifici, ut capiti visibili Ecclesiæ.

CCXXVI Idque ratio evincit. Nam Papa Princeps est Ecclesiæ totius, utpote Vicarius Christi: ergo in terris superiorem non habet. Probo consequentiam. Nam quia summus Princeps est Ecclesiæ, non potest judicari ab ullo Ecclesiastico Judice. Rursus: quia Respublica Ecclesiastica spiritualis est, ac proinde major ac sublimior quam ulla Respublica temporalis, ad summum Principem Reipublicæ Ecclesiasticæ pertinet, dirigere & judicare summum Principem Reipublicæ temporalis, non autem ab illo dirigi & judicari: alioqui rectus ordo & ipsa natura rerum perturbaretur. Ergo Papa in terris superiorem potestatem non habet, à qua judicetur.

Thaumaturgi, de quibus vide Basilium libro de Spiritu sancto, c.29; Gregorium Nyssenum in Vita ejus; Hieronymum de Viris Illustribus, & Eusebium ex versione Ruffini, lib.7 cap.25.

Quarto saculo, habemus miracula Antonii, Hilarionis, Martini, Nicolai, & aliorum, scripta ab Athanasio, Hieronymo, Sulpitio, & aliis.

Quinto saculo, habemus miracula plurima, quæ describit Augustinus facta suo tempore lib.22 de Civitate Dei cap.8.

Sexto saculo, habemus miracula, quæ narrat Gregorius in Dialogis, ubi refert duo, facta à Romanis Pontificibus, Joanne & Agapito, lib.3 cap.2 & 3.

Septimo saculo, miracula facta in Anglia à S. Augustino & Sociis, de quibus Gregorius l.9 epist.58, & Beda l.1 Hist. c.13. Item ab Oswaldo Rege per lignum Crucis l.3 c.2.

Octavo saculo, miracula S. Cuthberti & S. Joannis in Anglia, teste Beda l.4 & 5 Hist.

Nono saculo, miracula Tharassii, scripta ab Ignatio Nicæno. Item alia innumerabilia omnis generis, facta in civitate Sueffionensi in translatione reliquiarum S. Sebastiani Martyris,

tyris, quæ facta est anno Domini DCCCXXVI,
de qua vide Annales Francorum, scriptos
summa fide ab Auctore qui illo ipso tempo-
re floruit.

Decimo sæculo, miracula S. Romualdi,
scripta à B. Petro Damiani. Item Wenceslavi
Regis Boëmorum, S. Udalrici, & S. Dunstani,
de quibus vide Surium.

Undecimo sæculo, miracula S. Eduardi Re-
gis & Virginis, S. Anselmi, Gregorii Papæ
VII, & aliorum. Post illa undecim sæcula,

CCXXVIII *Duodecimo sæculo*, claruerunt
in Ecclesia Catholica miraculis B. Mala-
chias, & B. Bernardus. De Malachia Episco-
po, Legato Pontificis Rom. sic scribit Bernar-
dus in Vita ejus, postquam narravit multa
miracula: *Quo, inquires, antiquorum genere
miraculorum Malachias non claruit? Si benè
advertimus pauca ipsa, quæ dicta sunt; non Pro-
phetia defuit illi, non revelatio, non gratia sa-
nitatum, non mutatio mentium, non denique
mortuorum suscitatio.* Beatus autem Bernar-
dus, Monachus & Pater Monachorum, ac
Romanis Pontificibus addictissimus, pluri-
bus miraculis claruit quam ullus Sanctorum,
quorum Vitæ scriptæ exstant. Nam una die
in

in Constantiensi diœcesi constat eum illuminâsse cæcos undecim, curâsse mancos decem, & claudos decem & octo, ut scribit Gotfridus, qui cum ipso vixit lib. 4 cap. 5, Vitæ ejus: & præterea omnes quinque libri plenissimi sunt miraculis, ut difficile sit eorum numerum inire.

CCXXIX *Decimo tertio sæculo*, claruerunt in Ecclesia Catholica multi, sed præcipuè B. Franciscus: cujus Vitam miraculis plenissimam scribit B. Bonaventura. Item B. Dominicus, cujus Vita, etsi negligentius scripta fuit, tamen constat, eum tres mortuos excitâsse. Claruerunt eodem sæculo miraculis B. Petrus Martyr, & B. Thomas ex Ordine Prædicatorum, & B. Antonius ac B. Bonaventura ex Ordine Minorum: de quibus vide Antoninum 3 par. hist. tit. 23 & 24. Et ad finem ejus sæculi claruit miraculis plurimis S. Cælestinus V, Pontifex Romanus, tam ante Pontificatum, quàm postea; ut scribit in ejus Vita Petrus Cardinalis Cameracensis.

Decimo quarto sæculo, claruerunt miraculis etiam multi, sed præcipuè S. Bernardinus, S. Catharina Senensis, S. Nicolaus Tolentinas, de quibus vide Antoninum, ubi suprâ.

Decimo

Decimo quinto sæculo, claruit S. Vincentius vivus & mortuus miraculis plurimis, adeo ut B. Antoninus 3 part. hist. tit. 23 dicat, constare de xxxviii mortuis per eum excitatis. Idem B. Antoninus eodem sæculo miraculis claruit, cujus vita exstat apud Surium.

CCXXX Denique *hoc nostro sæculo* claruit in primis S. Franciscus de Paula, plurimis miraculis, ut in Bulla exstat apud Surium. Claruit etiam in Indiis omni genere miraculorum Beatus Pater Franciscus Xaverius, Societatis Jesu Presbyter &c. Hucusque Bellarminus: sed de miraculis S. Francisci de Paula, & S. Francisci Xaverii postea seorsim agendum. Scripsit autem hæc Bellarminus an. 1583, quo secundus controversiarum ejus tomus primo in lucem prodiit. In istis autem centum & amplius annis, qui ab eo anno transierunt, usque ad tempus in quo hæc scribo, multi alii floruerunt in Ecclesia Romana Sancti, virtute & miraculis insignes, ut constabit cap. sequenti.

CCXXXI Quod autem in solis professoribus veræ Religionis miracula vera repariantur, constat: quia miracula vera à solo Deo fieri possunt, ut ostendi lib. 1. cap. 2. & 3.

Conv.

Conv. Mah. Deus autem miracula non facit per professores falsæ Religionis: quia vel facit miracula ad confirmandam veritatem doctrinæ, quam annuntiant Ministri ab eo missi ad introducendam vel conservandam veram fidem; vel ad illustrandam Sanctorum vitam: neutro autem modo potest facere miracula per professores falsæ Religionis. Non primo. Quia, ut demonstravimus lib. i. cap. 3. cit. Deus non potest facere miracula in confirmationem doctrinæ falsæ, qualis est illa quam hæretici & alii professores falsarum sectarum disseminant. Non secundo. Quia cum miracula fiunt ad gloriam alicujus Sancti illustrandam, Deus per miracula illa ostendit, hominem illum esse vere Sanctum: nullus autem falsæ religionis professor potest esse vere Sanctus, dum falsam tenet religionem & caret vera; quia *sine fide impossibile est placere Deo, & justus ex fide vivit*, ut docet Apostolus. Unde sine vera fide & vera religione, impossibile est, ut detur vera justitia & vera sanctitas.

CCXXXII Jam vero, quod Deus nunquam tribuerit hæresiarchis vel falsis prophetis & sectatoribus falsarum religionum,
po-

potestatem faciendi vera miracula, probat Bellarm. eodem capite. Nam de Paganis certum est, illos vera miracula non fecisse; & certissimum, non potuisse facere in confirmationem suæ sectæ. Mirabilia autem quædam, quæ refert Valerius Maximus lib. 8, nimirum de statuis & brutis loquentibus, & de Virgine Vestali aquam cribro hauriente; & quod refert Marcus Tullius lib. 1. de Divinatione, de augure, qui novacula cotem scidit, facillime potuerunt fieri arte dæmonum, ut ostendunt D. August. lib. 10. de Civitate. cap. 16; & Tertullianus in Apolog. cap. 22. & 23. Deinde (ut ibi inquit Augustinus) *hæc atque alia hujusmodi nequaquam illis, quæ in Populo Dei facta legimus, virtute ac magnitudine conferri possunt.*

CCXXXIII In Synagoga, dum fuit vera Dei Ecclesia, & veram Dei fidem habebat, constat fuisse multa & magna miracula: at postquam Christus venit, & infelix ille Hebræus populus, negando Messiam sibi promissum, & oculos claudendo luci clarissimæ, veram fidem amisit; non habuit amplius ullum miraculum; & illud unum de piscina, quod adhuc durabat quando Christus prædicabat

cabat, postea omnino cessavit: quia jam non est amplius Dei populus, qui Deum in carne venientem, & tot miracula patrantem ad persuadendam suam divinitatem, suscipere noluit.

CCXXXIV De Mahumeto ostendi in secunda parte Conv. Mah. lib. 1. c. 1. & l. 5. cap. 39, nullo miraculo potuisse probare, se esse Prophetam; imo, ad declinandam invidiam, identidem dicere solitum, Christo & Apostolis datam esse virtutem patrandi miracula ad exterminandam idololatriam, & unius veri Dei cultum introducendum; cæterum, quia tot editis miraculis id perficere non potuerunt; sibi datum esse gladium, ut illo, & non lingua, veram Dei legem introduceret: ad conciliandam tamen sibi auctoritatem, quædam narrabat à se facta miracula, sine testibus tamen, ut de falsitate convinci non posset. De falsis prophetis (inquit Bellarminus) & hæreticis non minus est certum, eos sæpe miracula facere conatos, & semper spe sua esse frustratos. Nota est historia Prophetarum Baal, qui ignem de cælo deducere voluerunt per invocationem Baal, nec tamen potuerunt: quod tamen
verus.

ab iisdem canibus discerpti sunt, scribit Optatus Lib. 2. contra Parmenianum. De Timotheo Æluro Eutychiano scribit Theodorus lib. 1. collectaneorum; per multas noctes eum, habitu nigro indutum, per cellas Monachorum discurrisse, dicentem, se esse Angelum à Deo missum; ut illis significaret, ne Proterio (is erat vir sanctus & Catholicus Episcopus Alexandriæ) communicarent; sed ejus loco Timotheum Ælurum Episcopum designarent. De quodam Iconomacho scribit Paulus Diaconus, lib. ult. rerum Romanarum, eum in sepulchro quodam inclusum, inde Constantinum Iconomachum laudibus in cælum vehere cœpisse, ut nimirum ita quasi mortuorum responsis hæresis confirmaretur. De nostri sæculi hæreticis idem omnino constat. Hactenus ibi Bellarminus, qui statim narrat; quo pacto Lutherus & Calvinus conati sint, ad conciliandam sibi auctoritatem, facere vel saltem apparenter miracula; & nihil inde retulisse, nisi ignominiam & confusionem, quod nos commodius postea narrabimus.

CAPUT VIII.

Sextum caput id probandi, quia insignis sanctitas & gloria miraculorum, qua in Ecclesia Romana floruerunt multi viri & feminae, postquam Lutherus & Calvinus ab illa recessere; cum interim isti novæ Ecclesiæ reformatæ, vel potius deformatæ, authores, nullis virtutibus nullisque miraculis fuerint insignes; manifeste probat veritatem Ecclesiæ Romanæ, & falsitatem sectæ Lutheranae & Calvinianæ.

§. I.

Eo tempore, quo Lutherus ab Ecclesia Romana, tamquam à magistra errorum & synagoga sathanae, publice discessit, Deus toti orbi Christiano per miracula S. Francisci de Paula, in ejus canonizatione publicata, manifeste ostendit, eam esse Ecclesiam suam sanctam.

CCXXXVII **F**loruisse in Ecclesia Romana, postquam ab ea Lutherus secessit, viros & feminas, sanctitate & miraculis insignes, est evidens evidentia facti; & comprobatur, tum ex Bullis Canonizationis & Beatificationis, tum ex historia Ecclesiastica. Sed antequam eos enumeremus, oportet

oportet notare , paulo antequam Lutherus ab Ecclesia Romana apostataret, in ea obiisse S. Franciscum de Paula, Ordinis Minimo, unum conditorem, *vita sanctitudine illustrem, & miraculorum magnitudine, ac frequentia alterum Thaumaturgum*, ut loquitur Spondanus ad an. 1507, in quo Sanctus iste obiit, ætatis suæ anno nonagesimo primo; qui proinde natus est an. 1416, cum Martinus Lutherus natus fuerit an. 1483, & obierit an. 1546, ætatis suæ 63; & cœperit contra Indulgentias prædicare an. 1517; & damnata fuerit ejus doctrina an. 1520, à Leone X, qui in Sanctorum Catalogum retulerat S. Franciscum de Paula anno 1519: fueruntque proinde contemporanei, & Lutherus vigesimum quartum agebat annum, quando S. Franciscus de Paula obiit; & tunc ab Ecclesia Romana discessit, quando summus Pontifex, motus fama ac comprobatione ingentium miraculorum, quæ S. Franciscus tam in vita quam post mortem edidit, ipsum solenni ritu canonizavit.

CCXXXVIII Unde, quando Martinus Lutherus in Ecclesiam Romanam, tamquam in synagogam sathanæ & adulteram Christi, debacchatus est; Deus ipse evidens testimonium

nium dedit de veritate fidei Catholicæ Romanæ, quam S. Franciscus de Paula professus est; publico & irrefragabili argumento condemnans vitam & dogmata Lutheri, vitam autem & doctrinam Sancti Francisci comprobans. Lutherus, tamquam salacissimus hircus, in Commentario, quem an. 1522 edidit de vita conjugali, docuit, verbum illud Dei, *Crescite & multiplicamini, non præcepti modo vim habere, sed & fortius & majus quiddam esse, adeoque Dei opus; quod impedire vel non exequi, prorsus non sit in potestate nostra; adeoque necessarium, quam edere & bibere, excernere & ejicere, dormire & vigilare: quapropter, si quis contra hanc necessitatem aliquibus votis, juramentis, pactove seipsum vinxerit, & ferreis, adeoque adamantinis nexibus sese obligarit, id frustra esse; idemque prorsus esse, ac si vir non masculum, mulier non feminam se esse voveat, ut refert Spondanus ad an. 1522 num. 9. Et de seipso testabatur, se non magis à muliere abstinere potuisse, quam à cibo & potu: ita habet in colloquio mensali fol. 400 & 526. At sanctus Franciscus de Paula perpetuam virginitatem servavit.*

CCXXXIX Lutherus, in Libro de Libertate Christiana, morem Ecclesiæ reprehendit,

imperantis abſtinentiam à carnibus certis temporibus, ut diebus Veneris & in Quadageſima, & requirentis ad jejunium abſtinentiam à carnibus, & ab ovis, ac caſeo; quia nimirum, totus ventri deditus, delicias carnis quærebat; & eos cibos magis amabat, quàm plus libidinem fovēt. At *S. Franciſcus abſtinentia fuit admirabili: ſemel in die poſt ſolis occaſum reficiebatur; & ad panem & aquæ potum, vix aliquid ejusmodi obſonii adhibebat, quo veſci in Quadageſimalicet: quam conſuetudinem, ut Fratres ſui toto anni tempore retinerent, quarto voto eos adſtrinxit; eo ſpiritu ductus, quo mota eſt Eccleſia, ut certis temporibus abſtinentiam à carnibus imperaret, præſertim tempore jejunii; ſiquidem jejunium indicitur ad cohibendam carnis concupiſcentiam, quæ circa delectationem gulæ luxuriæque verſatur. Carnes autem terreſtrium & volatilium animantium magis nutriunt & delectant ex genere ſuo, quam ceteri cibi, cum ſint humanæ carni ſimiliores. Inde enim & libentius appetuntur, & materiam generationis magis augent; unde ſtimuli carnis acriores oriri ſolent. Atque eadem fere ratio eſt ovorum & lactis: nam, ut San-*

Ætus Hieronymus ex sententia veterum Ægyptiorum refert, libro secundo adversus Jovinianum, *nihil esse videntur aliud ovum & lac, nisi caro liquida & sanguis albus*. Sanctissimus ergo Franciscus voluit suos alumnos perpetuo à carnibus & ovis abstinere, ut sic longius distarent à vitiis carnalibus gulæ & luxuriæ.

CCXL Lutherus fuit vir superbissimus & ambitione plenus; at *Franciscus humilitatem sic coluit, ut se omnium minimum diceret, suosque alumnos Minimos appellari voluerit*. Lutherus convivia & corporis delicias avidè quærebat; at *Franciscus rudi amictu, nudis pedibus incedens, humi cubabat*.

Jam videamus, pro quo Deus sententiam tolerit, an pro Francisco, an pro Luthero; cujus religionem & fidem sibi gratam esse significaverit, Lutheri an Francisci? Loquantur facta; nam, *sicut humana conversatio verbis, ita divina potentia etiam factis loquitur*, inquit Augustinus Epist. 49. Factis ipsis mirabilibus Deus manifeste ostendit, vitam Francisci sibi fuisse gratissimam, ac proinde ejus fidem & religionem fuisse veram. Nam multis & magnis miraculis servi sui sanctitatem

testari voluit in vita; quorum illud imprimis celebre, quod à nautis rejectus, Siciliae fretum, strato super fluctibus pallio, cum socio transiit. Et etiam post mortem: Siquidem corpus ejus dies undecim insepultum, ita incorruptum permansit, ut suavem etiam odorem efflaret; ut dicit Ecclesia. Idque inter continua, quæ fiebant ad illud, sanationum miracula, ut inquit Spondanus ex Bulla Canonizationis. At e contra in Luthero nullum signum sanctitatis apparuit; sed contra iniquitatis consummatæ argumenta visa sunt, ut postmodum magis constabit.

CCXLI Quis hîc non agnoscat singularem Christi providentiam erga Ecclesiam? Siquidem eodem tempore, quo Lutherus classicum incepit canere contra illam, & scriptis & verbo clamare, Ecclesiam Romanam synagogam sathanæ; & non esse illam, quam Christus fundavit, sed aliam plane falsam, vera fide vacuum & erroribus plenum; tunc per solennem canonizationem Francisci de Paula, in qua stupenda ipsius miracula toti orbi Christiano manifestata, aperte demonstravit, Ecclesiam Romanam, cujus fidem tenuerat vir iste sanctus,

veram esse Christi Ecclesiam, sanctam, & immaculatam, utpote quæ nihil falsum credendum proponat, nihil injustum faciendum præcipiat aut consulat; licet multa supra rationem doceat.

§. II.

Conversio Sancti Ignatii eo ipso anno, quo Lutherus declaratus est hæreticus, & instituta ab eo Religio, manifeste probat veritatem Religionis Catholicae Romanae, in cujus subsidium Deus novam hanc militiam misit.

CCXLII **P**ostquam Lutherus ab Ecclesia discessit, floruerunt in Ecclesia Romana viri & feminæ, sanctitate & miraculis, in vita & post mortem illustres. Et imprimis manifeste Deus ostendit providentiam suam erga Ecclesiam, in foundatione Societatis Jesu. Nam 1521, quando Lutherus hæreticus declaratus est à Leone X, & publice cœpit venenum evomere contra fidem Catholicam; mirabiliter Deus convertit Ignatium de Loyola, à militia temporali ad spirituales, ut Dux eorum foret, qui portarent ejus sanctissimum nomen coram gentibus & populis; & infideles ad veræ fidei cognitionem inducerent,

evidenter demonstrata. C. 8 §. 2. 309

rebelles hæreticos ad illius unitatem revo-
cent, suique in terris Vicarii auctoritatem
enderent; ut loquitur Urbanus VIII, Pon-
ti- Maximus, in Bulla Canonizationis S.
Matthiæ. Siquidem in propugnatione Pam-
onensi accepto vulnere, cum graviter Ig-
us decumberet, ei apparuit S. Petrus,
in præcipua devotione colebat; & in
senti opitulatus est discrimine, ut postea
Iesiam sanctam & Sedem suam Aposto-
m defenderet per se & socios: quod ita
culante præstitit, ut constans fuerit omnium
us, etiam Pontificio confirmatus oraculo,
m, sicut alios aliis temporibus sanctos vi-
ita Diabolo ejusdemque temporis hæreticis,
nam & institutam ab eo Societatem obje-
. In eo anno 1521 Lutherus se recepit
castrum Wittenbergense, ut contra Ec-
am Catholicam scriberet; quem seces-
incredibili audacia suam Pathmon ap-
nt. Et eodem anno in speluncam Manre-
e abdidi Ignatius, poenitentiam acturus:
tempore, homo litterarum plane rudis,
irabilem illum composuit Exercitiorum li-
n, Sedis Apostolicæ judicio & omnium uti-
e comprobatum: qui, in omnibus suis no-

70 1115

O 3

tis

tis & documentis, est oppositus spiritui & doctrinae Lutheri; & qui fuit officina & fornax, in qua tot gladii ad hæresim debellandam formati sunt, quot fuerunt Ignatii socii & discipuli, qui ab his Exercitiis ardentem charitatis flammam & zelum animarum hauerunt. Et quia Lutherus initium fecit suarum hæresum à pervicacia contra Sedem Apostolicam, ejusque contemptu & inobedientia; S. Ignatius, cum impense flagraret Christi amore, eamque ob rem gloriam ejus & regnum omni ope toto orbe terrarum propugnandum susciperet; *quasi cohortem colligendam sibi putavit*, quam proprii sacramenti religione Apostolica Sedi subjiceret; tum ut per hunc nexum plenior à Capite Christo, per Vicarium ejus, vitalis succus ac vigor descenderet; tum ut, quemadmodum pervertendarum animarum hæretici initium faciunt à pervicacia, abscindendisque ab hoc corpore membris; ita ipse convertendarum opus ab obedientia & connexionione quam intima auspicaretur; ut inquit Historia Societatis, parte 5 lib. 9. n. 8: & ideo Religionem Societatis Jesu, à se institutam, ad tria consueta, quarto addito circa missiones specialis obedientiae voto, Sedi Apostolicæ arctius adstrinxit.

CCXLIII Qui consideraverit Societatis
sue foundationem, mediante milite, qui prima
dimenta grammaticæ inter pueros addi-
ere cœpit, cum triginta trium esset anno-
rum; ejusque celerem per totum Orbem
Christianum propagationem, cum tanta
eorum reformatione; manifestum habebit
argumentum veritatis Religionis Catholicæ
Romanæ, ad cujus defensionem & propa-
gationem novum hunc Ordinem mediante
S. Ignatio Deus instituit. Hanc singularem Dei
providentiam erga Ecclesiam suam notârunt
summi Pontifices, Gregorius XV, & Urba-
nus VIII, & scriptores plurimi hujus sæculi,
quos citat P. Daniel Bartoli in Vita S. Ignat-
ii. Siquidem inter cætera S. Ignatii decora,
singulare hoc, ipsique proprium observâ-
runt; quod ex militia sæculi, ejus belli ductor
cælitus lectus sit, quo ad præsidium, vexata;
ad defensionem, laborans Dei Ecclesia, esset
magnoperè usura. *In calamitoso videlicet
Henrici per Angliam schismate; in Lutheri de-
sertione per Germaniam; in rebellionem Calvinii
per Galliam; in extendendis per Castellam &
Lusitaniam Indiarum religionis veræ limitibus, quos
per Europam hæresis impiè arctârat. Fuitque*

hoc Deo ab ortu Ecclesiæ solenne, ut effusis in campum, hæresum ducibus, apostatis, tyrannis, propugnatores opponeret; nunc quidem singulos, nunc in turmas digestos, ad hoc peculiari providentia evocatas. Sic olim Athanasium Ario, Basilium Eunomio, Iuliano Gregorium cognomento Theologum, Nestorio Cyrillum; Hieronymum & Augustinum Eluidio & Pelagio; ante annos demum quadringentos, Albigenſium furori & grassantibus latè hominum vitiis, sanctissimorum Francisci & Dominici Patriarcharum familias geminas. Est certè dignum observatione, Ignatii ortus, conversio ad Deum, & conscripta ab eo Societatis instructio, publicis Ecclesiæ necessitatibus quam opportunè occurrerint. Quo enim anno Ferdinandus Castella Rex, cum Christophoro Columbo, de navigatione decernebat, quam hic novum in orbem ab se primum repertum instituit; eodem Ignatium Deus huic mundo dedit, ut barbararum tot gentium erudratio & in Christo cultus, ejus tum opera pretium, tum filiorum labor foret. Sexto vero post anno Orientem versus Vasco Gama, in detectas ab se Indias navigavit; quo item Xaverius nascitur, hoc est, 1497. Inde, post quatuor & viginti annos, Martinus Lutherus Vormatia, effrontem

contem coram Carolo Quinto apostasiam professus, & post desperatam emendationem Vassergæ se abdidit; ubi novus Ioannes, novæ Pathos jactator ridiculus, præsentis vœni contra religiosa vota librum scripsit; qui pestifera sui cœtatione, brevi cœnobia in solitudinem mutavit. E contrario hunc ipsum in annum cecidit humanis ex rebus Ignatii fuga, votumque Deo militandi; ex quo, receptis post curatum vulnus corporis viribus, Manresam secessit; ubi clara luce æternæ veritatis, libellum composuit spiritualium Exercitiorum; cujus, ut dicetur, mirabili ductu, & suam ipse sacram familiam collegit, & reliquas mirificè auxit. Una Ignatius & Calvinus Parisiis agebant, una discipulos & sequaces (quam diversi diversos!) legabant. Illic Fabrum sibi fluxit Ignatius, qui vitæ & doctrinæ suæ malleo (verba sunt Florimontii) hæresin fortiter obtrivit. Ibidem Calvinus; ait idem author, alterum sibi Fabrum curavit, insignem oppido suorum in fornacibus hæresum Cyclopum ministrum. Henricus denique Stavus Angliæ Rex, qui valedicente mundanis Ignatio Defensor fidei gloriose fuerat appellatus; eodem prima Societatis rudimenta Parisiis designante, devoventeque illam defen-

fioni Ecclesiæ Christiſque Vicario, ab Ecclesiâ sese ejusque capite Rom. Pontifice penitus abscidit, anno 1534: & pœna capitis eradi Pape nomen, & ne in quibuscumque libris chartisque legeretur, edixit.

§. III.

Catalogus Sanctorum, qui in Ecclesia Romana floruerunt, post apostasiam Lutheri.

CCXLIV **F**Loruerunt autem, postquam Lutherus contra Ecclesiam rebellavit, viri & feminæ, sanctitate & miraculis illustres in vita & post obitum; ita ut Sanctorum Confessorum nullum forsan seculum, post tempora Ecclesiæ primitivæ, feracius & fœcundius fuerit. Loquor autem dumtaxat de iis, quorum sanctitas ab Ecclesia est declarata, vel per canonizationem solennem, vel saltem per beatificationem. Imprimis ab eo tempore floruerunt in Ecclesia Prælati, zelo, caritate, misericordia, sapientia, & rerum gestarum magnitudine insignes, S. Carolus Borromæus, S. Ecclesiæ Cardinalis & Archiepiscopus Mediolanensis; S. Thomas de Villanova, Archiepiscopus Valentinus

ex S. Augustini familia; S. Franciscus Salesius, Episcopus Genevensis, & B. Toribius Mogrobeso, Archiepiscopus Limensis. Extra statum Episcopalem multi magnique sancti floruerunt. Ex sacra Prædicatorum familia, S. Ludovicus Beltran, & S. Rosa: ex sacra S. Francisci Religione, S. Petrus de Alcantara, B. Franciscus Solanus, & B. Felix de Cantalicio: ex ordine Carmelitano, S. Theresia de Jesu, S. Maria Magdalena de Pazzis, & B. Joannes de la Cruz: ex ordine Clericorum Regularium Theatinorum, S. Cajetanus & B. Andreas Avelinus: ex Congregatione Oratorii, ejus Fundator S. Philippus Neri: ex hac minima Societate Jesu, S. Ignatius ejus Fundator; S. Franciscus Xaverius, Indiarum Apostolus; S. Franciscus de Borgia, ex Duce Gandiæ tertius Societatis Generalis; B. Stanislaus Kostka, & B. Aloysius Gonzaga; præter alios multos, de quorum Beatificatione apud Sedem Apostolicam agitur.

CCXLV Horum Sanctorum tam insignia sunt veræ caritatis & sanctitatis argumenta, tam insignia opera, tam manifesta Spiritus sancti charismata, tam conspicua miracula; ut nullus homo, veri Dei cognitionem habens,
pos-

possit dubitare, hos homines fuisse Deo charos. Una Theresia de Jesu, tam heroica sanctitatis admirandæ monumenta reliquit, ut stupidus sit, qui non videat, non potuisse debilem feminam talia opera facere, nisi virtus & sapientia Dei in illa inhabitasset.

§. IV.

Concluditur ex dictis, solam Ecclesiam Romanam, in qua semper fulget gloria miraculorum, esse veram Christi Ecclesiam.

CCXLVI **I**llatio est manifesta. Quia cum levidens sit, Deum, summè bonum & sapientem, velle ut omnes homines rectè vivant, & ipsum colant, eo modo quo ipse vult coli: & certum omnino sit, Deum habere in mundo aliquam fidem & religionem, in qua & per quam homines salvari possint; & velle, ut ad ipsam veniant, ut illum in ipsa colant, prout ipse vult coli: hæc non potest esse alia, quam illa, in qua Deus tot miracula per singula sæcula patravit. Per hæc enim miracula loquitur Deus, & clamat, in illa Religione, & per illam se velle coli; in qua tot miracula operatur; nec fieri

feri potest, ut ipse veram religionem destituat omni miraculo, & falsam ornet tot & tantis, quot & quanta in Religione Catholica per singula sæcula operatus est. Miracula enim sunt, quasi sigilla quædam & testimonia, quibus vera Religio comprobatur. Cum enim hæc habeat mysteria, quæ sunt supra captum mentis humanæ, nequit solis rationibus persuaderi; sed opus est quibusdam argumentis supernaturalibus, quibus mentes hominum convincantur: hæc autem sunt miracula. Ergo cum hæc in sola Ecclesia Catholica, & non in ulla hæreticorum secta reperiantur; sequitur, solam Ecclesiam Catholicam Romanam esse veram Christi Ecclesiam, & non solum fuisse veram Christi Ecclesiam in illis primis sæculis, in quibus ejus cultores & prædicatores tot miraculis clauerunt; sed etiam in his posteribus, in quibus eadem gloria refulsit. Unde merito Augustinus, lib. de utilitate credendi c. 17, & libro contra epistolam fundamenti c. 4, dixit, *teneri in Ecclesia vinculis miraculorum; & Richardus de S. Victore, lib. 1 de Trinit. c. 2, addet dicere: Domine, si error est quod credimus, à te decepti sumus: ista enim in nobis iis*
signis

318 *Veritas Religionis Catholicæ
signis & prodigiis confirmata sunt, quæ non
nisi à te fieri potuerunt. Unde, sicut impossi-
bile est, Deum homines decipere, ita impossi-
bile est, esse falsam Religionem Catholicam
Romanam, ad quam amplectendam Deus
tot miraculis homines invitat.*

CAPUT IX.

*Septimum caput idem probandi, quia parallela
comparatio inter Martinum Lutherum, Ecclesiæ
reformatæ primum Authorem, & Franciscum
Xaverium, Ecclesiæ Romanæ propagatorem,
manifeste ostendit, Ecclesiam Romanam esse ve-
ram Christi Ecclesiam; Ecclesiam vero Luthe-
ranam & Calvinianam, & alias inde ortas,
non esse nisi synagogas sathana.*

CCXLVII **H**anc comparisonem insti-
tuit Cardinalis Bellarminus
l. 4 de notis Ecclesiæ c. 14. Postquam enim
narravit miracula aliqua ex iis, quæ postea
authentice comprobata sunt, & in Bulla Ca-
nonizationis ejus continentur, & referuntur
per compendium in ipsius Lectionibus, de
paralyticis, surdis, mutis, & cæcis curatis, de
mortuis resuscitatis, & de incorruptione cor-
poris;

poris; siquidem de mortui cadaver, viva calce
per multos menses bis obrutum, sed penitus in-
corruptum, odore & sanguine manavit; & ubi
Malacam delatum est, pestem savissimam con-
festim extinxit. Postquam, inquam, hæc Bel-
larminus breviter insinuavit, statim subjun-
git: Conferantur ista cum Lutheri vita, &
morte. Lutherus deserit monasterium, ducit
uxorem post votum continentiae, bellum
indicit Papæ; Franciscus ingreditur Ordinem
religiosum, servat diligentissime votum con-
tinentiae, obligat se Papæ voto obedientiae
seculari, & ab eo missus in extremas mundi
partes proficiscitur. Certe isti contrariis itine-
bus incedunt, ut necesse sit alterum eorum
errare à recta via. Quis poterit melior esse
index quam Deus, qui scrutatur renes &
corda? Quomodo autem potuit Deus aper-
ire sententiam suam explicare, quam tri-
bundo uni donum singulare miraculorum,
conservando corpus ejus præter naturæ
viæ perpetuo incorruptum; cum interim
ne unam quidem muscam excitare po-
tuit, & corpus ejus præter naturæ etiam
viæ subito putrescere cœperit; idque
contingit, quando gelu omnia rigeabant; & ita
pu-

ortatu S. Ignatii à Paulo III Pontifice summo S. Franciscus Xaverius ad Indias, cum Apostolici Nuntii potestate; vel mediate, quando mittuntur ab Episcopis constitutis à summo Pontifice. Alia extraordinaria, quando immediate mittuntur à Deo, sicut missus est Moyses, ad liberandum populum suum de captivitate Pharaonis; & missus est Christus Dominus ab æterno Patre, ad redimendum genus humanum; & Apostoli missi sunt à Christo, ad prædicandum Evangelium. Sicut autem, qui mittuntur missione ordinaria, debent ostendere litteras patentes Prælatorum, quibus constet de legitima authoritate: ita qui mittuntur missione extraordinaria à solo Deo, debent ostendere sigillo Dei proprio, se ab ipso missos; sigillum autem Dei sunt miracula. Unde, per miracula & vitæ sanctitatem debent probare, se missos esse à Deo. Non enim sufficit, quod ipsi dicant, se missos esse à Deo: nam omnes seductores & hæresiarchæ palam hoc dicebant; sed debent ostendere litteras patentes, id est, operibus miraculosis & virtutibus insignibus probare, se missos esse à Deo. Unde cum Deus Exod. 3. apparuisset Moyse, il-
lique

lique intimasset missionem; Mittam te ad Pharaonem, ut educas populum meum, filios Israel de Ægypto; & ille cap. 4. se excusans diceret; Non credent mihi, neque audient vocem meam, sed dicent, Non apparuit tibi Dominus: dedit ei potestatem faciendi miracula, quibus probaret se missum à Deo, Ut credant, inquit, quod apparuerit tibi Dominus. Et Christus, mittens Apostolos suos ad prædicandum Matth. 10 dixit: Euntes prædicate, dicentes, Appropinquavit regnum celorum: infirmos curate, mortuos suscite, leprosos munde, demonia ejicite. Unde Marci ultimo dicitur: Illi vero profecti prædicaverunt ubique, Domino cooperante, & sermonem confirmante, sequentibus signis; & Hebr. 2. contestante Deo signis & virtutibus.

CCL Ipseque Christus, ut probaret, se esse Filium Dei, à Patre missum ad redimendum genus humanum, tanta & tam manifesta edidit miracula, ut omnino inexcusabiles reddiderit Judæos, qui illum recipere noluerunt. Unde Joan. 15. v. 22. dixit: Si non venissem, & locutus fuisset eis; peccatum non haberent: nunc autem excusationem non habent de peccato suo. Si opera non fecissem

eis, quæ nemo alius fecit; peccatum non ha-
ent; nunc autem & viderunt, & oderunt &
& Patrem meum. Ut autem exponit ibi
pletus, propterea Christus dixit: Quæ nemo
ius fecit; quia nec tot, nec tanta ullus alius
peratus est. Qui igitur ei non crediderunt
(infert ille) infideliores fuerunt graviusque
peccarunt, quam qui Prophetis & Moyfi ipsi
idem non habuerunt: nemo enim eorum tot
et tanta operatus est. Unde Augustinus, l.22
de Civitate c.8, dicit, miracula fuisse necessa-
ria, ut mundus crederet; cuius dictum expendi
l.1 c.8, Manuduct. ad Conv. Mahum.

§. II.

Ex dictis infertur, Lutherum & Calvinum non
fuisse missos à Deo, ad prædicandum sua
dogmata.

CCLI **E**X præmissa explicatione infertur;
Lutherum & Calvinum, aliosque
novatores, à se ipsis venisse ad prædicanda
sua dogmata; vel potius à diabolo missos, non
autem à Deo. Quia nec eorum missio fuit
ordinaria, mediante mandato alicujus Eccle-
siastici Prælati legitimi; siquidem ab Episco-
pis Catholicis missi non sunt, contra quorum
fidem

fidem prædicabant, nec erant alii à quibus mitti possent legitime: nec fuit extraordinaria & immediate à Deo, ut ipsi dicebant; passim vociferantes, se missos esse immediate à Christo extraordinario modo, sicut missi sunt Prophetæ. Oportebat namque signis & miraculis, insigni vitæ sanctitate & mundi contemptu, hoc probare; quod longe fuit ab istis novatoribus, qui superbia, ambitione, maledicentia, luxuria pleni fuere: & ad tam peregrinam & tam exoticam doctrinam, omnino contrariam ei, quam saltem per novem vel decem sæcula ex ipsorum confessione totus orbis Christianus crediderat, opus erat miraculis, & magnis miraculis, aliisque supernaturalibus signis, quibus persuaderent, se non esse impostores. Ut enim ponderat optime P. Lessius, cum ex Scripturis Matt. 24. Marci 13, 1 ad Tim. 4, 2 ad Tim. 3, 2 Petri 2, constet, novissimis temporibus multos pseudopphetas venturos, qui jactent se à Deo missos, eosque Dominus attente cavendos jusserit; nemo novus admittendus est, qui sue missionis *πληροφροσίαν* & plenam fidem non fecerit, sed omnes suspecti habendi. Atqui non possunt ullo modo hanc *πληροφροσίαν* fa-

evidenter demonstrata, C. 9 §. 2. 325
ere, nisi divinis signis; ut sunt miracula,
dictio futurorum, revelatio abscondito-
&c. hæc enim cum rerum creatarum
superent, manifestum est esse à Deo :
sunt veluti litteræ patentes, Dei sigillo
signatæ, quibus missio divina probatur.

CCLII. Hinc quotquot à Deo unquam
mediate missi sunt ad populum docen-
um, miraculis vel aliis supernaturalibus si-
nis instructi venêre, quibus eorum missio
populo est manifestata. Sic Moyses, filios
raël educturus ex Ægypto, eisque Legem
laturus, cum maxima miraculorum potesta-
e venit, & innumera vel ipse fecit, vel Deus
circa ipsum, toties ei sub visibili specie appa-
tendo, exhibuit. Sic omnes Prophetæ, vel
miraculis, vel occultorum revelatione suam
missionem probarunt. Idem fecit ipse Domi-
nus Prophetarum: qui etsi clare ex Scriptu-
ris convincere posset, se Messiam esset; idque
etiam testimonio Joannis Baptistæ satis pos-
set constare; tamen plurimis miraculis, statim
initio prædicationis, se à Patre missum ad
hominum salutem ostendit; & Pharisæis,
odio ipsius credere nolentibus, dixit, ut si ipsi
propter se credere nollent, saltem operum
magni-

magnitudine convicti crederent. Pari modo omnes Apostoli, apud Judæos & Ethnicos, multis miraculis suam missionem probaverunt. Denique idem fecere variarum gentium primi Doctores, qui illos ex paganismo ad fidem nostram traduxere. Quare cum isti novi prophetæ dicant, se missos immediate à Deo, si id miraculis & signis supernaturalibus non confirmant, sicut omnes alii proxime à Deo missi fecere, non sunt ullo modo audiendi.

§. III.

Lutherus & Calvinus sibi per miracula auctoritatem conciliare tentarunt, sed irrito conatu.

CCLIII **C**ONSTAT autem manifeste, Lutherum & Calvinum sæpe tentasse miraculum facere, & numquam ex hoc conatu aliud reportasse, quam ignominiam & confusionem, ut late ostendit Bellarm. l. 4 de notis Ecclesiæ c. 14. Nam imprimis (inquit) *Lutherus bis tentavit miraculum facere: voluit aliquando de quadam discipula sua diabolum ejicere, sed periculum fuit, ne ipse à dæmone occideretur. Vide Staphylum, qui interfuit, in Absoluta responsione.* Rursum (ut scribit

Joannes Cochläus in actis Lutheri anno 23.) Neseum, in Albi misere submersum, e miraculi Lutherus vanis immurmurationibus frustra in vitam revocare tentavit. Sed quamvis viventi miracula non successerunt, idem tamen post mortem miraculo insigni claruit: nam ejus cadaver, cum deferretur in media hyeme, quo tempore corpora mortua in multos dies conservari solent, & esset conclusum in arca stannea optime clausa, ut in Wirtembergæ sepeliretur; tam tetrum odorem spirare coepit, ut nemo eum ferre potuerit: proinde coacti fuerunt corpus relinquere in itinere. Vide historiam de morte Lutheri, quæ solet annecti libro Cochläi de vita & actis ejusdem Lutheri.

CCLIV Aliud miraculum refert Felicianus Ninguarda in libro contra Annam Burgensem, & Lindanus in Dubitantio, & Alanus 1.6. Dialogorum cujusdam Ministri, qui in finibus Poloniæ & Hungariæ an. 1558, excitare voluit hominem nomine Matthæum; cui ipse persuaserat, ut se mortuum fingeret, & revera mortuum effecit. Simile narratur de Calvino ab iisdem, sed fusiùs ab Hieronymo Bolseco in vita Calvinii c. 13, ex quo huc pauca inferere placuit.

§. IV.

*Machinatio Calvinii, ut populo persuaderet,
se mortuum suscitâsse : & quam
confusionem inde tulerit.*

CCLV **P**Ræterire, inquit, non debeo va-
frame ejus & subtilem machina-
tionem, qua tum usus est, cum quemdam, cui
Bruleo nomen, & patria Ostunum, in vitam
revocare cogitaret; molireturque, ut sancti
atque gloriosi Dei Prophetæ, miraculorum-
que patratoris nomen sibi & famam pararet.
Historia talis est: Is, quem dixi, Bruleus
Ostuno Genevam demigrârat, & cum inops
esset ipse & uxor ejus, Calvinii gratiam au-
cupabantur, ut ei commendati, peculii pau-
perum fierent participes. Eis Calvinus vitæ
subsidia benignè pollicetur, si ipsi contrâ
suam operam sibi non negarent ad rem
quamdam, quam per eos fieri vellet: sed opus
esse fide, & magna taciturnitate. Vicissim illi
ad id, quod jubere vellet, promptos se offe-
runt; & quemadmodum à Cavino instructus
fuerat, miser hic Bruleus morbum simulat.
Ministri pro concione populo commendant,

ut

precibus juvarent, & eleemosynis pauper-
ti succurrerent. Non diu post personam
mortui induit, & mortuum se simulat. Hic
Calvinus, clam admonitus, quasi tum om-
nium rerum ignarus, deambulatum prodit,
sed comitatus magnâ catervâ amicorum.
Postquam eo ventum esset, ubi clamores &
ejulatus uxoris, quæ misellam & desolatam
egregiè exprimebant, exaudiret: quidnam
hoc esset, sciscitatus, domum ingreditur; ubi
in genua ipse & reliqua caterva provolvitur,
precibusque alta voce profusis Deum obte-
statur, potentiam suam, ostendere, & mortuo
huic vitam restituere, gloriamque suam sic
universo populo declarare vellet, simulque
manifestû facere, se (Calvinum) peculiarem
sibi gratum servum esse, & à se ad Euan-
gelici sui ministerii atque Ecclesiæ reforma-
tionem singulariter & vere vocatum; post
quas preces ad mortuum appropinquat, &
miseri hominis manu apprehensa in Dei no-
mine imperat, ut se erigat. Repetit iterum,
sæpiusque eosdem sermones, voce etiam al-
tius elevata. Quid fit? Neque audit, neque
loquitur, neque se commovet mortuus; ju-
sto enim Dei judicio, qui fucos mendacia-

P

que

que detestatur, is qui se mortuum simulabat, verè esse mortuus repertus est. Et uxor, quidquid eum agitare, quomocumque impelleret, neque vocem extorquere, neque ut se commoveret, efficere potuit; sed totus frigebat, rigebat totus. Quo animadverso plorare, ululatus serio edere & ex animo cœpit uxor; & in Calvinum inuenta, impostorem eum, sicarium, latronem, qui maritum interemisset, appellans, ex ordine rem, quo modo erat gesta, clara elataque voce exposuit. Et infra: *Negent hoc quantum velint Calvini mancipia, exploratum & cognitum satis fuit, veritasque rei probata, imo per ipsammet uxorem confirmata.* Possumus ergo his opponere, quod ait Tertullianus in libro de præscript. *Si alium Deum prædicant, cur ejusdem rebus & litteris utuntur, contra quem prædicant? Si eundem, quomodo aliter? Alioqui probent se novos Apostolos: dicant Christum iterum descendisse, & dedisse eis virtutem eadem signa edendi. Volo igitur, inquit, virtutes eorum proferre, nisi quod agnosco maximam virtutem eorum, qua Apostolos in perversum æmulantur: illi enim de mortuis suscitabant, isti de vivis mortuos faciunt.*

Com-

CCLVI Comparemus hanc historiam cum veritate certissima de miraculis, à S. Francisco Xaverio in vita & post mortem patratis, quæ sunt tam manifesta, ut non nisi per summam obstinationem negari possint. Nota sunt omnibus ea, quæ post exactissimam probationem posita sunt ab Ecclesia in ejus lectionibus 3 Decembris: constatque, hunc novum Indiarum Apostolum in dono linguarum, in miraculis, & peregrinationibus, & laboribus pro Christo toleratis, fuisse primis Apostolis simillimum: & ideo Ecclesia testatur in Breviario Romano, Gregorium XV illum, *ubique terrarum novis maximisque fulgentem miraculis, Sanctis adscripsisse.* Et non solum ante canonizationem, solenniter celebratam anno 1622, sed post illam maxima edidit miracula. Unum satis celebre, quod totam Italiam, & Hispaniam, & totam Indiam habet testes, hic referam eisdem verbis, quibus illud anno 1662 scripsit Neapoli, ubi accidit, P. Michaël de Elizalde nostræ Societatis, meus olim in Metaphysica magister, in celebri illo suo libro, *de forma vera religionis quærenda & invenienda*, quæst. 27 à numero 478, & 487.

§. V.

*Celebre miraculum S. Francisci Xaverii,
patratum cum venerabili P. Marcello
Mastrilli anno 1634.*

CCLVII UNum hic non subdicebo (inquit citatus Author) illudque præclarum, editum à Xaverio miraculum. Neapoli illud scribo, ubi non pridem gestum fuit; ubi testes multi supersunt; ubi coargui illudique possim, si vera haud narrabo.

Anno Domini 1634, Comite de Mont-Rey Prorege, in ipso ejus Palatio dies festus agebatur in honorem Conceptionis Deiparæ. Ex altaribus magnifice apparandis unius cura demandata est P. Marcello Mastrillo, nostræ Societatis Jesu Religioso, ex Mastrillorum illustri familia orto, notoque satis Neapoli, sed celebritatis plane finis mœstus; nam cum quidam in alto parietis peripetasmata refigeret, bilibris ei malleus per incuriam manu elabatur; atque in Marcelli caput cadens, eo illum ictu affligit, ut sensuum expers jacuerit, mortuo simillimus: sublatus mox inde manibus, curruque impositus,

fitus, ad collegium Neapolitanum, advehi-
t. Peritissimi quidam medici atque chirur-
gum accersuntur, vulnus examinant, consul-
t, & communi suffragio lethale dicunt id
vulnus, in quo curatio parum proficiat; cæ-
men hoc capiti tam esse noxium, ut leviora
quoque sint curatu difficillima. Mox æger
agna febre corripitur; os etiam nervorum
contractione obstruitur. Ad extremum, aliis
factis Christianorum officiis, vigesimo se-
cundo à vulnere die sacro Oleo inungitur;
et, ut moris est, à sociis Patribus Deo
commendatur; ad crastinum expectatur
vires.

CCLVIII Hæc inter, cum hora esset qua-
rta noctis; diei Januarii tertii; Mar-
cellus suo se nomine vocari sentit; stantem
prope lectum videt Xaverium, veste quidem
peregrinantium adinstar, vulgari satis; sed
tunc hilari & venusto, quique deceret Cæ-
sarem. Rogatur, an mori, an ad Indiam ire
constaret? Quod mallet Deus, Marcellus
respondit. Tunc vero Xaverius votum nun-
ciare incipit; verba præit, quæ Marcel-
lus resumeret; patriæ, amicis, consanguini-
bus renuntiatur, renovata religiosa vota;

additum aliud de suo ad Indiam profectu; promissumque, se, si liceret, apud Barbaros mortem pro Christo subiturum. Adstantes quidem socii Marcellum audiebant loquentem, & de gravissimis rebus agere visum; sed in extremis vitæ angustiiis delirare suspicabantur, & quid esset, mirabantur magis, quam ut quidquam judicarent. Voto nuncupato, sanctissimi ligni Crucis frustulum, quod apud se habebat, Xaverii jussu Marcellus reverenter osculatur, ac vulneri applicat. Tunc Xaverius eum bono animo esse jubet: valetudinem jam esse integram: & his dictis evanuit. Extemplo Marcellus in lecto erigitur; se sanum dicit; visa factaque memorat; vestitur, electo exilit; cicatrix, pallor, imbecillitas abeunt; restituti capilli, ad vulneris curationem erasi: ex numerosissimo Collegio accurrunt cuncti; tum Marcellus, tum cæteri humi strati Deo gratias habent: stupent, devotione lacrimisque perfusi: omnes Marcellus amplectitur, cibumque postsumit, quo tamdiu ferme caruerat. Mox, à Superiore jussus, omnia manu minutatim scribit, subscribitque; & sequenti die, quando funus expectabatur, coram magna frequen-

quentia (nam multi ad famam concurrerant) Sacrum facit, cæteraque prosequitur integræ valetudinis officia. Vix in tam patenti miraculo opus informatione fuerat; tamen ea jussu Eminentissimi Archiepiscopi exactissime facta; ac medici, chirurgi, testes Patres, omnes jurati miraculum testantur; repugnat nemo, & quasi in meridiana luce cujuscumque indolis vel affectionis homines conveniunt. Ad Indiam quantocius profectus, post innumera alia brevi peracta facinora, tandem anno 1638, Octob. 18, in Japonia Nangasacki pro fide torquetur, cruciatur, occiditur.

CCLIX Eram quidem eo temporis ego in Hispania; ut vero fatear ingenuè, satis licet hoc in genere incredulus, dubitare tamen de hoc miraculo numquam potui, iis momentis convictus plane, quæ prodere juvat. Videbam primum nostros homines de eo ubique persuasissimos: at certe in hoc genere increduli magis plerumque existimus, quam faciles: quod quidem pro me satis mihi evidens facit rerum nostrarum diuturna experientia: alii advertere facile possunt, vix apud nos, in nostrisque templis ullas mirâculis celebres

imagines extare; quod ego nec approbaverim hic, nec improbaverim: scio utrumque extremum vitiosum, nimiae, vel tardioris credulitatis; hanc ergo rem suo in loco relinquo aliis judicandam. Mihi tot hominum, non nimis utique faciliū, constans persuasio argumentum veritatis invictum est. Jam demum integro ferme triennio Neapoli dego, cum his hominibus tracto, quorum multi eo in collegio tunc temporis erant: alius in cubiculo ipso aderat, vir quidem, ne de superstite nimium dicam, probitatis haud vulgaris: audio, circumspicio, attendo, reflecto, & (ut vera solent) omnia invenio uniformia, vicissim cohærentia, concordiaque. Nihil est, quod Xaverius Marcellusque nostri sint; nam de eodem Xaverio permulta hoc ipso in Regno vulgata sunt, quæ creduntur ab aliis quidem, at ab aliis negantur passim vel etiam spernuntur.

CCLX Sed nostros nunc testes omittamus: Italiam, Hispaniamque totam compello. Invaluit quaquaversum veritatis vis ingens: Marcellus jam ad Indiam profecturus singulari lætitia, cultuque non solito ubique excipitur. Ut infinita circa hoc supprimam,
il-

Iud reliquorum argumentum præclarum, quod Rex noster, inter tot illa alia pietatis officia, eâ illum formâ allocutus sit, tam inusitata, *V. R. me encomende à Dios*; ac rogatus de causa, sibi visum respondit, non cum hominum aliquo, sed cum Sancto agere. Nimirum tantus Rex à Ministris suis ex Italia exacte omnium certior factus erat: facilis porro à Rege ad cæteros proceres, & populos, regnaque conjectura. Quanta omnium frequentia? quanta ubique devotio? quæ lacrymæ? Felix ille habebatur, cui ex paupere supellectili aliquid contingeret: ac uno demum verbo, sic ferme cum Marcello actum ubique atque cum Cælitum aliquo, qui nos revisurus venisset.

CCLXI At his majus veritatis argumentum Marcellus ipse, adeo mutatus in alium, ut non tam fanatus à Xaverio, quam versus in Xaverium videretur. Ex ea hora mutata cuncta: nihil visum in eo, nihil auditum deinceps, quod viri Apostolici non esset. Flagrabat amore Dei, amore Xaverii, pro Japoniæ conversione ardebat; hic totus sermo, hæ curæ. Examinentur tot regna, an in eo levius aliquid viderint, audierintve. Ad Orientalem

Indiam solvit; demum Macaum appellit; inde ad Philippinas tempestate jactatur: ibi dum moratur, ad Mindanai expugnationem ducitur (quippe pius Dux Corquera plus roboris in uno Marcello, quam in exercitu universo se ducere ratus est) nec spes fefellit: nam toties frustra tentata expugnatio, expedita feliciter. Inde ad Japoniam solvit: cito capitur: inauditis illis fossæ & aquæ tormentis exponitur: prodit ex tormentis vegetior: beatum caput amputandum carnifici traditur: riget ille, frustra tentat, atque à Marcello tandem ipso jussus crudeli officio fungitur; ac Marcellus, ut promiserat, felix Christo victima cadit. Infinita mari terraque ab eo edita mirabilia historiæ produnt. Nihil pluribus opus, hæc Marcelli vita, hæc factorum series, hic curationis mortisque consensus, tot item haud integro quadriennio peracta facinora, populorum hac illac sensus, regnorum ubique consensus, omnium concordia tenorque, si quid hoc in genere firmum est, miraculi veritatem evidentissimam plane conficit. Hinc ut mirer denuo Orthodoxos illos, tanto opere morali evidentiae supra à nobis assertæ repugnantes. Miraculi porro instrumentum,

mentum, sanctissimi ligni Crucis frustulum, ex Philippinis reportatum, nactus est Excell. Comes de Penneranda, noster nunc Prorex: quanta vero in reverentia habitum, quanto cultum affectu!

CCLXII Totam ad extremum quæstionem comprobemus ex sacræ Congregationis Rituum more exactissimo; licet enim nihil hoc ex loco profecturi simus apud sectarios, qui omnia Romæ gesta hoc solo improbant, ut vix, quæ eorum impudentia est, homines compotes mentis ibi degere concedant; tamen hæc temeritas est ipsorum extrema, ac deinde apud Orthodoxos saltem audiemur.

CCLXIII Quidquid itaque miraculorum in universa Ecclesia approbatur, in hoc primum integerrimo Tribunali discutitur: eo Theologi optimi evocantur: ibi Promotor fiscalis adest, qui magno studio, exquisita cognitione, hinc inde exceptiones, tam in jure quam in facto quærat, opponat; hoc casu, hoc crisi, hoc dæmonis ope fieri potuisse disputat; historiæ rerum similium citantur, errores in eo genere committi soliti producuntur; collatio instituitur medicorum; philosophorum

lolo-phorum sensa producantur; testes eliduntur; circumstantiæ quæque expenduntur: nihil uno verbo omittitur, quod ab hominibus geri hoc in negotio valeat. Atque hoc, opinor, concederent, si ad miraculum aliquod probandum Romam venirent, ipsi etiam procacissimi sectariorum. Sic primum discussa causa, denuo coram ipso Romano Pontifice instituitur: & si omnia manifestissima non erunt, nihil factum. Qui Romæ adfuimus, satis sumus hujus veritatis conscii; novimus, quam sit difficilis provinciæ, vel unius miraculi approbationem, post diuturnam discussionem, elicere.

CCLXIV Aliud est itaque, quod simplices & indocti de multis mirabilibus, per nimiam quamdam facilitatem, vel rerum ignorantiam sint persuasi, quæ interea ab aliis in nullo pretio habeantur; nec his nos vel Ecclesia pro veritatis suæ confirmatione utitur, curantque de corrigendo errore Episcopi. Aliud sunt authentica, publica, examinata, approbata miracula: hæc omnia nullus non extremè temerarius negaverit. Erraverit certè semel vel iterum (de quo non disputo) sacra Congregatio: at id calumniæ nulli opposueris

posueris humanissimo etiam Tribunali legitimo, quod numquam rectum judicaverit: at vel unum verum miraculum veritatem nostram concludit. Haud dicas, Romam in eo facilem. Experti sunt innumeri, experiunturque quotidie, quanto labore, quanto examine, quamque diuturno constet negotium: ex magna miraculorum multitudine vix unum, imo nullum probatur aliquando. Sectarum itaque considerent, nec satis putent Genevæ oblatrare; possunt enim facile rem hanc explorare, & Orthodoxi saltem; vel ex hoc uno loco, fateamur veritatem nostram manifestissimam.

CCLXV Narrationem hujus miraculi scripsit ipse V. P. Marcellus, quæ prodiit Italicè & Latinè Neapoli, an. 1634; Hispanicè Matrili eodem anno; Viennæ Austriæ anno 1639; Gallicè Lucemburgi anno 1635. Vitam hujus inclyti viri redegit in compendium P. Alegambe, in Bibliotheca Scriptorum Societatis.

§. VI.

Aliud celebre miraculum, quod S. Xaverius operatus est cum P. Alexandro Philippucci, Societatis Iesu, anno 1656.

CCLXVI **A**lexander Philippuccius Maceratensis, Societatis Iesu, postquam Romæ diligentem operam dederat Philosophiæ, mense Decembri an. 1656, in gravem incidit infirmitatem; cujus principium fuit subtilis è capite stillatio ad pectus manans, sævissima tussi comitata, pectorisque ipsius doloribus acutissimis. Româ Maceratam missus est mense Junio; ubi paucis diebus habuit meliusculè: sed principio Julii recrudit malum, crevitque tussis usque adeo, ut multis continenter horis frequens concussio pectoris imitaretur, imo superaret identidem pulsum arteriæ. Tussis hæc subinde degeneravit in exoticas vociferationes intrinsecas, impetu & celeritate tussi similes, sed duratione pertinaciores. Primis diebus cessabat hæc vociferatio eo brevi tempore, quo cibum capiebat; sed postea tam continua fuit, ut nullam daret quietem, nisi tempore somni,

sonni, qui multis hebdomadis fuit admodum exiguus. Fatigavit illum hæc ructatio horrida plusquam octo mensibus; quo tempore varias subiit mutationes. Quodam temporis spatio mugitum tauri imitabatur: etiam longiori tempore referre videbatur sonitum illius cornu, quod assurgentis aque impetu inflat Centaurus, qui Tusculi visitur in villa Aldobrandina. Post hæc & prorupit in ululatus canis, fustè verberati, aut voratâ spongiâ dirè cruciati. Hæc inter juvenis miserabilis toto corpore tabescebat, cadaveri jam similior quam corpori spiranti. Industriam & artem consumpserant medici, neque præter inanes conjecturas, de causa mali tam insolentis & pertinacis, erat quod sperare ab illis liceret; ipsis fatentibus, & quodam ex illis certius conjectante, infirmitatem videri esse unam ex illis, quas Hippocrates appellat Divinas: ut nimirum gloria Dei manifestaretur in illo: ad quod ipsum inter symptomata tam laboriosa, quæ duravêre ad mensem usque Martium anni 1658, videtur illi Deus vitam conservâsse; cui placuit, non paucis mensibus ad gratiam sanitatis illum præparare, immixtis in animum varii generis sanctis

sanctis desideriis, & affectibus piis minimè vulgaribus; sed inprimis quadam sui resignatione in voluntatem divinam, extra hanc nihil desiderando; cui proposito accedebat desiderium magnum, non recuperandi sanitatem industriâ aut arte humana, sed à sola Dei manu, quando huic placeret ut sanus fieret; quem sensum animi Superiori suo non semel aperuit. Denique mense Augusto anni 1657, ipso festo Assumptionis, ad honorem Beatissimæ Virginis, & S. Francisci Xaverii, voto se obstrinxit, proficiscendi in Indias ad conversionem infidelium; quando Deo placeret, sanitatem ipsi restituere; idque etiam abrupto & valere jussu studiorum cursu, quando id bonâ Superiorum veniâ ipsi liceret. Exinde sensit sibi modis insolitis accendi interiores affectus pietatis erga S. Franciscum Xaverium, simulque fiduciam, non alia via, quam ejusdem patrocínio recuperandi sanitatem, quando Deo placeret eam sibi reddere. Audierat, Patrem Marcellum Mastrillum suasisse cuidam personæ, cupienti quamdam à Deo obtinere gratiam, intercessione ejusdē sancti Indiarum Apostoli, ut novem continenter diebus ante 12. Martii diem, quo ca-

zatus est, cultu ejusdem speciali variis
tis operibus demonstrando, se exerceret;
nos deinde latius manaverat, ac in pri-
Maceratæ vigeat. Exarsit igitur ad hanc
tis suæ & fiduciæ demonstrationem;
vitque Superiorem, ut plures ad eam-
secum obeundam hortaretur? Illis igitur
us novem effudit se in varia pietatis ex-
ia, cuique diei attributa ad honorem S.
ncisci Xaverii; sic tamen ut diebus sin-
s pluries magno sensu recitaret quam
lo orationem, à se conceptam hac forma.

CLXVII *Sanctissime Pater Franciscus
eri, qui ex ore infantium & lactentium
cis laudes tuas, humillimè obsecro huma-
mani charitatem tuam per Sanguinem Iesu
iosissimum, & immaculatam Conceptionem
tissimæ Domine nostræ Mariæ, ut mihi ab
uita Dei bonitate (si me ex hoc morbo mori
edit) impetres, ut nunc per diversa sparsus
gar, & in uno eternitatis desiderio com-
ar; & relictis plurimis, erga quæ hucusque
atus sum, hoc unum necessarium diligentis-
è queram, & perfectè assequar; nempe, in
s Mariæ, in vulneribus Iesu, & in oscula
mini, te præsentem, & illorum auxilium pro
ma*

me implorante, piè, religiosè, ac devotissima in pace in idipsum dormire & requiescere. Sin me divina dispositio diutius vivere velit, Protector mi prodigiosissime, excita potentiam tuam, & veni, ut sanum me facias, in manu forti & in brachio excelso tuo, ut non medicina vel natura viribus, sed tuis apud Iesum & Mariam intercessionibus mihi redditam debeam sanitatem. Ecce, Pater mi humanissime, ante te omne desiderium meum, & gemitus meus à te non est absconditus. Amen.

CCLXVIII Quid plura? die 12 Martij, anniversario Canonizationis & novendialis pietatis postremo, cum se æger sentiret etiam pejus solito valere, ob intemperiem cæli & acrius frigus; postquam sacro Christi Corpore esset refectus, Deoque gratias egisset, etiam pie recitata oratione illa sua quam descripsi; sensit novo quodam ac repentino erga S. Franciscum Xaverium affectu se commoveri; conversisque oculis ad imaginem ex oratorio pendentem, qua Indiarum Apostolus, peregrinantis habitu, qualis Patri Marcello Mastrillo apparuerat, expressus erat, prorupit in has ipsas voces; *O mi sancte Francisce, si Dominus noster me vult sanum;*

ecquando facies, ut sit finis hujus tussis? Nec mora, ipso temporis momento cessavit exotica illa tussis. Stupuit æger ipse; & propriens se è lecto, in genua se conjecit ad sacram imaginem; accersitoque Superiori renuntiavit gratiam sibi factam; rogavitque, ut allatis Reliquiis S. Francisci Xaverii, earum contactu plena fieret gratia; cum sublata tussi remaneret voci languor & debilitas, pectori vero angustia & dolor. Stupens Superior, neque dubitans de miraculo, sacras Reliquias attulit, ægroque applicuit; atque è vestigio voci quidem pristinum robur rediit, pectori vero dolor omnis abstersus est, usque adeo, ut & prolixo tempore sine molestia genibus nixus, S. Francisco Xaverio thaumaturgo suo gratias egerit; & erectus in pedes, detractoque pectori panno, quo ad velamen usus erat, valida illud manu percutere potuerit sine ullo doloris sensu. Primum quidem accurrerunt ad spectaculum domestici Patres Fratresque omnes, dato signo æris campani sonitu, & in complexum ruerunt amantissimi Patris, ut sibi à mortuis restituti; tum vero, dissipata latius fama eventus miraculosi, concursus
ex

ex civitate universa ad Collegium factus ;
multique, ac inprimis medici admissi ad con-
clave, in quo tam mira erant patrata, suis
vix oculis credebant, neque lacrymis tempe-
rabant, Deum laudantes in opere suo per S.
Franciscum Xaverium Indiarum Apostolū.
Celebrata est solemniter Missa cum musica
in gratiarum actionem, cum Hymno, Te
Deum laudamus, assistentibus Illustrissimo
Domino Marassani, Governatore de la Mar-
ca; & Excellentissimis Dominis Auditoribus
Rotæ, cum illustrissimis Magistratibus ci-
vitatatis; inter quos numerabatur D. Baptista
Philippuccius parens Patris Alexandri; qui
indutus superpelliceo inservivit Sacro, & per
integras quatuor & amplius horas adstitit co-
ram omnibus concurrentibus ad novitatē mi-
raculi: de quo exactissimam fecit informa-
tionem Illustrissimus Papirius Sylvester Epi-
scopus Maceratensis, quam Romam misit.
Fuitque adeo celebre hoc miraculum, ut sin-
gulis annis celebretur festum in illa civitate
in ejus memoriam, cum Missa solemni, cum
musica & concione panegyrica de laudibus
S. Francisci Xaverii. Ipse autem P. Alexander
Philippuccius, ut valetudinem, quam mi-
ra-

raculose à Deo acceperat, in salutem animarum impenderet; obtenta licentia à P. Oliva, Præposito tunc Generali, transivit ad Indias, ad Provinciam Japoniæ, & strenue in præsentiarum laborat in Provincia de Cantone, spectante ad Imperium Sinarum. In perpetuum autem gratitudinis monumentum proprium nomen relinquens, S. Francisci Xaverii nomen & cognomen assumpsit; & deinceps non alio nomine voluit designari, quam *Francisci Xaverii Philippucci*, & sic subscribere solitus est, *Franciscus Xaverius Philippucci*.

§. VII.

Miraculum aliud, quod operatus est S. Xaverius cum Venerab. P. Ludovico Sanvitores, primo Marianarum Insularum Apostolo, an. 1659.

CCLXIX **A**Lia miracula operatus est S. Xaverius cum Venerabili P. Didaco Ludovico de Sanvitores, nostræ Societatis, qui fidem Christi primus invexit in Insulas Marianas, & ibi in odium ejus à barbaris occisus est an. 1672, die 2 Aprilis, sabbato ante Dominicam Passionis; quo eodem die, de viginti duobus retro annis, cum Diacon-

conatus ordine suscepit potestatem prædicandi Euangelium, pro quo occisus est, ætatis suæ an. 48, Religionis 32, à sua in Indias navigatione an. 12, & quarto anno sui ingressus in Insulas Latronum; quibus *Insularum Marianarum* nomen imposuit, postquam tredecim ex illis Insulas lumine fidei illuminaverat, & in illis per se, & socios suos quinquaginta millia Insulanorum baptizaverat. Miracula ista narravit ipse Venerabilis vir, in litteris quas scripsit ad Goswinum *Nikel*, Præpositum Generalem Societatis, Compluto 2 Julii an. 1659, vi quarum missionem Indicam impetravit; quas litteras adducit in ejus vita l. 1 c. xi P. Franciscus Garcia, qui illam Hispano idiomate scripsit; & P. Ambrosius Ortiz, qui anno 1686 eam in linguam Italicam vertit.

CCLXX Postquam Deus, per intercessionem S. Francisci Xaverii & S. Francisci de Borgia, hunc virum ab infirmitate proluxa & molesta liberaverat; postquam ille votum missionis Indicæ emiserat, & summo ardore illam desiderabat; quia Superiores Provinciæ Toletanæ ægrè ferebant, Provinciam spoliari viro, tantis talentis & virtutibus prædito;

&

& pater ejus, Illustrissimus Dominus D. Hieronymus de Sanvitores, huic profectiōi sui dilectissimi filii in Indias vehementer resistebat; clementissimus Dominus, ad vincendas omnes has difficultates, disposuit, ut parens illum juberet venire Matritum ad invisendum alium filium suum, Ludovici fratrem uterinum, ægrotantem. Dum autem ibi commoraretur Ludovicus, incidit in febrem malignam, quæ ipsum ad extremum vitæ periculum deduxit; & cum medici de ipsius vita desperarent, & jussissent ut ægroto administraretur Viaticum; tunc ille parentem suum, de ipsius periculo summe sollicitum & anxium, allocutus, dixit: *Si vestra Dominatio vitam mihi desiderat, eam totaliter consecret obsequio Dei & saluti animarum, quacunque mundi parte Deus ipse, mediis Superioribus Societatis, voluerit me eam impendere.* Annuit parens, & promisit se non restitutum ejus profectiōi ad Indos, si id Superiores Societatis expedire judicarent. Hac promissione summam consolationem habuit ægrotans, & firmam concepit spem, se brevi sanandum ab illa infirmitate. Hac spe plenus sacrosanctum suscepit Viaticum, & renovavit summo ardore

dore votum, quod jam dudum ediderat, missionis Indicæ.

CCLXXI In his rerum circumstantiis, singulari Numinis providentia, adducta est infirmo una syngrapha S. Xaverii, & altera venerabilis Martyris Marcelli Mastrilli, simul cum voto missionis Indicæ, quod manu propria scripserat, dictante sancto Xaverio; quod cum summa consolatione coram se lectum audivit, & in corde suo similia Deo ipse promittebat. Post quatuor vel quinque horas à suscepto Viatico, illi supervenit dulcissimus somnus: in quo sibi visus est videre S. Franciscum Xaverium & Patrem Marcel- lum, qui illi assistebant; & audivit vocem claram dicentem; *Iam sanus es.* Ad sonitum hujus vocis à somno excitatus est; & proprium pulsum tangens, quasi experturus, an vox illa veritatem nuntiasset; se omnino liberum à febre invenit, & copiosissimi sudoris quasi balneo madefactum. Frater infirmarius, qui infirmo cum alio Patre assistebat, audivit vocem illam, *Iam sanus es;* infirmus autem ab eo petivit, ut porrigeret ipsi indusium siccum, & madefactum deponeret. Venerunt mane medici, & invenerunt in-

infirmum sine ullo vestigio febris, & sine ullis præcedentis infirmitatis reliquiis repente sanatum. Hac occasione, tamquam è cælo delapsa, utens Pater Sanvitores, à Superioribus impetravit missionem Indicam; in qua ea sanctitatis Apostolicæ argumenta reliquit, ob quæ sperare possumus, eam aliquando ab Ecclesiâ sancta declarandam. Certe, qui hujus præclarissimi viri historiam legerit; vocationemq; ejus miraculosam ad Societatem, & ad Indiam, & virtutes Apostolicas ejus consideraverit; dubitare non poterit, ipsum fuisse vivam S. Xaverii effigiem; & forsan feret judicium, quod Societas infra Xaverium non habuerit missionarium majorem. Cum hoc Apostolico viro magnani ego felici forte mea contraxi amicitiam, & frequentem habui per litteras communicationem; & illi post Deum debeo, quod dimissa Salmanticensi Cathedra, me consecraverim missionibus in Hispania obeundis.

§. VIII.

*Concluditur ex his miraculis veritas Religionis
Catholicæ Romanæ.*

CCLXXII **M**iracula ista, patrata à S. Xa-
verio, non solum probant,
illum esse Sanctum, & cum Christo in glo-
ria regnare, ac proinde veram esse fidem Ca-
tholicam Romanam, quam semper tenuit &
prædicavit, & in qua obiit; sed etiam evin-
cunt directe, Lutherum & Calvinum fuisse
magistros errorum & perniciosissimos hæ-
resiarchas, Nam apud Bellarminum, tom. 2
lib. 1 de Sanctorum Beatitudine c. 15 docent,
inutile & illicitum esse, invocare Sanctos, si-
ve Angelos sive homines, ac petere, ut pro
nobis orent: inutile quidem, quia non habent
tam longas aures (ita enim Calvinus loqui-
tur) ut preces nostras audire possint: illicitum
autem, quia hinc obscuratur gloria Christi,
qui est unicus mediator & intercessor no-
ster. Hæc autem assertio Lutheri & Calvini
est manifestus error: nam Sanctos recte invo-
cari, habetur ex consensu totius Ecclesiæ, ut in-
quit Bellarm. l. 1 de Sanctorum Beatit. c. 20.

Quo-

Quomodo autem Sancti cognoscant preces eorum, qui illos invocant; explicant Theologum D. Thoma 2, 2, q. 83 art. 4, & 3 part. q. 10 art. 2; de quo agit late Bellarm. lib. 1 de Sanctorum Beatitudine cap. 20; & nostri instituti non est in hoc immorari.

§. IX.

Quomodo argumentum, petatum à miraculis Catholicorum, & defectu miraculorum in aliis sectis, hæretici eludere tentent. Ubi exponitur, quam procul sit ab idololatria cultus imaginum.

CCLXXIII CUM hæretici, suas sectas esseveras, miraculis nequeant probare; toti sunt in excusando defectum miraculorum in suis sectis, & in accusando & calumniando miracula patrata à Catholicis Romanis. Imprimis Calvinus, in præfatione suarum Institutionum, respondet; nos injuriam ipsis facere, quod ab eis miracula exigamus; cum ipsi doctrinam antiquam, & innumeris miraculis ab Apostolis & Martyribus confirmatam, prædicent. Sed respondeamus, esse evidenter falsum, quod illorum religio sit illa, quam Apostoli prædicarunt.

Ostendimus enim, eam, quam Apostoli prædicarunt, semper in mundo, in visibili hominum cœtu & Ecclesia perseverasse; nec hanc esse posse aliam, quam Catholicam Romanam; nam Religio Calvinii & Lutheri novæ sunt, & cum ipsis incepterunt.

CCLXXIV Deinde dicit, miracula nostrorum Sanctorum, vel esse ficta, vel imaginaria; id est vel non ita contigisse, & falso narrari ab historicis; vel si contigerunt, esse præstigias dæmonum. Fuisse autem dæmonum præstigias, ex eo confirmat, quod vera miracula confirmant Evangelium, Marci ultimo; ista autem evertunt Evangelium, & confirmant idololatriam, id est reliquiarum & imaginum cultum &c. Respondeo, impudentissime negari à Calvino & aliis hæreticis, miracula illa, quæ à Sanctis Ecclesiæ Romanæ patrata sunt. *Stultum est enim* (inquit Bellarminus) credere potius Calvino & Illyrico de historiis antiquis, quibus non interfuerunt; quam Bernardo, Bonaventuræ, Antonino, qui interfuerunt. Præterea, ut S. Augustinus respondit Paganis, negantibus historias miraculorum nostrorum, lib. 10. De Civit. Dei, c. 10 : Si licet, absque ulla ratione,

negare facta olim miracula; peribit fides omnium librorum; & tolletur, non solum nostra, sed etiam omnis alia Religio; omnes enim, qui Dii habentur, operibus mirabilibus, à doctis viris conscriptis, divinitatem suam, siue veram siue falsam, mundo persuaferunt.

CCLXXV Dicere autem, quod fuerunt miracula illa præstigiæ dæmonum, non est solutio, sed calumnia verus; sic enim Scribæ & Pharisei loquebantur de miraculis Christi, Matth. 12; & Pagani de miraculis Martyrum, quos magos & necromanticos vocare solebant; & Ariani, Eunomiani, Vigilantiani de miraculis Catholicorum, ut testantur Ambrosius in Serm. de SS. Gervasio & Prothasio, Hieronymus contra Vigilantium, & Auctor. l. de persecutione Wandalica. Deinde nullam habet probabilitatē, quod SS. Martinus, Franciscus, & alii quidam, qui simplicissimi erant, magica arte uterentur.

CCLXXVI Dum autem Calvinus respondet, miracula illa non posse esse vera, quia per illa confirmaretur idololatria; supponit id, quod ipsi probandum erat; nempe idololatriam esse, colere imagines Christi & Sanctorum. Ut enim explicant Doctores

Catholici, manifestum est, Catholicos non adorare statuas Sanctorum tamquam Deos, aut cultu soli Deo debito, sicut ab Ethnicis coluntur idola; nec eo modo, ut cultus sistat in imaginibus, quasi illis aliquid excellentiæ insit; sed ita ut transeat ad prototypum, seu ad ipsos Sanctos cum Christo regnantes. Nam illa externa adorationis nota, quæ fit coram imagine, est veneratio prototypi; sicut erigere statuam Regi, vel illi statuæ caput aperire, non est honor statuæ, nisi materialiter, sed est honor ipsius Regis.

CCLXXVII Quod autem honor iste, qui Sanctis deferitur, non sit cultus latriæ, qui Deo proprius, perspicuum est. Quia non colimus aliquem Sanctum, ut supremum Dominum & Auctorem rerum; sed solum ut amicum ejus qui supremus est Dominus. Tanti enim facimus Deum, ut etiam eos, quos ipse sublimes fecit, dignos aliquo honore putemus. Quod sanè non in injuriam, sed in honorem Dei cedit: sicut in honorem Regis cedit, quod aulici ejus honorentur, propter respectum quem habent ad Regem, nimirum quia sunt ejus domestici, ejus ministri, ejus amici &c. Hæc dixerim, quia hic multi simplices impingunt.

CCLXXVIII Hanc doctrinam tradit Tridentinum sess. 25 dicens, *Imagines Christi, Deiparæ Virginis, & aliorum Sanctorum, in templis præsertim habendas & retinendas, eisque debitum honorem & venerationem imper- tiendam; non quod credatur inesse aliqua in iis divinitas vel virtus, propter quam sint colenda, vel quod ab eis sit aliquid petendum, vel quod fiducia in imaginibus sit figenda, veluti olim fiebat à gentibus, quæ in idolis spem suam collocabant: sed quoniam honos, qui eis exhibetur, refertur ad prototypa quæ illæ repræsentant; ita ut per imagines, quas osculamur, & coram quibus caput aperimus, & procumbimus, Christum adoramus; & Sanctos, quorum illæ similitudinem gerunt, veneremur: id quod Conciliorum, præsertim vero secundæ Nicænæ Synodi decretis, contra imaginum oppugnatores, est sancitum. Statimque explicat fructum magnum, quem fideles capiunt ex eo, quod per picturas & statuas repræsententur mysteria nostræ redemptionis, & vitæ Sanctorum. Illud vero diligenter (inquit) doceant Episcopi, per historias mysteriorum nostræ redemptionis, picturis vel aliis similitudinibus expressas, erudiri & confirmari populum in articulis fidei com-*

memorandis & assidue recolendis : tum vero ex omnibus sacris imaginibus magnum fructum percipi, non solum quia admonetur populus beneficiorum & munerum quæ à Christo sibi collata sunt; sed etiam quia per Dei Sanctos miracula & salutaria exempla oculis fidelium subjiciuntur, ut pro iis Deo gratias agant, ad Sanctorumque imitationem vitam moresq; suos componant, excitenturque ad adorandum ac diligendum Deum, & ad pietatem colendam,

CCLXXIX Hinc patet, quo spiritu ducti sint Calvinus ejusque discipuli, dum sacras imagines execrantur. Nam Theodorus Beza, præcipuus Calvini discipulus & individuus comes, in Colloquio quodam, ausus est in hanc horribilem blasphemiam prorumpere: *Fateor, me ex animo Crucifixi imaginem detestari.* Et David Paræus, in caput 1. epistolæ ad Romanos dub. 18, disertè scribere non timuit; omnes esse idololatrias, qui tuentur imaginem Crucifixi, non minus quam qui colunt imagines serpentium & aliarum bestiarum. Quam longe isti fuerunt à spiritu Pauli, qui dicebat 1 Corinth, 2 v. 2; non judicavi, me scire aliquid inter vos, nisi Iesum Christum; & hunc crucifixum: qui dicebat;

Al si

Ab sit mihi gloriari nisi in cruce Domini nostri Iesu Christi: & Vivo ego, jam non ego, vivit vero in me Christus? Quid evidentius quam homines, insipientes imaginem Crucifixi, & serio cogitantes quid pro nobis passus sit, inde concipere divini amoris flammam, & desiderium patiendi pro Christo; & cum Apostolo clamare, Charitas Christi urget nos; & Pro omnibus mortuus est Christus, ut & qui vivunt, jam non sibi vivant, sed ei, qui pro ipsis mortuus est, & resurrexit. Et propterea agebat Petrus, Christus passus est pro nobis, vobis reliquens exemplum, ut sequamini vestigia ejus, 1 Pet. 2 v. 21. Quid potentius ad excitandam ardentem amoris flammam, quam intueri Crucifixum, & cum Apostolo dicere: Qui dilexit me, & tradidit semetipsum pro me? Et propterea Sponsa, Christi crucifixum contemplata, dicebat: Fasciculus myrrha dilectus meus mihi, inter ubera mea commorabitur. Quia Bernardus, quia Franciscus, quia alii Sancti hæc dies noctesque meditabantur, ideo ad tantam sanctitatem pervenerunt. Pugnant ergo manifestè, non solum cum Scriptura, & cum spiritu Ecclesiæ; sed cum manifesta ratione hæretici, exterminantes.

usum Imaginum; & propterea, eorum templa potius sunt meschitæ Mahumetanorum, & synagoga perfidorum Hebræorum, quam templa Christianorum. Sed hæc fusius persequi nostri instituti non est: satis sit dicere ad eorum confusionem, imaginem Christi non posse esse deterioris conditionis, quam olim fuerunt in veteri testamento imagines Angelorum & ærei serpentis. At hæc jussu Dei factæ sunt, & in honore habitæ, ut constat ex c. 25 Exod. v. 18, ubi Deus dixit Moyfi: *Facies duos Cherebin aureos & productiles ex utraque parte Oraculi; Cherub unus sit in latere uno, & alter in altero.* Et ex c. 21, n. 8, ubi dixit: *Fac serpentem æneum, & pone eum pro signo; qui percussus, aspexerit eum, vivet.* Ergo à fortiori licet facere imagines Christi, & illas honorare. Satis sit ad æternum opprobrium hæreticorum, Bellarminum tom. 1 l. 2 de reliq. & imaginibus Sanctorum c. 6 clare probare, *Authores Iconomachia fuisse omnes, aut Iudaos, aut Mahumetanos, aut Magos, aut manifestè hæreticos; ita ut negare non possint, qui hoc tempore oppugnant imagines, avos & majores suos esse impios.*

CCLXXX Qui voluerit accendi zelo defen-

fendendi cultum & venerationem sacrarum
Imaginum, legat præfationem Cardinalis Bel-
larmini ad 4. controversiam generalem, id est
ad libros de Ecclesia triumphante, sive de
gloria & cultu Sanctorum; ubi inter alia hæc
habet: *Multa sunt, quibus à nobis hujus tem-
poris hæretici dissident; multa illi in nostra
Ecclesia, templis, monasteriis, gymnasiis,
dogmatibus, ritibus, hominibus denique om-
nium ordinum reprehendunt; multa desiderant,
multa carpunt, multa emendanda & corri-
genda esse clamitant: sed nihil est, quod ex-
horreant, execrenturq; magis, quam invocatio-
nem Sanctorum, reliquiarum cultum, imagi-
num venerationem: his enim tribus manifestant
impietatem & idololatriam contineri volent.*
*Hoc uno veluti pallio discessionem suam à nobis,
hoc est, impiam ab Ecclesia Catholica separa-
tionem & defectionem, honestissime tegere se
arbitrantur. Hoc solo nomine latrocinia sua &
sacrilegia in ecclesias, templorum direptio-
nes, imaginum confractiones, Sacerdotum cæ-
des, sacrorum omnium profanationem defen-
dunt, quod se bellum gerere contra idola pro-
prietate dicant. Hac ipsa de causa censuram
equissimam Ecclesie, & pastorales baculos Epi-
scopo-*

scoporum, quibus interdum ipsorum furor reprimitur vel retardatur, impiam persecutionem, quasi adversus Deum pro idolis excitatam, nominant. His denique vinculis & compedibus provincias & nationes a se deceptas, arctissime irretitas & constrictas tenent.

CCLXXXI Sic enim populis illis persuasum est, nos pro Deo vivente mortuos homines, pro summo & sempiterno spiritu ossa & cineres, ligna & lapides colere: & tam alte mentes eorum perniciofa hæc persuasio penetravit, ut propterea, injusta quidem, sed tamen gravi diuturna que apud eos laboremus infamia. Et licet multa interdum de nostrorum, hoc est, Catholicorum hominum gravitate, sapientia, justitia, benignitate, de studio precandi, de moderatione in rebus omnibus audiant; non queunt tamen non continuo ab ejusmodi sermonibus aures removere, seque totos avertere; cum ad memoriam revocant, de quibus tam eximie laudes predicantur, eos nihilominus idololatrias esse, defunctorum manes & cadavera, picturasque & statuas adorare.

CCLXXXII Hucusque ibi Bellarminus; qui, ne aliquis ei opponeret, ipsum augendi gratia aliquid finxisse; testimonia adducit

evidenter demonstrata. C. 9 §. 9. 365
ex ipsorum hæreticorum libris. Referam, inquit, pauca de libris eorum, ut ipsos eosdem suæ impietatis præcones ac testes habeamus. Quibus relatis, concludit: sed & nos, si cives Sanctorum sumus, si ullum habemus fidei zelum, excitemur atque accendamus oportet; & religiosa piaque indignatione vehementer commoti, tam nefariis hominibus accerrime resistamus. Imitentur Lutherani majores suos, Porphyrium, Iulianum, Vigilantium, Wiclesum, & quotquot umquam cum caelestibus Divis impia bella gesserunt, & (ut fabula Poëtarum de Gigantibus ferunt) de suis sedibus Caelites deturbare ac detrahere voluerunt. Nos vero majorum nostrorum, Athanasii, Ambrosii, Hieronymi, Paulini, Augustini, Gregorii vestigiis inhereamus: qui quidem Apostolorum & Martyrum gloriam religiose emulari, & res gestas contra detractores pro viribus differendo tueri, & memoriam denique sermonibus alere, basilicis honorare, carminibus celebrare, litteris propagare, & consecrare aeternitati, semper studuerunt. Ita enim fiet, ut & illi, quorum imitantur scelera, earumdem cum illis pœnarum societate jungantur; & nos, quos in hoc studio ad virtutem habuimus duces, eosdem ad præmia & coronas socios habeamus.

CAPUT X.

Octavum caput idem probandi, quia incredibile & monstrosum est, quod Christus ad reformandam suam Ecclesiam elegerit Lutherum, Monachum apostatam; qui abjecta professione religiosa, Monialem professam sibi matrimonio copulavit, & cum ea usque ad mortem vixit; & Ioannem Calvinum, Presbyterum ambitiosum, superbia, & maledicentia plenum, qui sacrilegas etiam nuptias contraxit; & de libidine prepostera accusatus, imo & sententia Indicis damnatus est.

§. I.

Qualis fuerit Lutherus.

CCLXXXIII **Q**ualis fuerit Lutherus egregie describit Cardinalis Bellarm. tom. I l. 3 de Roman. Pontifice c. 23, & in oratione in scholis habita, quæ tamquam præfatio præfigitur tom. quarto; ubi pulchre probat, Lutherum ejusque doctrinam depictam fuisse à Joanne Apoc. c. 9; quando vidit, stellam cecidisse de calo, & datam ei clavem putei abyssi, & aperuisse puteum abyssi. Quid enim aliud est stellam de calo cadere?

dere? nisi hominem caelesti vitæ addictum, à terra longissimo intervallo remotum, sacri cœlibatus ac monasticæ professionis splendore & puritate micantem, subito ad terrenas delicias, atque ad negotia hujus mundi delabi, mortali conjugio implicari, in carne & sanguine volutari? Lutherum autem quis tandem ignorat, cum aliquando monasticam vitam, perfectam, pauperem, continentem, caelestem plane ac divinam in clarissimo quodam Ordine profiteretur; repentino atque horribili casu, ex Sacerdote laicum, ex paupere divitem, ex continente maritum, ex monacho politicum factum? monasterium in palatium, pannosam vestem in sericam, victum sobrium ac tenuem in opiparas cœnas & prandia commutasse? Denique, qui propter Christum, uxorem, liberos, agros, nummosque contempserat; iterum propter uxorem & liberos, propter agros & nummos, Christum reliquisse? Quia vero Lutherus præcipuum studium suum in Apostolica Sede oppugnanda positurus erat, seque Christi Vicario antagonistam singularem professurus; pulchre Ioannes dicit, Stella de calo cadenti clavem abyssi datam. Ita nimirum oportebat, ut sicut Christus Apostolo Petro ejusque successoribus claves regni cœlorum attribuit,

buit, ita etiam satanas cum apostolo suo primario clavem abyssi communicaret: & sicut Petrus caelesti clave divina oracula reſerabat, ac populis ſibi creditis doctrinam ſalutarem de celo adſerebat; ſic Lutherus abyſſi clave infernalem puteum aperiret, ac tetros inde errores, antiquarum hæreſum colluviem, dogmata pernicioſa tartareaque educeret.

CCLXXXIV Prætermitto reliqua quæ ſequuntur, in quibus deſcribuntur horrendi effectus, qui ad caſum Lutheri conſecuti ſunt. Qualis fuerit ſuperbia Lutheri, conſtat ex ejus libro ad Ducem Georgium, in quo ſic ſcribit apud Bellarminum l. 3 de Roman. Pontific. cap. 23. *A tempore Apoſtolorum nullus Doct̃or, aut Scriptor, nullus Theologus, aut Iuris Conſultus, inſigniter & clare conſcientias ſecularium ſtatuum confirmavit, inſtruxit, ac conſolatus eſt, ſicut ego feci. Per ſingularem Dei gratiam hoc certo ſcio, quoniam nec Auguſtinus, neque Ambroſius, qui tamen in hac re optimi ſunt, mihi in hoc æquales ſunt. Item in libro contra Regem Angliæ ait: Certus ſum, quod doctrinam meam de celo habeam. Item, Certiſſimus ſum, quod doctrina mea non ſit mea, ſed Chriſti; & quod doctrina mea non poſſit ſibi eſſe*

con-

evidenter demonstrat. C. 10 §. 1. 369
contraria, cum sit doctrina Christi. Et in libro
contra Statum Ecclesiasticum dicit, se ita esse
certum, ut doctrinam suam à nemine, ne ab An-
gelis quidem judicari velit: & neminem salvum
esse posse, qui doctrinam ipsius non reciperet.
Qualis vero fuerit Lutheri modestia, constat
ex ejus Epistola ad Amicum de voce SOLA:
cum enim, in sui erroris de fide justificante
confirmationem, adduxisset illud Apostoli,
Rom. 3. Arbitramur hominem justificari per
fidem, addidit, solam. Cumque rogaretur, cur id
fecisset, respondit in hæc verba: Si tuus Papista
morosum & difficilem se præbere volet de voce
(sola) statim dic; Papista & asinus eadem res
est; sic volo, sic jubeo, sit pro ratione voluntas.
Nolumus enim Papistarum esse discipuli, sed
præceptores. Semel enim superbiendo gloriabi-
mur adversus hujusmodi asinos. Et infra: Rogo
te, ne quid aliud hujusmodi asellis respondeas
de voce (sola) sed tantum dicas: Lutherus sic
vult, ille Doctor est omnium Doctorum in Papa-
tu, &c. En modestiam hujus Prophetæ in
fraude illa excusanda.

CCLXXXV Et notum est, initium ejus
apostasiæ fuisse superbiam. Promulgaverat
Leo Pontifex (inquit Spondanus ad an. 1517
n. 4.)

n. 4) largissimas Indulgentias bello Turcis inferendo, & templo Vaticano S. Petri construendo, ut quicumque aliquid in eos usus erogaret, veniam peccatorum amplissimam consequeretur: eique negotio in Germania praefecerat Albertum Archiepiscopum Moguntinum, qui ad praedicandas illas indulgentias Ioannem Tetzelium delegit, Fratrem Ordinis Dominici; qui nuper simili occasione praedicationibus suis magnam pecuniam acquisierat militibus Teutonicis, adversus Moscovitas & alios hostes. Ægre admodum Lutherus tulit, hoc munus non sibi commendari, vel alteri sui Ordinis; siquidem à longo tempore Ordo ejus id muneris obire consueverat. Cœpit primum contra abusum in evulgandis Indulgentiis & pecuniis colligendis ad populum declamare; postea autem Theses impressit, in quibus non solum praedicatorum & collectorum abusus carpebat, verum etiam communem ac receptum ab Ecclesia Indulgentiarum usum impugnabat, ac Romanorum Pontificum in iis concedendis auctoritatem in dubium revocabat; nec non quæ ad Sacramentum Pœnitentiæ & Purgatorium spectant, vellicabat, fidemque specialem adstruebat. Hæc fuit mali origo.

Luthe-

CCLXXXVI Lutheri quoque audacia & temeritas, conjuncta cum superbia, constat ex ipsius verbis art. 25, quibus audacissime omnes ad pugnam argumentorum provocabat, dicens: *Adeste hic, omnes Papistæ in unum: conflante studia vestra in unum, si forte possitis hoc vinculum dissolvere*; cum tamen postea pro argumentis sola mendacia plerumque proferret. Sed magis constat ex contemptu Conciliorum: nam in libro de formula missandi sic habet: *Si quod Concilium statueret aut permetteret utramque speciem, nos nequaquam utraque uti vellemus; sed in despectum Concilii ejusque statuti, aut una aut neutra uti vellemus, maledicturi universos, qui ex statuto Concilii utrâque uterentur.*

CCLXXXVII Fuit homo totus ventri & carnis voluptatibus deditus; & idcirco jejunium vocabat traditionem humanam, qua Deus frustra colatur; abstinentiam carniû, superstitionem; vota monastica dicebat esse impia, irrita, & omnino non servanda; castitatem esse impossibilem, omnibus esse uxores ducendas; agebatque, id esse tam necessarium, quam edere, bibere, & dormire, ut constat ex libro, quem scripsit de vita conjugali. Et in serm. de
matri-

matrimonio dixit, *licitū esse uti ancilla, si uxor debitum recusaret.* Fuitque ita luxuriæ servus, ut in colloquis mensalibus fol. 415. de se ipso testetur, quod sub initium sui Evangelii (antequam professam monialem sibi copulasset) *propter libidinis vehementiam, & amorem mulierum ad insaniam pene redactus fuerit.* Et in capite 31 Proverbiorum hoc glossema apponit, *Nihil amabilius vel suavius est in terra, quam amor mulierum, si cui is potest contingere.* Et in libro de vita conjugali & colloq. mens. fol. 400 & 526 testatur, se non magis à muliere potuisse abstinere, quam à cibo & potu, & opus conjugale esse, opus divinum, caeleste, spirituale. Quis unquam leno vel adulter adeo fuit impurus, ut ita loqueretur? Et quis non stupeat eorum hominum cæcitatem, qui hunc sputcissimum hominem, tamquam novum Apostolum susceperint, & ut novum Evangelistā suspexerint.

CCXXXVIII Idem Lutherus anno 1534 librum edidit de Missa privata, & unctione Sacerdotum, in quo non erubuit confiteri, se à diabolo edoctum, & persuasum, Missam esse summam abominationem; idque non per somnum, & quietem, sed palam dum

vigilaret, ut refert Bellarm. tom. 3. lib. 1. de Missa cap. 6. Unde, ut ait Nicolaus Romæus in Joannis Calvinii nova effigie pag. 543. dubitandum non est, diabolum Lutheri fuisse magistrum. Nam de Missa cum illo disputavit anno Domini 1518 aut 1519, & antea non erat illi incognitus, postea familiarissimus. Id latius narrat Spondanus ad ann. 1521 num. 3. ubi postquam narravit, Federicum Electorem Saxonicum, præcipuum Lutheri fautorem, ut eum subduceret à periculo, quod ipsi imminebat à Carolo V Imperatore volente illum capere, ipsum duxisse ad quoddam Castrum Wartbergum prope oppidum Astaldium, ubi fere decem menses secreto, sed laute habitusest: quem ipse locum, Pathmum & eremum suam nominavit: postquam hæc, inquam, narravit, addit Lutherum nequioribus indies furiis agitatum, inter multa, quæ ibi scripsit pessima, librum fecisse *de abroganda Missa privata*, quem librum composuit ex colloquio cum diabolo, qui illi subministravit argumenta contra Missam. Idque probat ex alio libro, quem typis mandavit ann. 1533, cujus titulus est *Protocolum colloquii cum damone*, qui histo-

riam

riam rei gestæ descriptam tenet. Magna certe (inquit Spondanus) Dei providentia factum est, ut memorabilem colloquii hujus historiam Lutherus ipsissimus conscripserit, & in publicum emisserit, libello de Missa angulari & Sacerdotum consecratione: cui prolixè satis ipsius diaboli verba, tum rationes omnes & argumenta, quibus ad persuadendam Missæ abrogationem usus est, ordine digestas inseruit. Horrendum facinus: quo tam se, quam suos affectas, diaboli discipulos profitetur: & quidem cum gloriatione, sicuti & frequens suum cum eodem diabolo commercium, multumque sal cum eo comesum, sæpius commemorare gaudet. Unde quis mirari possit, si tot ac tantæ in ejus scriptis petulantia, convitia, maledicta, virulentia, calumnia, spurcitia, blasphemia, in Deum, Sanctos, Scripturam, Doctores, Ecclesiam, Sacramenta, Pontifices, Reges, totumque Ordinem ecclesiasticum & politicum, in scientiam Theologiæ & Philosophiæ, denique in omne quidquid boni fuit in cælo, terra, locisque inferis, repariantur? Quid enim aliud diabolo plenus, quam diabolica effutisse potuit? Nam quod & nonnulla bona aliquando scripsit, an non & diabolo hoc in usu est, ut incautos fallat?

CCLXXXIX Memorant autem (inquit idem Spondanus ad an. 1533 n. 13) qui familiariter cum Luthero vixerunt, eum hoc ipso anno per æstatem frequenter nocturnis terriculamentis infestatum fuisse, & horrendis somniis perturbatum de fine mundi, & extremo judicio. Hujus monstri mors vitæ respondit. Mortuus est autem, ut narrat idem Spondanus an. 1546 n. 11, Islebii, patriâ suâ, cum à Mansfeldensibus Comitibus, in quorum ditio-
ne oppidum erat, vocatus componendi causâ cujusdam dissidii, ad finem Januarii eo accessisset; eoque die hilariter de more atque opiparè prandium, & nocte cœnam sumpsisset; doloribus pressus, inter secundam & tertiam horam post mediam noctem, fœdum spiritum exhalavit, anno ætatis suæ sexagesimo tertio. In ejus funere omnia relata sunt ad vanam gloriam & sæcularem pompam. Funus splendidissimum fuit (subdit Spondanus) delato corpore intra stanneum loculum triumphali curru Wittembergam, comitante Catharina uxore, seu verius pellice, carpento vectâ, unâ cum tribus ex ea susceptis spuris, Ioanne, Martino, & Paulo; & longâ continuaque equestris pedestrisque suæ superstitionis turbæ deductione & comploratione.

Scri-

CCXC Scribit autem Jonas, Lutheri usque ad mortem amicus, in epistola, quam de ejus obitu scripsit ad Electorem Saxoniae; Lutherum eadem nocte, quâ extinctus est, dixisse ipsi Jonæ aliisque circumstantibus, *Doctor Iona, & tu Michaël* (erat is Prædicator in Mansfeldt) *orate pro Domino Deo nostro & ejus Evangelio, ut ei bene succedat, quia Concilium Tridenti & abominabilis Papa graviter ei adversantur.* Ita refert Spondanus ad ann. 1546 n. 13, & Nicolaus Romæus in Calvini nova effigie pag. 754 citans epistolam, quæ ponitur in calce Joannis Cochlæi de actis & scriptis Lutheri: qui tamen author aliquantulum immutata refert illa verba, dicens fuisse hæc: *Doctor Iona, & tu Michaël, orate pro Deo nostro, ut ei cum Ecclesiæ sacræ causa bene succedat.* Hanc blasphemiam vel potius delirium (blasphemia enim & delirium est dicere, quod pro Deo orare possimus; quasi esset indigus, & habens superiorem, qui ei auxilium præstare posset) refert ille Jonas, tamquam divinum quoddam scitum, dignus planè talis magistri discipulus.

CCXCI Ex dictis constat, Lutherum non Dei Apostolum & Reformatorem Ecclesiæ, sed

sed à vera Ecclesia apostatam & Ecclesiæ deformatorem fuisse, & hominem vitiosissimum, & jure ipso infamem, ob nuptias sacrilegas, contractas cum Moniali professâ. Si enim jure Cæsareo infamis est, qui in adulterio deprehensus est; L. Palam. §. *Qui in adulterio*. Tit. de ritu nuptiarum: quanto magis, qui nuptias, bis, imo ter sacrilegas (nimirum quia contractas à Sacerdote, Monacho professso, cum Monacha professsa) contrahit, & sacrilego concubitu assiduè utitur? Fœdius enim est, esse adulterum Christi, quam uxoris vel mariti.

§. II.

Qualis fuerit Calvinus.

CCXCII **E**Jus ortum, & primordia describit Spondanus ad ann. 1534 à n. 9: & n. 14 eum Luthero conferens, inquit: *Fuit autem ipse Luthero longè acumine præstantior; & ut doctrinâ in plerisque, ita & moribus dissimilis ei. Quippe naturâ melancholicus & taciturnus, cibi & potus abstinent, ob ventriculi debilitatem & hemicraniam quibus laborabat, ideoque tenui & macilento corpore; summam in gestibus affectans gravitatem;*

R

tem;

zem; dissimulandi artifex eximius; non minus consilio quam audaciâ promptus. Lutherus autem, crasso corpore, genio indulgens, per summam hilaritatem tempus transigebat; nec lingua moderabatur; nihil saepe celabat, sed quaecumque animus suggererat, evomebat. Fuit Lutherus orator, cum disertus patriâ linguâ, tum vehemens. Calvinus, nullâ actionis elegantiam instructus, tadium saepe afferebat, latine vero scribendi laude excelluit. Lutherus denique religionem crassiorem & pinguiorem, Calvinus subtiliorem commentus est.

CCXCIII Qualis autem fuerit in moribus; describit Nicolaus Romæus, in Calvinii nova effigie, in tractatu, qui intitulatur, Calvinus in equuleo, seu Calvinii Confessio, art. 6 pag. 725. Calvinus (inquit) adolescens, post jam Grammaticæ fundamenta, animum ad iurisprudentiam adjecit: Aureliam, ubi tum Petrus Stella; & Bituriges, ubi Andreas Alciatus magno studiosorum concursu jus profitebantur, profectus. Hic à Melchiore Volmario Gerviano, Græcarum litterarum Professore, sed occulto Lutherano, vel potius Melanchtoniano, patris in morte domum revocatus (ut ipse scribit ad hanc Volmarium, præfatione Commentarii in Epist.

2 ad Corinthios, Geneva anno Domini 1546) miserè deceptus; & multa animo meditans, Noviodunum reversus est, anno etatis (ut videtur) 22, sæculi autem decimi sexti 31. Patris diligentia antea Sacellanus Ecclesiæ Cathedralis factus (non Canonicus) etiam curam Pastoralem in proximo pago adeptus est, cui nomen Pons-Episcopi, vulgo, Pont l'Evesque de Noyon. Atque hoc anno currente, ea evenisse necessarium est, quæ de ipsius crimine, accusatione, condemnatione, stigmate, verissime narrantur. Nam præter Acta Cathedralis Ecclesiæ, & Bertelerii Secretarii Genevensis testimonium, quod Bolsecus se vidisse affirmat; vel illud satis sit, quod Noviodono etatis anno 23 Parisios reversus, ejusdem flagitii, conquerentibus pueris, à Collegii Becodiani Rectore accusatus sit, in absentem & contumacem condemnationis latâ sententiâ. Vitium enim hoc, & quæ sunt ejusdem generis, inter secures etiam & rogos erumpere, & liberè dominari solet, ut insinuat S. Hieronymus epist. ad Innoentium, de muliere septies icta. Hucusque Author.

CCXCIV Quod autem hic refert de libidine præpostera Calvinii, prius scripserat P. Leonardus Lessius in opusculo illo cele-

380 *Veritas Religionis Catholicae*
bri, *Qua fides & religio sit capeffenda*, in nona
consideratione, in quinta ratione; ubi ex
Hieronymo Bolseco in vita Calvini c. 5 &
Julio Brigecio pag. 59, inquit: De infamia
Calvini constat ex actis judicialibus, Novioduni
illum convictum, & per sententiam damnatum
de nefando crimine, & publicè exurendum fuisse,
nisi ad preces Episcopi pœna ignis fuisset
commutata in supplicium virgarum, & ferri
candentis in tergo ustulationem. Unde patet,
illum quoque jure & facto fuisse infamem
L.I. w. De his qui notantur infamia, & L.
Quid ergo §. ex compromissio w. De his qui
notantur infamia.

§. III.

Ostenditur, Calvinum fuisse convictum Sodomia,
& ob eam causam stigmatè inustum.

CCXCV **H**oc scripsit P. Lessius anno
1609, in prima editione il-
lius opusculi: postea vero anno 1614, in 2
editione ejusdem opusculi, addidit appendi-
cem disputationum, in tria capita seu tres
quæstiones divisam; in 3 autem capite inquit,
utrum Calvinus fuerit convictus Sodomia,

&

evidenter demonstrata. C. 10 §. 3. 381
& eam ob causam stigmatē iniustus; & sub hoc titulo sic scribit: Non ex aëre scripsi ea, quæ hac de re in Consultatione adduxi, neque ex meo cerebro; sed ex bonis auctoribus, & fama communi, quæ 40 & amplius annis viguit, non solum apud Catholicos, sed etiam apud Lutheranos. Plurimi scriptores huius rei, tamquam certa & notoriæ, mentionem fecere: ex quibus paucos adferam.

CCXCVI Imprimis adfert Hieronymum Bolfecum, Medicum Lugdunensem, confcium secretorum Calvinī; utpote qui olim ejus discipulus fuerat, & postea ad fidem Catholicam conversus est, ut testatur Spondanus ad an. 1564, num. 25: qui an. 1590 vitam Calvinī descripsit, & dedicavit Primati Franciæ Archiepiscopo Lugdunensi. Ibi testatur, se vidisse Testimonium publicum apud quemdam Bartelier, Senatus Genevensis Secretarium, de vita & moribus Calvinī. Quod ego testimonium (inquit) publicum apud hunc vidi, & in ipsiusmet manibus inspexi: & idcirco, ut rem verissimam, commemorare possum. In quo quidem testimonio hoc quoque erat adjectum: Calvinum, cum curatum illic Beneficiū & aliud Sacelli cu-

jusdam Sacerdotium obtineret, sodomitici sceleris convictum, in vitæ discrimen venisse; ut igni, quæ hujusmodi sceleris ordinaria & legitima pœna est, cremaretur. Caterum Episcopi urbis commiseratione pœnam moderatam, ut cauterio candens ejus humero Liliū inureretur. Quo probro confusus, neque talem ignominiam ferens, utrumque ecclesiasticum Beneficiū in Pastorem Noviodunensem transtulit; & ab eo certa pecuniæ summo accepta, in Germaniam, deinde in Italiam profectus est; fortunæ, si quam sibi propitiam invenire posset, se permittens.

CCXCVII Nec Bolsecus solum dicit, se in manibus illius Secretarii hoc testimonium vidisse, & inspexisse; sed etiam jurejurando affirmat: ita enim scribit in epistola dedicatoria ad Archiepiscopum Lugdunensem: Jam hoc quoque eundem testor Deum, nihil me hoc tractatu complexum, quod contra meam conscientiam scriptum esse mihi conscius sim; sed quæ scribo, omnia veritate niti, & vel ex tabulis & testimoniis, manu ipsius Calvinī descriptis, ea me desumpsisse, vel referentibus maximæ auctoritatis viris cognovisse, vel meis oculis conspexisse manuque palpassse. Comprobat

id ibidem Lessius testimonio Julii Brigerii, Thomæ Stapletonii, Edmundi Campiani Martyris, Joannis Duræi, Surii ad an. 1538, & Guilielmi Reginaldi. Quibus relatis subiungit: *En septem testes, omnes ἀξιόπιστοι, omnes omni exceptione majores: quibus accedat Octavus, Conradus ipse Schlussemburgius Lutheranus, cujus verba jam ex Reginaldo retulimus. Longe plures adferre possem, sed hi abunde sufficiunt, non solum ad me vindicandum à nota calumniæ, sed etiam ad faciendam fidem cuilibet a quo lectori. Quis enim in re historica plura & graviora testimonia requirat?*

CCXCVIII. His accedunt multæ rationes & indicia, quæ rem ostendunt esse valde credibilem. Primum. Quia historia de crimine illo consentanea est aliis Calvinii gestis, quæ de ipso commemorantur. Scribit enim Bolsecus, in vita Calvinii c. 11, cum puer Calvinii minister, quatuor Francorum millibus hero subtractis, se in fugam dedisset, & amici velent illum persequi, numquam Calvinum permittere voluisse: ne videlicet comprehensus puer arcana patefaceret: quæ res ingentem suspicionem movit, ipsum puero abutum esse. Aliud factum narrat Florimondus, Præ-

ses Burdegalensis, l. 7. De ortu hæresis, cap. 9; *Fertur, inquit, & complures scriptis evulgarunt, Rectorem Collegii de Boncourt accusasse Calvinum nefandi criminis; & ex puerorum depositionibus, cum non comparuisset, absentem fuisse condemnatum.* Omitto alia impuritatis illius documenta, quæ à scriptoribus referuntur. Secundum quæ historia illa est conformis vitæ & moribus discipulorum Calvini, qui se omni genere libidinis inquinaverunt.

§. IV.

Frustra Ludovicus Maimburgus conatur Calvinum ab hac infamia liberare.

CCXCIX **Q**UAMVIS hæc & alia fundamenta, adducta à P. Lessio, satis valida sint ad persuadendum, Calvinum reum fuisse nefandi criminis; tamen Ludovicus Maimburgus, l. 4. historiæ Calvinismi ad an. 1564, hoc hujus hæresiarchæ scelus non vult credere; tum quia nihil ejusmodi reperitur in exactis informationibus, Novioduni captis nostris hisce temporibus; nec in regestis Ecclesiæ Cathedralis, quæ servata fue-
runt.

evidenter demonstrata. C. 10 §. 4. 38
runt ab incendio, quod an. 1552 acta publica
totamque pœne civitatem Noviodunensem
consumpsit : tum quia verisimile satis est,
quod si talis attestatio, quæ incendium præ-
cessisset, veritatem haberet; numquam Ge-
bennenses recepissent pro fundatore Eccle-
siæ, & Reformatore morum, disciplinæ, atque
doctrinæ, infamem hominem, tam turpi nota
insignitum. Unde concludit, Bolsecum im-
postorem fuisse seu calumniatorem, aut sal-
tem deceptum fuisse per suum Bertelier. Ul-
terius addit, fieri potuisse, ut Joannes Calvi-
nus, quem antea vocabant Cauvinum, sume-
retur pro ejus nepote Joanne Cauvino ejus-
dem Ecclesiæ Capellano ; qui ut notatur in
regestis Capituli, cum non emendaret incon-
tinentiam, pro qua fuerat castigatus, fuit be-
neficio privatus, diu admodum postquam
Calvinus exiret è regno. Has rationes pro-
ponit Maimburgus, quasi datas à Protestan-
tibus. Et tandem concludit: *Volo itaque, quan-*
doquidem ita placet Protestantibus nostris, non
præstare fidem huic infamiae, vergenti in Autho-
rem ipsorum sectæ : Deus enim non indiget his
probationibus, quæ repelli possunt ut incerta; &

multo minus falsitatibus hominum, ut inimicos suos debellet. Hæc Maimburgus.

CCC Fateor, Deum non indigere mendaciis hominum: fateor, nec hæreticis posse affricari crimina, quæ ipsi non commiserunt, nec sine sufficienti probatione posse ut infames notari. At quando efficaces sunt probationes, oportet ut eorum vitia omnibus pateant, ut sic eorum sectatores oculos aperiant, & non sequantur, tamquam Dei Apostolos & Ministros, homines iniquos: vergit enim in dedecus & ignominiam sectæ, quod ipsius primus author fuerit homo criminosus & infamis. Jam vero probationes, quibus ductus est P. Lessius, efficaces sunt, nec illis satisfacit Maimburgus; imo nec mentionem facit argumenti, quo potissimum Lessius probat, Bolsecum vera narrasse; vel quia non vidit, vel quia impar dandæ congruæ responsioni, maluit dissimulare, quam frigide respondere. Sic autem arguit Lessius: *Si ista de crimine Sodomitico, & stigmate vera non erant, cur discipuli Calvini ea non refutarunt? Cur inspectionem Actorum publicorum & Magistratum testimonia non petierunt? Facile enim*

evidenter demonstrata. C. OI §. 4. 287
enim, si falsa erant, refutari tunc temporis po-
tuissem.

CCCI Primo; testimonio Magistratus Gene-
vensis, qui publico instrumento declarare potuis-
set, tale scriptum numquam ad se perlatum, &
se nihil umquam de hujusmodi Calvinii crimine
inaudisse: non enim dubitandum, quin eo tempo-
re, nimirum an. 1577, fuerint multi supersti-
tes, qui hujus rei possent meminisse; & fortasse
ipse Bartelier, in cujus manibus se hoc testimo-
nium vidisse affirmat Bolsecus, adhuc supererat.
Secundo; testimonio Magistratus Noviodunen-
sis. Non enim est dubium, quin ex actis judicia-
riis, quæ asservari diligenter solent, veritas co-
gnosci posset: verum neutrum fecerunt fratres
Euangelici. Quis credat, si solida aliqua ratione
tanti sceleris infamiam à suo Apostolo amoliri
potuissent, & adversarium suæ religionis Hiero-
nymum Bolsecum calumniæ convincere, & apud
omnes hoc modo infamem reddere, eos id fuisse
prætermissoiros? sic enim effecissent, ut nec in
ceteris, quæ Bolsecus de Calvinii variis crimi-
nibus, & pessimis artibus ac machinationibus
scribit, ei fides adhiberetur. Itaque cum nihil
fecerint coterempore, quo maxime oportebat (ni-
mirum

inuri memoriam solent. *Ad hac Wittakerus nihil amplius quod responderet, habuit. Unde etsi in sua responsione contra Duraum ad cetera, quæ hoc loco Duraus adfert, respondere conetur, ut patet pag. 280; hoc tamen de stigmate prorsus dissimulat. Hæc ex libro Anglico, cui titulus. Apologia Protestantium pro Romana Ecclesia. Quid causæ fuisse putabimus homini, alioquin loquacissimo & importunissimo, hujus silentii; nisi quod fama publica & conscientia propria convictus, nullo colore rem tegere & honestare potuerit?*

CCCIII Nec fundamenta adducta à Maimburgo, ad vindicandum Calvinum ab hac infamia, efficacia sunt. Nam quod in informationibus, Novioduni captis hisce temporibus, id est, centum & amplius annis post obitum Calvinī, reperiri non potuerit instrumentum, quo comprobaretur illud Calvinī delictum; nec in regeſtis Ecclesiæ Noviodunensis ab incendio liberatis inventa sit ulla illius memoria; est argumentum mere negativum, quod nihil concludit. Cum necesse non fuerit, ut infereretur Actis illius Capituli memoria hujus infamiæ; vel quamvis fuerit in-
serta,

serta, facile potuerit inde avelli ab aliquo Calvini; vel discipulo, vel consanguineo, vel studioso. Deinde quia Bolsecus, sub juramento testatus est, se vidisse hujus rei testimonium authenticum in manu Bartelier, Senatus Genevensis Secretarii, qui missus fuit Noviodunum hujus rei gratia, ut in vitam atque mores Calvini inquireret, & qualis adolescens fuisset, exploraret; & inde retulit testimonium, quod de Calvino præcipui aliquot cives Noviodunenses interrogati perhibuerunt, Notariusque legalis in publicas tabulas retulit. Hoc autem testimonium non oportuit servari in Archivo vel Ecclesiæ vel Civitatis Noviodunensis, quia sua ipsorum non intererat habere hoc Instrumentum de infamia sui Civis, vel sui Capellani, aut Canonici; sed adduci Genevam, unde exposcebatur. Ex tabulario autem Genevensi promptum fuit discipulis Calvini, Magistri & Apostoli sui, ignominiam auferre. Nec Bolsecus ausus fuisset hæc scribere, si falsa essent; aut non fatis ipsi explorata. Nec tunc, quando memoria erat recens, dissimulassent Calvinistæ, Bolsecum de calumnia vel de fal-

falsitate convincere, nisi res fuisset adeo nota, ut celari non posset tunc. Postquam autem sæculum transivit, & testibus comprobare non potest delictum Calvinii; Protestantes illud negant; & illis potius Maimburgus vult credere, quam scriptoribus tot & tam gravibus, qui hoc testati sunt, & de falsitate non sunt accusati tunc, quando de falsitate poterant convinci, si falsa narrassent.

CCCIV Estque valde levis illa conjectura de æquivocatione nepotis Calvinii cum ipso Calvinio; cum nepos Calvinii non fuerit de crimine nefando accusatus, nec quidquam scribatur de Lilio candente ejus humero inusto, sicut scribitur de Calvinio. Nec vim habet illud aliud fundamentum, quod scilicet Genevenses non recepissent pro fundatore novæ Ecclesiæ hominem infamem. Quid enim mirum, quod hominem infamem acceperint pro magistro & reformatore, qui credunt, *nullam esse nostri arbitrii libertatem, sed omnia inevitabili necessitate evenire; & Deum non minus esse authorem & impulsorem operum malorum, quam bonorum?* Si imbuti sunt Calvinii doctrina, palam docentis,

centis, Deum ab æterno omnia opera scelerata hominum & dæmonum decreto suo statuisse & præordinasse, & suis temporibus ad ea excitare, movere, & impellere; quid mirum, quod non repudient Calvinum ex eo, quod secutus impulsus Dei, ipsum incitantis & moventis ad committendum peccatum nefandum, illam insaniam subire voluerit, ne Deo resisteret? Quid mirum, quod pro reformatore susceperint hominem de hoc vitio convictum, qui pro Apostolo venerantur hominem blasphemum in Christum; utpote qui libro 2. Instit. cap. 16. aperte docuit, Christum Dominum *cruciatus gehennæ, cum damnatis ac reprobis spiritibus, aliquando pertulisse*? Quid mirum, quod hominem infamem susceperint pro reformatore, si tamquam Dei Evangelistam & novum Apostolum susceperunt hominem, qui l. 3. institutionum c. 12. §. 4. expresse dicit; *omnia opera hominum, si sua dignitate censeantur, nihil nisi inquinamenta & sordes esse; nec ullum à Sanctis exire opus, quod si in se censeatur, non mereatur justam opprobrii mercedem*? Quid mirum, quod hominem infamem

mem

mem suscepert pro reformatore, si sibi
persuaserint, à Deo missum esse ad refor-
mandam suam Ecclesiam hominem, qui post
solemne votum castitatis in receptione Or-
dinis sacerdotalis susceptum, publice sacri-
legas nuptias contraxit? Ut enim scribit Spon-
danus ad an. 1538 num. 12, Calvinus eo
anno ex civitate Genevensi, in quam se in-
truserat anno 1536, in exilium pulsus, se re-
cepit Argentoratum, ubi dogma Zwinglii
vigeat: Et ibi, ut *jucundius exilium suum
ferret, viduam cujusdam Anabaptista, nomi-
ne Ideletam Buriam, matrimonio sibi junxit,
& multis annis cum ea vixit; nullis tamen
susceptis liberis, quamvis ex priori matrimo-
nio nonnullos haberet.* Verba sunt Spondani.

CCCV Quid mirum? quod hominem,
de peccato nefando convictum, ut Ecclesiæ
reformatorem admiserint; qui credere potue-
runt, à Deo missum fuisse ad prædicandum
novum Evangelium hominem, de quo ipsis
notum fuit, voluisse per fictionem & arti-
ficiam persuadere suis auditoribus, se mor-
tuum suscitasse in confirmationem suæ do-
ctrinæ; cum tamen non vere mortuum sus-
citaverit; sed vivum & sanum, mortuum
red-

reddiderit; Deo vindictam sumente de tam sacrilega fictione, ut narrat Spondanus ad an. 1553 num. 15, tamquam rem exploratam; & nos supra retulimus.

CCCVI Quid mirum? quod Calvini discipuli hoc sui magistri crimē nihili fecerint, quandoquidem, ut refert Guilielmus Reginaldus lib. 4. pag. 1020, quidam Calvinistæ in Anglia, ex illa de justificatione fidei Calvinii sententia, inter ceteras has deducunt & tuentur conclusiones. 1. Omnes illi errant, qui putant se salvandos, cum multa bona opera fecerint. 2. Non est necesse laborare, quo bonis operibus vitam consequamur eternam, jam nunc enim eam tenemus. 3. Est hic unus ex præcipuis erroribus, qui versantur in orbe Christiano, arbitrari, quod bona opera quidquam prosint ad salutem. 4. Peccata nostra nihil minuunt de gloria Dei, totum damnum peccati positum est in scandalo proximi. 5. Christus suo sanguine redemit & liberavit nos ab omnibus peccatis & legibus, ut deinceps nulla lex nos obliget in conscientia. Hic aperte liberamur à Decalogo & ab omnibus præceptis Sacramentorum. 6. Nihil debes Deo nisi fidem, ut confitearis Christum Iesum, & credas eum surrexisse

à mortuis; sic enim salvus eris. In reliquis omnibus Deus liberum tibi facit, ut sequaris voluntatem tuam: omnia enim facere potes absque scrupulo conscientiae: neque enim perire vel damnari potes, quidquid externe vel feceris vel infectum reliqueris. Hæc omnia illi deducunt (et quidem rectissime) ex illo de justificatione per fidem specialem fundamento, à Luthero & Calvino posito: in quorum etiam scriptis pene hæc omnia expresse habentur. Quis majorem licentiam optare vel fingere possit ad omne flagitium?

CCCVII Quid mirum? quod tamquam reformatorem acceperint virum, de tali crimine notatum; qui sibi persuadent, spiritum Dei habuisse hominem, adeo superbum, qui passim Patres & Concilia contemnit; & judicium suum judicio totius Ecclesiæ, per mille & amplius annos constanter, etiam ex sententia ipsius Calvini, retento, impudenter præfert? Superbia Calvini ex ejus libris est facis conspicua, nimirum ex lib. 2 Instit. c. 14 §. 3, l. 3 c. 4 §. 38, & c. 5 §. 10, l. 4 c. 12 §. 20 & alibi: contemnit enim passim (inquit Lessius) omnes veteres & sanctos Patres, & audacter erroris accusat: sæpe pro concione in hæc voces.

voces erumpebat : Ego Prophetâ sum. Ego Dei spiritum habeo. Ego si erro, tu es Deus, qui me propter peccata populi in errorem mittis, & decipis. Qui hominem ejusmodi, Spiritum Dei habuisse credunt, & ex illo scripsisse quæ scripsit; non mirum quod illum suscep- rint, ut reformatorem Ecclesiæ; quamvis aliunde scirent, fuisse ob sodomiam lilio candenti sigillatum. Nullum ergo adducit Maimburgus fundamentum, quo satis à Cal- vino eliminetur notam infamiæ.

CCCVIII Fateor Henricum Spondanum ad an. 1534, n. 11, non affirmare hanc infamiam Calvinî: solum enim ibi hæc scribit : *Quod vero traditur vulgo, enim in turpe crimen sodomie incidisse, ac propterea in vita discrimen, nisi pœna moderationem Episcopus impe- trasset, Lillii candentis ad humerum inustionem, & exilium à patria : hoc Massonus tacet, so- lamque abeundi in exilium causam hæresim fuisse, ait.* Dixerat n. 9 se vidisse tres vel qua- tuor Vitas Calvinî, unam Theodori Beze ejus discipuli, dubiæ prorsus fidei, utpote in ejus tantummodo & hæresis laudem fabricatam: alteram Hieronymi Bolfeci Medici Lugdu- nensis Latinam, aliamque Gallicam Jacobi Lainger

Lainger Scoti Doctoris Sorbonici, *acerbior*
rem, quam ut in pluribus accepta sit omnibus;
& ultimam Papirii Massoni Parisiensis *causidici,*
viri doctissimi, notaque moderationis, cui
tutius in iis, quæ refert, fidem adhibeas. Spon-
danus secutus est Massonum, & quia hic
Author tacet sodomiam Calvinii, etiam ipse
noluit hoc affirmare. Et quamvis approbet
quæ ille refert tamquam vera, non tamen
reprobat ea quæ tacet. Hinc autem nullum
potest argumentum defumi, in favorem in-
nocentiæ Calvinii ab illo crimine. Massonus
enim non defendit Calvinum, ut facit Maim-
burgus; nec enim positivè negat illud crimen
fuisse à Calvino commissum; sed solum ta-
cet, & ab utroque abstrahit; nec illum con-
demnans, nec illum absolvens. Bolsecus au-
tem & Langeus, palam & disertè affirmant,
idque coram discipulis Calvinii, quando re-
cens erat memoria facinoris, & poterant ma-
nifestè convinci, si falsa narrâssent. Quare
cum tunc temporis, quando vivebant cives
Noviodunenses, qui rei veritatem possent
deponere, nemo hos scriptores impugnarit,
signum clarum est, illos vera dixisse. At vero
ex eo, quod Massonus sit vir moderatus, &
fidem

fidem mereatur in iis quæ refert; non sequitur, quod debeant reputari falsa ea, quæ ipse tacet. Potuit enim tacere ex motivo politico, non offendendi hæreticos Calvinistas, tunc in Gallia potentes. Nam si positivè affirmaret, Calvinum non fuisse accusatum de crimine illo, sicut Bolsecus affirmat, fuisse accusatum; posset rem facere dubiam: sed cum nihil dicat, & ab hoc abstrahat, non facit dubiam historiam narratam à Bolseco; imo ipsa taciturnitas Massoni probat, ipsum non habuisse fundamentum ad negandum, vel saltem ad revocandum in dubium, id quod tam asseveranter affirmavit Bolsecus; quia si habuisset, non dissimulâset.

CCCIX Concluditur ergo ex dictis, Calvinum, hominem jure infamem fuisse, tum ob nuptias sacrilegè contractas post Sacerdotium, habens annexum solenne votum castitatis, tum ob sodomiam. Ut patet ex lib. i tit. de his qui notantur infamia & l. Quid ergo § ex compromisso. Tit. de iis, qui notantur infamia. Ejus mores describit citatus Papius Massonus, quem Spondanus, ad an. 1564 num. 25, appellat moderatissimum & temperatissimum in omnibus scriptis, nec nisi quæ

quæ optime nosset, scribere scium. Hic Author in vita Calvinî testatur apud Spondanum ibi; Calvinum iracundum adeo fuisse, ut Bucerus, etsi amicus, familiari Epistolâ eum castigaturus, canem rabidum vocârit, & scriptorem maledicendi studio infectum: judicare eum de hominibus, prout amaret vel odisset, prout liberet: Melancthon præfractam ejus, ut loquebatur, morositatem vituperaverit: Genevenses inter jocos dicerent, malle se apud inferos esse eum Beza (qui videlicet suis scurrilitatibus & festivis jocis eos in mediis flammis exhilarâisset) quam apud superos cum Calvino. Vindicta appetentem & sanguinarium fuisse, mordacem in scribendo, & dicendo, ad omnem simplicis animi figuram compositum, texisse intus latentem superbiam & philautiam. Itaque non immerito Balduinum (qui silentium ei imposuit seni, immenso ipsius dolore) dixisse; collegas ejus conqueri solitos, de ipsius intolerabili arrogantia & incredibili fastu. Nemini imparem aut secundum haberi voluisse: nec vero parem ferre potuisse; nec imparem, nisi obsequentem, pati. Demumque ita vitam ejus claudit, ut asserat, eum, qui Calvinum labem ac perniciem hominum dixerit, nihil mentiturum esse:

esse : tantum enim malorum intulisse in patriam, ut cunabula ejus merito detestari atque odisse omnes debeant. Idemque in vitis Pontificum Romanorum, Viperam eum, & Scorpionum appellans, ait, pudere se fateri, hoc monstrum in Galliâ natum; multumque debere Galliam anno 1564 quo portentum illud extinctum est.

CCCX Huic vitæ respondit mors, quam ex Bolsecò in vita Calvinì cap. 22. describit Nicolaus Romæus, in Calvinì nova effigie pag. 763; Gravissimos (inquiens) dolores, & asperrimos cruciatus, quibus, Dei in illum severa gravissimaque manu ingruente, excruciabatur, non ferens; dæmonibus invocatis, jurans, execrans, & blasphemans, miser expiravit : cujus illi testimonium perhibuere, qui decumbenti ad extremum usque halitum ministrarunt. Diem atque horam detestatus est & execratus, quam unquam studiis impenderat; cum ex ulceribus totoque corpore gravissimi foetores emanarent, ob quorum graveolentiam, & sibi ipsi gravis, & quæ eum circumstabat familiæ erat. Phthiriasi quoque gravissime afflictus fuit : quo morbi genere crudeles quique tyranni & impietate insignes, in scelerum detestationem, à Deo puniti fuerunt: Antiochus Epiphanes,

evidenter demonstrata. C. 10 §. 4. 401
phanes, 2 Machab. c. 9 v. 9 L. Cornelius Sylla,
Herodes, Maximianus Impe. Hunoricus 2 Wan-
dalarum Rex, Arnulphus Imper. Caroli Crassi
successor, & similes, quorum præ cæteris nobili-
tata fuit impietas. Vide Claudium de Sainctes
in Respons. ad Apologiam Beza pag. 11 a.

§. V.

Concluditur, ex moribus Lutheri & Calvinii
manifeste demonstrari, eos non fuisse Ecclesiæ
reformatores, sed deformatores, & manifestos
Hæresiarchas.

CCCXI **P**ostquam P. Lessius vitam &
morum conditionem Lutheri &
Calvinii breviter depinxit, merito concludit.
Quis nunc, istis perpensis, in animum inducat,
Deum hujusmodi hominibus, qui & omni jure
& orbis judicio erant infames, quorum vita tur-
pissima, lingua effrenis & maledica, animus
tumidus, ambitiosus, iracundus, & invidia ple-
nus, ad reformationem Ecclesiæ suæ uti voluisse?
Quis unquam hujusmodi mores, vel in Aposto-
lis, vel Prophetis notavit? Erant quidem Apo-
stoli plerique conditione humiles, nulli tamen ob-
flagitia infames: & quamvis essent indocti &
S sim-

simplices, repente tamen facti sunt sapientia, vita sanctitate, & miraculorum gloria admirabiles. Mira in illis animi demissio, mira mansuetudo; mirus gloriae, rerum terrenarum, & voluptatum hujus vitae contemptus; mira in proximum charitas, mira in verbis modestia & circumscriptio. Similes mores cernimus in omnibus, quibus Deus usus est, vel ad Gentium conversionem, vel ad morum populi Christiani reformationem. v.g. in S. Augustino Anglorum Apostolo, in S. Bonifacio Germanorum, in SS. Adelberto, Othone, Willebrordo, Eligio, & in aliis aliarum gentium; in SS. Benedicto, Bernardo, Romualdo, Dominico, Francisco, & aliis, quorum exemplo & doctrina plurimi ad contemptum terrenorum, & amorem caelestium sunt excitati.

CCCXII Si ad alicujus provinciae conversionem, si ad morum nonnullam in populo correctionem, Deus talibus viris, quorum vita mundo erat admirabilis, usus est; qui tamen non immediate à Deo, sed à summo Pontifice suam missionem acceperunt; quales, obsecro, par erat esse eos, qui mittebantur immediate à Deo, idque ad reformationem praecipuorum capitum Religionis, imo ad totius Ecclesiae & Regni Christi collapsi

lapsi instaurationem? Etiam si tota sanctitas & excellentia, omnes virtutes & omnia dona spiritualia, quæ fuerunt in S. Ioanne Baptista & in omnibus Apostolis, simul in unum conflata ipsis infusa fuissent; hoc tamen totum haud satis fuisset, ad sufficientem illis auctoritatem tantæ molitionis conciliandam. Et nos tam fungi erimus, ut credamus, divinam sapientiam, ad rem adeo stupendam, usam fuisse hominibus, non solum nulla vitæ sanctitate commendatis, sed etiam infamibus, impuris, ambitiosis, vindictæ cupidis, & maledicis? Quid enim hoc aliud erat, quam omnibus, micam prudentiæ habentibus, justam dare occasionem, eos non admittendi, sed ut impostores averfandi? Nam qui per infamiam non possunt admitti ad ullam dignitatem, ad ullum officium sive ecclesiasticum sive sæculare, imo nec ad accusandum, nec ad postulandum; quomodo admittentur, ut reformatores Religionis, ut architecti Ecclesiæ, ut iudices Episcoporum, Pontificum, & Conciliorum Oecumenicorum?

CCCXIII Unde patet, quam frivola sit responsio hæreticorum, qui, quando eis describuntur mores Lutheri & Calvinii, dicunt; se nihil curare, quales illi fuerint, sed solum attendere ad ipsorum doctrinam, quæ bona

404 *Veritas Religionis Catholica*
est: nequit enim dici, esse bonam doctrinam
hominum iniquorum, quæ opponitur com-
muni Ecclesiæ sensui, sanctorum Patrum do-
ctrinæ, & Conciliorum definitionibus: pror-
susque est monstrosus dicere, quod Deus
Augustino, Hieronymo, Ambrosio, Grego-
rio, Basilio, Athanasio, Nazianzeno, Chryso-
stomo, Thomæ, Bonaventuræ, & aliis san-
ctissimis Doctoribus negaverit lucem ad ve-
ram intelligentiam Scripturarum; & quod
eam communicaverit hominibus superbiâ,
ambitione, maledicentiâ, & luxuriâ plenis.

C A P U T X I.

*Nonum caput idem probandi, quia evidens est
evidentiâ facti, Lutherum & Calvinum &
alios sectarios, qui ab Ecclesia Romana in de-
cimo sexto sæculo recesserunt; renovâsse hære-
ses antiquas, à vera Christi Ecclesia damnatas;
nimirum ab Ecclesia Romana intra quinque
priora secula, quando, etiam ex confessione
adversariorum, vera erat Christi Ecclesia.*

CCCXIV **E**cclesiam Romanam fuisse
veram Christi Ecclesiâ prio-
ribus illis sæculis, fatentur adversarii, ut vidi-
mus

mus c.2. Certissimum autem est, esse verè hæreticas illas doctrinas, quas vera Christi Ecclesia hæreticas esse declaravit, & ut tales damnavit. Quia, cum sit *columna & firmamentum veritatis*, nequit errare in articulis, quos credit & credendos proponit; ac proinde certum est, esse verè hæreticos, qui pertinaciter defendunt propositiones à vera Christi Ecclesia damnatas; ut hæreticas. Si ergo probaverimus, Lutherum & Calvinum pertinaciter tradidisse propositiones damnatas ab Ecclesia Romana in illis primis sæculis, quando etiam ex confessione adversariorum erat vera Christi Ecclesia: evincemus, illos esse verè & indubitanter hæreticos. Quod autè res ita se habeat, evincit Bellarm. tom. 2 l.4 de notis Ecclesiæ c. 6, & cum eo Lessius; rectè probans, religionem Lutheranam & Calvinisticam nihil aliud esse, quam diversarum hæresum, à diversis hæresiarchis diversis sæculis traditarum, & olim per Ecclesiam Catholicam proscriptarum, colluviem; idque multiplici exemplo probat.

CCCXV I Uterque, nimirum Lutherus & Calvinus, docet, nullam esse arbitrii libertatem: & Lutherus art. 39. affirmat, hoc esse præci-

puum suæ Religionis fundamentum. At illa fuit olim hæresis Simonis Magi & Valentini, teste Augustino, hæresi II; & Manichæorū, & Wiclefi, &c.

2 Uterque docet, Deum esse impulsorem omnium scelerum, & omnia mala fieri ex vi decreti divini. At olim fuit ista hæresis Simonis Magi & Florini.

3 Uterque docet, non esse necessaria ad salutem bona opera, sed sufficere fidem. At hæc fuit olim hæresis Simonis Magi; & Eunomianorum circa annum Domini 360.

4 Uterque docet, habenti fidem nihil obesse peccata, quantumlibet multa & magna; horum enim malitiam non imputari credenti. Quæ olim etiam fuit hæresis Eunomianorum, & Basilidis, & Carpocratis, teste Irenæo, lib. I, cap. 23. & 24.

5 Calvinus negat præsentiam realem Corporis Christi in Eucharistia. At hæc olim fuit hæresis Berengarii circa annum Domini 1051. Ubi notandum primo, etsi aliqui privatim ante Berengarium ea de re dubitaverint, & questionem moverint; neminem tamen fuisse ausum hoc publice profiteri, ut testantur Hugo Lingonensis & Adelmanus Brixienfis, in Epistolis suis ad Berengarium, & Paschasius lib. de verbis.

evidenter demonstrata. Cap. II. 407
verbis institutionis hujus Sacramenti. Itaq; fuit
hac constans Ecclesia doctrina, omnibus here-
siarchis intacta, usque ad tempora Berengarii.
Secundo, sententiam Berengarii ipso vivo fuisse
in quinque Conciliis damnatam, & ipsum Be-
rengarium ter suam sententiam abjurasse, &
tandem in fide Catholica cum magna pœnitentia
mortuum: quo mortuo extincta fuit illa hæresis
fere per ducentos annos, usque ad Lollardos, qui
eam renovarunt, ut colligitur ex Trithemio in
Chronico Hirsaugiensi ad annum 1315. Eam-
dem postea tenuit Wiclef, ut patet ex art. ejus 3.
Quo mortuo, rursus extincta fuit per centum
circiter annos, usque dum Zwinglius eam re-
stituit, quem Calvinus & aliquot alii sunt se-
cuti. Ex quo manifeste apparet, hanc sen-
tentiam semper in Ecclesia pro manifesta hæresi
habitam. Itaque, vel Ecclesia semper in pri-
mario fidei articulo erravit, & sic numquam
Ecclesia Christi fuit; vel sententia illa, que rea-
lem Corporis Christi præsentiam in Eucharis-
tia abrogat, revera hæresis est.

6 Uterque tollit omnes traditiones, & solis
Scripturis omnia vult contineri. Eadem fuit
hæresis Arianorum, ut constat ex D. Augustino:
item Nestorii, Dioscori, & Eutychetis, ut ha-
beatur in septima Synodo Act. I. 7 Uter-

7 Uterque negat Sacramentum Penitentiae & Confirmationis. Eamdem haeresim olim docuere Novatiani, teste Cypriano & Theodoro.

8 Uterque docet, Ecclesiam solis bonis constare; & Ecclesiam olim visibilem, à multis saeculis periisse; hoc vero tempore in sua tantum coetu existere. Similis fuit haeresis Donatistarum, ut testatur D. Augustinus lib. de unitate Ecclesiae cap. 12.

9 Uterque docet, non esse orandum pro defunctis; non esse servandum jejunium Quadragesimae, aut alia statuta jejunia, sed cum cuique visum fuerit jejunandum. Idem olim docuere Aëtiani, teste Epiphanio haeresi 75, & Augustino lib. de haeresib. cap. 33.

10 Uterque negat venerationem sacrarum Reliquiarum, Imaginum Christi ac Sanctorum, & vocat idololatriam. Idem olim fecit Vigilantius, teste Hieronymo; fecere & Iconomachi, teste Zonara, Cedreno, Nicephoro de Iconomachis.

Ex his luce meridiana clarins est praecipua dogmata, quibus Lutherana & Calvinistica religiones constant, esse haereses antiquas, olim ab Ecclesia damnatas, eaque semper pro haeresibus in Ecclesia habita fuisse. Idem facile de ceteris ostendi

evidenter demonstrata. Cap. II. 409
ostendi potest. Unde sequitur, has religiones ni-
hil esse aliud, quam veterum & jam olim pro-
fligatarum hæresum colluviem.

CAPUT XII.

Decimum caput idem probandi, quia omnes se-
ctarii, qui sub specioso titulo Reformationis fi-
dem Ecclesiæ Romanæ impugnarunt, in manife-
stos & crassissimos errores prolapsi sunt, quos
eleganter describit Bellarminus. Ubi specialiter
ponderatur error de fide speciali justificante.

§. I.

CCCXVI **A**lienati sunt peccatores à vul-
va, erraverunt ab utero, locuti
sunt falsa, aiebat David Ps. 57. Quæ verba
exponens S. Augustinus, ita verissime scripsit
in illum locum: In ventre Ecclesiæ, inquit, ve-
ritas manet: quisquis ab hoc ventre Ecclesiæ se-
paratus fuerit, necesse est ut falsa loquatur. Et
mox repetens dicta; Necesse est, subjungit, ut
falsa loquatur, qui aut concipi noluit in ventre
Ecclesiæ, aut quem conceptum mater excussit;
sicut excussit Lutherum & Calvinum sola
Ecclesiæ Catholica Romana, quæ est co-
lumna & firmamentum veritatis; & quæ su-

pra solidam Petram fundata est, nihil contra rationem tradere potest, licet multa supra rationem credenda proponat; nihil turpe præcipere; ac proinde illi soli convenit illa nota veræ Ecclesiæ, quæ exprimitur illis verbis, *Credo sanctam Ecclesiam. Constat enim Ecclesiam sanctam dici, quia ejus Professio sancta est, nihil continens falsum quoad fidei doctrinam, nihil injustum quoad doctrinam morum, ut inquit Bellarminus, lib. 4 de notis Ecclesiæ notâ octavâ.*

CCCXVII Quam verè dixerit Augustinus, *necesse esse, ut falsa loquatur, qui à ventre Ecclesiæ separatus est*, evidentissimè patet ex densissimis & palpabilibus tenebris, quæ offusæ sunt supra mentes hæreticorum hujus sæculi, qui cum sapientissimi omnium hominum videri velint, tamen ea dicunt interdum, ea proferunt in medium, ea pro Evangelio venditant, quæ somnia ac deliramenta esse, pueri quoque ac anus etiam decrepitæ intelligerent, ut inquit Bellarminus, in Præfatione ad primum suum controversiarum tomum, & inductione eleganter probat. *Quid magis impium (inquit) ac stultum fingi potest, quam Deum, qui fons est bonitatis & justitiæ, aucto-*

evidenter demonstrata. C. 12 §. 1. 411
rem omnium scelerum & flagitiorum facere?
At hoc facit Petrus Martyr, in commentario
libri secundi Regum; nec non Ioannes Calvi-
nus, in lib. Instit. 1 cap. 18 §. 4.

CCCXVIII Quid magis puerile & in-
eptum, quam dicere Deum in lapide, vere &
proprie esse lapidem; in ferro, ferrum; in trun-
co, truncum; in stipite, stipitem; in rebus omni-
bus, res omnes? At hoc docet Michaël Servetus
in epistola sexta ad Calvinum. Quid magis ab-
surdum & contra omnem non solum rationem,
sed etiam sensum, quam palam asserere, infan-
tes dum baptizantur, exemplo S. Ioannis Ba-
ptista, divinas quasdam motiones internis sen-
sibus percipere, promissiones Evangelicas audi-
re, & promittenti Deo fidem habere? At hoc
palam asserit Martinus Lutherus, in Commen-
tario tertii capitis Epistolæ ad Galatas; & quæ
eum secuti sunt Centuriatores, centuriâ 2, c. 4.
nec saltem reverentur S. Augustinum, qui in
epistola ad Dardanum, quæst. 2, scriptum reli-
quit; si propter unum Ioannem credibile est,
infantes omnes ante ætatem consilio & ratione
uti; etiã propter asinam Balaam, quæ sapienter
aliquando locuta est, admonendos esse homines,
in deliberationibus suis asinina expectare con-
silia.

CCCXIX

CCCXIX Deinde, quis non obstupescat, potuisse homines reperiri, qui sibi persuaderent, nihil aliud ad justificationem impiorum requiri, quam ut certo statuant, se esse justos & sibi remissa esse peccata, ut jam non opinio à veritate rei, sed è contrario rei veritas ab opinione dependeat? Et tamen hoc ipsum incredibile paradoxum, est articulus quartus illius celeberrimæ Augustanæ confessionis, quæ pro Evangelio est maximæ parti nostræ temporis hæreticorum.

CCCXX Quid jam de Ioanne Wiclefo dicemus, cujus hic est articulus sextus, in Concilio Constantiensi damnatus Sess. 8, Deus debet obedire diabolo. Quid de Ioanne Calvino, qui in Libro Institut. 2 c. 16 tam serio, tam ex proposito docet, Dominum nostrum Iesum Christum (quod certè piæ aures audire recusant) cruciatus gehennæ cum damnatis ac reprobis spiritibus aliquando pertulisse? Unde etiam exstiterunt postea qui dicerent, Christum in cruce desperasse, atque adeo ad inferos esse damnatum. Quam tetrâ, putas, caligine tenebatur animus ille, qui tantam impietatem cogitare potuit? Sed quo in loco ponemus Martini Lutheri verba illa, quæ is in libro de Conciliis scripta reliquit? Mihi paulo ante negotium fuit cum

Ne-

Nestorianis, qui pertinacissime contra disputabant, quod Divinitas Christi non possit pati. *En tibi, Christiane Lector, quibus non tam erroribus laborant, quam furoribus agitantur; quibus tenebris involvuntur; in qua precipitia ruunt, qui semel circa fidem naufragium fecerunt.*

CCCXXI Haecenus ibi Bellarminus, qui id fusius probat lib. de notis Ecclesiæ cap. 11. Quid potest magis absurdum excogitari, quam id, quod scripsit Lutherus libro de captivitate Babilonica cap. de Baptismo? *Vides, quam dives sit homo Christianus, sive baptizatus; qui etiam volens non potest perdere salutem suam quantiscumque peccatis, nisi nolit credere. Nulla enim peccata possunt eum damnare, nisi sola incredulitas: cetera omnia, si redeat vel stet fides in promissionem divinam, in momento absorbentur per eandem fidem. Quid absurdius eo, quod Calvinus statuit l. 3 Institut. c. 2 §. 11 & 12? Fidem Calvinistarum non posse amitti, eamque efficere, ut nullum peccatum Calvinistis imputetur. Et quod eodem c. 2 §. 38, tamquam veritatem certissimam ponit? videlicet, omnes Calvinistas esse electos ante omnem operum prævisionem: neque solum esse electos, sed etiam*
hoc

hoc ipsum debere firmissime credere, adeo ut si
 quis ea de re aliquo modo dubitet, horrende sit
 sacrilegus, miserrime cæcus, Spiritui sancto in-
 iurius, & prima pietatis tyrocinia ignoret. De
 fide hac hæreticorum nostri seculi merito
 dixit noster Maldonatus in c. 9 Matt. *Fidts,*
quam isti nuper invenerunt, figmentum est, chi-
mæra est. Unde Academia Lovanienfis, in ar-
 ticularis adversus Lutheranos art. 9, sic habet.
Fides, qua quis firmiter credit & certo statuit,
per Christum sibi esse remissa peccata, seque
possessurum vitam æternam, nullum habet in
Scripturis testimonium; imò eisdem adversatur.
 Neque componitur cum eorum primo prin-
 cipio, nimirum nihil posse fide divina credi,
 nisi id, quod à Deo in Scripturis est reve-
 latum. Quæro enim, in quo loco sit à Deo re-
 velatum, eum vere coram Deo esse justum,
 qui firmiter credit se esse electum, & non
 posse perire, sibi que peccata omnia esse di-
 missa? Quomodo hoc componitur cum illa
 sententia D. Petri, *Cum timore, & tremore ve-*
stram salutem operamini? Quomodo cum illo
 Prov. 20; *Quis potest dicere, Mundum est cor*
meum, Purus sum à peccato? Quomodo cum
 illo Ecclesiast. 9; *Nescit homo, utrum odio, vel*
amore dignus sit; sed omnia in futurum reser-

evidenter demonstrata. C. 12 §. 1. 415
vantur incerta ? Unde merito Tridentinum
Sess. 6 c. 9 sic statuit : Sicut nemo pius de Dei
misericordia, de Christi merito, deque Sacra-
mentorum virtute & efficacia dubitare debet ;
sic quilibet, dum se ipsum suamque propriam
infirmiorem & indispositionem respicit, de sua
gratia formidare & timere potest : cum nullus
scire valeat, certitudine fidei cui non potest
subesse falsum, se gratiam Dei esse consecutum.
Et c. 16. Et quia in multis offendimus omnes,
unusquisque sicut misericordiam & bonitatem,
ita severitatem & iudicium ante oculos habere
debet; neque se ipsum aliquis, etiamsi nihil sibi
consciis fuerit, iudicare; quoniam omnis homi-
num vita, non humano iudicio examinanda
& iudicanda est, sed Dei.

§. II.

Ex sententia Calvinii & Lutheri, de fide specia-
li justificante, sequitur, damnatos fuisse omnes
Catholicos, qui à tempore Apostolorum extite-
runt in Ecclesia usque ad Lutherum.

CCCXXII **D**Einde, quia, ut arguunt Bel-
larminus lib. de notis Eccle-
siæ cap. 11, & Lessius ratione 12. si vera foret
b. c. c.

hæc doctrina Lutheri & Calvinii de fide justificante, sequeretur, omnes Catholicos, qui à temporibus Apostolorum hæc tenent extiterunt, damnatos esse & æternis ignibus addictos, Quia juxta hujus religionis primarium dogma, caruerunt fide justificante, ac proinde justitia coram Deo: unde permanserunt in peccatis suis, & in illis sunt mortui. Fides enim necessaria ad justificationem, ut hæc religio tradit, est illa, qua homo firmiter credit se esse justum coram Deo propter Christi satisfactionem, quæ ipsi per hanc fidem applicetur & imputetur. Hanc autem fidem constat orbi ignotam usque ad Lutheri tempora fuisse. Neque ipse diffitetur, sed potius gloriatur, quod veram rationem justificationis, à veteribus obscuratam, mundo patefecerit. Idem constat ex omnium veterum scriptis; tum quia præter fidem Christi requirunt internam voluntatis mutationem, & propositum servandi totam legem; tum quia damnant illam securitatem salutis, & volunt, hominem cum timore & tremore salutem suam operari, & semper esse sollicitum. Unde fidem illam specialem, qua quis certo credat se esse justum, omnes rejiciunt ut meram præsumptionem. Et si enim credendum sit, Christum ex parte sua pro nobis plenissime

sa-

satisfecisse; non tamen constat nobis, utrum nos fecerimus ea omnia, quæ ex parte nostra sunt necessaria, ut hujus satisfactionis simus participes, & utrum ea aliquando non excidemus. Perspicuum igitur est, omnes veteres hac fide caruisse. Damnati sunt igitur tot sancti Patres, tot Martyres, tot Virgines. Quis autem non videat, hæc esse absurda, incredibilia, & blasphema?

CAPUT XIII.

Ultimum caput probandi, solam Ecclesiam Catholicam Romanam esse veram Christi Ecclesiam, quia illi soli conveniunt notæ veræ Ecclesiæ, nempe quod sit Visibilis, & conspicua; quod sit Una, Sancta, Catholica, & Apostolica.

§. I.

Ostenditur, illam solam esse verè Visibilem.

CCCXXIII **O**Mnes has proprietates debere convenire Ecclesiæ, à Christo supra Petrum fundatæ; constat ex Scripturis. Imprimis, quod debeat esse visibilis & conspicua, ostendimus cap. 1 §. 2, & ostendunt omnes Controversiæ, contra hæreticos hujus temporis, asserentes, Ecclesiam

fiam esse invisibilem & soli Deo cognitanti. Et sane, quod vera Christi Ecclesia sit visibilis, probatur ex Scripturis omnibus, ubicumque invenitur nomen *Ecclesia*. Nam, ut inquit Bellarm. l. de notis Ecclesiæ c. 12; *Semper nomine Ecclesiæ, visibilis congregatio significatur; nec unum saltem locum Calvinus proferre potuit, nec protulit, ubi hoc nomen tribueretur congregationi invisibili; quod late ibi ostendit.* Et probatur ex definitione Ecclesiæ, quam, rejectis hæreticorum sententiis, statuit Bellarminus tom. 2 l. 3 de Ecclesia militante. Nam *Ecclesia est congregatio hominum utentium Sacramentis eisdem, & fidem Christi profitentium, sub regimine legitimorum Pastorum*: ergo est visibilis; idque ipsum nomen & ratio Ecclesiæ persuadet. Ecclesia enim est societas quædam, non Angelorum, nec animarum, sed hominum; non potest autem dici societas hominum, nisi in externis & visibilibus signis consistat. Ut enim inquit Augustinus lib. 19; contra Faustum cap. 11, *in nullum nomen religionis, seu verum seu falsum, coagulari homines possunt, nisi aliquo signaculorum vel sacramentorum visibilium consortio alligentur.* Ratio est; quia non est societas,

cietas, nisi se cognoscant ii qui dicuntur socii; non possunt autem homines se agnoscere, nisi societatis vincula sint externa & visibilia.

CCCXXIV Et sane, cum extra Ecclesiam veram Christi nemo possit salvari, ut supra ostendimus; & Deus velit omnes homines salvos fieri; vult, ut omnes veniant ad Ecclesiam veram Christi, & in illa perseverent, & ad id omnes obligat sub poena æternæ mortis: hoc autem fieri non posset, nisi Ecclesia vera Christi esset visibilis. Quomodo enim obligare posset homines ad intrandum in Ecclesiam invisibilem? ergo debet esse visibilis vera Christi Ecclesia. Nec solum debet esse visibilis, sed ita conspicua, ut sit veluti civitas supra montem posita, & veluti tabernaculum in sole; id est talibus notis, prærogativis, & excellentiis ornata, ut quicumque serio & ex animo quærunt suam salutem, possint cognoscere, quænam sit vera Christi Ecclesia, in qua sola potest salus obtineri. Quæ prærogativa nulli hæreticorum sectæ, sed soli Ecclesiæ Catholice Romanæ convenit. Illa sola habet evidentiâ signa credibilitatis, quæ ostendunt, ipsam habere Deum.

Deum authorem, & esse illam eandem quam Christus supra Petrum fundavit; ut evincunt argumenta, quæ in hoc tractatu confecimus. Ergo sola Ecclesia Catholica est visibilis, ea visibilitate quæ est propria veræ Ecclesiæ Christi, ita scilicet, ut omnes teneantur illi se adungere, & in illa perseverare; id est, Capiti ejus obedire, & cæteris ejus membris communicare; ut docent Cyprianus, in libro de simplicitate Prælatorum; Hieronymus, in epistola ad Damasum de nomine Hypostasis; & Augustinus, lib. 5, de Baptismo, cap. 1.

§. II.

Ostenditur, illam solam esse vere Unam.

CCCXXV **R**ursus sola Ecclesia Catholica est *Una*, unitate requisita ad constituendam veram Ecclesiam Christi. Dicitur enim Ecclesia *Una*, propter unionem & consensum eorum qui in Ecclesia sunt; omnes enim unam eandemque fidem profitentur, juxta illud Ephes. 4. 5. *Unus Dominus, una fides, unum baptisma.* Ut autem præclare notat P. Valentia, *Ecclesia Christi, non ob eam rem solum ab unitate fidei &*
do-

doctrina Una esse dicitur, quoniam omnes qui sunt ejus membra, in eadem fide atque doctrina, quamdiu sunt ejus membra, consentiunt actu; sed quoniam modum atque rationem ipsa tener, accommodatissimam ad consensionem fidei tuendam. Ratio est perspicua. Quia si Ecclesiæ unitatem in actuali tantum doctrinæ fidei consensione, & non præcipue in ratione ad consensum accommodatissima poneremus; nil omnino magnum Ecclesiæ Christi tribueremus, nec posset Ecclesia Catholica per eam notam ab hæreticorum conventiculis ullo modo discerni. Quis enim unquam fuit hæreticorum cætus tam exiguus, in quo, qui ad eum pertinuerunt, quamdiu pertinuerunt, non fuerint actu de doctrina consentientes? Cum enim primum aliquis prudens ac sciens ab aliis dissentit, censetur ad eum cætum non pertinere. Præcipua ergo ratio, ob quam ab unitate doctrinæ Ecclesia Catholica dicitur Una, est, quia ipsa unum Pastorem rectissime agnoscit, cujus judicio in fidei controversiis acquiescit; vel quia, ut Cyprianus Epist. 9. Ecclesiam definit, ipsa est plebs Sacerdoti adunata, & Pastori suo grex adhærens. Atque adeo quam facile est in Ecclesia cognoscere, quid summus Pontifex in fidei quæstionibus è

Cathedra, id est universam obligando Ecclesiam, decernat; tam est Ecclesiae facile, retinere in doctrina fidei consensum: è contra vero, haereticorum omnium conventicula, dum Scripturarum atque adeo fidei explicationem alicui certae auctoritati, tamquam divina assistentia infallibili, non committunt; sed unicuique Scripturam solam, ut unicam ac sufficientem fidei magistram, designant; necesse est, ut in tot sententias de fide diversas distrahantur, quot sunt fere capita. Ergo ideo Christi Ecclesia una est unitate doctrinae, quia omnia membra Capiti in credendo adherere debent; Et ideo Cyprianus agebat, Exordium ab unitate proficiscitur, ut Ecclesia una monstretur; & Hieronymus, propterea inter duodecim unus eligitur, ut capite constituto, schismatis tollatur occasio.

CCCXXVI Quare sola Ecclesia Catholica est vere Una: quia in illa sola datur regula visibilis, infallibilis ad decidendas fidei & morum controversias, & proponendum fidelibus cum infallibilitate, quid credere debeant; nempe Romanus Pontifex, vel cum Concilio generali, vel sine illo, dum è Cathedra Petri totam Ecclesiam instruit de iis
quæ

quæ credere debet. Ut enim inquit D. Thomas 4 contra gentes cap. 76, *ad unitatem Ecclesiæ requiritur, quod omnes fideles in fide conveniant: circa ea vero, quæ fidei sunt, contingit quæstiones moveri; per diversitatem autem sententiarum divideretur Ecclesiæ, nisi in unitate per sententiam unius conservaretur.* Sententia autem unius, nempe Romani Pontificis, semper est necessaria ad conservandam unitatem fidei. Quamvis enim res fidei determinentur in Concilio Generali, est necessaria sententia Romani Pontificis, intimantis toti Ecclesiæ decreta Concilii, & obligantis per modum Superioris ad illa suscipienda; ut ostendimus cap 6. §. 12.

CCCXXVII Quare, ad unitatem fidei conservandam, debent omnia Ecclesiæ membra esse unita cum Capite, nempe cum Romano Pontifice; eamque fidei doctrinam amplecti, quam Ecclesiæ Romana, quæ matrix est omnium Ecclesiarum, tenet, & Cathedra Petri credendam proponit. Idque ab experientia constat. Ut enim observat Cardinalis Bellarminus; *Videmus, omnes Ecclesias, quæ ab isto Capite se diviserunt, tamquam ramos præcisos à radice, continuo aruisse. Certe Ecclesiæ*
Asia-

*Asiatica & Africana, quæ quondam ita flore-
bant, ut numerosissima Concilia celebrarent; &
semper haberent multos homines, vel doctrinâ,
vel sanctitate, vel utroque Dei munere claris-
simos; ab eo tempore, quo à Romana Ecclesia
schisma fecerunt, nulla Concilia celebrârunt,
nullos habuerunt homines, famâ sanctitatis
aut doctrinæ toti orbi notos, & nunc in sum-
ma ignorantie versantur.*

CCCXXVIII Ex hac unione membro-
rum cum capite, oritur concordia membro-
rum inter se, & conspiratio in doctrina fidei,
ut eadem dogmata ubique terrarum credant
omnes Catholici. Propterea concordia ista
est signum regni Dei, quod debet stare in
æternum; sicut è contra discordia est signum
regni diaboli, quod corruere debet. Nam, ut
inquit Christus Matth. 12, *omne regnum in
seipsum divisum desolabitur; & ut ait Apo-
stolus 1 Corinth. 14, Non est Deus divisionis,
sed pacis.* Et idcirco diabolus, ut Ecclesiam
everteret, introduxit hæreses. Ut enim dicit
Augustinus l. 18 de Civitate Dei c. 52, dia-
bolus cupit per hæreticos efficere, ut in Ec-
clesia Christi sint liberæ dissensiones, sicut
erant in Academiis Philosophorum; ut sicut
illæ

illæ per multas divisiones tandem intereunt, & ab invicem consumuntur, ita fieret in Ecclesia.

CCCXXIX Et hinc defumit Bellarminus clarissimum argumentum, ad convincendum, solam Ecclesiam Catholicam Romanam esse veram Christi Ecclesiam: *Siquidem in illa, imprimis omnes Scriptores sacri mirificè inter se consentiunt; licet fuerint homines diversi, & in locis, temporibus ac linguis diversis scripserint: quod pro re planè divina B. Augustinus observat, lib. 18 de Civit. Dei c. 41. Deinde omnia legitimorum Conciliorum & Pontificum decreta, etiam in omnibus dogmatibus, inter se conveniunt; licet edita sint à diversis hominibus, diversis locis, temporibus, occasionibus, & contra diversissimas, imo sæpe contrarias hæreses; quod est apertum signum unius & ejusdem Spiritûs sancti, hanc Ecclesiam gubernantis. Hoc autem esse verum, ostendit diligentia hæreticorum; qui, licet omnia diligenter evolverint, tamen non invenerunt quidquam ullius momenti, quod reprehendere possent, ut in disputatione de Conciliis ostendimus. Denique, nunc omnes Catholici, toto orbe dispersi, de omnibus dogmatibus fidei sentiunt*

T

idem

idem, nec possunt aliter sentire; cum omnes subjiciant sensum suum sensui unius & ejusdem summi Pastoris, ex Cathedra Petri cum consilio aliorum Pastorum Ecclesiam dirigentis.

§. III.

Sicut Ecclesiæ Romanæ unitas probat ejus veritatem, ita innumera secta suborta ex hæresi Lutherana & Calviniana, & contradictiones suorum authorum, probant earum falsitatem.

CCCXXX **E**Contra vero constat, nullam unquam fuisse sectam hæreticorum, quæ unitatem in doctrina suæ fidei diu conservaverit, & quæ intra paucum tempus non sit divisa in alias plures; quod longa inductione probat Bellarminus l. de notis Ecclesiæ cap. 10. Nobis sufficiat enarrare, quod hæreticis nostri temporis accidit. Constat namque ex Federico Staphilo, in libello de concordia discipulorum Lutheri; Lutheranos, vix dum natos, dividi cœpisse in Anabaptistas, Confessionistas, & Sacramentarios; & rursus singulas sectas in alias & alias, usque ad 34; & hoc quidem tempore Staphili. *Nunc autem* (ajebat Bellarminus an. 1583, in quo

quo primo prodiit in lucem secundus controversiarum tomus) numerantur fere centum diversissimæ sectæ, ab uno Luthero prodeuntes. Ipsa confessio Augustana, quæ medullam Lutheranismi continet, ita intra paucos annos immutata est, ut nesciant ipsi, quænam sit vera Confessio Augustana. Ut enim ait Fabritius Leodius in sua Harmonia, qui contulit unam editionem illius factam an. 1530, cum alia facta an. 1540; una est duplo major alia. Ex eadem Provincia Saxonica (inquit Bellarminus) intra decem annos, prodierunt contradictoriæ sententiæ, publico nomine editæ, de re omnium gravissima. Nam in Synodo Dresdensi, an. 1571 celebrata, communi consensu exploserunt sententiam Brentii, Illyrici, & aliorum, de persona Christi; & tamen illam ipsam sententiam à se damnatam, an. 1580 in libro concordia publice receperunt; & tam Synodus quam Concordia Wittembergæ impressa sunt, & ejusdem Principis auctoritatem præferunt.

CCCXXXI Et hoc quidem magna DEI providentia fit, ut hæretici consistentiam non habeant in suis doctrinis; nam hoc pacto hereses se ipsas consumunt. Divisio enim earum

rum non est mathematica, quæ procedat in infinitum; unde Isaia 19 dicitur; *Concurrere faciam Ægyptios adversus Ægyptios*. Et propterea Hilarius, 7 de Trinitate, merito dixit: *Bellum hæreticorum pax Ecclesiæ est*. Ipse Lutherus, qui de se dicebat, *Certus sum, quod doctrinam meam de celo habeam. Certissimus sum, quod doctrina mea non sit mea, sed Christi*; sibi ipsi ita contrarius fuit, ut de sola communione Eucharistiæ, ex ipsius operibus ipso vivo, notatæ sint 36 contradictiones à Gaspare Querhamer Laico Saxone, & in lucem editæ in libello, cui titulus *Tabula contradictionum Lutheri*, cum máxima confusione Lutheri & authoritatis ipsius imminutione. De communione sub utraque specie, notatæ sunt à Doctore Cochlæo contradictiones septem; librumque hic Doctor composuit, cui titulus *Lutherus septiceps*; qui nihil aliud continet, quam Lutheri contradictiones & contrarias de omnibus pene controversis articulis sententias, suis verbis expressas. Ex quo evidenter deprehenditur, Lutherum seductorem fuisse.

CCCXXXII Contradictiones Calvinipalam detexit Nicolaus Romæus, in Calvinino-

nova effigie, spectaculo 9 §. 4 pag. 565; ubi loquitur: Porro quam turpiter secum ipse subinde pugnet, nimis prolixum esset referre. Longe prolixius est, Calvine, tuas tecum pugnas referre: nam ut de aliis tuis libris nihil dicam, tota tua Institutio est cento contradictionum; ut artis sit invenire locum, non, ubi sint; sed ubi non sint; ut non tanta nobiscum, quanta tecum tibi sit contentio; ut à nullo possit Calvinus, quam à Calvino vehementius refutari. Nam ut in tua doctrina nihil certi te habere ostendas, instar arundinis, modo huc, modo illuc, imaginationis tue vento agitaris. Itaque non tantum in una hac Institutione fœdissime tecum pugnas, sed in uno libro, in uno capite, in una sectione, in una & eadem periodo seu oratione.

CCCXXXIII Hactenus ille, qui hujus rei statim probationes subjungit. Hinc Richardus Ardekin, author modernus, tom. I Theologiæ tripartitæ tract. 3 in proëmio articuli primi, agens de sectis modernis, proferimus (inquit) discordias ac pugnas novatorum, ac imprimis Lutheri, non tantum cum vera Ecclesia, sed etiam cum sacris litteris impie depravatis, cum se ipso sibi contrario, & cum suis Affectis per sectas innumeras ab ipso dissi-

430 *Veritas Religionis Catholicae*
dentibus, dum confusione plusquam Babylonica
idem ipse destruit & edificat, affirmat & negat,
neque secum ipse consentit, dum tamen toties
Ecclesiae consensui se opponit: quod manifestum
est erroris ac spiritus satanici indicium. Ut
hinc tandem videant moderni sectarii, quam
devios sibi duces in via salutis elegerint, & de-
sertis tandem erroribus ad rectam Ecclesiae se-
mitam tempestive regrediantur.

CCCXXXIV Haecenus ille, qui post-
quam descripsit innumeras sectarum diffe-
rentias inter se dissidentes, quae ex haeresi Lu-
theri & Calvinii, in Germania, in Anglia, &
Hollandia prodire, ut merito dici possit,
Quot capita, tot sententiae; articulo 3, sic con-
cludit: Et erit etiamnum aliquis adeo fatuus
& excors, ut serio in animum inducat suum,
infinitam Dei sapientiam reformandae suae Ec-
clesiae hanc haereseum, inter se mutuo dissectarum
atque armatarum, colluviem in orbem immi-
sisse. Quae cum antiquam Ecclesiam evertat,
neque per se novam, nisi mere Babyloniam
constituat; quid aliud restat, quam ut omnem
Christi Ecclesiam e mundo eliminat? Quis igitur
erit, nisi rationis penitus expers, qui sibi si-
nat persuaderi; huic portentosa tot capitum

Hydra spiritum inesse divinum, qui audiri debeat, contra auctoritatem & vocem totius Ecclesiae Romanae; quae constanti sedecim saeculorum decursu suam fidem, caelestibus signis comprobata, summo animorum dogmatumq; consensu, per orbem pæne universum propagavit.

§. IV.

Ostenditur, solam Ecclesiam Romanam esse Sanctam.

CCCXXXV Sicut Ecclesia vera Christi debet esse una, ita debet esse sancta, ut constat ex Symbolo Constantino-politano, *Credo in unam sanctam Ecclesiam*; imo ex Symbolo Apostolorum, *Credo in sanctam Ecclesiam*. Dicitur autem Ecclesia sancta ex multiplici capite. 1 Quia nullus potest in illam ingredi, nisi per Baptismum, habentem vim sanctificandi animam. Unde dicebat Apostolus I Corinth. 6, 11, *Hæc quidem fuistis, sed abluti estis, sed sanctificati estis*. 2 Quia extra illam vera sanctitas esse non potest, cum vera sanctitas siue vera fide reperiri non valeat, nec vera fides extra illam inveniri possit, ut supra ostendimus. 3. Omnia

ipsius Sacramenta, & cæremoniæ, & ritus ad sanctitatem ordinantur; eo enim spectant, ut vel sancti efficiamur, vel in sanctitate crescamus & confirmemur. 4 Quia Christus, qui est ejus sponsus & caput primum, est Sanctus Sanctorum. Denique Ecclesia sancta dicitur, ob professionem & doctrinam. Ut enim inquit Bellarminus, l. de notis Ecclesiæ c. 11; *Constat, sanctam dici Ecclesiam, quia professio ejus est sancta, nihil continens falsum quoad fidei doctrinam, nihil injustum quoad doctrinam morum. Unde Psal. 18 appellatur lex Domini immaculata, testimonium Domini fidele, preceptum Domini lucidum. Unde merito Augustinus, l. 2 de Civitate c. 18 dixit: Nihil in Christianis Ecclesiis turpe & flagitiosum spectandum imitandumque proponitur; ubi veri Dei aut precepta insinuantur, aut miracula narrantur, aut dona laudantur, aut beneficia postulantur; & l. 12 c. 7. Persuadebatur veritas, nova consuetudini, sed non contraria rationi. Religio namque Christiana, hoc ipso quod veram doctrinam de Deo revelatam contineat, continet multa mysteria supernaturalia, quæ sunt supra rationem, & per rationem probari non possunt; ut mysterium*

Trini-

Trinitatis, & Incarnationis, & præsentia realis Christi in Eucharistia: licet autem sint supra rationem, & non possint recte intelligi nisi prius credantur, non sunt tamen contraria rationi.

CCCXXXVI *Ex hac nota* (subdit ubi supra Bellarminus,) *evidenter ostenditur, nullam esse veram Ecclesiam, nisi nostram: nulla enim est secta, vel Paganorum, vel Turcarum, vel Hæreticorum, quæ non contineat aliquot exploratos errores, & rectæ rationi manifeste contrarios. Quod ibi longa inductione probat, & nos contra Mahumetanos ostendimus: de sectis autem Hæreticorum nostri temporis demonstravimus paulo supra, nimirum c. 12 hujus libri. Ergo manifestum est, inter Religiones, solam Christianam; & inter Christianas, solam Catholicam Romanam esse veram.*

§. V.

Ostenditur, solam Ecclesiam Romanam esse Catholicam, ac proinde solam illam esse veram Christi Ecclesiam.

CCCXXXVIII **E**X hoc etiam capite va-
lidè probatur, solam
T 5 Ec-

Ecclesiam Romanam esse veram Christi Ecclesiam. Quia illa Religio censenda est vera Christi Religio, quæ semper habita & dicta fuit Catholica, juxta illud Symboli, *Credo sanctam Ecclesiam Catholicam*. Atqui sola Ecclesia Romana dicta semper est *Catholica*, ejusque cultores *Catholici*: ergo sola Ecclesia Romana est vera Christi Ecclesia. Minor probatur. Quia quamvis hæretici suis sectis conati sint arrogare nomen *Ecclesiae Catholicae*, & *Catholici* audire curaverint; numquam id obtinere potuerunt; sed ipsi hæretici, vel inviti, nomine *Catholicorum* intelligunt eos, qui sunt sub obedientia Romani Pontificis, & fidem Ecclesiae Romanae tenent, credendo ea quæ Sedes Petri credenda proponit; & quæ Ecclesia particularis Romana, quæ reliquarum Ecclesiarum mater est, credit & tenet: collectioque omnium Ecclesiarum, quæ cum Ecclesia Romana in fide communicant, & Episcopo Romano ut Vicario Christi obediunt, intelligitur nomine Ecclesiae Romanae universalis. Ita observavit Augustinus, lib. contra Epistolam fundamenti c. 4, ubi dicit, quod, *etiamsi omnis hæresis velit videri & dici Catholica Ecclesia,*
tamen

tamen cum interrogantur hæretici à Paganis, ubi ad Catholicam conveniatur; nemo audeat domum suam ostendere. Idem docet Cyrillus Catech. 18 his verbis: Si iveris in aliquam urbem, non petas, ubi sit Ecclesia vel Domus Dei, nam etiam hæretici dicunt, se habere Domum Dei & Ecclesiam; sed petas, ubi sit Catholica Ecclesia; id enim est nomen proprium hujus sanctæ Ecclesiæ, matris omnium nostrum; quasi dicat; Si hoc petas, nullus hæreticus suam Ecclesiam ostendet.

CCCXXXVIII Unde S. Pacianus Episcopus Barcinonensis, qui obiit anno 380, in epistola ad Symphronianum, quæ est de nomine Catholico, in hoc agnoscit divinam providentiam, quæ numquam permisit, ut nomine Ecclesiæ Catholice aliud unquam intelligeretur, quam Ecclesia Romana supra Petrum fundata, quæ successores Petri ut Christi Vicarios reveretur, & cum Sede Petri in fide communicat, Quod argumentum majorem vim habet nunc, quando post sexdecim sæcula numquam Deus permisit, ut Ecclesia Romana à possessione nominis Catholica deturbaretur. Idem argumentum est; hoc nomen non ab hominibus, sed à Deo ipso

impositum esse Ecclesiæ Romanæ; & quod nulla hæreticorum secta, est vera Christi Ecclesia. *At certe* (inquit Pacianus,) *non est ab homine mutuatum, quod per sæcula tanta non cecidit: Catholicum istud, nec Marcionem, nec Apellem, nec Montanum sonat* (addamus nos, nec Lutherum, nec Calvinum &c.) *nec hæreticos sumit Authores.* Et infra: *Christianus mihi nomen est, Catholicus vero cognomen; illud me nuncupat, istud ostendit.* Et ibidem comparat veram Christi Ecclesiam arbori pulcherrimæ, quæ ramos suos in omnem partem diffundit; hæreses vero comparat ramis, quæ variis temporibus à trunco hujus arboris separantur, quin propterea arbor mutetur, sed semper eadem manet. Nomen ergo *Catholica* convenit huic arboris trunco, qui semper manet idem, quamvis rami inutiles ab illo separentur: & sicut illi duntaxat rami vivunt, qui conjuncti sunt & uniti cum trunco; ita illi duntaxat Christiani vivunt vera vita fidei & charitatis, qui sunt uniti per fidem cum Sede Petri; eosdem tenentes articulos, quos tenet Sedes Petri; & qui per obedientiam Romano Pontifici sunt subiecti: qui autem per hæresim separantur à Sede Petri, sunt

sunt veluti rami aridi, à trunco arboris præcisi, qui nomen Catholicorum non participant, quia jam non sunt pars hujus arboris.

CCCXXXIX Hæreticorum sectæ denominantur à suis authoribus, à Marcione Marcionistæ, ab Ario Ariani, à Macedonio Macedoniani, à Nestorio Nestoriani, ab Eutichete Eutichiani, à Luthero Lutherani, à Calvino Calviniani &c. Soli Catholici denominantur à vera Christi fide, *Christiani Catholici*; & denominantur *Catholici Romani*, quia sunt uniti cum matrice omnium Ecclesiarum. nempe cum Romana; & Pontifici Romano, possidenti Sedem Perri, tamquam Christi Vicario obdiunt. Hinc arguit Lactantius lib. 4. cap. 30; hæreticos non esse vere Christianos; quia licet verum Christianismi characterem in Baptismo susceperint; tamen carent vera Christi fide, quia illam per hæresim amiserunt. Cum Marcionista (inquit) aut Ariani nominantur, Christiani esse desierunt; quia Christi nomine amisso, humana & externa vocabula induerunt. Et propterea Hieronymus, in Dialogo contra Luciferianos, in fine dixit: *Sicubi audieris, eos, qui dicuntur Christiani, non à Domino Iesu*
Chri-

Christo, sed à quoquam alio nuncupari, ut Marcionistas, Valentinianos; scito, non Ecclesiam Christi, sed Antichristi esse synagogam. Et Chrysostomus hom. 33. in Acta Apostolorum, Illi, (inquit) habent quosdam, à quibus appellantur; prout enim Hæresiarachæ nomen, ita & secta vocatur: nobis autem nullus vîr nomen dedit, sed fides ipsa. Siquidem à vera Christi fide Catholica denominamur Catholici, & quia illa vera fides non alia est, quam fides Sedis Romanæ, denominamur Catholici Romani.

CCCXL Nec solum nomine Ecclesia Romana Catholica dicitur, sed re ipsa nomine significata: quia Catholicum idem est, ac universale, latissime patens, & ad omnia se extendens. Unde Ecclesia dicitur Catholica seu universalis, tribus de causis. 1 Ratione loci, quia per universum orbem diffusa est; Marci 16. 15: Euntes in mundum universum, prædicate Euangelium omni creaturæ: 2 Ratione temporis, quia semper durabit. Dan. 2. 44: Suscitabit Dominus cæli regnum, quod in æternum non dissipabitur. 3 Ratione hominum salvandorum, quia quotquot salvantur, in visibili Ecclesia salvantur; & nullus ex-

tra eam salvari potest. Hinc patet discrimen inter Ecclesiam Christi & Synagogam Iudeorum. Hac enim nullo istorum modorum fuit Catholica seu universalis. Non primò, quia non fuit diffusa per totum orbem, sed per solam Palæstinam: nec secundo, quia non duravit, nisi certo tempore, nempe usque ad mortem Christi: nec tertio, quia poterant salvari homines extra Synagogam, ut Ninivite & alii. Hæc autem Religio catholica & universalis, est solum Religio Romana, quia (ut scribit Lessius anno 1609) per totum orbem diffusa extendit se ad omnes gentes, & ad omnia regna. Nullum enim est regnum, nulla gens nobis cognita, quæ hanc Religionem, vel non habeat adhuc, vel aliquando non habuerit, vel modo non incipiat habere. Imo hoc tempore pene apud omnes gentes est publica Religionis nostræ professio. Nimirum, apud Iapones, Sinas, Indos, Persas, Tartaros, Turcas, Afros, Brasilos, Peruanos, Mexicanos &c. Omnibus enim his locis reperiuntur Catholici, reperiuntur templa, altaria, imagines Christi & Sanctorum: celebratur Missa, administrantur nostra Sacramenta, servantur festa & jejunia; denique servatur publice Religio Romana, Cui dubium esse

esse possit, eam esse veram Religionem & veram salutis viam, quam Dominus omnibus regnis proponi & predicari voluit, quam in omnibus regnis tempore congruo crescere & fructificare fecit, & quam etiamnum ubique aliquo modo conservat; efficiens, ut Catholici per totum orbem sint dispersi, ut infideles per illos ad veram Religionis notitiam pervenire possint. Extendit etiam se ad omnia tempora, quæ quidem ab Apostolorum ævo fluxere. Nulla enim ætas, nullum sæculum, ab eo tempore assignari potest, quo hæc Religio non fuerit. Omnibus sæculis celebrata Missa pro vivis & defunctis, celebrata festa, servata jejunia, frequentata vota Monastica, invocati Sancti, honorata Sanctorum reliquie, & alia nostræ Religionis propria in usu fuere, ut ex omnium ætatum scriptoribus constat. Extendit se etiam ad omnes homines; quia, ut supra ostendimus, nullus homo extra Ecclesiam Catholicam salvari potest.

§. VI.

*Ostenditur, solam Ecclesiam Romanam esse
Apostolicam, ac proinde illam solam esse
veram Christi Ecclesiam.*

CCCXLI **E**cclēsia dicitur *Apostolica*.
I Quia ab Apostolis initium
habuit, & ab illis fundata est, & per orbem
terrarum propagata. Nam, ut inquit Aposto-
lus Rom. 8, *in omnem terram exivit sonus eo-
rum*. Dicitur *Apostolica*, quia per continuatam
seriem Episcoporum ab Apostolis descendit
& originem trahit. Denique dicitur *Apostoli-
ca*, quia conservat *fidelem* & doctrinam ab
Apostolis traditam. Manifestum autem est,
solam Ecclesiam Romanam has prerogativas
habere; non autem Ecclesiam Lutheranam,
vel Calvinianam, vel ullam aliam hæretico-
rum sectam; ut constat ex dictis c. 1 §. 4. Ma-
nifestum etiam est, Ecclesiam Universalem,
quæ Romanum Pontificem ut Christi Vica-
rium veneratur, & illi subjecta est, denomi-
nari Romanam, à præcipua sui parte, nimi-
rum ab Ecclesia particulari Romana; quam
Apostoli Petrus & Paulus fundarunt, & in
qua

qua Petrus fuit primus Episcopus, quæ est reliquarum Ecclesiarum Mater & Magistra. Unde tam certum est, Ecclesiam universalem esse Apostolicam, quam certum est, esse Apostolicam Ecclesiam Romanam, in qua nuper sedit Alexander VIII. At certissimum est, Ecclesiam Romanam esse Apostolicam, quæ ab Apostolis fundata est, & ab Apostolo Petro numerat Pastorum suorum successionem: quia evidenter evidentiæ facti probatur, Alexandrum VIII successisse Innocentio XI; Innocentium XI, successisse Clementi X; Clementem X, Clementi Nono; Clementem Nonum, Alexandro VII; Alexandrum VII, Innocentio X; & Innocentium X, Urbano VIII. & sic ascendendo perveniemus ad Petrum. Ergo evidenter evidentiæ facti probatur, Ecclesiam Romanam fundatam esse ab Apostolo Petro, & Pontificem Romanum esse ejus successorem; ac proinde esse Ecclesiam Apostolicam.

CCCXLII Deinde supra cap. 2 demonstravimus, numquam Ecclesiam Romanam amisisse eam fidem, quam ab Apostolis acceperat. Unde quod Augustinus scripsit Epist. 126, *In Romana Ecclesia semper viguit Apostolica*

stolica Cathedra principatus, etiam modo & omni sæculo verificatur. Et ideo totum Concilium generale Chalcedonense, ex 630 Patribus Latinis & Græcis compositum, *Petrum* appellavit, *Petram & crepidinem Ecclesiæ Catholicæ*, Actione 3. Cum ergo omnes Ecclesiæ particulares Catholicæ, quæ Romanum Pontificem agnoscunt ut Vicarium Christi, ipsique obediunt; communicent in fide cum Ecclesia particulari Romana, & eam fidem teneant quam Sedes Petri docet; sequitur manifeste, Ecclesiam Romanam universalem, prout est collectio Ecclesiarum obediens Romano Pontifici, esse Apostolicam, quoad fidem quam tenet, & quoad successionem suorum Pastorum. Quamvis enim maxima pars Episcopatum & Sedium Episcopaliū de novo erectæ sint post mortem Apostolorum, ac proinde paucae sint, in quibus Apostoli sederunt ut Episcopi: tamen primi illarum civitatum Episcopi, vel ab Apostolis instituti sunt, vel à Romano Pontifice Successore Apostolorum; & ordinem Episcopalem, vel immediate ab Apostolis acceperunt, vel mediate, nempe mediantibus aliis Episcopis, qui tandem ab Apostolis originem traxe-

444 *Veritas Religionis Catholica*
traxerunt. Sectæ autem hæreticorum, nec
successionem suorum Episcoporum habent
ab Apostolis, cum sint novæ; nec earum do-
ctrina esse potest Apostolica, cum sit opposi-
ta doctrinæ, quam Ecclesia Romana ab
Apostolis accepit, ut abunde probatum est,
cap. 1 & 2.

CAPUT XIV.

*Concluditur ex dictis, quomodo se gerere debeat
Missionarius Catholicus, in disputando cum
hæreticis, ad hoc ut illos convincat.*

CCCLIII **E**X disputatis in toto libro, satis
constat, supposita fide in Chri-
stum & veritate Scripturarum, evidenter de-
monstrari, solam Ecclesiam Romanam esse
veram Christi Ecclesiam. Ut autem Missio-
narius Euangelicus utiliter de rebus Religio-
nis disputet cum hæreticis; debet prætermi-
tere controversias particulares, & adversarios
reducere ad unam generalem, quæ omnes
complectitur, nimirum ad controversiam *de*
Ecclesia. Assumat principium, in quo hæretici
omnes conveniunt cum Catholicis, nempe
articulum Symboli *de Ecclesia sancta*. Om-
nes enim, qui articulos contentos in Sym-
bolo

bolo Apostolorum credunt, tenentur credere, dari in mundo *Ecclesiam sanctam*; & juxta Symbolum Constantinopolitani Concilii, seu secundæ Synodi Generalis, tenentur credere, *in unam sanctam, Catholicam, & Apostolicam Ecclesiam*. Deinde cum illi admittant Euangelia, & fateantur à Christo dicta esse illa verba; *Tu es Petrus, & super hanc petram ædificabo Ecclesiam meam, & portæ inferi non prævalebunt adversus eam*; nisi Christum, vel mendacem, vel insipientem in promittendo facere velint; debent necessario concedere, Christum supra Petrum fundasse Ecclesiam suam; & illam, ex quo ab ipso fundata est, semper in mundo extitisse, & usque in finem mundi permanfuram. Ergo necessario fateri debent, dari nunc in mundo aliquam veram Christi Ecclesiam. Deinde cum Apostolus affirmet, *Ecclesiam Dei esse columnam & firmamentum veritatis*, necessario fateri debent, vera esse omnia dogmata, quæ illa tamquam articulos & veritates fidei credit, & credenda proponit, ut constat ex dictis c. 1 §. 3. Si enim vel unam falsitatem seu errorem unum tamquam dogma fidei juberet credi, non esset columna & firmamentum veritatis, sed

magistra

magistra errorum. Ergo hæretici utrumque necessario admittere debent; nempe, & existeret in mundo aliquam veram Christi Ecclesiam, & vera esse omnia dogmata quæ illa vera Christi Ecclesia credenda proponit.

CCCXLIV Admissis his duobus principiis, promptum erit evincere, vera esse omnia dogmata, quæ credenda proponit Ecclesia Catholica Romana, v. g. septem esse Sacramenta, Christum esse physicè præsentem sub speciebus panis & vini, & nihil de substantia panis & vini sub illis manere post consecrationem; dari purgatorium; imagines Christi & Sanctorum esse colendas &c. sic enim arguet Doctor Catholicus. Ea omnia, quæ vera Christi Ecclesia tamquam dogmata fidei credit & credenda proponit, vera sunt. Atqui sola Ecclesia Catholica Romana est vera Christi Ecclesia, & illa tamquam dogmata fidei credit, & credenda proponit talia & talia dogmata. Ergo hæc vera sunt.

CCCXLV In hoc discursu, Major concedetur ab hæretico, quia expressè revelatum est, Ecclesiam Christi esse columnam & firmamentum veritatis, ac proinde non posse esse magistram errorum. Minor quoad secundam

cundam partem est evidens evidentiâ facti, quia evidenter constat, illa omnia esse dogmata fidei in Ecclesia Romana. Tota ergo disputatio reducetur ad probandam primam partem Minoris, nempe, quod sola Ecclesia Catholica Romana sit vera Christi Ecclesia. Ad hanc autem propositionem probandam habemus argumenta evidentiâ, qualia sunt ea, quæ in hoc libro ponderavimus: evidenter enim demonstratur, inter Religiones Christianas, nec Lutheranam, nec Calvinianam, nec ullam aliam hæreticorum sectam, sed solam Religionem Catholicam Romanam esse veram Christi Religionem & Ecclesiam, & in illa sola posse homines salvari. Unde Missionarius attentè ruminetur capita probandi illam propositionem, à nobis expensa in hoc tractatu; & ex illis argumenta depromere poterit efficacia ad convincendos adversarios.

CCCXLVI Utinam Deus eorum oculos illuminet, ne obdormiant in morte; sed emittat lucem suam, & veritatem suam, ut veniant ad veram Ecclesiam; quod abs dubio facient, si ipsi lucem ab ipso enixè petant, & de hac re serio deliberent; quod facere non poterunt, nisi

nisi prius exuant anticipatam quamdam opinionem, quâ tenentur de idololatria, superstitionibus, & abusibus Ecclesiæ Catholicæ. Primum ergo monendi sunt, ut se disponant ad lucem divinam & donum veræ fidei à Deo suscipiendum ; deinde ipsis inculcandum, non posse ipsos ad recipiendam lucem divinam se disponere, nisi seponant parumper illud præjudicium de idololatria & superstitionibus Catholicorum; & serio cogitent, se in illa sua persuasione falli posse. Incredible enim est, tot Doctores & Viros sanctissimos & sapientissimos, quos Ecclesia Catholica semper habuit; & tot Concilia, quot in Ecclesia Catholica sunt celebrata, ad quæ ex omni parte confluxêre viri sapientiâ & virtute præstantes, qui erant veluti Christianitatis flos; hanc idololatriam non vidisse, vel visam non solum non abjecisse, sed sedulo retinuisse & coluisse. Postulandum deinde est ab ipsis, ut serio considerent ea, quæ circa hoc punctum diximus c. 9 §. 9; & ut reflectant, hanc antiquam esse Mahumetanorum & Iconomachorum calumniam; & nullam unquam fuisse hæreticorum sectam, quæ errores graves Ecclesiæ non imposuerit,

rit,

rit, & quæ non quæsierit similes prætextus ad tegendam defectionem suam, ut jure videretur ab Ecclesia recessisse. Si hæc faciant; Pater misericordiarum, qui vult omnes homines salvos fieri, & ad agnitionem veritatis venire, ipsos trahet ad veram Christi Filii sui Ecclesiam, ut in æternum cum ipso in cælo regnent,

C A P U T U L T I M U M,

Ad Complementum Operis ;

In quo exponitur, quomodo sit explicanda analysis seu resolutio fidei Christianæ atque Catholicæ, sine mutua prioritate & circulo.

Pro complemento hujus libri opere pretium duxi, adjungere hoc punctum; quia solet negotium facessere iis, qui disputant cum hæreticis; & in eo rectè explicando, non parum laborant Theologi.

§. I.

Quid sit Fidei resolutio, & quanta sit hujus controversiæ difficultas?

CCCXLVII C Elebris est apud Theologos Scholasticos quæstio
V de

de Fidei nostræ resolutione; quomodo scilicet sit facienda sine circulo vitioso; qui tunc contingit, quando hoc per illud, & illud per hoc probamus apud eum, qui neutrum concedit, & æque de utroque dubitat: v.g. Si negem, & matrem & filium esse probum; circulum committes, probando, matrem esse probam, quia filius dicit; & filium probum, quia mater dicit. Quare? Quia utrumque mihi æque ignotum & incertum est; probatio autem debet procedere à notis ad ignota, vel à concessis ad inconcessa, ut ex Aristotele & aliis Philosophis constat. Unde qui apud infidelem, cui ignota est authoritas divinæ Scripturæ, & cui similiter est ignota authoritas Ecclesiæ, probaret, Ecclesiam esse infallibilem, quia Scriptura id testatur; & probaret, Scripturam esse infallibilis authoritatis, quia Ecclesia id testatur; & nullam probationem adduceret, qua, independenter à testimonio Scripturæ, probaret, Ecclesiam esse infallibilem in his quæ credenda proponit, circulum committeret.

CCCXLVIII Cum autem unaquæque res resolvatur in sua principia & causas, ex quibus vel à quibus etiam conficitur; analy-
sis

sis seu resolutio Fidei nihil aliud est, quam Fidei in sua principia causasque reductio. Cum autem Fides, instar aliarum rerum, sua quatuor vulgata causarum genera fortiat, in illas omnes potest resolvi. Et de tribus quidem, nempe materiali, efficiente, & finali, res est facilis & expedita. Si enim quæ-
ratur, ubi sit Fides, per quod causa materialis denotatur; respondebis, esse in^o intellectu; si autem quæ-
ratur, à quo sit, seu quam causam efficientem habeat? respondebis, esse à Deo, & ab intellectu creato; quia Deus simul cum intellectu est causa actus Fidei: si autem quæ-
ratur, ad quem finem ordinetur Fides, & cujus gratia existat; respondebis, ordinari ad perducendos homines ad æternam Dei possessionem, & æternam Dei visionem, tamquam in finem ultimum; & nobis à Deo dari, tamquam *lucernam lucentem in caliginoso loco*, ut nobis ostendat viam qua ad Deum tendamus. Similiter si quæ-
ratur, quam causam formalem intrinsecam habeat Fides, seu quid sit Fides; facile respondetur, Fidem sumptam pro actu, nihil esse, quam actum intellectus, quo ex imperio voluntatis firmiter assentimur iis, quæ à Deo reve-

lata sunt, quia ab ipso dicta sunt, sumptam vero pro habitu, nihil aliud esse, quam virtutem à Deo infusam ad eliciendum ejusmodi actum. Si vero ulterius quærat, quodnam sit motivum intrinsecum illius actus Fidei; facile ex communi sententia Theologorum respondetur, motivum illud esse summam Dei auctoritatem in dicendo, consistentem in summa sapientia & veracitate Dei, ut testificante: est enim Deus infinite dignus, ut sibi aliquid testificanti firmissime super omnia credamus, quia est summe sapiens, & ideo per ignorantiam nequit falli in his quæ dicit; & insuper est summè verax, & ideo per malitiam & dolum neminem potest fallere; ac proinde habet summum jus, ut sibi aliquid affirmanti firmissimè credatur; ubi constiterit sufficienter, ab ipso fuisse affirmatum: proindeque infidelitas est gravissimum peccatum.

CCCXLIX Hæc omnia facilia sunt; sed ulterius magna restat difficultas in explicanda causa formali extrinseca, seu motivo & ratione objectiva, atque principio objectivo, ad quod ultimo revocandus sit assensus Fidei, & in quo ultimo quiescit intellectus,
cum

cum ab hoc poscitur ratio Fidei suæ, quin amplius debeat interrogari: resolvere enim, est reddere rationem sui assensûs; unde resolvere ultimo, est reddere ultimam rationem, quin maneat jus ulterius interrogandi.

6. II.

Quomodo Pater Becanus circulum vitet.

CCCL **H**OC hæretici argumentum retorquet inprimis rectè Becanus contra ipsum: Nam ego, inquit, vicissim quæro ex illo: Unde scis, Scripturam esse divinam? respondet: Quia privatus meus spiritus hoc dicit. Sed, Unde scis, privatum tuum spiritum esse infallibilem & divinum? Quia scriptura hoc dicit. Certè & hic circulus est, mi Paræ: nam Scripturam probas per privatum spiritum, & rursus spiritum privatum per Scripturam: proinde ac si afferas, mater est proba, quia filius dicit; & filius est probus, quia mater dicit.

CCCLI Respondet ergo Becanus, circulum quidem fore, si quis Christianus apud Ethnicum, qui nec Ecclesiam neque Scripturam admittit, probare vellet, Scripturam esse

infallibilem, quia Ecclesia dicit; & Ecclesiam esse infallibilem, quia Scriptura dicit; nam utrumque illi æquè ignotum, æquè incertum est: e contrario vero, non fore circulum, si unum per alterum apud eum probes, qui alterum admittit, alterum negat. V.g. Calvinus admittit Scripturam, negat Ecclesiæ infallibilitatem: recte illum convincam hoc modo: Scriptura, quam tu admittis, dicit, Ecclesiam esse infallibilem: ergo reverâ infallibilis est. Similiter; si quis idiota admittit iudicium Ecclesiæ, & tamen nesciat in particulari, libros Machabæorum esse Canonicos; facile persuadebo illi sine circulo, si sic dicam: Ecclesia, cujus tu auctoritatem agnoscis, asserit, libros Machabæorum esse Canonicos: ergo non debes de hac re amplius dubitare.

CCCLII Statimque ostendit, hunc modum probandi usitatum esse in Scripturis & Patribus. Nam quia Pharisei mittebant Moysen, & negabant Christum; convincit eos Christus his verbis Joannis 5, 36; *Si crederetis Moysi, crederetis & mihi; de me enim ille scripsit.* Contra vero, quia Manichæi mittebant Christum & Evangelium, negabant

bant autem Moysen & Prophetas; convin-
cit illos Augustinus simili argumentandi
modo, in libris contra Faustum Manichæum,
& lib. I de moribus Ecclesiæ Catholicæ c. I
& sequentibus. Hinc deducit, Catholicos
non committere circulum, dum hæreticos,
qui negant Ecclesiam, convincunt ex Scri-
pturis, quas non negant. Recteque monet,
Paræum hoc modo excusari non posse:
nam spiritus privatus, qui ab ipso fingitur,
à nemine admittitur; neminem ergo ex pri-
vato spiritu potest convincere: & subinde
efficaciter & lepidè hunc hæreticum exagi-
tat, ostendendo, ipsum incidere in circulum
inextricabilem.

§. III.

*Ostenditur, hujus Authoris discursum non satis
difficultatem complanare.*

CCCLIII **S**ed quamquam hæc sufficiunt ad
convincendum hæreticum, &
ad persuadendum, posse nos contra hæreti-
cos, admittentes Scripturas, ex illis argue-
re efficaciter contra ipsos; in præsentī mate-
ria non videtur ex sola Scriptura probari

posse, Catholicam Religionem Romanam esse veram Christi Ecclesiam. Nam ex Scriptura solum habetur, Ecclesiam Dei esse columnam & firmamentum veritatis, ac proinde non posse veram Christi Ecclesiam proponere aliquam falsitatem aut errorem, tamquam dogma aut articulum Fidei ab omnibus credendum; cæterum quod Ecclesia Catholica Romana, sit vera Christi Ecclesia, non videtur efficaciter posse ex illo Apostoli testimonio concludi. Respondebunt enim hæretici, verum quidem esse, quod Ecclesia Christi sit infallibilis; ac proinde hinc recte inferri, quod sint vera omnia illa, quæ vera Christi Ecclesia credenda proponit; cæterum hanc veram Christi Ecclesiam non esse Romanam, sed Ecclesiam reformatam Calvinii, vel aliquam aliam. Quapropter, ad convincendum, solam Ecclesiam Catholicam Romanam esse veram Christi Ecclesiam, seu illam de qua Christus dixit, portas inferni non prævalituras adversus ipsam; & de qua dixit Apostolus, esse columnam & firmamentum veritatis; oportet ad alia argumenta recurrere; nec ex solo Evangelio, non adjunctis aliis, facile erit evincere, solam Ecclesiam

Ca-

Catholicam Romanam esse veram Christi Ecclesiam.

CCCLIV Quapropter, quando hæreticus Calvinista, vel aliquis alius, admittens Evangelia & Epistolas Pauli, quærit à Catholico Romano; Cur credat, dari Purgatorium, & Sacramenta esse septem? & ipse respondet, se id credere, quia Deus hoc revelavit; & hæreticus instat, Unde sciat, hoc Deum revelasse? & ipse respondet, quia Ecclesia Catholica Romana, quæ est columna & firmamentum veritatis, id credendum proponit: videtur Catholicus principium petere, supponeudo id, quod hæreticus negat, nimirum quod Ecclesia Catholica Romana sit columna & firmamentum veritatis; & ideo hæreticus statim clamabit, hoc gratis à respondente supponi, & nequitiam probari: unde iterum instabit; Unde scis, Ecclesiam Catholicam Romanam esse columnam & firmamentum veritatis? Si autem tunc Catholicus respondeat, se id non scire, sed credere, quia Apostolus dicit, Ecclesiam esse columnam & firmamentum veritatis; iterum replicabit hæreticus; Unde sciat, Ecclesiam, de qua loquebatur Apostolus, esse Ecclesiam

Catholicam Romanam, quæ modo existit. Certe hic satisfacere non poterit, nisi recurrat ad argumenta illa evidentia credibilitatis, quæ ostendunt, Ecclesiam, quam Christus supra Petrum fundavit, non esse aliam, quam Ecclesiam Catholicam Romanam: non ergo sufficit solus recursus ad Scripturam, testimonium perhibentem de infallibilitate Ecclesiæ; ut contra hæreticos convincamus, veros esse omnes articulos, quos Ecclesia Catholica Romana credendos proponit.

§. IV.

Statuuntur aliqua propositiones, de servientes ad explicandam resolutionem Fidei: quarum prima est, Evidens esse, dari aliquam veram Religionem in mundo, & inveniri facile posse ab omni homine ritè illam quarente.

CCCLV **H**Anc Fidei resolutionem nullus; quem sciam, aptius & solidius explicavit, quam P. Michaël de Elizalde, in præclaro illo opere de forma veræ Religionis quærendæ & inveniendæ; cujus præcipuus scopus est, probare, cum veræ Religionis professio sit necessaria ad salutem, &
Deus

Deus velit omnes homines salvos fieri ; evidens esse, quod vera aliqua Religio existat in mundo, & hanc sine magno molimine inveniri posse, non solum à doctis & ingeniosis, sed etiam ab omnibus vera ratione utentibus, dummodò illam rite & debito modo quærant, Et cum late demonstrasset, Deum impressisse mentibus hominum prima quædam principia, quæ non sunt probanda, sed ultro admittenda, quæ lumine naturæ nota appellantur, quibus homines juvarentur ad scientias humanas acquirendas ; hinc recte concludit, Deum optimum maximum omnibus hominibus hunc quasi naturalem instinctum & veluti primum principium impressisse, & naturali lumine illustrasse, *dari aliquam veram Religionem in mundo, & nefas esse sine Religione vivere*, ut hoc primo principio sollicitarentur & stimulantur, ad quærendam veram Religionem ; quia ipso lumine naturæ, quo cognoscitur unum dumtaxat. esse Deum, etiam cognoscitur, hunc Deum unam dumtaxat Religionem veram in mundo habere, in qua & per quam coli velit, cæteras vero huic oppositas esse falsas. Unde quest. 5 illius operis pag. 69 n. 112, sic discurret subti-

lis

lis iste & solidus Theologus : Si disciplinis aliis praeiussit Deus illarum principia, ex quibus homines possent illas invenire, vel excogitare; à fortiori ea, quae Deus nobis concessit de vera Religione dictamina & principia, talia sint necesse est, quibus possint homines Deum & veram Religionem invenire si velint, cum in hunc duntaxat finem ea concesserit. Et statim subdit: Quibus consideratis omnibus, asserendum indubitanter puto, ex toto rigore Philosophiae, vel nullum verum esse invenibile, sed sensus & mentem, & naturam totam forte errare; vel prae omnibus ac potissimum esse invenibilem veram Religionem. Si enim Deus non est, neque naturam fecit, nihil tutum est, nihil invenibile: si Deus est, & naturam fecit, & hominibus prima documenta ingessit quibus proficerent; evidens est, in his maxime edoctum hominem, quae magis Deum decent, quae pluris ipsorum quoque hominum intersunt, & quae maxima, quae summa & capitalia sunt; in his autem omnium caput est vera Religio: ergo vel hac inveniri potest, vel nihil inveniri potest. At multa inveniri possunt, & asseri, & probari, & agi, ut contra Academicos demonstratum est cum Augustino: ergo vera Religio inveniri potest. Hinc n. 115

inquit, *veram Religionem in mundo esse, ita animis est impressum nostris, ex eo unde est; ut esse non possit, unde non est.* Quæ est definitio, quam de verò vel veri perceptione tradit Zeno Philosophus.

§. V.

Secunda propositio, Doctrinam veræ Religionis non posse humano discursu acquiri, sed divinitus esse traditam.

CCCLVI **P**ROBAT insuper solidissimè tota qu. 6, doctrinam veræ Religionis, non humanæ rationis & inventionis esse, sed superiorem & divinam; non scholarum aut librorum contentionibus depromendam, sed delapsam è cælo; traditam à Deo, & credendam ab homine. Quam assertionem verissimam esse, omnes nationes & omnes orbis religiones & sectæ fatentur. Id enim imprimis agnoscunt omnes Christiani veri, id est Catholici Romani; omnes falsi, scilicet hæretici: id agnoscunt Judæi, id Mahumetani, quorum falsus propheta & verus impostor Mahumetus, ut gentes ad se traaheret, finxit suam Legem sibi à Deo revelatam. Imo nec Gentiles hoc negabant: nulla enim,
nec

nec Gentium, est vel fuit tam humanitus instituta religio, quæ oracula & leges numinum non quæserit, non audierit, & quæ in his potissimum non se se fundaverit. Nam & Græci ipsi, qui sapientiam, id est, rationem & demonstrationem maxime quærebant, oraculis abundarunt; & si quæ eorum Philosophi colebant ex animo religionem, non eam ad scholam unusquisque suam ejusque sententiam efformabat, sed ad fabulosam illam numinum doctrinam & normam: unde habebant, *scholas pugnantes, sed templa communia*, ut de illis pulchre dixit Augustinus.

CCCLVII Veritas hujus assertionis fundatur in doctrina Angelici Doctoris & Scholasticorum Principis D. Thomæ, qui 2, 2 q. 2 art. 3 inquit; *Utrum, credere aliquid supra rationem naturalem sit necessarium ad salutem?* Et respondet affirmative; & probat, tum auctoritate Apostoli dicentis ad Hebræos 10, *Sine Fide impossibile est placere Deo*; tum ratione; *Quia cum natura hominis dependeat à superiori natura, ad ejus perfectionem non sufficit cognitio naturalis, sed requiritur supernaturalis*, inquit ibi ad 1. Quod magis explicat in corpore: *Quia in omnibus naturis ordinatis*
in-

invenitur, quod ad perfectionem naturæ inferioris duo concurrunt, unum quidem, quod est secundum motum proprium; aliud autem, quod est secundum motum superioris naturæ: sicut aqua, secundum motum proprium, movetur ad centrum; secundum autem motum lunæ, movetur circa centrum, secundum fluxum & refluxum. Similiter etiam orbes Planetarum moventur motibus propriis ab Occidente in Orientem; motu autem primi orbis ab Oriente in Occidentem: sola autem natura rationalis creata habet immediatum ordinem ad Deum; quia ceteræ naturæ non attingunt ad aliquid universale, sed solum ad aliquid particulare, participant divinam bonitatem, vel in essendo tantum, sicut inanimata; vel etiam in vivendo & cognoscendo singularia, sicut plantæ & animalia. Natura autem rationalis, in quantum cognoscit universalem boni & entis rationem, habet immediatum ordinem ad universale essendi principium. Perfectio ergo rationalis naturæ, non solum consistit in eo quod ei competit secundum suam naturam, sed in eo quod ei attribuitur ex quadam supernaturali participatione divinæ bonitatis. Unde & supra dictum est (nempe 1, 2 q. 3 art. 8) quod ultima beatitudo

tudo hominis consistit in quadam supernaturali Dei visione, ad quam quidem visionem homo pertingere non potest, nisi per modum addiscen- tis à Deo doctore, secundum illud Ioan. 6. Om- nis, qui audit à Patre, & didicit, venit ad me. Huius autem disciplinae fit homo particeps; non statim, sed successive secundum statum suae na- turae. Omnis autem homo addiscens, oportet quod credat, ad hoc quod ad perfectam scientiam perveniat; sicut etiam Philosophus dicit, quod oportet addiscentem credere. Unde ad hoc quod homo perveniat ad perfectam visionem beatitu- dinis, praequiratur quod credat Deo, tamquam discipulus magistro docenti.

CCCLVIII Probaverat autem efficaciter sanctus Doctor, 1, 2 q. 3, 8, beatitudinem ho- minis sitam esse in visione divinae essentiae; quia cum Deus sit omnium prima causa, ad cuius essentiam cognoscendam insitum na- turaliter est homini effectum cognoscendi desiderium; non nisi in illius essentiae visione potest ejus beatitudo consistere. Ad quod probandum duo praesupponit principia. Pri- mum est, quod homo non est perfecte beatus, quamdiu restat sibi aliquid desiderandum & quarendum. Secundum est, quod uniuscujusque
po-

potentia perfectio attenditur secundum rationem sui objecti. Hinc sublimit: At objectum intellectus est, quod quid est, id est, essentia rei, ut dicitur in 3 de Anima: unde in tantum procedit perfectio intellectus, in quantum cognoscit essentiam alicujus rei. Si ergo intellectus aliquis cognoscat essentiam alicujus effectus, per quam non potest cognosci essentia causæ, ut scilicet cognoscatur de causâ, quid est; non dicitur intellectus attingere ad causam simpliciter, quamvis per effectum cognoscere possit de causâ, an sit: & ideo remanet naturaliter homini desiderium, cum agnoscit effectum, & scit habere causam, ut etiam sciat de causâ, quid est: & illud desiderium est admirationis, & causat inquisitionem, ut dicitur in 1 Metaph. cap. 2: puta, si aliquis, cognoscens eclipsim Solis, considerat, quod ex aliqua causâ procedit, de qua, nescit, quid sit; admiratur, & admirando inquirat: nec ista inquisitio quiescit, quousque perveniat ad cognoscendum essentiam causæ. Si igitur intellectus hominis, cognoscens essentiam alicujus effectus creati, non cognoscat de Deo, nisi an sit; nondum perfectio ejus attingit simpliciter ad causam primam, sed remanet ei adhuc naturale desiderium inquirendi causam: unde nondum est perfecte

fecte beatus. Ad perfectam igitur beatitudinem requiritur, quod intellectus pertingat ad ipsam essentiam primæ causæ, & perfectionem habeat per unionem ad Deum, sicut ad objectum, in quo beatitudo hominis consistit. Hactenus S. Thomas.

CCCLIX Quare S. Thomas eo art. 3, ex eo, quod ultima hominis perfectio & beatitudo consistat in clara Dei visione, ad quam naturalis ratio ascendere non potest proprio motu; per legitimam consequentiam intulit; necessarium fuisse ad salutem, aliqua hominibus per disciplinam Fidei credenda proponi. Unde titulum illius articuli tertii explevit, probando, quod necessarium sit ad salutem, credere aliquid supra rationem naturalem. Doctrina ergo veræ Fidei per solum discursum humanum, sine magisterio Dei, per se ipsum, vel per Angelos, vel per alios homines docentis homines, haberi non potest.

CCCLX Idque à fortiori patet ex iis, quæ sanctus Doctor tradit art. 4, in quò inquit; *Utrum credere ea, quæ naturali ratione sciri possunt, sit necessarium?* Ubi probat, ut citius & firmitus Dei notitiam homines assequerentur.,

tur, necessarium fuisse homini, non solum suscipere per Fidem ea quæ supra rationem naturalem sunt, sed ea etiam quæ naturali ratione investigari possunt: Dicendum est, inquit, quod necessarium est homini, accipere per modum Fidei, non solum ea quæ sunt supra rationem, sed etiam ea quæ per rationem cognosci possunt. Et hoc propter tria. Primo quidem, ut citius homo ad veritatis divinæ cognitionem perveniat: scientia enim, ad quam pertinet probare, Deum esse & alia hujusmodi de Deo, ultimo addiscenda proponitur (nimirum Metaphysica & Theologia) præsuppositis multis aliis scientiis; & sic non nisi post multum tempus vitæ suæ homo ad Dei cognitionem perveniret. Secundo, ut cognitio Dei sit communior: multi enim in studio scientiæ proficere non possunt, vel propter hebetudinem ingenii, vel propter alias occupationes, vel etiam propter torporem addiscendi; qui omnino à Dei cognitione fraudarentur, nisi proponerentur eis divina per modum Fidei. Tertio modo, propter certitudinem: ratio enim humana in rebus divinis est multum deficiens; cujus signum est, quia Philosophi, de rebus humanis naturali investigatione per scrutantes, in multis er-

raverunt,

raverunt, & sibi ipsis contraria senserunt: ut ergo esset indubitata & certa cognitio apud homines de Deo, oportuit, quod divina eis per modum Fidei traderentur, quasi à Deo dicta qui mentiri non potest.

CCCLXI Idem sanctus Doctor 1.2. q. 91. art. 4. inquit: *An fuerit necessarium, esse aliquam legem divinam?* Et respondet, quod præter legem naturalem & legem humanam, necessarium fuit ad directionem humanæ vitæ, habere legem divinam: idque probat quatuor rationibus, quarum secunda est hæc: *Quia propter incertitudinem humani iudicii, præcipue de rebus contingentibus & particulæribus, contingit, de actibus humanis diversorum esse diversa iudicia, ex quibus etiam diverse & contrariæ leges procedunt. Ut ergo homo absque omni dubitatione scire possit, quid sit agendum, & quid vitandum; necessariam fuit, ut in actibus propriis dirigeretur per legem divinitus datam, de qua constat quod non potest errare.*

CCCLXII Præterea efficaci ratione suadet, doctrinam veræ Religionis non acquiri per discursum & scientiam, sed per Fidem hauriri debere à Deo docente. Nam,
cum

cum Deus velit omnes homines salvos fieri, & ad salutem consequendam necessaria sit vera Religio, & Deus nulli hominum neget necessaria ad salutem; consequens est, quod omni homini rationis compoti dederit Deus potestatem inveniendi veram Religionem: ergo omni homini dedit potestatem acquirendi doctrinam veræ Religionis. At non omni dedit potestatem, acquirendi eam doctrinam, quæ per scholarum discussionem comparatur: ergo doctrina veræ Religionis non est doctrina per scholarum discussionem, seu per scholastica certamina, & humanum discursum comparata. Ergo doctrinam veræ Religionis à Deo docente debent homines accipere. Deus autem, ut doctrinam veræ Religionis, ad salutem necessariam, hominibus traderet; commercium cum illis habere debuit, & locutione quadam externa mentis suæ consilia illis manifestare. Ut enim sciret homo, quem à se cultum Creator deposceret; cum nequeat per se divinæ mentis arcana intueri; necessarium fuit, ut per signum aliquod sensibile à Deo loquente illum cultum addisceret: ut autem homines certificarentur, Deum esse qui per illa signa
ip-

ipsis loqueretur; debuit Deus locutioni suæ talia signa adjungere, quæ non sinerent prudenter dubitare, illum esse qui loquebatur. Hoc pacto locutus est Deus cum Mōyse, & per ejus os cum filiis Israël: talibus enim prodigiis & cœlestibus signis locutionem illam ornavit, ut non potuerint homines prudenter dubitare, quin à Deo esset doctrina illa, quæ talibus notis illustrata erat. Hoc pacto locutus est per Prophetas, & novissime locutus est nobis per Filium suum unigenitum, Jesum Christum; qui tali vitæ sanctitate, talibusque operibus & miraculis se Filium Dei esse comprobavit, ut inexcusabiles sint, qui credere nolunt, doctrinam Christi esse doctrinam Dei. Doctrinam hanc Christus Ecclesiæ suæ commisit, quam supra Petrum fundavit, & per illam sensibilibiter loquitur hominibus: & ut eos omnino securos redderet de veritate doctrinæ, quam hæc Ecclesia illis credendam proponit; talibus notis, insignibus, & signis eam illustravit, ut cæcus sit, qui non videat, Ecclesiam Catholicam esse os, per quod Deus sensibilibiter hominibus loquitur, & eis manifestat quæ necessaria sunt, ut ad æternam Dei visionem perveniant.

CCCLXIII

CCCLXIII Præterea probatur, doctrinam veræ Religionis, non per studium humanum acquiri; sed à Deo per fidem accipi debere. Quia veram Religionem ejusque doctrinam omnes putant à se haberi, & si non haberetur, quærendam, sive viri, sive foeminæ, sive nobiles, sive plebeji, sive domini, servi & ancillæ, sive docti, sive rustici sint. At non omnes putant, à se haberi scientias; vel quærendas, si non habentur. Ergo veræ Religionis doctrina non est scita nec habita per scientiam & discursum: ergo credita. At non credita hominibus: ergo credita Deo. Ergo via unica habendi doctrinam veræ Religionis, est via Fidei divinæ, seu Fidei per quam homo credit Deo loquenti. Per hanc viam homo rudis & illiteratus, & simplex vetula, plus veræ & solidæ sapientiæ exiguo tempore comparat, quam arrogans Philosophus Gentilis multorum annorum studio. Augustinum audiamus serm. 187 de tempore id egregiè explicantem: *Qui tibi (inquit) videris nihil scire, si scias hoc ipsum quod nescias, nonne plus cæteris videris scire? Gentilis homo videt lapidem, & Deum putat: Philosophi vident celum, & putant Deum &c.*

Tu vero considera , quantam super istos habes scientiam.

CCCLXIV Ex ipsa etiam natura doctrinae verae Religionis, constat, eam non esse humanae investigationis & inventionis, sed superiorem & divinitus traditam; siquidem doctrina verae Religionis ea esse nequit, quae circa necessaria & quasi essentialia Religionis maximè deficit & errat. At talis est omnis doctrina, solum fundata in ratione naturali & naturalis inventionis: ergo nulla doctrina, solum fundata in ratione naturali & naturalis inventionis, est doctrina verae Religionis. Doctrina ergo verae Religionis debet esse divinitus à Deo tradita. Minor probatur. Quia materia necessaria & quasi essentialis Religionis sunt Deus & divina; cum vera Religio ad Dei cultum essentialiter dirigatur. At doctrina, solum in ratione naturali fundata, seu naturalis investigationis & inventionis, maximè deficit & errat circa Deum. Ut enim nuper agebat D. Thomas, *ratio humana in rebus divinis est multum deficiens*: est enim principii loco à principibus Gentilium philosophis & sapientibus Pythagora, Socrate, Platone, Trismegisto, & aliis

aliis traditum, & à Christianis receptum, mentem humanam se habere ad Deum & divina, sicut noctuam ad lumen solis. Idque experientiâ ipsâ est manifestum, ex innumeris erroribus, in quos inciderunt Philosophi Gentiles, circa naturam Dei & finem propter quem homo conditus est: ut patet ex Tullio in libris de natura Deorum; qui postquam lib. 1. retulit multorum Philosophorum pugnancia placita, circa naturam & conditionem Deorum, sapienter subjunxit: *Quorum opiniones cum tam variae sint, tamque inter se dissidentes, alterum profecto fieri potest, ut eorum nulla; alterum fieri non potest, ut plus unâ vera sit.*

CCCLXV Et sanè circa hominis beatitudinem, in qua scilicet consistat summum ejus bonum, maximæ olim Philosophorum extitère concertationes. Lactantius lib. 3. Divinarum institutionum c. 7, decem sententias cum suis authoribus refert, & cap. 8 ostendit illos errasse, & luculenter refutat. Marcus Varro, apud D. Augustinum, lib. 19 de Civit. c. 1, ostendit, sectas Philosophorum de summo bono ita posse permisceri, ut ex ea permixtione octoginta octo supra ducentas sen-

tentiæ seu sectæ existant. Totusque mundus plenus erat erroribus, donec venit Christus, qui tot tenebras dispulit: ideo quippe Filius Dei, in mundum venit, ut nobis veram doctrinam traderet, & viam ad veram felicitatem ostenderet, simulque gratia sua nobis vires tribueret ad ambulandum per eam: *Non enim nos aliter discere poteramus quæ sunt Dei, nisi magister noster, Verbum existens, homo factus fuisset*, ut inquit sapienter D. Irenæus lib. 9. cap. 1.

§. VI.

Tertia propositio: Veram Religionem nec quæri debere, nec inveniri posse, per examen rerum & dogmatum, quæ tradit.

CCCLXVI **H**anc propositionem breviter stabilivi 1 parte Manud. ad Conversionem Mahumetanorum l. 2 c. 1 §. 7. Eamdem solidissime probat P. Elizalde q. 8 & 9, redditque rationem. Quia nequit via esse apta & recta ad veram Religionem, per quam melius itur ad falsam quam ad veram, & in qua deterior futura sit causa veræ Religionis quam falsæ alicujus. Talis autem est via per examen. Doctrina enim veræ Religionis,

ligionis, ut nuper ostendimus, natura sua est de rebus altissimis & divinis, & hoc ipso nobis difficilibus ac parum notis : est etiam de rebus æternis atque futuris, quarum nec experientiam, nec usum, nec speciem propriam habemus, nec simile. Unde vera Religio, ad examen nostrum vocata, difficilior erit atque obscurior, quam falsa aliqua. Si enim quis sagacissimus Philosophus fabricaret nunc Religionem quamdam, quæ unum Deum, mundi conditorem poneret, & tolleretur à Judaismo Messiaë expectationem, & multa quæ puerilia apparent; & à Christianismo tolleretur Trinitatem personarum, Incarnationem Verbi Dei, præsentiam Christi in Eucharistia, & illa omnia mysteria quæ omnino humanum discursum superant; & ea omnia relinqueret, quæ contra vitia & in favorem virtutis, circa præmium bonorum & poenam malorum, ratio naturalis approbat; & à Mahumetismo tolleretur spurcitiam, & barbariem, & errores omnes contra rationem naturalem, & contra mathematicam & historiam; & hic Philosophus in certamen veniret cum Christiano circa veritatem Religionis, & contenderet suam esse veram, Christianam vero falsam; &

utriusque veritatem vellet explorare per examen articulorum, quæ unaquæque docet; & Christianus hunc modum discutiendi & examinandi, quænam sit vera Religio, incaute admitteret; evidens est, in hac disputatione Religionem falsam prævalituram; quia assertor falsæ Religionis nihil poneret quod non probaret, & omnia sibi objecta contra suos articulos clare dissolveret; e contra vero Religionis Christianæ & veræ professor poneret articulos, qui ratione naturali probari non possunt; imo qui homini destituto Fidei lumine apparent omnino impossibiles, & quos nemo intelligere poterit, nisi prius eos crediderit, ob authoritatem Dei dicentis; juxta regulam illam, quam Deus ipse nobis constituit per Isaiam, c. 7. *Nisi credideritis, non intelligetis.* Tales sunt articuli de unitate Essentiæ & trinitate Personarum, de incarnatione Verbi, de Divinitate hominis crucifixi, & de præsentia reali Christi in Eucharistia. Et quamvis Christianus posset objectiones contra hæc mysteria factas dissolvere cum probabilitate; tamen non ita liquido & clare dilueret, ut replicari amplius non posset: unde in hoc certamine vinceret falsæ Religionis

nis assertor. Evidens ergo est, hanc non esse rectam viam ad quærendam veram religionem. Rationem à priori jam dedimus 1 parte *Manuductionis* lib. 2 cap. 1 §. 7 nuper citato. Quia vera Religio continet articulos, qui intelligentiam nostram transcendunt; & qui, cum sint supra rationem, nequeunt per rationem probari; ibi etiam aliam reddidimus rationem. Quia, si ad quærendam & invenientiam veram Religionem, prius deberemus omnia ejus dogmata examinare; prius finiretur vita, quam susciperetur vera Religio.

CCCLXVII Doctrinam, in hac assertionem datam, colligimus ex S. Augustino, epist. 49, quam scripsit ad Presbyterum quemdam nomine *Deogratias*, respondens ad quæstiones à Pagano quodam ipsi propositas, quarum solutionem ipse ab Augustino petierat. Petebat Paganus ille, ut sibi difficultates istę explanarentur, antequam Christianus fieret. Quæstiones erant sex: illas ad Augustinum misit *Deogratias*; & postquam omnibus satisfecit Augustinus, ad finem epistolę sic loquitur: *Proposita exposuimus, ut potuimus; sed ille, qui proposuit, jam sit Christianus, ne forte, cum expectat ante librorum sanctorum finire*

quaestiones, prius finiat vitam istam, quam transeat à morte ad vitam. Ferri enim potest (id est permitti, & tolerari) quod, antequam Christianis Sacramentis imbuatur, quærit de resurrectione mortuorum. Concedendum etiam fortassis, quod de Christo quasi vit, cur tanto post venerit, vel si quæ sunt aliæ pauca & magnæ quaestiones, quibus cætera inserviunt. Si autem, qualis est illa: In qua mensura mensi fueritis, remetietur vobis, vel qualis ista de Iona; & omnes tales, antequam sit Christianus, finire cogitat; perperam cogitat, vel conditionem humanam, vel ætatem iam suam. Sunt enim innumera- biles, quæ non sunt finiendæ ante Fidem, ne finiatur vita sine Fide: sed plane, retenta iam Fide, ad exercendam piam delectationem mentium fidelium, studiosissime requirendæ, & quod in eis eluxerit sine typho arrogantia communi- candum; quod autem latuerit, sine salutis dispen- dio tolerandum. His verbis claudit Augustinus epistolam illam: quibus nihil sapientius, & evidentius dici potuit. Permittit Augustinus, quod de paucis & magnis quibusdam quæ- rat, qui Fidem Christi vult suscipere, & ea si- bi exponi deponat; non quidem eo genere examinis, ut inde dijudicanda veniat, & ac-
cipienda

cienda, vel refutanda vera Fides & Religio (nam ad hoc omnia essent examinanda) sed ita, ut is qui jam Fidem suscipere decrevit, minorem difficultatem experiatur in magnis & difficilibus mysteriis, ex quorum difficultate retardatur à suscipienda Fide. Monendus tamen est Catechumenus ille, ut considerationem avertat à mysteriis illis, quæ ipsi difficultatem præcipuam ingerunt; & illam applicet ad penetranda argumenta quæ evincunt, Deum esse authorem Religionis Christianæ, & mysteria illa revelasse, quæ intelligentiam ejus superant; & exponatur ei obligatio captivandi intellectum in obsequium Fidei, & firma Fide credendi omnia quæ Deus dixerit, ubi firmis rationibus constiterit Deum ea dixisse; quamvis homini, sibi relicto & suo discursu nitenti, appareant penitus impossibilia: constat enim evidenter, multa sæpe homini videri impossibilia, quæ re ipsa existunt & verissima sunt; cum tamen evidentissimum sit, Deum nec posse fallere, neque falli in iis quæ attestatur. Unde ratio evidentissima dictat, credendum esse Deo aliquid testificanti, quamvis nobis summe difficile, imo & impossibile videatur (ut ex-

posui l. 2, i part. Manud. ad conv. Mahum. c. 1 §. 4 & 6) postquam nobis constiterit, id Deum dixisse: & hac in re præ oculis habendum est colloquium, quod ego habui cum Mahumetano ingenioso, qui Fidem Christi nolebat recipere, propter difficultatem, quam experiebatur in mysterio Trinitatis & Incarnationis: & observandus est modus, quem post explicationem mysteriorum ego tenui, ut illum obligarem ad captivandum intellectum, ad assentiendum his mysteriis, ob authoritatem Dei, qui illa mundo manifestavit per os Domini nostri Jesu Christi & Apostolorum: hoc colloquium exhibui parte 2. Manuduct. ad conv. Mahum. l. 3 c. 10 à pag. 127 ad 130 editionis Dilinganæ, & à pag. 252 ad 258 editionis Matritensis.

§. VII.

Propositio quarta: Veram Religionem quarendam & inveniendam esse, per examen fundamentorum & rationum, quæ evincant, Deum esse authorem illius Religionis.

CCCLXVIII ID exposui & probavi l. 2. 1. I part. Manu. ad con. Mah. cap. 1

cap. 1. §. 4. & 6, & constat veritas propositionis. Nam sicut est injuria infinitæ Dei majestatis & authoritatis, nolle assentiri mysteriis quæ sufficienter proposita sunt, ut ab ipso revelata (quia ubi per argumenta graviora, & facientia moralem certitudinem, nobis constat, Deum revelasse mysterium aliquod; ratio evidens dicat, mysterium illud credendum esse cum summa adhæsiōe, ob authoritatem Dei dicentis, ut ostendimus in illo libro citato cap. 6. §. 1.) ita est gravis injuria infinitæ authoritatis Dei, accipere doctrinam alicujus Religionis, tamquam à Deo datam, quin præcedat sufficiens fundamentum ad firmiter judicandum, Deum esse authorem talis Religionis: nam *qui cito credit, levis est corde*, Ecclesiast. 16. ut exposui lib. 1. cap. 1. Fundamentum autem hoc debet esse tale, ut reddat evidenter credibilem illam doctrinam, id est, quod reddat audientem omnino securum de eo quod Deus sit author illius doctrinæ, quia de hoc possit prudenter dubitari: nam quamdiu potest prudenter dubitari, an Deus sit locutus, nemo potest prudenter imperare assensum Fidei divinæ, quo scilicet veritati mysterii revelatū

assentiatur super omnia, id est firmitus & immobilius, quam assentiri solet conclusioni evidenti. Paris enim est periculi, accipere, tamquam à Deo revelata ea quæ seductor aliquis proponit, tamquam à Deo dicta; & nolle accipere, tamquam à Deo dicta ea, quæ verus Dei Prophetam ipsius nomine dicit, postquam sufficienter probavit, se esse Dei Prophetam & Dei nomine loqui; ut probarunt Moyses, Elias, & alii Prophetæ Legis veteris; & in novo Testamento probarunt Apostoli, & alii viri sancti.

CCCLXIX Unde Mahumetani, qui doctrinam à Mahumeto prædicatam, tamquam doctrinam à Deo datam, receperunt; quin in hoc seductore viderent signa ulla, quæ ostenderent, illum esse Dei Prophetam, omnino sunt inexcusabiles: sibi enim persuadent, Mahumetum fuisse Dei Prophetam, cum tamen adsint manifesta argumenta, persuadentia fuisse hominem ambitionis & carnalem, qui se Prophetam finxit, ut regna occuparet, & imperium posteris suis relinqueret. Sunt etiam inexcusabiles sectarii, qui Lutherum ut novum Germaniæ Prophetam susceperunt, & sibi persuaserunt,
Mo-

Monachum apostatam, carnalem, ambition-
sum, nullis præ eminentem virtutibus, nul-
lis ornatum miraculis, sed magnis vitiis onu-
stus, à Deo electum fuisse ad reformandam
Ecclesiam. Et similia dici debent de his qui
Calvino adhæserunt.

CCCLXX Fundamenta autem illa, quæ
persuadere debent Deum esse authorem
Religionis, ut eam homines, tamquam à
Deo datam, tuto & laudabiliter suscipiant;
debent esse talia, quæ non relinquunt locum
prudenter dubitandi, ne data fuerit à Deo: ac
proinde debent esse talia, ut evidentiam mo-
ralem gignant de eo, quod Deus illius Reli-
gionis mysteria revelaverit. Debent enim
reddere evidenter credibilia mysteria talis Re-
ligionis, inducendo evidentem obligationem
suscipiendi illam Religionem, ut à Deo da-
tam; & credendi ejus mysteria, tamquam à
Deo revelata; ut probavi & explicavi par.
1. Manual. ad Conv. Mahum. lib. 1. cap. 12.
& 13. lib. 2. cap. 2.

§. VIII.

Propositio quinta : Manifestum esse debere, & ex rebus in mundo moraliter evidentibus, quanam ex omnibus mundi Religionibus & sectis sit vera & à Deo data Religio.

CCCLXXI. **V**eritas hujus propositionis constat ex his, quæ in toto libro adduximus ad approbandum, Religionem Christianam, non solum esse evidenter credibilem, sed evidenter veram evidentiâ in attestante; quatenus evidenter probatur, Deum esse authorem illius: & robustissimè ostenditur à P. Michaële Elizalde, in toto suo opere de forma veræ Religionis quærendæ & inveniendæ, præsertim q. 19. Scopus enim illius præclari operis est, hoc probare, & efficaciter persuadere: *Esse in mundo manifestissimum, esse scitu & exploratu brevissimum, facillimum, saltem permultis, quamnam inter omnes Religiones doctrinam Deus traderit proposueritque credendam, & in quo errare ritè quærentes nequeant.* Ad quod proinde, opus non sit metaphysicâ, non theologiâ, non demonstrationibus immortalitatis animæ;

mæ; cum vel hoc absurdissimum futurum esset, si omnes, tam viros quam fœminas, imo & litteratos omnes juberemus esse metaphysicos vel theologos. Quid enim stultius? Omnes enim tenentur veram Religionem quærere, & ita quærere ut inveniant, & inventam suscipere; non tenentur autem omnes esse metaphysici vel theologi. Ad internoscendum ergo, quænam sit vera Religio & à Deo data, non opus est metaphysicâ, neque theologiâ. Vera namque Religio & vera Ecclesia, est arx munitissima, in quam intrare debent, quicumque voluerint salutem suam in tuto ponere: est domus Dei, in qua habitare debent, qui heredes regni cælorum futuri sunt; & simul arx & castellum munitissimum, in quo se defendere possunt ab hostium impugnatione. De Ecclesia loquitur Salomon Prov. 9 dicens: *Sapientia edificavit sibi domum; excidit columnas septem; misit ancillas suas, ut vocarent ad arcem,* Ubi S. Gregorius Magnus apud Salazar, per Ancillas Sapientiæ, Apostolos intelligit, qui fuerunt ministri Sapientiæ incarnatæ seu Christi; ab eo in mundum missi, ut Gentes vocarent in hanc arcem, id est, ut illis ingressum

sum in Ecclesiam Christi persuaderent. Ubi nota, Ecclesiam, & esse domum, & simul arcem: domum, ad habitandum; & arcem, ad se defendendum à dæmonum impugnationibus.

CCCLXXII Est Ecclesia Dei civitas supra montem posita, ut ab omnibus videri possit, qui oculos in illam intendere velint. Ut enim inquit sapientissimus theologus, & hæreticorum acerrimus impugnator Gregorius de Valentia, tom. 3 disp. 1 q. 1 punct. 7 col. 156 in sexta Ecclesiæ proprietate: *Dicitur ab orthodoxis Doctoribus, secundum certissima & clarissima sanctorum Scripturarum testimonia, Ecclesia visibilis; id est, sic in luce hominum & conspectu positâ, ut quovis sæculo evidenter internosci, & quasi digito monstrari queat Congregatio illa, quam esse Ecclesiam veram determinatè credere possis ac debeas: Et hanc Ecclesiæ prærogativam prædixit David Psal. 186 dicens: In sole posuit tabernaculum suum, id est, ut ibi explicat Augustinus, in manifestatione posuit Ecclesiam suam, non in occulto; & epist. 166 ad Donatistas: Ipsa est Ecclesia in sole posita, id est, in manifestatione, omnibus nota usque ad terminos terræ: & in libro*

libro de unitate Ecclesiæ cap. 16. *Non est, inquit, operta Ecclesia, quia non est sub modio, sed super candelabrum, & de illa dictum est: Non potest civitas abscondi supra montem posita. Sed Donatistis velut operta est, qui audiunt tam lucida & manifesta testimonia, quæ illam in toto orbe demonstrant, ut malint clausis oculis offendere in montem, quam in eum ascendere: & epist. 107. Facile tibi est, attende, videre Civitatem supra montem positam. Unde Origines homil. 30 in Matth. merito dixit: Ecclesia plena est fulgore, ab Oriente in Occidentem. Ergo evidenter cernitur, Religionem Christianam esse à Deo.*

CCCLXXIII Et quidem ad hominem contra Authores Catholicos, qui evidentiam veritatis nostræ Religionis negant; cum tamen constanter doceant, Religionem Christianam ita esse evidenter credibilem, ut Religionem omnes sibi oppositas faciat incredibiles; hoc validum & invictum formatur argumentum. Nam si Religio nostra reliquas facit incredibiles, ergo reliquas facit improbables: omnia enim probabilia sunt prudenter & absque vitio credibilia. Ergo Religio Christiana non solum est evidenter probabilis,

lis, aut evidenter probabilior reliquis sectis; sed certa. Sola enim major probabilitas unius doctrinae, non facit ut opposita sit absolute improbabilis, seu talis cui nullus possit prudenter assentiri. Si autem Religio Christiana ex suis fundamentis & rationibus est certa: ergo est similiter evidens evidentiâ extrinsecâ & in attestante. Omnis enim certitudo, per rationem ac probationem comparata, est in eodẽ gradu evidentię, quo illa: imo evidentiã rationum est causa certitudinis; nam extra Fidem divinam, quæ est summe certa, quamvis sit obscura, omnis certitudo alicujus veritatis fundatur in ipsa evidentiã talis veritatis: ergo implicat Religionem Christianam esse ita evidenter credibilem, ut omnem sectam sibi oppositam reddat incredibilem, quin sit evidenter vera, evidentiâ in attestante.

CCCLXXIV Præterea argumentor. Nam cum Deus velit, omnes homines salvos fieri; vult, ut omnes quærant veram Religionem, donec illam inveniant; & vult, ut inventam amplectantur; & si jam in illa sunt, vult, ut in illa usque in finem perseverent: nam sine professione veræ Religionis nemo
po-

potest salvus fieri, quia *sine Fide*, teste Apostolo ad Hebræos 10, *impossibile est placere Deo*: vera autem Fides non datur, ubi non datur vera Religio. Nec satis est ad salutem, quod quis amplectatur Religionem, quæ sibi videatur probabilior, aut verisimilior, vel etiam certa si re ipsa sit falsa; sic enim quilibet salvaretur in sua Religione, quia cuilibet sua videtur melior & verisimilior aliis, imo certa. Sic Mahumetani, & Hæbræi, imo & hæretici obstinati verissimam arbitrantur suam Religionem; & arbitrantur Christianos Catholicos in errore versari. At certum est apud omnes Catholicos, neminem extra veram Religionem posse salvari, ut constat ex Symbolo Athanasii: *Hæc est, inquit, Fides Catholica, quam nisi quisque integram inviolatamque servaverit, absque dubio in æternum peribit*. Ergo Deus obligat omnes adultos ad quærendam & inveniendam veram Religionem, illamque amplectendam: ergo omnes possunt dignoscere quænam sit vera Religio. Patet consequentia. Quia si non possent discernere inter veram & falsam Religionem, & dignoscere quænam sit vera, quænam falsa; impossibilia Deus juberet, dum jubet

jubet veram Religionem amplecti. At Deus impossibilia non jubet, ut definitum est à Tridentino: ergo omnes possunt discernere, quanam inter omnes sit vera Religio. Non possent autem hoc præstare, nisi vera Religio esset talibus veritatis indiciis vestita, ut, quicumque ea indicia inspiciat & contempletur, evidenter apprehendere possit, Religionem, talibus indiciis vestitam, seu talibus notis insignitam, esse Religionem à Deo traditam, & consequenter veram. Ergo argumenta evidentiæ credibilitatis, quibus Deus Religionem Christianam insignivit, connexa essentialiter sunt cum ipsius veritate; & quicumque ea penetrat, evidenter cognoscit, Religionem Christianam esse veram. Probatur consequentia. Nam si illa credibilitatis argumenta solum redderent Religionem Christianam evidenter probabiliorem & verisimiliorem reliquis omnibus sectis, neque ex se essentialiter essent connexa cum veritate, sed possent conjungi cum falsitate; Deus non obligaret ad quærendam, inveniendam, & amplectendam Religionem veram; sed solum ad amplectendam Religionem probabiliorem & verisimiliorem, siue sit

Sit vera siue sit falsa: ergo si omnia credibilitatis argumenta, quibus Religio Christiana est insignita, possunt cadere in Religionem falsam, possunt à Deo omnes homines obligari, ut titulo ponendi in tuto suam salutem amplectantur Religionem, re ipsa falsam, in qua salus esse non potest: quo nihil absurdius & Deo indignius excogitari potest. Hoc enim esset, Deum homines decipere & seducere; dum ex una parte statueret, non dare salutem æternam, nisi professoribus Religionis veræ; & ex alia parte Religionem falsam vestiret talibus veritatis indiciis, ut omnes tenerentur illam amplecti: & ita homines fugiendo mortem, in mortem inciderent; seu potius quærendo vitam, inciderent in mortem sempiternam; idque Deo procurante seu incitante.

CCCLXXVI Id explicemus. Ponamus, Petrum fugere hostem insequentem, & non esse alium modum vitandi mortem & evadendi gladium hostis persequentis, nisi se recipiat in aliquam turrim vel arcem. Sint tres vel quatuor turres, ante ipsum è regione positæ, quarum una dumtaxat sit secuta & medium aptum ad vitam tuendam; reliquæ vero sint

sint omnino expositæ hostium furori, & quæ certissime expugnandæ sint ab hoste insequente Petrum. Sciat hoc Petrus, & evidenter cognoscat, se non posse in qualibet ex illis turribus se tueri, sed in una dumtaxat ex illis. Quid faciet in angustia Petrus? ad quam ex illis quatuor confugiet? Certum est, illum obligatum esse eligere illam, in qua majora securitatis indicia conspexerit. Unde si indicia illa sint fallacia, & re ipsa turris illa non sit munita, sed expugnationi obvia; Petrus per illa indicia decipietur; & dum vitam vult tueri, ex illius tuendæ desiderio incidet in præsentissimam mortem: unde qui vocavisset & incitasset Petrum ad ingressum illius turris, ei ostendendo majora securitatis indicia in illa turri quam in aliis, illum profecto decepisset, & causa foret ruinæ ipsius. Cum ergo homini evidens sit, extra Religionem veram nemini patere aditum ad æternam salutem; & evidens quoque ipsi sit, inter omnes Religiones mundi unam dumtaxat esse veram, & à Deo descendentem; reliquas vero illi oppositas esse falsas, & à diabolo ortas; evidens ipsi est, se obligatum esse, ad quærendam & amplectendam Religionem illam

lam unicam, quæ vera est. Ergo, cum veritas Religionis cognoscatur per indicia veritatis & argumenta credibilitatis; evidens ipsi est, se obligatum esse ad amplectendam illam Religionem, in qua post diligentem inquisitionem viderit majora veritatis indicia, & urgentiora credibilitatis argumenta. Ergo impossibile est, ut Deus Religionem falsam vestiât majoribus veritatis indiciis, & urgentioribus credibilitatis argumentis, quam Religionem veram: sic enim homines deciperet, eos obligando per illa præminentiora veritatis indicia ad amplectendam Religionem falsam. Ergo evidens est, inter omnes mundi Religiones illam dumtaxat esse veram, quæ majoribus à Deo ornata est veritatis indiciis, & credibilitatis urgentioribus argumentis. At evidens est, inter omnes mundi Religiones solam Religionem Christianam Catholicam esse ornatam à Deo majoribus veritatis indiciis, & urgentioribus credibilitatis argumentis; cum ex confessione omnium Doctorem Catholicorum. non solum sit evidenter credibilis, sed evidenter credibilior omnibus aliis mundi Religionibus; & quidem cum tanto excessu, ut
apud

apud æquum rerum æstimatorem & sincerum veritatis amatorem reliquæ omnes comparativè ad illam, nec verisimiles, aut probabiles, neque prudenter credibiles maneant: ergo evidens est, inter omnes mundi Religiones solam Religionem Christianam Catholicam esse veram, ac proinde solam illam esse veracem seu veritatis magistrum, & veræ Fidei depositariam atque custodem. Ergo Doctores Catholici, tamquam omnino indubitatum statuentes, Religionem Christianam à Deo ornatam esse evidentibus credibilitatis notis, & aliunde negantes ornatam esse evidentibus veritatis argumentis, virtualiter sibi contradictoria docent. Dicendum ergo est, Christianam Religionem Catholicam ornatam esse à Deo evidentibus veritatis argumentis, ac proinde quemcumque hominem, qui illa veritatis argumenta penetraverit, evidenter cognoscere, Christianam Religionem esse veram, id est, Deum habere authorem.

CCCLXXVII Confirmatur, & explicatur. Vera Religio est in mundo ab hominibus invenibilis: ergo est certo agnoscibilis, & discernibilis inter omnes; cum homines inveni-

re eam nequeant, nisi agnoscendo & discernendo. Antecedens constat ex dictis. Quia alioquin Deus impossibilia hominibus præciperet, dum eis præcipit, ut quærant veram Religionem, sine qua impossibile est salutem æternam obtinere. Præterea antecedens illud à nemine eorum negatur, qui aliquam Religionem tenent: nam cum unusquisque suam veram putet, necesse est ut putet, à se inventam esse veram Religionem, nempe suam. Vel ergo vera Religio æquari à falsa potest in fundamentis suæ veritatis, vel non potest? Si secundum: ergo excessus in fundamentis erit infallibile signum veritatis; ac proinde evidens erit, esse veram illam Religionem, quæ præ reliquis est credibilis, & majoribus illustrata est veritatis indiciis. Si autem vera Religio æquari à falsa potest in fundamentis veritatis, impossibile erit inter utramque discernere; cum utraque sit æque fundata, & æque credibilis; ac proinde impossibile erit, veram Religionem invenire, ita ut animus in ea quiescat; & sibi sine formidine persuadeat, se veram Religionem tenere.

CCCLXXVIII Ulterius. Vel excessus fundamentorū est certo & evidenter agnoscibilis,

lis, & tunc obtinui: vel est tantum opinabilis, & tunc opinari quidem de Religione potero, invenire autem non potero. Denique vel evidentia credibilitatis est certa nota veritatis; & tunc intentum obtinui, videlicet, Religionem Christianam esse evidenter veram, cum juxta omnes Doctores Catholicos sit evidenter credibilis: vel evidentia credibilitatis non est certa nota veritatis, sed fallibilis & indifferens, & solum putabilis; & tunc veram Religionem invenire non potero, nec certus esse, quod Deus sit author Religionis Christianæ, ejusque mysteria revelaverit; sed semper manebo dubius, & apud me dicere potero; Forſan nos feſellit Deus, dum per argumenta evidentia credibilitatis nos induxit ad amplectendam Religionem Christianam. Cum ergo hæc ſint evidenter abſurda, dicendum eſt, manifeſtum eſſe, & de rebus moraliter evidentibus, quænam inter omnes ſit vera & à Deo data Religio, quæ erat propositio quinta, cujus veritatem probandam fuſcepimus.

§. IX.

*Explicatur ex jamdictis, Fidei nostra resolutio,
facienda apud homines infideles, qui
Euangelio non credunt.*

CCCLXXIX **E**X dictis facile est, legitime
Fidei nostræ resolutionem
explicare. Si ergo Philosophus Gentilis vel
Mahumetanus à Christiano quærat: Cur
credis, Deum esse unum & trinum? Cur cre-
dis, Deum factum esse hominem? Cur credis,
Jesum Nazarenum, à Judæis crucifixum, esse
verum Deum? Respondebit: Quia Deus,
summe sapiens ac verax, qui nec fallere, nec
falli potest, has veritates mundo revelavit. Si
autem ulterius quærat: Cur credis, Deum has
veritates mundo revelasse? Respondeat, ne-
gando suppositum, & dicat; se non credere,
seu Fide solum obscura cognoscere, Deum
has veritates revelasse; sed se hoc scire, seu per
evidentia argumenta cognoscere. Si autem
ulterius quærat: Unde scis, Deum has verita-
tes mundo revelasse? Respondeat: Quia evi-
dens est, Deum aliquam Religionem veram
in mundo habere, in qua & per quam homi-
nes

nes salvari possint: & evidens est, hanc non posse esse aliam, quam Religionem Christianam Catholicam Romanam; quia sola hæc est à Deo illustrata evidentibus veritatis notis, & manifestissimis credibilitatis argumentis; & evidens est, Deum non potuisse Religionem falsam tot ac tantis veritatis signis & credibilitatis argumentis exornare. Et hic exponat credibilitatis argumenta, quæ toto hoc Tractatu sunt adducta, & breviter proposita ad finem libri primi conv. Mahum.

CCCLXXX Vel respondeat: Certus sum, Deum revelasse mysterium Trinitatis, & Incarnationis, & Divinitatis Christi; quia evidens mihi est evidentia facti, Christum Dominum has veritates docuisse, & per Apostolos mundo persuasisse: Christus autem evidenter probavit suam divinitatem, ut constat ex iis quæ dixi toto l. i Manud. ad conv. Mahumetanorum, in quo sensibilibus argumentis manifeste probavi divinitatem Christi, & ostendi Religionem Christianam esse evidenter credibilem: unde quæcumque Christus revelavit mundo, Deus revelavit. Rursus, quod Christus sit Deus, manifestis probatur argumentis; quia evidens est evi-
dencia

dentia facti, Christum Dominum palam dixisse Judæis, se esse Filium Dei naturalem verumque Deum, & ob hanc causam à Judæis crucifixum esse: & evidens mihi est, evidentiâ facti & per historias fide dignas, quibus innumeri viri sapientissimi & sanctissimi fidem certissimam adhibuerunt, & per effectus manifestos, qui rem ita se habuisse manifeste comprobant; Christum Jesum, in confirmationem illius doctrinæ de sua Divinitate, evidentiâ miracula patrasse, mortuos suscitando, cæcos illuminando, paralyticos sanando, & alia opera miranda supra omnes naturæ vires operando; & Deum, illum tertia die à mortuis suscitasse, & ipsum redivivum Apostolis aliisque personis apparuisse, & post quadraginta dies coram magna multitudine virorum ac mulierum è monte Oliveti ad cælos ascendisse; & Apostolos per totum orbem dispersos Christi divinitatem mundo persuasisse; & resurrectionem atque ejus in cælos ascensionem, ut oculares testes, testificatos fuisse; & in hujus fidei defensionem ipsos & innumerabiles Martyres, omnis ætatis & sexus, alacriter & constanter sanguinem fudisse; & sapientissimos ac doctis-

simos Doctores omni seculo hanc doctrinam constanter defendisse, & pro ea defendenda innumeros labores alacriter sustinuisse. Evidens quoque mihi est evidentia facti, & per historias, quæ adhuc in genere narrationis humanæ summam auctoritatem habent; hanc Fidem professos fuisse viros ac feminas sanctissimas, quos Deus manifestis illustravit miraculis; & manifestum est, nec fidem falsam posse veram sanctitatem generare; nec providentiæ Dei congruum esse, ut miraculis illustret falsæ Fidei professores.

CCCLXXXI Vel denique respondeat: Certus sum, Deum esse authorem Religionis Christianæ, quia manifestum mihi est, hanc Fidem non aliter, quam virtute divina potuisse per totum mundum defendi, contra tot Imperatorum & Principum potentiam & tyrannidem. Quia cum Religio Christiana proponat credenda mysteria difficillima, qualia sunt divinitas hominis crucifixi, ejus realis præsentia sub exigua panis particula, & identitas ejusdem naturæ cum personis distinctis; & cum præcepta atque consilia, carni & sanguini contraria contineat; & nihil de præsentis suis cultoribus promittat, sed
omnia

omnia in futurum releryet ; incredibile est , mundum , res humanitus tam incredibiles , tam firmiter credidisse , nisi ad hoc credendum evidentia miraculorum induceretur , vel potentia divina & singulari gratia moveretur. Unde merito S. Thomas, I contra gent. c. 6 dicebat: *Hanc tam mirabilem mundi conversionem ad Fidem Christianam , indicium certissimum esse præteritorum signorum , ut ca- ulterius iterare necesse non sit , cum in suo effe- ctu appareant evidenter .* *Esset autem , inquit , omnibus signis mirabilius , si ad credendum tam ardua , & ad operandum tam difficilia , & ad sperandum tam alia , mundus absque mirabilibus signis inductus fuisset , à simplicibus & ignobi- libus hominibus.* Et hic repetendum est acutis- simum illud dilemma D. Augustini , à nobis propositum I parte Manud. nunc citatæ l. I c. 3 n. 85. Quia vel Apostoli , mundo prædi- cantes , hominem crucifixum esse Deum , & à mortuis resurrexisse , & vivum in cælos ascendisse , & totam illam doctrinam , quam ipsi prædicabant , docuisse ; hanc Fidem mun- do persuaserunt mediis signis externis & mi- raculis , vel sine externis miraculis. Si pri- mum: ergo Fides hæc vera est ; quia Deus ne-

quit miracula facere in confirmationem doctrinae falsæ, & mirabilia operari, ut secta, suæ voluntati contraria & suis perfectionibus injuriosa, in mundo prævaleat. Si secundum idem sequitur: quia hoc idem est miraculum internum, omnibus miraculis externis multo majus, & evidenter probans, sola Dei omnipotentis virtute fieri potuisse, ut res humanitus ita incredibiles, & carni & sanguini ita contrarias, mundus tam firmiter & tam constanter crediderit.

§. X.

Quomodo Fidei Christiana resolutio facienda sit, sine circulo & mutua prioritate, coram hæreticis, credentibus Evangelio & coram Catholicis.

CCCLXXXII SI hæreticus à me quærat: Cur credis, dari Purgatorium, & Christum Dominum instituisse septem Sacramenta? Respondebo: Quia Deus, summè sapiens ac verax, hoc revelavit. Si iterum roget: Unde cognoscis, id Deum revelasse? Respondebo: Quia Ecclesia Catholica Romana id semper tenuit
ac

ac credidit, atque omnibus credendum proponit. Si instet: Unde cognoscis Ecclesiam Romanam, hoc proponentem, non errorem, sed veritatem credendam proponere? Respondebo: Quia, teste Apostolo, *Ecclesia est columna & firmamentum veritatis*, id est columna firma & stabilis, quæ à veritate deflectere non potest; & sua firmitate ac stabilitate sustentat suos filios, ne à veritate aberrant, ut exponunt omnes Doctores Catholici; vel quia (ut fatetur etiam ipse Calvinus, apud Becanum in Compendio Manualis lib. 1. cap. 3. num. 17) *veritatem praconio suo celebrat, quia puram & sinceram retinet, quia ad posteros transmittit: vel quia, ut idem Calvinus dicit, veritatem tuctur ac propagat, ut à posteris in omne ævum colatur.* Si autem rursus roget: Unde scis Ecclesiam illam, quam Apostolus appellat columnam & firmamentum veritatis, esse Ecclesiam Catholicam Romanam? Respondebo: Quia ex Evangelio manifestum est, Christum Dominum supra Petrum fundasse Ecclesiam visibilem, in æternum permanсурam, ut constat ex illis verbis: *Tu es Petrus, & super hanc Petram edificabo Ecclesiam meam,*

Et porta inferi non prævalebunt adversus eam.
Et de hac Ecclesia, supra Petrum fundata, locutum fuisse Apostolum Paulum, manifestum est. Evidens autem est, Ecclesiam visibilem, supra Petrum à Christo fundatam, non esse aliam, quam Ecclesiam Catholicam Romanam; quia illa hominum congregatio sola est Ecclesia Christi, quæ eadem est, & Una, & Sancta, & Catholica, & Apostolica, & rectissime ordinata, & visibilis, hoc est in lucem hominum perpetuo constituta: hæ enim Ecclesiæ proprietates manifestè constant ex symbolis, Apostolico, Nicæno, & Constanti-nopolitano, & ex Scripturis. Atqui sola illa hominum congregatio, quæ Romano Pontifici pro tempore existenti paret, ipsumque ut verum Christi in terris Vicarium & legitimum Petri successorem agnoscit, & nulla alia, est talis: ergo sola hæc congregatio, id est, sola Ecclesia Catholica Romana, est vera Christi Ecclesia. Ad hanc autem Minorem persuadendam, suppetunt Doctori Catholico evidentia argumenta, ut demonstrant P. Valentia tom. 3 disp. 1 q. 1 punct. 7 à §. 21, Bellarminus, de notis Ecclesiæ, & alii: & nos in toto hoc opusculo id ostendimus manifestis.

stis argumentis. Evidens enim est, solam Ecclesiam Romanam posse per continuatam seriem Pastorum probare, se ab Apostolis fundatam esse: quia evidens est, evidentiâ facti, Alexandrum VIII, successisse Innocentio XI; Innocentium XI, Clementi X; Clementem X, Clementi IX; Clementem IX, Alexandro VII; Alexandrum VII, Innocentio X; Innocentium X, Urbano VIII; & sic ascendendo perveniemus ad D. Petrum, à quo usque ad Alexandrum VIII, utrumque includendo, quadraginta quinque supra ducentos numerantur summi Pontifices, secundum communiorum calculum. Et manifestum est, in sola Ecclesia Catholica Romana reperiri notas, signa, & argumenta, quæ probent, ipsam esse veram Christi Ecclesiam.

§. XI.

Alius modus id ipsum explicandi.

CCCLXXXIII **A**Lio insuper modo, sine circulo & mutua prioritate, possumus resolvere Fidem Catholicam coram hæretico; qui credens in

Y §

Christi

Christum, negaret integritatem, & incorruptionem novi Testamenti; seu qui diceret, novum Testamentum, quod in Ecclesia modo servatur, non esse omnino incorruptum, & quale ab Apostolis scriptum fuit. Interroganti ergo; Cur credis Purgatorium, & septem Sacramenta? respondebo: Quia Deus hoc revelavit. Et sciscitanti; Unde cognoscis, hoc Deum revelasse? respondebo: Quia Ecclesia hoc credendum proponit. Et iterum roganti: Unde cognoscis, Ecclesiam in hoc proponendo non errare? respondebo: Quia Ecclesia est infallibilis, ob assistentiam Spiritûs sancti, ei à Christo promissam. Et rursus instanti: Unde cognoscis, Ecclesiam hoc privilegium habere, & ei fuisse promissam à Christo assistentiam Spiritûs sancti, ne erret in iis quæ credenda proponit? Respondebo: Quia id Evangelium & Scriptura apertè testatur: nam Christus Matth. 16 apertè promisit, portas inferi non prævalituras adversus Ecclesiam, quam supra Petrum fundavit; prævaluissent autem, si Ecclesiam promovissent ad proponendum, tamquam articulum Fidei, aliquod dogma falsum: & Matth. 28 Apostolis & eorum suc-

ces-

cessoribus, Ecclesiam Christi principaliter componentibus, dixit: *Ecce ego vobiscum sum omnibus diebus usque ad consummationem sæculi*: non esset autem in Ecclesia Spiritus Christi, qui est Spiritus veritatis, si Ecclesia errare posset in iis quæ credenda proponit. Petro etiam, & in illo ejus successoribus, dixit Christus: *Rogavi pro te, Petre, ne deficiat Fides tua*: obrinuitque proinde Christus pro sua reverentia, ne à Sedē Petri deficiat unquam vera Fides; ut ita Romanus Pontifex, tamquam Petri successor, possit Fratres suos, id est, Episcopos & fideles, in Fide vera confirmare, eis ostendendo quid credere debeant. Ex iis & aliis Scripturæ testimoniis cognovi, Ecclesiam esse infallibilem in iis, quæ credenda proponit.

CCCLXXXIV Si autem amplius inquirat: Unde cognoscis, Scripturam hoc testificantem, esse scripturam Dei, ab eo scilicet dictatam; & libros unde sumuntur ejusmodi testimonia, esse Canonicos? respondebo: Quia Ecclesia Catholica, in Conciliis Generalibus congregata, catalogum librorum divinorum contexuit, & inter eos numerat Euangelia illa, in quibus continetur assisten-
tia

ia Spiritûs sancti respectu Ecclesiæ , ne tota errare possit in iis quæ credit. Hunc catalogum exhibuit Concilium Tridentinum Sessione 4 : Patres Tridentini hunc Catalogum acceperunt per traditionem ab Eugenio Papa in Concilio Florentino , ut videre est apud Bartholomæum Carranzam in Summa Conciliorum : rursus Eugenius illum accepit à Gelasio Papa in Concilio Romano , ut patet ex 2. tomo Conciliorum in Decretis Gelasii circa finem : iterum Gelasius ab August. lib. 2 de doctrina Christ. cap. 8 : Augustinus autem à Concilio Carthaginensi 3, quod alii quintum, alii sextum vocant. Denique Patres hujus Concilii ab Innocentio I Epist. 3 ad Exuperium cap. 7 : assumptus est autem Innocentius I ad summum Pontificatum anno 402. Unde ex illo tempore primitivæ Ecclesiæ ad nos usque , per continuam successionem , perseverat idem ille Scripturæ Canon , quem Ecclesia Catholica Romana tenet & amplectitur. Ab hoc Canone multos libros hæretici hujus temporis expungunt, in quos optimè quadrat, quod de Manichæis scripsit Augustinus in libro de bono perseverantiæ cap. 11. *Scripturas,*
inquit:

inquit, sic accipiunt, ut suo quodam privilegio, imo sacrilegio, quod volunt, sumant; quod nolunt, rejiciant.

§. XII.

Quomodo sine circulo authoritas Scripturæ probari possit per authoritatem Ecclesiæ, & Ecclesiæ authoritas per authoritatem Scripturæ.

CCCLXXXV **S**I autem ulterius interroget: Unde nosti, Ecclesiam Catholicam, præscribentem Catalogum librorum divinatorum, in eo designando non errasse? Hic non est recurrendum ad authoritatem invisibilem Spiritus sancti, quam habet Ecclesia Catholica, ne errare possit circa Fidem, quæ assistentia solum probatur ex Scripturis (sic enim circulum committeremus, probantes infallibilitatem Romanæ Ecclesiæ ex Scriptura, & rursus infallibilitatem Scripturæ ex infallibilitate Ecclesiæ: quem circulum supra, §. 3 hujus capituli, exprobrant Catholicis Calvinistæ apud Becanum in Compendio Manualis lib. 3. cap. 10) recurrendum itaque est ad authoritatem manifestam & visibilem Ecclesiæ, quæ in omnium oculos incurrit.

CCCLXXXVI Duplex namque est Ecclesiæ authoritas ; altera omnino invisibilis in se, & prorsus occulta ; nimirum authoritas proveniens ab infallibili assistentia Spiritus sancti, quæ assistentia nobis constat per revelationem contentam in Scriptura : altera est manifesta & visibilis ; quia in mundo est manifestum & quasi palpabile, Religionem Christianam modis mirabilibus atque divinis fuisse prius fundatam ; & per totum orbem diffusam ; mox illustratam invictis sine numero martyribus ; in ea per singula sæcula floruisse homines, admiranda sanctitate præditos, & manifestis miraculis claros ; in ea semper illustrissimos Doctores, clarissima sanctitatis & doctrinæ luce perfusos, claruisse ; ex illa prodiiisse viros Apostolicos, qui zelo & charitate ardentes per singula sæcula barbaras nationes ad Christum traxerunt, & quotidie trahant ; hanc Ecclesiam immobilem in sua Fide per tot sæcula permanuisse contra tot Imperatorum potentiam, contra tot hæreticorum persecutiones. Hæc, & alia Ecclesiæ decora ingentem illi conciliant authoritatem, & facillime clare manifestant, Ecclesiam tot notis illustrem,

lustrem, tot prærogativis ornatam, tot Martyribus, tot Confessoribus, tot Virginibus, & tot Doctoribus decoratam, esse illam Ecclesiam visibilem, quam sibi Christus conjunxit, tamquam Sponsam perpetuam, ut explicat Apostolus ad Ephes. 5. v. 31, & prædictum est ab Osea cap. 2. v. 16. *Sponsabo te mihi in sempiternum*; esse illam, quam Christus supra Petrum fundavit, & de qua dixit; *Et porta inferi non prævalebunt adversus eam*, id est, *vitia & peccata, & hæreticorum doctrina*, ut explicat Hieronymus ad illum locum: *adversus quam inferorum porta, id est, hæreticorum ora, impetum quidem facient, sed non prævalebunt*, ut inquit Damascenus in oratione de transfiguratione Domini; denique esse illam, de qua Augustinus lib. 1. de Symbolo cap. 9. dicit; *Ipsa est Ecclesia sancta, Ecclesia una, Ecclesia vera, Ecclesia Catholica, contra omnes hæreses pugnans. Oppugnari potest, expugnari non potest. Hæreses omnes de illa exierunt, tamquam samenta inutilia de vite præcisa; ipsa vero manet in radice sua, in vite sua, in charitate sua. Porta inferi non vincent eam.*

CCCLXXXVII Ad hanc ergo authoritatem

tem visibilem Ecclesiæ recurrendum est in præsentî interrogatione. Itaque ad illam interrogationem : Unde nosti, Ecclesiam Catholicam, præscribentem Catalogum librorum sacrorum, in eo designando non errasse ? respondebo : Quia Ecclesia Catholica Romana, tot prærogativis visibilibus, tot notis & insignibus fulget, ut ex illis manifeste cognoscatur, eam esse Ecclesiam illam, in qua habitat Spiritus Dei, id est, Spiritus veritatis; cui sua sensa manifestavit, & per quam vult sensibiliter hominibus loqui, eisque ostendere legitimam ad æternam felicitatem viam. Credibileque non est, Deum occultasse huic Ecclesiæ, quinam sint illi libri, quos ipse dictavit, & per quos voluit ad æternam salutem dirigi: cui enim committeret libros illos custodiendos, & fideliter usque in finem servandos, nisi Ecclesiæ illi, *quam suo sanguine acquisivit*, ut inquit Paulus Actor. 20. v. 28; quam sibi in æternum desponsavit, & quam tot dotibus & mirabilibus prærogativis decoravit ? Ergo Ecclesia Catholica est fida custos sacrorum librorum. Ergo ad illam attinet, discernere, quinam sint libri divini & à Deo dictati, & illos filiis suis
osten-

ostendere, ut ipsorum doctrina nutriantur ad vitam.

CCCLXXXVIII Confirmatur. Nam certum est, Filium Dei in terris visum esse, & cum hominibus conversatum fuisse, ut prædixerat Baruch. cap. 3. *Post hac, inquit, in terris visus est, & cum hominibus conversatus est.* Certum est, hominibus dedisse præcepta vitæ, & novam legem fundasse; & voluisse, ut Evangelium scriberetur, ut usque in finem esset forma sanctitatis. Ergo certum est, alicui hominum coetui tradidisse hoc pretiosum depositum servandum: cui autem, nisi Ecclesiæ suæ? Quænam autem esse potest Ecclesia ejus, nisi illa, quæ signis mirabilibus fulget, nempe Catholica Romana? Ergo certum est, ad Ecclesiam spectare prærogativam, conservandi purum Evangelium, aliosque libros sacros sine mixtura errorum. Ergo ex autoritate visibili & manifesta Ecclesiæ abunde probatur, eam habere auctoritatem infallibilem ad notificandum fidelibus, quinam sint libri Sacri & Canonici, qui tamquam divinitus inspirati legendi sunt.

CCCLXXXIX Ipsaque necessitas Fi-
dei

514 *Veritas Religionis Catholicæ*
dei nobis à Deo dandæ probat, Scripturas
sacras illi tamquam in deposito traditas. Au-
diamus Augustinum, hanc necessitatem Fi-
dei explicantem lib. 11. de Civit. Dei, cap. 2. &
3: *Quia ipsa mens, inquit, cui ratio & in-*
telligentia naturaliter inest, vitiis quibusdam
tenebrosis & veteribus invalida est, non solum
ad inhaerendum fruendo, verum etiam ad per-
ferendum incommutabile lumen; donec de die
in diem renovata atque sanata, fiat tanta sa-
lutis capax. Fide primum fuerat imbuenda,
atque purganda; in qua ut fidentius ambularet
ad veritatem, ipsa veritas Dei Filius, ho-
mine assumpto, non tamen consumpto, eandem
constituit atque fundavit Fidem, ut ad Deum
iter esset homini per hominem Deum: hic enim
est Dei & hominum mediator, homo Christus
Iesus. Hic prius per Prophetas, deinde per
seipsum, postea per Apostolos, quantum satis
esse iudicavit, locutus, etiam Scripturam con-
didit, quæ Canonica nominatur, eminentissi-
mæ authoritatis; cui Fidem adhibeamus de his
rebus, quas ignorare non expedit, nec per nos
ipsos nosse idonei sumus. Hæc ille. Hanc au-
tem Scripturam à se conditam, cui servan-
dam traderet Deus, nisi illi Ecclesiæ, quam
tot signis mirabilibus ornavit?

CCCLXC Sine circulo ergo cognoscimus, Ecclesiam habere authoritatem infallibilem, & assistentiam occultam Spiritus sancti, ne erret; quia Scriptura divina hoc testatur; & cognoscimus, Scripturam hoc testificantem esse divinam, quia Ecclesia visibilis, quæ prærogativis suis probat, se esse Ecclesiam Dei; declarat, tales & tales libros esse divinos.

CCCXCI Possemus etiam alia via vitare circulum, asserendo, nos scire, quod Ecclesia habeat authoritatem infallibilem, quia id Scriptura divina testatur; & interrogati; Unde scimus, Scripturam hoc dictantem esse divinam? respondebimus: Quia, nisi esset divina, tantam authoritatem non haberet omni sæculo apud omnes homines. Hanc rationem colligo ex Augustino l. 6 confessionum c. 5, dicente: *Cum essemus infirmi ad inveniendam liquida ratione veritatem, & ob hoc nobis opus esset autoritate sanctarum litterarum; jam credere cœperam, nullo modo Deum fuisse tributurum tam excellentem illi Scripturæ per omnes jam terras authoritatem, nisi & per ipsam tibi credi, & per ipsam te quæri voluisses.* Et idem Augustinus l. 1 de motibus Ecclesiæ c.

29, cum Manichæos ex quodam Euangelii loco convicisset, subjungit: *Quid hoc loco potest dicere impudentissima pertinacia? Non hoc Christum dixisse? At in Euangelio verba ista conscripta sunt. Falsum esse scriptum? Quid hoc sacrilegio magis impium reperiri potest? Quid ista voce impudentius? Quid audacius? Quid sceleratius? Simulacrorum cultores, qui Christi etiam nomen oderunt, numquam hoc adversus Scripturas illas ausi sunt dicere. Consequetur namque omnium litterarum summa perversio, & omnium, qui memoria mandati sunt, librorum abolitio; si, quod tanta populorum religione roboratum est, tanta hominum & temporum consensione firmatum, in hanc dubitationem ducitur, ut ne historia quidem vulgaris fidem possit gravitatemque obtinere.*

§. XIII.

Quomodo resolvenda sit Fides eorum, qui Christo & Apostolis prædicantibus crediderunt.

CCCXCII **H**Æc dicta sunt de resolutione fidei, prout nunc habetur à fidelibus: nam si sermo sit de actu fidei, quo audientes Christum, crediderunt, vera esse

demonstrata. Cap. ult. §. 13, & 14. § 17

esse mysteria quæ ipse prædicabat, videlicet, quod ipse esset verus DEVS & Messias in Lege promissus; ille resolvitur, tamquam in motivum credibilitatis, in miracula, quæ Christus patravit in confirmationem suæ doctrinæ: evidens enim est, vel esse doctrinam divinam, ac proinde veram, quæ confirmata est miraculis; vel saltem evidens est, posse ac debere credi ut divinam. Similiter si sermo sit de fide eorum, qui immediate audierunt Apostolos; illa revocanda est in miracula ab ipsis edita, vel in mirabilem prædicatorum sanctitatem & consonantiam cum ratione, quæ apparebat in doctrina ab ipsis prædicata, vel in aliud huiusmodi.

§. XLV.

Quomodo Fides nostra, qui miracula Christi, & Apostolorum non vidimus, possit in illa resolvi.

CCCXCHII **R**espectu autem nostri, qui miracula illa non vidimus, etiam à miraculis illis potest probari, revelatam fuisse à Deo doctrinam illam, quam Apostoli prædicarunt, v.g. Resurrectionem & Ascensionem Christi, dilemmate illo acutissimo

tissimo Augustini, l. 22 de civit. c. 5, sic arguentis: *Vel mundus credidit Resurrectionem & Ascensionem Christi per miracula Apostolorum & Prædicatorum Euangelii, vel sine ullis miraculis externis. Si primum? Ergo Deus confirmavit miraculis Resurrectionem & Ascensionem Christi; si vero Apostoli, ut eis crederetur, Resurrectionem & Ascensionem Christi prædicantibus, etiam ista miracula fecisse non creduntur; hoc vobis unum grande miraculum sufficit, quod eam orbis terrarum sine ullis miraculis credidit. Quare, juxta Augustinum, nobis pro miraculo sufficit Fides ipsa Catholicæ Ecclesiæ; ex terminis enim videtur manifestum, fieri non potuisse sine miraculo, ut tanta hominum multitudo crederet certissime rem ex natura sua incredibilem, præsertim cum talis fides tantam morum mutationem & sanctitatem attulerit.*

CCCXCIV Et quidem mihi mirabilior videtur mutatio illa, quam experimur per Fidem Catholicam, quam suscitatio mortuorum & illuminatio cæcorum; & facilius intellectu mihi apparet, hanc Fidem Ecclesiæ Romanæ introductam esse per miracula externa, quam sine ullis miraculis. Hoc enim secundum,

cundum, ut Augustinus animadvertit, licet à Deo fieri possit, difficilius tamen est, & incredibilius, quam illud primum. Unde idem Augustinus, l. 22 de civit. c. 8 agebat: Miracula necessaria fuisse, priusquam crederet mundus, ad hoc ut crederet; postquam vero mundus credidit, necessaria jam non esse miracula: nam qui adhuc prodigia, ut credat, expectat; magnum est ipse prodigium, qui mundo credente non credit. Huc etiam facit ille S. Thomæ locus, ex I contra Gent. c. 6, quem supra adduximus, §. II circa finem. Ut enim ille agebat, Hæc tam mirabilis mundi conversio ad Fidem Christianam, indicium certissimum est præteritorum signorum, ut ea ulterius iterare necesse non sit, cum in suo effectu appareant evidenter.

§. XV.

Resolutio Fidei, à nobis exposita, confirmatur
ex Patribus.

CCCXCV **P**Robatur nostra sententia, celebri alia autoritate ejusdem Augustini, qui l. de utilitate credendi, c. 14 latè agit de credibilitate nostræ fidei, & docet; Christum nihil prius, nec fortius, quam credi sibi voluisse: cum illi nondum essent idonei, cum
qui-

quibus ei res esset, ad divina percipienda secreta; docetque, Christum Dominum in eum scopum miracula fecisse, ut sibi loquenti & docenti crederetur. Et postea c. 16, paulo post initium, dicit, pertinuisse ad providentiam DEI, constituere aliquam auctoritatem, qua velut gradu certo innitentes, attollamur in Deum, & possimus credere, sine temeritate & periculo errandi. Et paulo post addit; nos duobus modis moveri ad credendum, partim sequentium multitudine; id est, tum miraculis, quæ in confirmationem Fidei facta sunt, tum multitudine populorum illam profitentium. Quod etiam repetit & confirmat in libro contra epistolam fundamenti, c. 4 his verbis: *Multa sunt, quæ justissime me tenent in Ecclesia Catholica gremio; tenet consensus populorum & gentium: tenet auctoritas, miraculis inchoata, spe nutrita, caritate aucta; vetustate firmata: tenet ab ipsa in Sede Petri Apostoli, usque ad præsentem Episcopatum successio Sacerdotum.* Idem aperte testatur ibidem c. 5, inquit: *Infirmata Catholicorum auctoritate, jam nec Evangelio credere potero, quia per eos illi credideram.* Ergo affirmat Augustinus, se ab auctoritate Ecclesiæ Catholicæ inductum fuisse ad

ad credendum, Deum esse authorem doctrinæ contentæ in Euangeliiis. Denique in libro jam citato de utilitate credendi, c. 14 circa finem, docet, Christum miraculis obtinuisse, ut sibi prædicanti, se esse Deum atque Messiam in Lege promissum, crederetur: *Quid enim agunt tanta & tam multa miracula, ipso etiam dicente, illa fieri non ob aliud, nisi ut sibi crederetur?* Et postmodum: *Ergo Christus, affe-rens medicinam, quæ corruptissimos mores sanatura esset, miraculis conciliavit authoritatem, authoritate meruit fidem, fide contraxit multitudinem, vetustate roboravit religionem.* Ex quibus manifeste constat, D. Augustinum per motum fuisse miraculis, & aliis notis credibilitatis, ut crederet, Religionem Christianam habere Deum authorem; ac proinde ut ob authoritatem Dei revelantis crederet mysteria nostræ Religionis: ergo Fides nostra resolvenda est in illa signa & argumenta.

CCCXCVI Idque etiam aperte docuit Richardus à Sancto Victore, l. 1. de Trinitate, ubi considerans evidentissima argumenta credibilitatis, quibus homines inducuntur ad credendum, Deum esse authorem illius, ac proinde ejus mysteria revelasse; exclamat;

dicens : Domine, si error est quod credimus, à te decepti sumus. Redditque rationem : Quia mysteria nostræ Fidei tam multis, tam magnis, tam miris prodigiis divinitus sunt confirmata, ut genus videatur esse dementia, vel aliquantulum dubitare. Ergo gravissimus iste Pater reducit assensum, quo credimus, Deum esse authorem Religionis Christianæ, ac proinde ejus mysteria revelasse, ad signa & motiva credibilitatis: ergo his, tamquam motivo intrinseco, innititur assensus revelationis.

CCGXC VII Præterea suadetur nostra conclusio autoritate D. Thomæ hic q. 2 art. 9 ad 3 dicentis : Ille, qui credit, habet sufficiens inductivum ad credendum : inducitur enim autoritate divinæ doctrinæ miraculis confirmatæ; & quod plus est, interiori instinctu Dei invitantis. Unde non leviter credit, cum habeat sufficiens inductivum ad credendum. Ubi aperte loquitur, non de motivis, quæ habemus ad volendum credere (nam priusquam credamus, non inducimur autoritate divinæ doctrinæ : neque enim tunc agnoscimus illam, tamquam autoritatem & doctrinam divinam; alioqui crederemus, antequam credamus) sed de motivis, quæ habemus ad ipsum

sum actum credendi , ut optime expendit
Cardinalis Sfortia de Fide num. 64.

CCCXCVIII Denique efficaciter suade-
tur ex verbis Christi Joan. 10 , *Si mihi non
vultis credere, operibus credite* ; quibus signi-
ficat , opera sua miraculosa suamque vi-
tam esse motivum ad credendum , quod
missus à Deo ; & sua doctrina sit divina, ac
proinde credenda ob authoritatem dicentis.
Et ex verbis Christi Joannis 11. *Lazarus
mortuus est, & gaudeo propter vos, ut creda-
tis*; ex quibus constat, Christum voluisse nos
credere divinam revelationem , propter te-
stimonia & motiva , quæ suadent ejus exi-
stentiam. Idque fecerunt Samaritani Joan. 4 .
*Multi crediderunt in eum, propter verbum mu-
lieris testimonium perhibentis, Quia dixit mihi
omnia.* Ergo Samaritani ducti sunt ad creden-
dum, Christum esse Messiam , quia ob testi-
monium mulieris crediderunt , ei aperuisse
secreta cordis ; & ob hoc miraculum credi-
derunt, illum esse Messiam.



INDEX OPERIS

IN quo evidenter demonstratur, inter Christianas Religiones solam Catholicam Romanam esse veram Christi Religionem atque Ecclesiam, ac in illa sola inveniri salutem.

CAP. I. *Primum caput id probandi, quia ex Evangelio est manifestum, Christum supra Petrum fundasse Ecclesiam visibilem, usque ad finem mundi permansuram: evidens autem est, hanc non esse illam, quam Reformatam heretici appellant, utpote quæ cum Luthero & Calvino incepit; sed Catholicam Romanam, quæ continuata serie Pastorum, à D. Petro usque ad Alexandrum VIII, 245 numerat summos Pontifices.*

§ I. *Demonstratur, Christum supra Petrum fundasse Ecclesiam suam.* pag. 1

§ II. *Demonstratur, Ecclesiam supra Petrum fundatam esse visibilem.* 13

§ III. *Demonstratur, Ecclesiam visibilem, à Christo fundatam supra Petrum, numquam perivisse; sed semper in mundo extitisse, & permansuram usque ad finem mundi.* 17

• § IV. *Demonstratur ex dictis, solam Ecclesiam Catholicam Romanam, esse veram Christi*

Ec-

*Ecclesiam, non autem illam, quam Reformatam
appellant.* 34

§ V. *Præcluditur vanum hereticorum effu-
gium, afferentium suam Religionem non esse no-
vam, sed semper extitisse, licet latuerit occulta,
quousque Lutherus cæpit palam prædicare.* 56

CAP. II. *Caput secundum idem probandi,
quia cum Sæctarii fateantur, Ecclesiam Roma-
nam tribus, quatuor, vel quinque sæculis ve-
ram Ecclesiam Christi fuisse, manifeste de-
monstratur, illam postea à vera fide, quam ab
Apostolis acceperat, non defecisse per Aposta-
siam, heresim, vel schisma.* 66

CAP. III. *Tertium caput idem probandi: quia
cum sine fide impossibile sit placere Deo; si Ec-
clesia Romana à quinto vel sexto sæculo veram
Christi Fidem perdidit, ut somniant sæctarii;
evidenter inde inferitur, per mille annos nul-
lum hominem salutem obtinuisse, ac proinde
damnatos fuisse Benedictum, Malachiam, Ber-
nardum, Dominicum, Franciscum, & alios, quos
heretici ipsi Sanctos fuisse non negant; hoc au-
tem est evidenter falsum.* 78

CAP. IV. *Impugnatur effugium quorundam
Protestantium, qui cum absurdum capitis præ-
cedentis devorare non audeant, dicunt, posse*

Index Operis.

quemlibet Christianum in sua religione & fide salvari, Lutheranum, v.g. in sua; similiter Calvinistam, & Pontificium. Atque aperte demonstratur, si semel intra Ecclesiam Romanam reperitur salvatio, eam reperiri non posse in secta Lutherana vel Calviniana, nec in ulla alia negante aliquem ex articulis, quos Ecclesia Romana credendos proponit. 90

§ I. Demonstratur, evidentem esse errorem contra lumen rationis, quod unusquisque possit salvari in sua fide & religione, videlicet Mahumetanus in sua, Iudeus in sua, & Christianus in sua. 92

§ II. Ostenditur ex Apostolo, non posse ullum nunc salvari sine fide in Christum. 99

§ III. Excluditur error hereticorum assertentium, solam fidem in Christum justificare. 105

§ IV. Quanam sit fides Christi requisita in adultis ad salutem. 107

§ V. Solvitur objectio, contendens non esse necessariam fidem explicitam in Christum ad salutem; & exponitur, quomodo Deus omnibus distribuat auxilia sufficientia ad perveniendum ad hanc fidem. 112

§ VI. An Cornelius Centurio fuerit justificatus ante fidem explicitam Christi? ubi statuitur responsus negativa. 117

Index. Operis.

§ VII. Rejicitur error quorundam hareticorum nostri temporis, asserentium, posse omnes Christianorum sectas in sua fide & religione salvari, dummodo credant articulos in Symbolo Apostolorum contentos, quamvis in aliis inter se dissentiant. 127

§ VIII. Cum ad salutem requiratur fides supernaturalis & divina, haretici circa mysteria, etiam quæ vere consentiuntur, non habent nisi fidem pure humanam, ex motivo suo fallacem, sicut habent Mahumetani. 132

§ IX. In quo sensu possit esse verum, quod salvari valeant omnes, qui credunt duodecim articulos contentos in Symbolo. 144

§ X. Rejicitur ex dictis doctrina hæreticorum, distinguens inter articulos essentialia, quos omnes credere debeant; & accidentales, quos liberum sit vel admittere vel repudiare. 147

CAP. V. Sæctarii fatentes, dari in Ecclesia Romana salvationem, habent evidentem obligationem deferendi suam sectam, & transeundi ad Ecclesiam Catholicam. 151

CAP. VI. Quartum caput probandi solam Ecclesiam Catholicam Romanam esse veram Christi Ecclesiam; quia in illa sola invenitur firma credendi regula, & supremus controversa-

Index Operis.

fiarum fidei Iudex. 154

§ I. Præsupponuntur aliqua. *ibid.*

§ II. Ostenditur contra hæreticos solam Scripturam non esse normam & iudicem, ad omnes fidei controversias decidendas. 161

§ III. Primum caput probandi, solam Scripturam non esse iudicem controversiarum fidei; quia per ipsam nequit sufficienter probari, quænam sit legitima & vera Dei Scriptura. 165

§ IV. Secundum caput idem probandi, quia Scriptura nequit fungi munere Iudicis, ad definienda dubia circa ipsius sensum. 175

§ V. Caput tertium idem probandi; quia cum Littera occidat, Spiritus autem vivificet; qui solam Scripturam vult esse controversiarum Iudicem, relicto Ecclesiæ sensu, necesse est ut erroribus obvolvatur. 179

§ VI. Caput quartum idem probandi, quia cum Scriptura, quoad verum & legitimum sensum in multis locis sit obscura, nequit se sola esse Iudex omnium controversiarum fidei. 184

§ VII. Infertur ex dictis, Lutheranos & Calvinistas non posse ex Scripturis arguere. 189

§ VIII. Quintum caput idem probandi, quia multa sunt controversiæ fidei, quæ non possunt de-

Index Operis.

definiri ex Scriptura. 193

§ IX. Supponitur, ut omnino certum inter Catholicos, Concilia generalia, confirmata à Romano Pontifice, esse legitimos controversiarum fidei & morum Iudices: ubi obiter ostenditur, etiam permissio, quod Concilium generale sit supra Papam, non esse licitum appellare à sententia Pontificis ad Conciliū generale. 198

§ X. Demonstratur, Concilia generalia, confirmata à Pontifice, non posse errare in decretis fidei & morum. 205

§ XI. Ostenditur, Romanum Pontificem, etiam extra Concilium generale, & non expectato Ecclesiæ consensu, esse infallibilem controversiarum fidei Iudicem. 225

§ XII. Nequit dici, Christum reliquisse primario auctoritatem supremam in Ecclesia, ut exercendam tamen per unum, nempe per Romanum Pontificem, tamquam per Ministrum Ecclesiæ & Vicarium Concilii. 249

§ XIII. Continuitur materia præcedens. Ubi exponitur, quomodo, etiam in sententia Doctorum, asserentium Concilium generale non posse, etiam ut distinctum à Papa, secundum se totum errare; nihilominus sit necessaria confirmatio Pontificis, ut ejus decreta obligent to-

tam Ecclesiam, & rem faciant de fide certam. 255

§ XIV. Ex eo, quod decreta Concilii sint infallibilia pro priori ad confirmationem Pontificis, minime sequitur, hunc subjacere Concilio, aut posse ipsius iudicium ab illo reformari. 262

§ XV. Ostenditur, non esse expectandum Ecclesiae consensum, ut definitio Pontificis Romani sit infallibilis. 265

§ XVI. Certum est, regimen à Christo institutum in Ecclesia sua esse monarchicum: inde necessario inferitur, Romanum Pontificem, ut supremum Ecclesiae Monarcham, esse supremum controversiarum fidei Iudicem, ejusque proinde iudicium esse irreformabile à Concilio. 277

§ XVII. Solvitur objectio, contendens iudicium Romani Pontificis in controversiis fidei posse reformari à Concilio generali, quamvis ille sit Monarcha spiritualis. 282

CAP. VII. Quintum caput idem probandi, quia evidens est evidentia facti, per singula secula floruisse in Ecclesia Romana viros & feminas sanctitate & miraculis illustres; certum autem est, veram sanctitatem & gloriam miraculorum solum in professoribus verae fidei reperiri; nec Deum umquam tribuisse haeresiar-
chis

Index Operis.

*chis & eorum sectatoribus potestatem patranda
vera miracula, quibus auctoritatem sibi conci-
liarent ad persuadenda sua dogmata.* 292

CAP. VIII. Sextum caput idem probandi :
*quia insignis sanctitas & gloria miraculorum,
qua in Ecclesia Catholica Romana floruerunt
multi viri, & feminae, postquam Lutherus &
Calvinus ab illa secessere; cum interim duo isti
Ecclesiae reformatae, vel potius deformatae au-
thores nullis virtutibus nullisque miraculis
fuerint insignes; manifeste probat veritatem
Ecclesiae Romanae, & falsitatem sectae Luthera-
nae & Calvinianae.* 302

§ I. *Eo tempore, quo Lutherus ab Ecclesia
Romana, tamquam a magistra errorum & syn-
agoga sathanae publice discessit, Deus toti orbi
Christiano per miracula S. Francisci de Paula,
in ejus canonizatione publicata, manifeste
ostendit, eam esse Ecclesiam suam sanctam.* Ibid.

§ II. *Conversio S. Ignatii eo ipso anno, quo
Lutherus declaratus est haereticus, & instituta
ab eo Religio, manifeste probat veritatem re-
ligionis Catholicae, in cujus subsidium Deus
novam hanc militiam misit.* 308.

§ III. *Catalogus Sanctorum, qui in Ecclesia
Romana floruerunt, post apostasiam Lutheri.* 314

Con-

Index Operis.

§ IV. Concluditur ex dictis, solam Ecclesiam Romanam, in qua semper fulget gloria miraculorū, esse veram Christi Ecclesiam. 316

CAP. IX. Septimum caput idem probandi: quia parallela comparatio inter Martinum Lutherum, Ecclesiae reformatae authorem, & Franciscum Xaverium, Ecclesiae Romanae propagatorem, manifeste ostendit, Ecclesiam Romanam esse veram Christi Ecclesiam; Ecclesiam vero Lutheranam & Calvinianam, & alias ex illa ortas, non esse nisi Synagogas sathanae. 318

§ I. Qui à Deo immediate missione extraordinaria mittitur ad praedicandum, debet miraculis probare, se missum à Deo. 320

§ II. Ex dictis infertur, Lutherum & Calvinum non fuisse missos à Deo, ad praedicandum sua dogmata. 323

§ III. Lutherus & Calvinus sibi per miracula auctoritatem conciliare tentarunt, sed irritò conatu. 326

§ IV. Machinatio Calvinii, ut populo persuaderet, se mortuum suscitasse: & quam confusionem inde tulerit. 328

§ V. Celebre miraculum S. Francisci Xaverii, patratum cum venerabili P. Marcello Mastrilli anno 1634. 332

Aliud

Index Operis.

§ VI. Aliud celebre miraculum, quod S. Xaverius operatus est cum P. Alexandro Philippucci Societatis Iesu anno 1656. 342

§ VII. Miraculum aliud, quod operatus est S. Xaverius cum Venerab. P. Ludovico Sanvitores, primo Marianarum Insularum Apostolo, anno 1659. 349

§ VIII. Concluditur ex his miraculis veritas Religionis Catholicæ Romanæ 354

§ IX. Quomodo argumentum, petatum à miraculis Catholicorum, & defectu miraculorum in aliis sectis, hæretici eludere tentent. Ubi exponitur, quam procul sit ab idololatria cultus imaginum. 355

CAP. X. Octavum caput idem probandi, quia incredibile & monstrosus est, quod Christus, ad reformandam suam Ecclesiam, elegerit Lutherum, Monachum apostatam, qui abjecta professione religiosa, Monialem professam sibi matrimonio copulavit, & cum ea usque ad mortem vixit; & Ioannem Calvinum, Presbyterum ambitiosum, superbia & maledicentia plenum, qui sacrilegas etiam nuptias contraxit, & de libidine præpostera accusatus, imo & sententia Iudicis damnatus est. 366

§ I. Qualis fuerit Lutherus.

Ibid.
Qualis

Index Operis.

§ II. Qualis fuerit Calvinus. 377

§ III. Ostenditur, Calvinum fuisse convi-
ctum Sodomiae, & ob eam causam stigmati-
zatum. 380

§ IV. Frustra Ludovicus Maimburgus co-
natur Calvinum ab hac infamia liberare. 384

§ V. Concluditur, ex moribus Lutheri &
Calvini manifeste demonstrari, eos non fuisse
Ecclesiae reformatores, sed deformatores, &
manifestos haesiarchas. 401

CAP. XI. Nonum caput idem probandi, quia
evidens est evidentia facti, Lutherum & Calvi-
num, & alios sectarios, qui ab Ecclesia Roma-
na in decimo sexto saeculo recesserunt, renovasse
haereses antiquas, à vera Christi Ecclesia dam-
natas, nimirum ab Ecclesia Romana intra
quinque priora saecula, quando etiam ex con-
fessione adversariorum vera erat Christi Ec-
clesia. 404

CAP. XII. Decimum caput idem probandi,
quia omnes sectarii, qui sub specioso titulo re-
formationis, fidem Ecclesiae Romanae impugna-
runt, in manifestos & crassissimos errores pro-
lapsi sunt, quos eleganter describit Bellarmi-
nus. Ubi specialiter ponderatur error de fide
speciali justificante. §. I. 409

Ex

Index Operis.

§ 11. Ex sententia Calvinii & Lutheri de fide speciali justificante, sequitur, damnatos fuisse omnes Catholicos, qui à tempore Apostolorum extiterunt in Ecclesia usque ad Lutherum. 415

CAP. XIII. Ultimum caput probandi, solam Ecclesiam Catholicam Romanam esse veram Christi Ecclesiam, quia illi soli conveniunt nota vera Ecclesia, nempe quod sit Visibilis, & conspicua, quod sit Una, Sancta, Catholica, & Apostolica. 417

§ I. Ostenditur, illam solam esse vere Visibilem. Ibid.

§ II. Ostenditur, illam solam esse vere Unam. 420

§ III. Sicuti Ecclesia Romana unitas probat ejus veritatem, ita innumera secta suborta ex heresi Lutherana & Calviniana, & contradictiones suorum authorum, probant earum falsitatem. 426

§ IV. Ostenditur, solam Ecclesiam Romanam esse Sanctam. 431

§ V. Ostenditur, solam Ecclesiam Romanam esse Catholicam, ac proinde solam illam esse veram Christi Ecclesiam. 432

§ VI. Ostenditur, solam Ecclesiam Romanam esse

Index Operis.

esse Apostolicam, ac proinde solam esse veram Christi Ecclesiam. 441

CAP. XIV. Concluditur ex dictis, quomodo se gerere debeat Missionarius Catholicus, in disputando cum haeticis, ad hoc, ut illos convincat. 444

CAP. ULT. In quo exponitur, quo modo sit explicanda analysis seu resolutio fidei Christiana atque Catholica, sine mutua prioritate & circulo. 449

§ I. Quid sit fidei resolutio, & quanta sit hujus Controversiae difficultas. ibid.

§ II. Quomodo Pater Becanus circulum vitet. 453

§ III. Ostenditur, hujus authoris discursum non satis difficultatem complanare. 455

§ IV. Statuuntur aliqua propositiones, deservientes ad explicandam resolutionem fidei, quarum prima est; Evidens esse, dari aliquam veram Religionem in mundo, & inveniri facile posse ab omni homine illam rite querente. 458

§ V. Secunda propositio: Doctrinam verae Religionis non posse humano discursu acquiri; sed divinitus esse traditam. 461

§ VI. Tertia propositio: Veram Religionem. nec

Index Operis.

nec quæri debere, nec inveniri posse per examen rerum & dogmatum, quæ tradit. 474

§ VII. *Propositio quarta: Veram Religionem querendam & inveniendam esse, per examen fundamentorum, quæ evincant, Deum esse authorem illius Religionis.* 480

§ VIII. *Propositio quinta: Manifestum esse debere, & ex rebus in mundo moraliter evidentibus, quanam ex omnibus mundi religionibus & sectis, sit vera & à Deo data Religio.* 484

§ IX. *Explicatur jam ex dictis fidei nostræ resolutio, facienda apud homines infideles, qui Euangelio non credunt.* 497

§ X. *Quomodo fidei Christianæ resolutio facienda sit, sine circulo & mutua prioritate, coram hæreticis credentibus Euangelio, & Catholicis.* 502

§ XI. *Alius modus idipsum explicandi.* 505

§ XII. *Quomodo sine circulo autoritas Scripturæ probari possit per autoritatem Ecclesiæ, & Ecclesiæ autoritas per autoritatem Scripturæ.* 509

§ XIII. *Quomodo resolvenda sit fides eorum,*

Index Operis.

rum, qui Christo & Apostolis pradicantibus crediderunt. 516

§ XIV. *Quomodo fides nostra, qui miracula Christi & Apostolorum non vidimus, possit in illa resolvi.* 517

§ XV. *Resolutio fidei, à nobis exposita, confirmatur ex Patribus.* 519

Omnia ad maiorem DEI Gloriam.



169









